









A  
D 82 i  
1750  
4

# FASTI SOCIETATIS JESU,

Res, & Personas me-  
morabiles Ejusdem Societa-  
tis per singulos anni dies re-  
præsentantes,

## Operâ, & Studiô

*REVERENDI*

P. JOANNIS DREWS,  
Societatis JESU,

Prutheno Varmiensis SS. Theolo-  
giæ Doctoris concinnati.


*Operis Postbumi*

## Pars IV.

Pragæ, Typis Univeritatis Carolo-  
Ferdinandeæ Collegii Societatis JESU  
ad S. Clementem, Annœ 1750.



✓  
PPH



# I. OCTOBRIS.

I. Nno 1579. Gregorius →  
 XIII. Altare portatile, à Paulo V. Societati concessum, sed à Concilio →

Tridentino universim sublatum, restituit Societati pro Missionibus ità, ut in eo licetè valeant sacrificium celebrare ubique gentium, modò loca, et si communia, & profana, tuta, & honesta sint; & Generalis, vel Provinciales. Præpositi, judicaverint, illo hic vel ibi utendum esse: possint quoque fidibus rite dispositis Sacramentum Eucharistiaz ibidem ministrare. *Bullar. Soc.*

2. In India, anno 1552. in eunte Octobri expeditionem suscepit, in insulam florentissimam Ceilanum, P. Manuel Morales, facta spe ipsius Regis

convertendi. Sed cùm hoc evanuisset ; totus labor impensus est excolendis præsidiariis Lusitanis , qui ibidem munita quædam loca tenebant , & navissimo cultore planè indigebant. Tribus primis concionibus bonus Pater vix alium tulit fructum , quàm dicteria , & contemptum : sed cùm nihilominus instaret , & infractus urgeret opus suum ; ea facta est animorum commotio , & mox commutatio , ut à prima luce ad profundam noctem eum distinerent , confitentes. Princeps insuper quidam arcii Lusitanæ vicinus , cum uxore , liberis , familia tota , & omni populo lustralibus aquis tinti sunt. *Bartol. hisp.*

*Asiat. lib. 3. n. 35.*

3. In Transylvaniam , anno 1579. urgente Principe Bathoreo , Stephani Regis Poloniæ fratre , ac adnitentibus Pontifice , ipsoque Stephano , expediti sunt Socii decem , quos hoc die Claudiopolim pro Collegio fundando deduxit Provincialis P. Sunnierus. Nullum prope in tota Transylvania templum erat , quod non occupâssent Ariani ,

riani, ceterique sectarii : ipse Princeps non nisi domi suæ divinis mysteriis interesse audebat. Singulari tamen DEI Providentia factum est ; ut , frustra obnitentibus heterodoxis ministris, Societas à Nobilitate licet heretica , in Provinciali conventu sit admissa , & munia sua liberè exercere permissa. *Sacchin. hist. Soc. p. 4. lib. 7. n. 119.*

*Eodem die obierunt.*

4. Romæ, annô 1572. ad vitam immortalem , & magnorum meritorum præmia transiit S. Franciscus Borgia, tertius Societatis Præpositus Generalis ; sed solemnis memoria beatissimi obitus ejus, auctoritate Apostolica translata est primô in 3. Octobr. denique in 10. mensis ejusdem.

5. Viennæ Austriæ , annô 1558. P. Theodoricus Gerardi, Belga. Ea morum sanctimonia vixit Romæ : ut vir magnus P. Martinus Olavius de eo dixerit : Multas virtutes in multis in Collegio Romano eminere ; in Theodorico nullam desiderari. Morti vicinus,

ad Theodoricum Canisium , sibi assi-  
stentem dixit : Concentum audio An-  
gelicum , charissime Canisi , comitare me ,  
concentum Angelicum audio . Ad So-  
cios præclara dixit de Vocationis præ-  
stantia , & adjecit : Si quid igitur contra  
illam diabolus injiciat , vel menti occur-  
rat ; illico abigendum non minùs , quam  
si contra fidem quid occurrat .

6. Syracusis in Sicilia , anno 1575 .  
P. Michaël Ochoia , Hispanus , dono gra-  
tuito curandi morbos insignis . Usus  
est hac gratia non solum in Hispania ,  
sed etiam Italia , & in ipsa urbe , ubi à  
P. Polanco febrim depulit . Utebatur  
autem plerumque curâ corporum ad  
curam animorum , ut mens esset sana in  
corpore sano . Multum enim authori-  
tatis illi accrevit ex hoc cœlesti dono :  
unde , & conciones , & alia Apostolica  
munia multum operabantur fructum in  
iis , apud quos versabatur .

7. Coloniæ in Germania anno 1655 .  
P. Adrianus Horn , Germanus . Manè  
repertus est extictus , cum pridiè sa-  
pus fuisset : dormienti similis , lœvâ co-

renam DEI-paræ V. gestans, ut omni nocte solebat. Pietas in illo eximia, puritas illibata, comitas ingenii, conciones DEO plenæ, gubernatio suavis, provida, nullaque annonæ caritate arctata. In exules peregrinos, qui bellico tumultu è variis ejecti provinciis affuebant, erat amantissimè liberalis, victu, veste, viatico, etiam in re domi angusta. Aliquando de hujusmodi peregrinis alendis solicitus, vocem audivit internam: ut bene speraret. Mox ad locupletem, & ægram virginem evocatus, liberali, & opportuno subsidio est adjutus. Cæterum vir tam liberælis, non minus studiosus erat religiosæ paupertatis. Unde consuetum ejus erat ad domesticos acroama: Quæſo, nè laedamus sanctam paupertatem.

## II. OCTOBRIS.

**I.** **I**nter ceteros hominum Custodes, Angelos sanctos, quos hodie veneratur Ecclesia, specialiter ille nostrum meretur amorem, & cultum, cuius protectioni, & directioni universa-

commissa est Societas : ut piè credere licet. Non esse hunc è grege Angelorum , sed præcipuis cœli principibus argumento est : quod & consilio , & robore plurimum valere illum oporteat , ut tantis , & hominum , & infernalium potestatum machinis , atque insultibus depellendis , par esse possit. Ipsi igitur honor , & amor in secula.

2. Annō 1568. Romæ primus Procuratorum à Provinciis deputatorum , conventus habitus est sub Præposito Generali S. Francisco Borgia , quovis triennio deinceps iterandus. Quamvis enim , & antē mitterentur subinde à Provinciis procuratores , qui de statu illarum , & negotiis informabant Generalem : non tamen simul ab omnibus missi , conveniebant , nec tempus convenienti determinatum erat. Munus præcipuum hujusmodi Procuratorum est duplex : disquirere , ac decernere , an sit cogenda Congregatio Generalis ? deinde informare Generalem de Statu Provinciarum. Dubitatum fuit : an Procurator eligi posset ipse Provincialis ?

cialis? responditque Borgia, non posse: sive ut minus interturbaretur Provinciarum administratio, sive ut incorruptius de necessitate cogendæ Congregationis Generalis judicaretur, dum non illi, quorum in manu administratio est, sed alii judicant. *Sacchin. hist. Soc.*

*p. 3. lib. 4. n. 117.*

3. Ad P. Franciscum Suarez hoc die, anno 1607. Paulus V. Pont. Max. insignem dedit epistolam, qua illi gratias agit pro missio ad se egregio volumine, quod scripserat pro tuenda Immunitate Ecclesiastica, à quibusdam Politicis infestata. *Multum, inquit, in eo ( libro ) diligentiae, ac doctrinae, nec minus ardoris afferendæ Catholicæ veritatis, & divinæ B. Petri tuendæ authoritatis elucet, usque adeò: ut opus universum Theologum eximium exprimat, ac pium.* *Est igitur, cur in Domino gaudeas, & gratias agas Patri lumen, à quo omne datum optimum, & omnne donum perfectum.* *Nobis autem non potuit, nisi gratissimum esse beneficium, & sale beneficium, apud Ecclesiam sanctam,*

*humilitati nostræ commissam , opportune à  
te possum , &c.* Maffeus in Vita cap. 15.

*Eodem die obierunt.*

4. In Japonia, in insula Xiqui , annō 1570. P. Cosmus Turrianus, Hispanus, magnus fidei zelator : sūnē pane , vino, lacte , & carnibus vivebat, sed cœli deliciis affluens passim habitus pro Apostolo , & amatus ut Pater. Omuræ regulum baptizavit, & moriens triginta circa Christianorum millia reliquit.

5. Nangasachi in Japonia, an. 1633. P. Benedictus Fernandez, Lusitanus, & P. Paulus Saito Japon , odiō fidei interempti sunt, prono capite pendentes in foveam. P. Paulus septem totos dies tormentum illud toleravit ; P. Benedictus paulò citius extractus fuit, ut diutius torqueri posset , sed brevi in carcere extinctus est. Stupentes affirmabant satellites ; se distinctè percepisse verba , quibus cadavera duorum illorum Patrum , cùm ad rogum deferrentur cremanda, se invicem salutabant Lusitanâ , & Japonicâ lingua , eāmque felicitatem sibi gratulabantur. 6. Le-

6. Lerenæ in Hispania , anno 1677.  
 P. Franciscus Pardus, Hispanus, ardens,  
 & indefessus in Missionibus Operarius.  
 Theologicæ Cathedræ admotus pro-  
 pter ingenii excellentiam ; nullum fecit  
 finem petendi , donec à Præposito Ge-  
 nerali impetraret relictis in perpetuum  
 scholis Apostolico muneri sese impen-  
 dere. Impendebat autem se tanta con-  
 tentione : ut nec lassitudo per iter con-  
 tracta , nec jejunia , & fames , nec mor-  
 bi graves eum arcere potuerint. Ex-  
 petebatur certatim ab Episcopis , & Ar-  
 chiepiscopis ad excolendas diæceses  
 suas. Unde funus ejus omnes urbis Ec-  
 clesiæ mæsto ære campano celebrârunt,  
 & trium Capitulorum Canonici dedu-  
 xerunt.

### III. OCTOBRIS.

I. E Boræ in Lusitania , postquam So-  
 cietati Collegium excitavit , &  
 Academiam à se institutam eidem ple-  
 nè consignavit Henricus Cardinalis Re-  
 gis frater ( postea Rex ) anno 1567.  
 Templum hodie moliri cœpit, Archie-

piscopus solemnī ritū , magnāque ce-  
remoniā templi fundamenta auspicatus  
est , urgente fabricam , & impensas .  
suppeditante Henrico . Ut verò Col-  
legium Academicum justam haberet a-  
ream , sanctimoniales sancti Salvatoris  
è regione Collegii sitas ære suo aliò .  
transtulit . Alit hoc Collegium ordi-  
nariè Socios 140 . ejus Rector est etiam  
perpetuò Rector Academiæ . *Sacchin.*  
*p. 3. hist. Soc. lib. 3. n. 212. Sotuell. in bibl.*  
*Soc.*

2. Felix fuit hic mensis an. 1564.  
duorum potentium Regum in India .  
Orientali conversione , apud populos  
*Celebes* dictos . Cùm Lusitanis navibus  
excurrerat ad illos P. Magallianes : per  
legatos enim ad Indiæ Prætorem mis-  
sus , petierant Christianæ doctrinæ ma-  
gistros . Invenit ergo Magallianes a-  
nimos paratos , imò magna contentio-  
ne baptismum flagitantes . Primus .  
Christianis adjunctus est Rex Mana-  
densis cum mille quingentis è flore suo-  
rum : reliqui dilati sunt aliquantis per.  
Contigit opportunè , ut Rex Siani , vir  
inter

inter suos justitiæ , & prudentiæ singularis laude inclytus , hospes esset apud Manadensem , qui cùm videret , audiretque , quæ de Legis Christianæ mysteriis proponebantur , & tot Procerum assensu probabantur ; non distulit suavi jugo Christi submittere colla , tinctusque fonte sacro rediit ad suos , multos in Religionis Societatem verbô , & exemplô traxit , tamque fortem se probavit athletam Christi : ut etiam regno exutus , fidus ei adhæreret . *Bart. hist. Asiat. lib. 6. n. 20. &c seq.*

3. Anno 1582. P. Baptista Elianus culturæ Maronitarum insudans , Memphim in Ægyptum est evocatus à Consule nationis Gallicanæ in illis partibus , ob spem rei bene gerendæ pro Ecclesia Catholica apud Cophtos . Adfuit hoc die , Patriarcham opportuno tempore convenit , ac referentem audiit : gentem suam reformatione quidem non egere , nec admissuram in ritibus , videbat tamen Pater : an non in fidei dogmata erroris quidpiam irrepississet . Obscuratus est Pater perlibenter , deprehensio-

henditque errores non leves, præser-  
tim ex secta Dioscoriana. Certiorem  
de omnibus fecit Pontificem Grego-  
rium XIII. ac interdum pervolvendis  
Cophtorum libris se se applicuit. *Sac-*  
*chinus hist. Soc. p. 5. lib. 2. n. 62.*

*Eodem die obierunt.*

4. Cracoviæ in Polonia, anno 1591.  
P. Stanislaus Varsevitus, Polonus, obi-  
tis ad Turcas legationibus regiis, Sena-  
toria nobilitate, & Præfectura Cancel-  
lariæ clarus, Episcopatu etiam è Rege  
oblato, sed non admisso, Romæ cum a-  
liquot è sua familia in societatem se re-  
cepit, habuitque S. Stanislaum Kostkam  
connovitium. Pro re Catholica, do-  
ctrina, concionibus, exemplo magna, &  
mira gessit. Denique in arena heroum  
serviendo peste infectis pretiosam ani-  
mam pro fratribus posuit.

5. Neapoli in Italia, anno 1588.  
Pompejus Capuanus, Italus, Novitus,  
illusterrimæ familiæ Proregum flos.  
Cùm nuptias detrectaret, submissæ sunt  
Veneris pedissequæ, quæ artibus suis ca-  
stissi-

stissimum juveni emollirent, ac subjugarent. Sed ille Sacro quodam furore plenus, prostibula in fugam conjecit. Callum induxerat genibus assidue flectendi, & orandi. Cum apud parentem urgeret, ut Societati nomen dare liceret, tanquam delirus in obscurum conclave compactus est, adhibiti que multi, etiam Religiosi, qui à proposito juvenem dimoverent, sed frustra pervicit omnia; sed illo diu frui Societati non licuit, cœlo maturam virtutem sibi vendicante.

6. Cracoviæ, anno 1662. Laurentius Chodorowicz, Polonus, Coadjutor, orationis studio, patientia, & charitate excellens. Noctu, cum medium silentium tenerent omnia, in templum se recipiebat, & erat pernoctans in oratione usque ad diluculum. Invertit aliquando lebetem aquâ plenum, eaque dextram tibiam, ac pedem perfudit, ac miserè ambussit. Sustinuit tamen omnem dolorem toto triduo, nec vulnus inspexit, nec tibialia detraxit. Triduo elapsò, cum videret rem amplius celari

celari non debere, horrore, ac stupori  
fuit ipsis medicis cruda ejus patientia,  
præsertim quando tibi alia cum cute,  
& adhærente carne detracta sunt. Ne-  
mo illum iratum, nemo aliquit laboris  
detrectantem vidit. Consumptus est  
flammis charitatis inter obsequia stre-  
nua, peste infectorum.

#### IV. OCTOBRIS.

I. **A** Nno 1568. in India Orienta-  
li, ad proferendum Christi  
regnum profectus P. Petrus Mascare-  
nia, appulit ad insulam Sanguin. Re-  
perit ibi, & Regem, & populum ad-  
modum sitientes baptismi, atque ita  
dociles: ut intra paucos dies plerique  
capaces se præbuerint fontis divini.  
Abluti cum essent, mirum in modum  
exarserunt amore erga Crucifixum  
Redemptorem, & in triumphale ipsius  
signum, Crucem. Hanc ut pro dig-  
nitate concinnarent: rex cum proceri-  
bus dies aliquot per sylvas oberrantes,  
procerissimam, speciosissimamque quæ-  
sierunt arborem, quam in Crucem for-

marent; nec passi sunt operi serviles, admoveri manus, sed sola nobilis juventus arborem dejecit, dedolavit, ac tam affabre elaboravit; ut in omnibus vicinis regnis formosior non reperiretur. Ut ad locum designatum deportaretur, reges duo (nam, & Sinai Rex aderat) subjecerunt humeros, una cum procerum primariis, ubi verò erecta fuit, omnes in genua procubuerunt, & regnante à ligno DEUM supplices adoraverunt. Pari diligentia, reverentia admotæ manus ad ædem sacram excitandam. Rex ætate jam proiectus, non erubuit securim cædendis arboribus vibrare, regina cum gyneçœ vellere herbas, & locum purgare, omnes omnia agere, ut intrà dies paucos steterit templum. *Sacchin. hist. Soc. p. 3. lib. 4. n. 265.*

2. In Brasilia, anno 1561. solemnissimus institutus est à Patre Grana Provinciali baptismus, in pago Boni JE-SU: baptizati ferè nongenti barbarorum, post laboriosam instructionem, instituta legitima conjugia, totique homi-

homines ad normam disciplinæ Christianæ formati. *Idem p. 3. lib. 5. n. 288.*

3. Septimancæ in Hispania, anno 1554. constituta domus Probationis, separata à Collegio, inopinata liberalitate viri Curialis, adeò infensi Societati; ut nec Jesuitam videre sustineret. Is erat Joannes Moschera, homo opulentus, & è primariis; qui repente, quomodo, nescitur, non solum societati est conciliatus, sed ità devinctus: ut gemina ampla domo se exuerit, illique donaverit utramque. Dicitur singularis Patris Borgiæ, Septimancæ tunc commorantis, Humilitas virum ità subegisse. *Orlandin. hist. Soc. p. 1. lib. 4. n. 79.*

*Eodem die obierunt.*

4. In insula Mariduque, anno 1625: P. Joannes de las Missas, Indus Manilanus. A Mauris, aliisque barbaris, odiō fidei nostræ furentibus, glande plumbea trajectus, & capite truncatus est. Indè furor versus in templum, sacra omnia profanata, in cadaver Patris barbaris

mo-

modis s̄evitum, ex cranio propinatum. Jam ab ipsis religiosæ vitæ rudimentis, de insigni ejus sanctimonia opinio in-  
valuit, ferturque Crucifixus, coram quo  
orabat, ipsum allocutus.

5. Vendæ in Livonia, anno 1620.  
**P.** Ertmanus Tolgsdorff, Prutenus, Var-  
miensis, operarius indefessus, & Livo-  
niae Pater, ac Apostolus appellatus ab  
Episcopo Ottone Schenking. Relicto  
Canonicatu Gutstadiensi, se cum mona-  
sterio deserto, quod Rigæ tenebat, So-  
cietati tradidit. Absolutō Cracoviæ  
tyrociniō, remissus Rigam, totus in a-  
nimarum salutem, & rei Catholicæ re-  
storationem incubuit, adolescentes è  
Prussia evocavit, emendicatis subsidiis  
educavit, instruxit, Ecclesiis præfecit.  
Erga rudes, & pauperes ea charitate,  
& subveniendi studio ferebatur: ut non  
nisi honorificentissimis eum nominibus  
vocitarent, nunc Senem Dominum,  
nunc Livoniae Patrem, & Episcopum.  
Etiam in decrepita ætate, diebus festis,  
horas antelucanas confitentibus dabat;  
indè concionabatur ad Germanos; tum  
sup-

supplicationes, atque alia Parochi munia expediebat ; & sacris operatus, dicebat ad Lothavos : quidquid erat temporis reliquum ad meridiem, iterum expiandis conscientiis tribuebat. A prandio catechismo imbuebat pueros , & rudes, deinde Vesperas decantabat, & si opus esset, infirmis operam suam impendebat, stupentibus omnibus, tantum esse virium seni : sed eas charitas sufficiebat. *Ex Tannero.*

6. Cazorlæ in Hispania, an. 1596. Dominicus de Onate, Coadjutor Hispanus. Secularis adhuc , ex frivolis quibusdam conjecturis accusatus , & damnatus , bonis omnibus spoliatus , innocens in carcerem est conjectus. Primum ibi vitæ religiosæ tyrocinium posuit vir bonus , cognitaque innocentiam dimissus , putavit mundo non esse amplius fidendum. In Societate mortem imminentem assidue animo versabat. Unde rogatus aliquando à Superiore , quid mente tractaret ? respondit : *Quod me per pedes trahant ad tumulum . Et quod severa ratio exigetur.* Noctu audire sibi visus

visus has Angeli sui voces : *Vita brevis est, labor exiguis, præmium grande. Præpara te ad reddendam rationem.* Et obiit non imparatus.

## V. OCTOBRIS.

I. **P**ater Antonius Possevinus anno 1581. caduceator inter Moschum & Regem Poloniæ Stephanum, in hujus castra, ad Plescoviam posita, pervenit, post negotium cum Moscho jam tractatum. Rex confessim accito Possevino, privatimque, & in Senatu auditis, quas afferebat à Moscho pacis conditionibus, suas & ipse protulit. Et quamvis non multò ab similes essent prioribus, quas antè proposuerat, aquiores tamen videri poterant, postquam alter jam hostis premere cœperat Moschoviam. Joannes enim Sueciæ Rex Narvam, aliasque maritimas Livoniæ arces expugnaverat. Misso igitur cum his conditionibus, sūisque literis ad Duicem Magnum interprete suo ; Possevinus interim operam, & obsequia sua, tum corporalia, tum spiritualia, curando militi Polono in

castris addixit, ratus, Religiosam charitatem, & humilitatem non dedecere Pontificium Legatum, sed reddere venerabiliorem. *Sacchin. hist. Soc. p. 5. lib.*

*1. n. 137.*

2. Annō 1631. Societati non parum splendoris accessit, per ingressum in eam prænobilis, ac eximii juvenis, Joannis Everardi Nidardi, qui ea diligentia, & felicitate ingenium literis, virtutibus animum applicuit; ut è scholis ad aulam ab Augustissimo Imperatore Ferdinando III. evocatus primùm Serenissimæ Filiaæ suæ Mariæ Annae, deinde Serenissimo Filio Leopoldo datus sit literarum, ac pietatis Magister. In Hispaniam postea iussus comitari Serenissimam Mariam, tanquam arbiter ejus conscientiæ, ità illi suam probavit prudentiam, & operam, ut expeditum in urbem cum charactere Oratoris Extraordinarii tam studiōsè commendārit Clementi IX. & X. Pontificibus: ut ab illo Episcopali dignitate, ab isto sacrâ purpurâ ex merito sit ornatus, invitus licet ac reluctans. *Soc. tuell. in bibl. Soc.*

*Eodem*

*Eodem die obierunt.*

3. Amacusæ in Japonia, an. 1583. P. Ludovicus Almeida Lusitanus. Celebrem chirurgum cùm ageret in navi Lusitana, exultus exercitiis Spiritualibus, Societatem ingressus, mirum in modum profecit in arte sua, ut nullus esset morbus, quem non sanaret facile, virtute divina. Sed in animarum cura, & zelo prædicandi Evangelium longè mirabilior fuit, laborum ac dolorum semper avidus, & insatiabilis. Et affluebat illis affatim, à Bonziis non raro quæsitus ad necem, ab idololatris piratis, & ipsis dæmonibus multoties male mulctatus, aliquando comprehensus, spoliatus, verberibus oneratus, hianti cymbo impositus, & mari alto comissus, evasit tamen. Aliàs Cangoximâ ejectus, per annum delituit in tugurio deserti litoris, solis agrestibus herbis vitam sustentans. Obiit magno cum luctu Ecclesiæ Japonicæ, quam annis 27. mirificè propagavit, & propugnavit.

4. Siracusis in Sicilia, anno 1590. P. Michaël Lætavallius, Italus, oratione,

assiduo pro animabus labore, & mortificatione sui mirabilis. Etiam morti vicinus, Viaticum sacrum sumere noluit, nisi flagellatione de more præmissa, prout morbus, & proiecta ætas permittebant. Visus est inter orandum, ad tres palmos à terra sublimis, per annos 40. quibus in Societate vixit, nullam turpem cogitationem passus. Morientem DEI-para V. cum S. Michaële aliisque Angelis invisit. Post mortem, Josephus Saladinus Antistes Syracusanus, rite inquiri jussit, in virtutes, & miracula P. Michaëlis, & juratis testimoniis firmatas tabulas misit ad Paulum V. Pont. M. supplicando pro illius Beatificatione.

5. Divione in Gallia, anno 1654. P. Nicolaus Conde, Lotharingus æquè zelosus, ac facundus, totam ferè Galliam concionando peragravit uberrimo fructu. In cubiculo nullum habebat librum præter Sacra Biblia, quæ flexis genibus legebat quotidie: admiranda tamen vi memoriaræ, abundabat omnigena eruditione, retinebatque sine scripto conciones, per plurimos annos habitas.

Le-

Legum nostrarum observantissimus, illi singulari affectu, & exercitio afficiebatur, quæ jubet, ut ea libentiū à nobis suscipiantur officia, in quibus magis exercetur humilitas, & charitas.

6. Antverpiæ in Belgio, anno 1629.  
P. Heribertus Rosweidus, Belga. Ab  
ipso tyrocinio prodidit, quam esset  
Sanctis, & Ecclesiæ præstituturus ope-  
ram. Cum enim Philosophiæ studeret,  
diebus recreationum secedentibus aliis  
ad amœniora camporum, & hortorum,  
ipse ad religiosa cœnobia se conferebat,  
& in bibliothecis obsoletos, manu scri-  
ptos Codices, præsertim de Sanctorum  
vitis, scrutabatur, & evolvebat, mate-  
riam congerens pro vastissimo opere,  
quod post P. Heriberti fata, Bollandus  
complexus est, & promovit. Edita à vi-  
ro laboriosissimo supra 20. Volumina  
in materia diversa, recenset. *Sotuell. in  
bibl. Soc.*

VI. OCTOBRIS.

I. ROME, anno 1568. feliciter finitus est Conventus Procuratorum  
Pars IV. B ex

ex singulis Provinciis deputatorum , qui  
 2. Octob. inchoatus fuerat. Omnia  
 consensu declaratum fuit : Congrega-  
 tionem Generalem non videri cogen-  
 dam. Optabat illam privato sensu Præ-  
 positus ipse Borgia ; ut in ea exonerata  
 retur munere sibi imposito : at assisten-  
 tes vetuerunt tentare aliquid , & com-  
 munis Procuratorum consensus de non  
 cogenda , fecit : ut vir sanctus , & hu-  
 millimus patienter ferret jugum officii ,  
 donec à Domino deponeretur. *Sacchin-  
 bist. Soc. p. 3. l. 4. n. 124.*

2. Panormi in Sicilia , anno. 1569.  
 occasione dramatis publicè in scenam  
 dandi à scholaribus nostris , coorta est ,  
 concussitque Collegium tempestas , ex  
 causa levissima. Cum enim drama il-  
 lud antè biduum privatim solum pro-  
 bandi gratiâ exhiberetur in templo ,  
 paucis externis cum Prorege præsen-  
 tibus , forib[us]que templi occlusis , ad-  
 fuit , & Joannes Bezerra unus è sacris  
 Quæsitoribus , pulsatisque foribus ad-  
 mitti voluit. Custos portæ , ratus vel  
 puerorum , vel alicujus de plebe petu-  
 lan-

lantiam esse , nec aperuit , nec prospexit , quis adesset . Bezerra sui contemptum interpretatus , abiit cum minis , & diris . Ubi dies hic illuxit , jámque frequens nobilitas consedisset , solus Prorex exspectaretur , adfuit iterum Bezerra fulmine armatus , vetuítque sub gravi anathemate drama in publicum dari . Cùm enim de re sacra esset , scilicet Diva Virgine , & Martyre Catharina , debere illud primum subire censuram Quæsitorum sacrorum . Quamvis verò idem drama ante annos aliquot Romæ jam datum esset cum plausu ; nè tamen crabrones acriùs irritaret Rector Collegii Paulus Achilles , detulit illud ad Bezerram , hic tradidit censoribus Theologis ; Ab his cùm nihil notatum esset inconveniens , solique ipsi in sole apparere videretur macula una , & altera ; tandem communi cessit judicio , spectator ipse interfuit , actaque tragœdia eo successu , ut quater repetita , & plausum , & lacrymas obtinuerit spectatorum . *Sacchin.* *Soc. hist.*  
*p. 3. lib. 5. n. 60.*

*Eodem die obierunt.*

3. Bazaini in India Orientali, anno  
1551. P. Melchior Consalvius, Lusitanus, Collegio Bazaini illum S. Xaverius cùm præfecisset, multùm ibi rem Christianam Apostolicō zelō auxit, multa subvertit idola. Quibus rei Christianæ progressibus irritati idololatræ obstinati, venenō propinatō mortem ipsi acceleravere.

4. Scimonofsci in Japonia, anno  
1628. Michaël Xucan, Japon Catechesis, & concionum assiduitate, & vigore, multos è suis civibus abduxit à cultu idolorum. Macai ob fidem exul, & indè redux in Japoniam, nihil omisit, quod fidei propagationi præstare potuit, inter continua yitæ discrimina. Vitam, quam in flammis volebat, terminavit in ærumnis,

5. Romæ anno 1583. Georgius Gilbetus, Anglus, Novitus. Prænobilis, & opulento genere] ortus in Anglia, ea morum concinnitate in Academiis,

miiis, & Aula regia vixit, ut nihil cul-  
tius illo haberetur. Sola Calvini secta,  
cui innutritus erat, flori huic nævum  
adsperserat, quem tamen facile illi ab-  
stesit Robertus Personius noster, ad-  
ducto ad Ecclesiam Catholicam. Ab  
eo tempore ita se totum impendit pro-  
movendæ rei Catholicæ, & juvandis  
tum Catholicis egentibus, & fluctuan-  
tibus, tum operariis Evangelicis, ut  
non solum proventus omnes bonorum  
suorum, & industrias omnes illis im-  
penderit, verum, & vestes proprias  
sibi non semel detraxerit; & relictâ  
sponsâ nobilissimâ, se in famulum ad-  
dixerit Missionariis nostris, Personio,  
& Campiano. Quo zelo, cum inter-  
necinum hæreticorum odium incurris-  
set, & toto regno quæreretur solicitissi-  
mè ad vincula: suasu Personii se re-  
cepit in Galliam, indè Romanam, ubi  
cum aliquamdiu sancto exemplō vixis-  
set in Seminario Anglicano, in supre-  
mo morbo admissus ad Societatem,  
quam pridem ardenter expetierat, vo-  
ta religiosa emisit. In morbo, cum po-

tiunculam quandam nauseabundus re-  
spueret stomachus, cùm Rector Colle-  
gii insinuâsse, ut amore Obedientiæ  
illam sumeret, alacriter hausit. Invi-  
senti autem se paulò pòst cuidam Pa-  
tri, jucundè dixit: *Proh! quanto me,*  
*Pater, delibutum gaudio offendis!* tu præmi-  
um hijus promptæ, qua mihi vim parvam  
intuli, obedientiæ, sc̄e mihi spectabilem ob-  
tulit DEI para Virgo, sed fronte quām sere-  
na, quām propitia, & suavi! Cùm tamen  
nuper eadem severa mihi apparuisset, quòd  
meo sensui paulò pertinacior adhæsissem. In-  
ter cœli delicias unum dolebat, quòd  
ignava morte in lecto, non cruenta in  
patibulo, moreretur.

## VII. OCTOBRIS

**I**N conflietu celeberrimo, & acer-  
rimo, inter Christianam, & Tur-  
cicam Classem ad Echinadas insulas com-  
misso anno 1571. etiam Societas ha-  
buit partem suam. Non pauci è So-  
ciis dispersi erant per naves Venetas,  
& Regis Catholici, qui ante certamen  
mili-

milites, & vectores ad omnem even-  
tum præparabant, & verbis opportu-  
nis, & Sacramentorum ministratiōne:  
in ipsa verò pugna Christi Crucifixi præ-  
latō signō, ad fortiter agendū pro ipsius  
gloria, incendebant animos, sauciis,  
& moribundis tum corporalia, tum spi-  
ritualia præstabant obsequia, & in ip-  
pos moribundos Turcas extendebant  
charitatem non sinè lucro, baptizatis  
quibusdam in ipso agone. Partā vi-  
ctoriā auctus est labor in curandis ani-  
mis, & corporibus sauciorum victorum,  
qui subducta in portus opportunos clas-  
se, uberem charitati Sociorum, præ-  
sertim Messanensium præbuerunt ma-  
teriam. Ex ipsa urbe quosdam è no-  
stris, Germani idiomatis peritos, in  
Siciliam mitti voluit P. Pontifex Pius  
V. ad opem Germano militi ferendam.  
*Sacchin. hist. Soc. p. lib. 7. n. 38. &c.*

2. In Hispania, anno 1561. turbæ  
graves exagitārunt Visitatorem, P. Hie-  
ronymum Natalem, sed animum in  
bona causa infractum, non labefactā-  
runt. Placentiam tendenti occurrit è

Societate laicus cum decreto Senatus regii, quō jubebatur Societas Hispanas observare leges, de non exportandis ad externa regna pecuniis, vel hominibus, sive discendi, sive docendi causā. Mox supervenit Frater alius cum literis P. Araozii, & aliorum quorundam, quibus significabant: Aulam varias ob causas Societati offensam esse. Vix ingressō Palatium, literas Regis exhibuit Prætor, quibus jubebatur intra decimum quintum diem adesse in aula. Videbatur historiæ Jobi pars quædam renovata. At sicut Jobo, ità Natali, & Societati interfuit Protector DEUS. *Sachin. hist. Soc. p. 2. lib. 5. n. 36. &c.*

3. Romæ, anno 1699. facta est Translatio sacri Corporis S. P. N. Ignatii, ex altari majori templi Domus Professæ, ad ipsius propriam Capellam insigni opere, & pretioso cultu visendam. Interfuit Eminentissimus Card. Colloredo, supposuitque unà cum Patribus nostris primariis, bajulos humeros oneri sacro. Officiantem, ut ajunt, egit A. R. P. Noster Thyrſus: in processi-

cessione decantatus Hymnus Ambrosianus, *Te DEUM*, &c. Ex liter. Rom.

*Eodem die obierunt.*

4. Toleti in Hispania, anno 1588.  
 P. Joannes Peralta, Hispanus. Quidquid agebat, contendebat, ut id faceret quam accuratissime, & exquisitissime. Silentii per omnem vitam erat custos severissimus, unde illi multum suppetebat temporis ad orandum, & laborandum. Dicebatur, illi, qui cum Peralta ageret, adhaerescere pietatem. Villaregii cum praesisset, secularium quorundam invidiam, contra quos bona Collegii defenderat, infami notam apud Superiorum aspersus, & officio exauthoratus, tacuit heroicè silentio, sed gloriiosior effulsit innocentia, calumniarum nube cœlitus dissipata.

5. Bononiæ in Italia, anno 1630.  
 P. Angelus Orimbellus, Italus, supra charitate Bononiensibus peste afflictis exhibita, eodem malo sublatu. Petierat per epistolas à Præposito Ge-

nerali copiam sibi fieri ejus obsequii,  
quod interveniente Cardinalis Spada,  
Gubernatoris Bononiesis autoritate  
non solùm obtinuit, sed dupli am-  
plissimo nosocomio excitato jussus est  
præesse. Mirum dictu, quantô gau-  
diô ibi à Medicis, chirurgisque, quan-  
tô ab ægrorum confessariis, ex variis  
religiosorum Ordinibus sit exceptus,  
pro comperta viri prudentia, & cha-  
ritate. Et respondit ipse cumulatè  
omnium votis, effecitque insuper in-  
stinctu cœlesti motus; ut urbs Bono-  
niensis publicô Decretô in Patronos le-  
gerit SS. Ignatium, & Xaverium, quo-  
rum præsentissimam opem in ea lue-  
extinguenda est experta. Ipse tamen  
post amissos in eodem obsequio Socios  
novem è Societate, opima charitatis  
victima cecidit. *Ex Tannero.*

6. Parisiis, annô 1651. P. Jaco-  
bus Sirmondus, Gallus, studiosissimus  
Antiquitatis scrutator, & illustrator.  
Præter multas Gallicas, Vaticanam bib-  
liothecam planè exhausit, non minùs  
Græci, quam Latini idiomatis peritus.

Ve-

Veteres Scriptores <sup>36</sup> recenset Sotuellus, quos Sirmondus notis doctissimis illustravit, insignibus elogiis à Card. Baronio, Jano Grutherio, & aliis doctis honoratus. Edidit præterea aliorum Opusculorum Decadem; Claudio Aquavivæ Prœposito Generali fuit ab Epistolis per annos 16. Christianissimo Regi Ludovico XIII. à sacris Confessionibus, inter assiduos labores vitam nihilominus prostravit ad annum ætatis 93. veletudine adeò vegeta, ut Jejunium Quadragesimale eodem rigore observaverit senecio, quo juvenis. *Sotuell. in bibl. Soc.*

## VIII. OCTOBRIS.

**I**VIctoriam Christianæ classis ad Echinadas insulas, anno 1571. reportatam de classe Turcica, ut ipso pugnæ die S. Pio V. Pontifici revelavit DEUS Romæ: ità eandem in Sardinia postridie manifestavit P. Antonio Boscho, viro religiosissimo. Decumbebat is Saffari, morbo lethali,

cùm ecce ingenti perfusus lètitia , in  
hæc erupit verba : O mirificam , &  
planè mirificam , qua cor meum ex-  
ultat lètitiam ! Sciscitantibus lètitiae  
causam , qui aderant Patribus ; Aga-  
mus , inquit , Domino grates de tam  
præclaro in nos beneficio . O benefici-  
um excellens ! Quærentibus rursus ,  
quodnam intelligeret beneficium , &  
susplicantibus , nè fortè vi morbi exer-  
raret mente : Magnificam reposuit ,  
victoriam consecuta est classis nostra de  
classe Turcarum . Agite in gratiarum  
actionem hymnum Eucharisticum SS.  
Ambrosii , & Augustini decantemus ;  
cœpitque præcinere Sociis alternan-  
tibus . Non fuisse vanam imaginatio-  
nem , docuit nuncius post dies aliquot  
allatus . *Sacch. bift. Soc. lib. 7. n. 100.*

2. Annô 1574. P. Everardus Mer-  
curianus Præpositus Generalis egregi-  
am dedit Instrukcionem ad Superiores  
Lusitanos de arte gubernandi secun-  
dùm Societatis spiritum . Invaluerat  
enim ibi austerior quædam regendi me-  
thodus , quâ potissimum Ludovicus Con-  
fal-

Salvius afflaverat superiores : ut minus familiares essent subditis suis, & pœnis magis, quam benignitate compellerent illos ad legum observantiam. Unde fiebat, ut plurimi fluctuarent in Religiosa vocatione, alii penitus deficerent ab illa. Admonitus de his Everardus, imprimis Provincialem constituit Emanuelem Rodericum, hominem ingenii mitioris ; deinde monita magni ponderis dedit Superioribus, quibus sibi apud subditos sincerum conciliarent amorem, & autoritatem non tremendam, sed venerandam. Dat illa *Sacchinus hist. Soc. p. 4. lib. 2. n. 85.*

3. Romæ, anno 1699. in Capella nova S. P. N. Ignatii faberrimè elaborata, altare consecravit Illustrissimus Episcopus Vices regens Urbis. Eminent in illo statua S. Patris, magnitudine grandis viri, argentea tota, in habitu Sacerdotali deaurato, gemmisque pretiosis distincto. Capella talis est, quam decuit non alibi, præterquam in medio, seu centro, & corde Romæ, poni, & orbis oculis spectari. *Ex li-  
ter. Rom.*

Eo-

*Eodem die obierunt.*

4. Nangasachi in Japonia, anno 1633. P. Joannes Acosta, Lusitanus. Per annos 29. gravissimis laboribus, ærumnisque, pro Japonum salute perfunctus, tandem comprehensus, & in scrobem è pedibus suspensus, quarto die cursum victoriæ, atque fortitudinis explevit.

5. Sassari in Sardinia, anno 1571. P. Antonius Boschus, Hispanus. Societati nomen dedit, quod crebrior in illa esset S. Synaxis usus. Post vitam in ea insigni religione actam, morti vicinus, in plausum erupit dicens: *Magnificam victoriam nostra classis consecuta est de classe Turcarum.* Quare ad agendas DEO gratias omnes invitans, Te *DEUM laudamus*, recitavit cum Sociis, ac bido post, cœlestia decantans intravit in gaudium Domini sui. Nuncius autem postea allatus de Victoria ad Echinadas insulas reportata, prædictionem firmavit.

5. Valentiæ in Hispania , anno 1579. P. Gaspar Loarte, Hispanus. Vir erat ante initam etiam Societatem doctus, ac probus, & jam tum divinis meditandis quaternas horas tribuens. Genuæ cùm esset Rector, vehementer re quapiam angebatur : sed inœrorem abstersit, ipsi spectabilis factus Christus Crucifixus, qui eum solatus dixit: *Bono animo esto : ego te pér omnem vitam non deseram.* Et promissi veritatem dulcissimè expertus est Gaspar ; Orationis tam erat amans, ut etiam æger, eo tempore, quo matutina domi persolvitur oratio, junctis, & sublatis in cœlum manibus, orationi incumberet.

## IX. OCTOBRIS.

1. IN India Orientali, anno 1547. formidabilis Acenorum Regis, Mahometani, classis improvisò Malacam appulit, Lusitanis urbem, & vitam ereptura. Classem conflabant naves 60. præter minores arma, & annonam vehentes. Excensione facta nocte intempesta, sinè mora tumultuarie

riè urbem aggrediuntur: sed vigiles, fortésque nacti præsidarios, & cives, non sinè clade rejecti sunt. Ergo in classem Lusitanorum, quæ portum tenebat, effusabile, naves octo concremârunt. Ingens urbem obruit constringatio, & luctus, sed commodum evenit, ut Sanctus Indiarum Apostolus ibi adesset, in quo uno plus solatii, & auxiliī repererunt afflicti, quàm in mille præsidiariis, ut crastinus probabit diēs, & ipsius vaticinio, precibus, ac lacrymis, gloria de hoste reportata victoria. *Bartol. in vita lib. 2. n. 29.*

2. Græcium in Stiria, annō 1573. pervenerunt Socii 12. duce Magio Provinciali, ad inchoandum Collegium, postulatu Serenissimi Archiducis Caroli, patris Ferdinandi II. Imperatoris, ad reprimendam, & extirpandam, quæ ibi nimium quantum invaderat, hæresim. Advocatos ad se mira alacritare, & gentis more, porrectâ dexterâ excipiens. Potestis, inquit, mihi credere: me desiderio desiderâsse adventum vestrum. Principio quidem,

non

non deerunt vobis difficultates; siquidem eritis, velut oves inter lupos: sed persuadeatis vobis, me fore vobis Patronum, & Patrem, & omnia. Nec liberalius locutus est, quam egit. Collegium optimè instructum auxit, ornavitque insigni Academia, ad quam confluuit numerosissima, & nobiliissima juventus Stiriae, Carinthiae, Sclavoniae, Carnioliae, Carniae, Croatiæ, &c. Denique tantis auctum est incrementis: ut jam amplius, quam centum, & quadraginta Collegiales in illo alantur. *Sachin. hist. Soc. p. 4. l. 1. n. 72. Sotuell. in bibl. Soc.*

### *Eodem die obierunt.*

3. Nangasachi in Japonia, anno 1633. P. Xystus Tocuum, & Damianus Fucaye Coadjutor, Japones, odio fidei, in scrobem capite depresso suspensi, occubuerunt, post strenuos labores conversioni civium suorum impensos.

4. Monasterii in Gallia, anno 1939. P. Balthasar Belli Gallus. Vir integerrimæ,

mæ , planè religiosæ vitæ , postquam Lugduni ante decennium strenuam navavit operam peste infectis , & victor ex ea arena feliciter evasit , iterum eandem tentavit aleam apud Monasterienses , sed brevi labore ad palmam pervenit , decimo quinto die atro carbone iactus est sublatus . *Ex Tann.*

5. Romæ , annô 1659. Wenceslaus Kolowrat , Bohemus , Scholasticus Theologus , genere , & virtute illustrissimus . Accepto nunciō de venia Societatem ingrediendi , data à Ferdinando III. Imperatore , & illustrissima matre , cui viduæ unicus erat Wenceslaus , exultabundus exclamavit : *Lætatus sum his , quæ dicta sunt mihi : in domum Domini ibimus ! Quàm dilecta tabernacula tua Domine virtutum !* Familiæ suæ charitatem omnibus , quibus licebat modis , occultare studebat ; solidæ humilitati , & perfectæ paupertati addictissimus . Cùm toto patrimonio se exueret , suggestit quispiam posse illum cum facili Superiorum venia aliquid in suos usus retinere . Exhorruit , & avertat , inquit , i- stud

stud à me Optimus DEUS, qui certè  
 providebit, ut quocunque in Collegio  
 degere me contingat, non desit mihi  
 frustum panni, quô religiosè tegar.  
 Monenti alteri, nè illustriissimæ familiæ  
 suæ oculos obsoletiore veste offenderet,  
 reposuit B. Aloysii dilemma, cùm di-  
 ceret: se vel notum esse iis, à quibus  
 videretur, vel ignotum. Ignotos nihil  
 se morari, tanquam ignotum: notis ve-  
 rò id fore non offendiculo, sed exem-  
 plo. Ægro Wenceslao illustris, & con-  
 sanguinea matrona edulii quiddam op-  
 portuni submiserat. Rejecit, ceu rem  
 nimis delicatam, dicens: Id genus dé-  
 licias, Comitem quendam à Kolowrat,  
 qui ipse jam esse desiisset, non verò pau-  
 perem religiosum decere. Cùm Socie-  
 tati longè plura dedisset, quām quæ ad  
 Fundationem Collegii requiruntur: ad-  
 duci tamen non potuit, ut Fundatoris  
 honores admitteret. Instanter petebat  
 ab amicis orari pro se, ut fieret *Magnus*  
*Sanctus*. Ceterū, quamvis nesciret se  
 Sanctum, vixit tamen, & obiit sancte.

Cor-

Corpus depositum sub tumba S. Aloysii, prope Joannem Berchmans.

## X. OCTOBRIS.

I. **F**estivitatem magni Servi DEI, S. Francisci Borgiæ, Præpositi Generalis Tertiæ, celebrat hoc die non solum Societas, sed universa Christi Ecclesia. Suspicit enim illum ut absolutissimam eximiæ Sanctitatis Ideam à Divina Providentia propositam omnis status hominibus. Habent in illo, quam imitentur Principes, curam, & amorem subditorum, Aulici fidelitatem, & pietatem, conjuges continentiam conjugalem, Adolescentes morum integritatem, Religiosi contemptum mundi, Sacerdotes cultum divinum, Prælati fugam honorum, & humilitatem, omnes denique erga DEUM, & proximum ferventissimam charitatem.

2 In India Orientali Aceni, de quibus heri, malacensis urbis expugnationem prosecuturi, militem hodie eduxerunt iterum in aciem, sed nihilo meliore fortuna. Tanta enim è bellis

cis tormentis obruti sunt globorum procellâ; ut nec appropinquare ausi, in sua se navigia recipere sint adacti. Sed quem in urbem collegerant, in civium quosdam interceptos effuderunt furorem. Naribus, & auriculis mutilatos, incisisque pedum, & manuum nervis, remiserunt in urbem, cum contumeliosa, imò sacrilega ad Præfectum epistola. Bilem movit Lusitanis Barbarorum arrogantia: sed vanæ erant finè viribus iræ, incensis navigiis, quibus hostem adorirentur. Deliberantibus tamen, quid facto opus esset: supervenit opportunè Xaverius, & sententiam rogatus finè cunctatione, respondit: Nullatenus ferendam esse illatam DEO, Regi Lusitano injuriam, eundem properè in hostem. Sed quibus navibus? subdebat Malacensis Præfектus Mellus. Vix quatuor residuæ sunt, non tam naves, quam navium cadavera; numquid has opponemus hostilibus sexaginta? Etsi mille essent, reponit Xaverius: quatuor sufficient illic debellandis, cum non unius Regis, sed

sed DEI potissimum agatur causa. His animati milites , mira alacritate con- clamare pugnam , nec dubitare de vi- catoria , spondente Xaverio. Impigri ergo accingunt se omnes , ad restau- randas , armandasque naves , fugitque ea laboris contentio : ut intrâ quinque dies parata steterit quinque navigiorum classis cum una celoce. *Bareol in Vita S. Xaver. lib. 2. n. 30.*

### *Eodem die obierunt.*

3. Oviedi in Hispania, anno 1591. P. Garcias de Alarcon , Hispanus. Adolescentulus adhuc minori fratri , & sorori author fuerat , ut Christi patien- tis amore , in mensa id , quod palato magis arrideret , dimitterent signo da- to , quod dabat ipse. Exemplò S. Bor- giæ incitatus , Societati adscribi petiit , in qua Magistrum Novitiorum , Recto- rem , Provincialem , Visitatorem , & Assistentem egit , incredibili animæ suæ , & officii curâ . Per plures annos ves- peri , nè bolum quidem admisit: sub-

noctis medium surgebat ad preces: post quas unâ horâ quiescebat, & surgebat cum ceteris ad orandum. Patribus, quos ad mortualement suum lectulum mœstos vidit, dixit: non est, quod vobis mors mea dolori sit: nunc enim plus habeo solatii, quam unquam habuerim. Mortuus comparuit Vallisoleti cuidam mortem ejus dolenti, dixitque se jam in æterna gloria cum bono DEO degere.

4. Cæsaraugustæ in Hispania, anno 1593. P. Honoratus Abella, Hispanus. Si fœminas visere necessitas cogeret, fecit id pudicissimæ plenus modestiæ, & sede una semper inter se ac fœminam vacua relicta. Fuere tamen, quæ scelus ipsi obtulerunt, sed ille vel solo vultu verecundiæ pleno procaces refutavit, nec ullius unquam graviorisnoxæ reum se agnovit.

5. Straubingæ in Germania, anno 1634. post 5. Socios in heroicæ charitatis officiis amissos, postremus contagiosa lue concidit P. Adamus Straub Germanus, multa laude ornatus, tum ob

ob virtutem religiosam , tum ob eximiam gubernandi peritiam , qua duas Residentias , & tria rexerunt Collegia. Monachii eandem mortis pretiosæ gloriam consecuti sunt Socii 13.

### XI.OCTOBRIS.

**I.C**elebrata est anno 1551. sub Julio III. Pont. Max. Sessio XII. in Concilio Tridentino , cui ex Societate interfuerunt missi à Pontifice PP. Jacobus Lainius , & Alphonsus Salmeron. Unde à Præsidibus Concilii designatum est , ut inter Theologos primi dicerent , tanquam Theologi Pontificii , Salmeronem quoque præcederet Lainius. Hic , cùm modestissimè excusasset , quòd ex Ordinatione Præsidū primus peroraret , subjunxit : Cùm in præsente materia , de Venerabili Eucharistia , non ex sensu privato , sed Sacris Literis secundūm communem sensum SS. Patrum expositis , differendum sit , nullum se Patrem , aut Doctorem allegaturum , quem non ipse totum à capite ad calcem pervolutāisset , atq; ex eo testimonia de rebus controversis collegisset.

Hæc

Hæc præfatus , duxit in altum dispu-  
tationis , produxitque ad firmandam  
sententiam suam sex circiter , ac trigin-  
ta Patres : quos omnes plenè , ac solidè  
legisse debuit secundùm protestationem  
præmissam . Ob quam doctrinæ , ac e-  
ruditionis copiam , ingeniique fœcun-  
ditatem cunctis Patribus erat propè mi-  
raculo : audiebaturque avidissimè , eti-  
amsi ad tres ferè horas produceret ser-  
monem . Accidit autem perincommo-  
dè : quòd in ea studiorum , ac aliorum  
laborum contentione versantem , febris  
quartana invaserit : ad quam depellen-  
dam , cùm secessum aliquem , ac die-  
rum aliquot vacationem peteret , non  
impetravit , malueruntque Præfides  
Concilii , ut , quo die febris acci-  
deret Lainio , conventus publicus non  
haberetur , quàm ut ejus præsentiâ , &  
sententiâ carerent . *Orlandin. hist. Soc. p.*  
*1. lib. 11. n. 36. & seqq.*

2. Annô 1667. constituit , præce-  
pitque Clemens IX. ut ab omnibus , qui  
ad Horas Canonicas tenentur , Offici-  
um de S. Ignatio Societatis JESU Fun-

datore recitaretur sub ritu duplici perpetuis temporibus, atque sub tali ritu celebrandum festum apponenteretur in Romano Breviario. *Bullar Constit.* 11. *Clement.* IX.

*Eodem die obierunt.*

3. In deserta insula Indica, anno 1555. P. Nicolaus Pasqualis, cum P. Andrea Gonzalez, & Alphonso Lopez. Ibant in Æthiopiam, juventuti, & rei Christianæ operam ibi daturi: sed navis in arena desertæ insulæ hæsit. Præcipui eorum, qui cum illis vehebantur, consensis minoribus scaphis, evaserunt: & quamvis obnixè Patres invitarent, ut secum abirent, maluerunt isti cum misera turba, fame peritura, in insula manere; ut viventibus solatio, morientibus auxilio essent. Sic postquam alii post alios fame enecti ceciderunt, occubuerunt, & ipsi alimento rum inopiâ, heroicæ charitatis victimæ.

4. Neapoli in Italia, anno 1579. P. Joannes Pedelongus, Italus. Juris pru-

prudentissimus cùm esset, videréique innocentem quempiam, contra ius, & fas, damnari ad mortem, crudeli seculo nuncium remisit. Distributis in egenos facultatibus Societatem ingressus, inter ceteras religiosas dotes, excellebat singulari promptitudine, & assiduitate pœnitentes juvandi, ita, ut antonomasticō vocabulō vocaretur, *Pater Confessarius*. Religiosè obiit mortem, cuius tempus sibi, alterique prædixerat.

5. Lomzæ in Polonia, anno 1624. Nicolaus Gruda, Coadjutor, cum Sociis quatuor heroica morte decessit in obsequio contagiosa lue afflatorum.

6. Cracoviæ in Polonia, anno 1591. P. Stanislaus Warsevicius. In Germania, quò studiorum causâ missus fuerat, Philippo Melanchthon magistro usus, hæresim aureo porrectam literarum poculō combibit. Redux in patriam puduit eum falsitatis, errati pœnituit. Brunsbergam venit, miratur locum, eumque sibi puero in somnis olim monstratum recognoscens, Societatem cognoscit, & amplectitur Romæ 24. Nov.

anno 1567. annos 37. natus. Quatuor  
indè, & viginti annos in Societate ità  
vixit, ut modestiæ, charitatis, obedi-  
entiæ, humilitatis, ardoris ad virtia de-  
bellanda, & profligandum errorem,  
exempla posteris imitanda reliquerit.  
Primus Collegio Vilnensi per annos o-  
cto præfuit. Lublinense Collegium sex-  
enniô gubernavit. Complures hæreti-  
cos è prima Poloniæ nobilitate reduxit  
in Ecclesiæ sinum. Nutantem in Suecia,  
quò missus à Gregorio XIII. fuerat,  
religionem toto quinquennio per sum-  
mum laborem sustentavit. Quo tempo-  
re Sigismundi Principis, qui postea Rex  
Poloniæ fuit, hujus nominis tertius,  
pueritiam optima disciplina, sanctissi-  
misque institutis formavit. Diem for-  
tunatum, quò vitam in Societate reli-  
giosam sequi decreverat, annuâ memo-  
riâ recolebat: *Omnia sibi bona venisse pa-*  
*riter cum illa dicens.* Annô 1590. Pro-  
eurator Provinciæ electus, Romam ve-  
nit. Reversus Cracoviam, unde mor-  
bi publicè grassantes plerosque Religio-  
sos viros abegerant, summa contentione  
flagi-

flagitavit, ut sibi liceret in eadem urbe laborantibus opem ferre. Quod dū impigrè præstat, correptus ipse morbo, charitatis præmium moriendo tulit. Eundem narrant aliquot post obitum annis, anno 1604. P. Petro Scargæ graviter ægrotanti spectandum se dedisse, auctorémque illi fuisse, ut 10. à DEO postularet annos, quos postea Scarga vixit. *Juvencius* fol. 177.

## XII. OCTOBRIS.

I. **A** Nnō 1657. Alexander VII. Pont. Max. Plenariam concessit Indulgentiam omnibus, tam Societatis personis, quàm cujuscunque alterius Ordinis, & Congregationis Regularibus, & aliis quibuslibet Ecclesiasticis, & laicis, quotiescunque in domibus Societatis Exercitia Spiritualia S. Ignatii per octidui spatum peregerint, & interea temporis verè pœnitentes, & confessi, SS. Eucharistiae Sacramentum sumpserint. *Bullar. Constit. 44. Alex. VII.*

2. Molshemii in Alsacia adolescens, opè S. Ignatii liberatus est à dæmons,

cui se tradiderat. Erat is Michaël Ludovicus, nobilis Germanus, à parentibus in Lotharingiam missus, ut Gallicam linguam in aula Ducis condisceret: At enim juvenis præter linguam, mores didicit parum sanos, inter quos ludendi consuetudo, & libido impotens illi exitio fuit. Amissis foliorum ludo pecuniis anxius, cogitabat, quomodo alias etiam à dæmone acquirere posset. Adfuit repente dæmon sub specie elegantis juvenis, promisitque argenti, quantum vellet; nec distulit promissa: tantum illico argenti obtrusit, quantū sufficeret ad ludum restaurandum. Rediit ad Socios Michaël, repetit ludum, & amissos recuperat nummos, imò collegas exhaustit suis. Placuit misero ea fortuna, nec dubitavit ad illam conservandam dæmoni se tradere, exaratâ sanguine suo syngraphâ geminâ, sub conditione vitæ in septennium proroganda. Indè in omne nefas effusus, jam denique propè aberat à fine septennii. Interim propitiô oculô respicitur à misericordia Divina; innotescit matri,

quod

quod actum fuerat; quæ, licet hæretica, cùm in Synagoga sua nihil inveniret remedii, Religiosis quibusdam filium tradidit curandum. Sed ille ab ipsis fugâ se expedivit. Captus tamen à fratre Canonicô Herbiopolensi, ducitur Molshemium, ubi S. Ignatius plurimis inclauerat miraculis, Patribusque nostris committitur. Laboratum diu, multumque, donec hoc die ad invocationem ardenter S. Ignatii adactus est dæmon, sub specie deformissimæ, ac grandis ciconiæ comparens, syngrapham reddere utramque. *Bartolus in vita S. Ign. lib. 5. n. 57.* Simile traditum supra 13. Januarii.

*Eodem die obierunt.*

3. Madriti in Hispania, anno 1600. P. Ludovicus Molina, Hispanus, magnum nomen inter Recentiores Theologos, & multis machinis impugnatum sed non eversum, decernente tandem Paulo V. anno 1606. Ut omnis doctrina Molinæ indemnus persisteret. Præ-

ter doctos in primam partem D. Thomæ Commentarios, & invictam Gratia, & Liberi arbitrii Concordiam, quæ lapis offensionis fuit, edidit Tomos 6. de jure, & justitia, tanta juris Civilis comprehensione: ut mirum omnino sit, hominem, qui in Theologicis studiis vitam consumpsit, tantam consecutum fuisse Juris scientiam. Nec minor fuit Molina religiosa virtute, quam excellentiâ doctrinæ. Etiam in proiecta ultra sexagesimum annum ætate, atque in continuo lucubrandi studio, passus non est, aliquid sibi dari ultra communem victum, & amictum. Breviario utebatur tam attrito: ut minores horæ in illo vix legi possent. Ad communia domûs munia non minus promptus provolabat, quam quivis accuratissimus tyro.

4. Ingolstadii in Germania, anno 1618. P. Jacobus Rhem, Germanus. Integra illi semper virginitas, quam custodiebat severâ oculorum modestiâ, & corporis mortificatione. DEI-paræ cultui addictissimus, instituit Sodalitatem

tem *Colloquii Mariani*, in qua juvenes de Virgine DEI para instituerent pias Collationes. In Sacello ejus Sodalitatis, cùm incessisset eum cupido noscendi, quis titulus Virginis gratissimus esset? canente choro Litanias Lauretanis didicit cœlitus à DEI Matre sibi spectabili, præ aliis placere titulum *Matris admirabilis*. Hunc ergo tertio repeti jussit. Inter sacrificandum visus est non semel sublimis à terra; & saepius absentia dixit, futura prædixit.

5. In America Mexicana, anno 1637. P. Joannes Ledesma, Americanus. Inter Theologos ita inclaruit, ut à Senatu regio, sacra inquisitione, Præfulibus, adeoque ab ipsa Hispania, Peruvia, & Sinis consuleretur, & ab ipso Professore, cùm ejusdem esset Collega in Cathedra Theologica, inter alios authores citaretur. Cùm grandævus regeret Seminarium Mexicanum, omnia ad ædem sacram pertinentia administrabat per se, altaria mundabat, & vestiebat, pavimentum verrebat, candelas etiam publicè, accendebat, &c.

abstergebat, &c. passimque se vocabat S. Gregorii ædituum. Erga Indos mirando ferebatur affectu : illos erudiebat, pascebat, & viribus totis defendebat. Cùm Mexicum eluvione aquarum vastaretur, ipse jejonus miseris Indis conquisitam annonam cymbâ advehebat ; quod charitatis officium toto triennio, vastante urbem lue, continuavit. Mortuo Clerus Metropolitanus totus, Religiosi omnes, & Senatus universus solemniter parentârunt. *Sotull. in bibl. Soc.*

### XIII. OCTOBRIS.

I. **A**nnô 1537. scripta est Venetiis sententia Vicarii Apostolici, pro S. Ignatio, qua contra omnes detractores, & falsos rumores, declaratur esse Sacerdos bonæ, ac Religiosæ vitæ, doctrinæ sanæ, & qui in civitate Venetiarum multa eximiæ probitatis exempla dederit. *Nadasi in Indice Memor.*

2. **A**nnô 1534. auspicatissimè electus est in summum Pontificem Paulus III, eodem planè anno, quô Henricus

VIII. rex Angliæ excitato schismate Angliam avulsit ab Ecclesia Romana, & fide orthodoxa; quóve Parisiis jacta sunt prima Societatis fundamenta, emissis à primis Patribus votis in monte Martyrum, festo assumptæ in cœlos Virginis DEIparæ. Nimirum emergentibus malis providit confestim Divina Bonitas opportuna remedia, & viros, qui Ecclesiæ subvenirent æquè intrepidi, ac validi, & Vicarium suum, qui sapienter, & gratiosè approbaret, firmaret, ac formaret Ordinem nascentem. Fuit Paulus magnus Instituti Societatis æstimator, sempérque illam paterno fovit affectu, & Privilegiis non paucis. *Orlandin. hist. Soc. p. i. l. i. n. 93.*

3. Annô 1584. Gregorius XIII. per Constitutionem *Exponi nobis, &c.* statuit: nulli è Societate licere deinceps ad Carthusiam secundò transire, nisi de licentia Præpositi Generalis. *Bullar. Soc.*

*Eodem die obierunt.*

4. Romæ annô 1574. P. Sebastianus Romæus, Italus. Præfuit annis unde-

viginti Romano Collegio insigni prudencia , & animi submissione ; eoque S. P. Ignatio apprimè charus. Quamvis plurimis distentus curis , non tamen exonerari volebat , sed alios ex aliis labores quærebat , dicere solitus : *Eos qui, sunt de Societate, nunquam nisi agros quiescere debere.* Unde P. Julio Mancinello post mortem visus est sub albo conopæo , in lectulo longè ornatissimo , symbolo quietis , quam post perpetuos labores consecutus est in beata æternitate.

5. Hui in Belgio , anno 1653. Magister Philippus Franciscus Pennant, Belga. Sex mensibus Paralyssi lecto affixus , usque manuum , ac pedum destitutus cum jaceret : DEIpara V. impensiùs ab eo implorata , per quietem se illi spestandam obtulit cum Filio parvulo insinu , stipantibus latera , hinc S. Francisco Xaverio , indè P. Mastrillo , didicítque ab ipsa , sanitatem sibi à Xaverio conferendam. Allatam S. Xaverii , Mastrillum sanantis , imaginem , ubi manibus paralyticis attigit , repente illas movit , & sensim convalescens , ad S. Xa-

ve-

verii festum plenè convaluit. Verum cùm id alii aliò traherent; iterum relapsus in morbum , præmissis precibus iterum ejusdem S. Xaverii imaginem affectis partibus admovit, & confestim vim , & vigorem in illis recepit. Gratus pro beneficio , semper Xaverianam illam imaginem de collo gestavit.

6. Zagrabiæ in Hungaria , anno 1621. P. Alexander Dobokay Hungar. In catalogo beneficiorum à DÉO acceptorum posuit & illud : quòd adhuc secularis post sacram Co[m]unionem audiverit in aurem dexteram illapsa sibi hæc verba : *Ingredere Societatem.* In Societate supra caput concionantis Patris Alexandri die Natali Christi Domini vidi vir nobilis splendorem quendam instar orbis lucidi. Mirum in eo fuit , quòd in diuturna , & varia gubernatione neminem acerbiùs reprehenderit ; quamvis pro tuenda disciplina religiosa gravis esset , & severus. Orationi tanto fervore intentus fuit: ut etiam sublimem à terra nonnemo viderit.

## XIV. OCTOBRIS.

**I.** Sanctus Indiarum Apostolus, Xaverius, dum totis viribus, multisque promissis urget, quantocuyus expediri à Lusitanis Malacensibus classem contra Acenos: ut maiores ficeret animos militibus, quorum non magnus erat manipulus ( centum, & octoginta in eam expeditionem designati numerabantur ) palam profitebatur: se ipsum cum classe iturum, cum non regis tantum, sed potissimum violati honoris Divini causa agatur. Et milites quidem hoc erecti promisso, jam victoriam tanquam certam canebant, non nescii, unum Xaverium adversus furentium Badagarum amplissimas copias nuper pro exercitu integro fuisse. At cives tam pertinaces obstatabant, ut minarentur ablato Xavero, se in alias oras secessuros, urbe di reptioni hostium relicta. Post multam altercationem civitati adjudicatus est Xaverius: ut civibus solatio, & praesidio esset; milites vero ad pugnam profectos, orationibus suis eminus juvaret. Sic di-

rem-

rempta lis est , & utrisque periclitantibus præstò fuit vir Sanctus. *Bartol. in Vita lib. 2. num. 30.*

*Eodem die obierunt.*

2. Tolosæ in Gallia , anno 1621. P. Guilielmus Trebosius , Gallus. Minister Collegii cùm esset , summa charitate providebat , nè quid Sociis deesset , & nè ipsi legibus deessent . Si quis legi de verrendo cubiculo non satisfecisset , ipse illud absente illo verrebat , purgamentis ad januam relictis , ut adverteret se moneri. In Missionibus longinquis , & arduis magno labore versatus est , parcissima utens refectione , verberatione sui largissima. Pro salute viri nobilis , paulò ante mortem vovit gestationem cilicii per hebdomadam cum cruenta sui flagellatione. Quod quamvis exequi , morbo impeditus , non potuerit , obtinuit tamen , quod optavit.

3. Ulyssipone in Lusitania , anno 1639. Hieronymus de Sylva Coadjutor , Lusitanus , vir eximiæ probitatis , & observantiæ disciplinæ religiosæ. Hic ipse

ipse est , qui Venerabilem Patrem Fran-  
ciscum Suarium non semel in mentis ex-  
cessu , & divino lumine illustratum vi-  
dit , atque ab eo vitâ jam functo , in  
deserto facello Eucharisticô epulô est  
refectus. Cùm enim à P. Rectori in  
itineris socium assumptus , præeunte in  
equo Rectori , ipse festo die Præsen-  
tationis DEIparæ V. divertisset ad Ora-  
torium quoddam desertum , doloréisque  
se Ven. Eucharistiâ , ut semper eo die  
confueverat , refici non posse , vidi pro-  
deuntem ad se P. Franciscum , præfe-  
rentem in læva aurata pyxidem , au-  
divitque dicentem : se illius reficiendi  
causâ divina voluntate missum , simûl-  
que promptum è pyxide divinum or-  
biculum famelico porrexit . Asscutus  
deinde Rectorem , cùm domum rediis-  
sent , accepit P. Rector epistolam à qua-  
dam Sanctimoniali S. Claræ scriptam ,  
quâ totum referebatur , quod cum Fra-  
tre Hieronymo actum esset .

## XV. OCTOBRIS.

I. FESTUM Sanctissimæ Virginis , & Ma-  
tris Theresiae admonet nos singu-  
laris

Iarisi erga illam observantiae, & cultus,  
 ob eximiam Societatis estimationem,  
 imò laudem usque ad invidiam, ut pa-  
 tet tum aliunde, tum ex libro vitæ pro-  
 priæ, quem sua manu conscripsit. In-  
 ter cetera c. 23. erumpit in DEI lau-  
 dem: *Laudatus sit Dominus; quod mihi*  
*gratiam dederit obediendi meis Confessariis,*  
*quamvis imperfæcte: qui quasi semper fu-*  
*erunt isti benedicti homines Societatis JESU,*  
*&c.* Et paulò superiùs: *Fuit propter ma-*  
*jus bonum meum, ut ego cognoscerem, &*  
*traclarem cum gente ad eò sancta, qualis est*  
*Societas JESU.* Cap. 38. scribit se vidis-  
 se in cœlo Nostros alba vexilla præfe-  
 rentes. *De aliquibus Religiosis, inquit,*  
*unius certi Ordinis, & de toto ordine simul,*  
*vidi magnas res: vidi illos in cœlo cum vexil-*  
*lis albis in manu aliquoties, & alias res simi-*  
*les magna admirationis: propter quod habeo*  
*dictum Ordinem in magna veneratione, &c.*  
*Quod per hunc Ordinem intellexerit,*  
 & indicârit Sanctam Societatem JESU  
 verbis expressis in Originali Vitæ à se  
 conscriptæ, testatur non solùm Confes-  
 sarius ejus, & Scriptor Vitæ, P. Fran-  
 cis-

ciscus Ribera, sed etiam Sanctius de Avila, Episcopus Seguntinus ipsius & ipse Confessarius. Plura videri possunt apud Lancicium Tom. 1. pag. 81. & apud Gomez in Elog. Soc. part. 1. Class. 7.

*Eodem die obierunt.*

2. Ciliæ in Styria, anno 1646. P. Paulus Cyrianus, Ungarus, inter alios 26. Socios per Provinciam Austriæ sublatos, in obsequio pestiferorum extinctus. Grassante in oppido illo peste, nec ullo comparente, qui miserorum curam in spiritualibus susciperet, eam sibi spartam ardentissimô studiô depositit. P. Paulus, Græcii tunc degens. Sed oppidanos, quibus Societas non satî cognita fuit, itâ deprehendit à se alienos: ut nec hospitio eum dignati sint, nec crustam panis, nisi ab ipsis pestiferis impetrare potuerit. Sed his non motus Pater, domum occupavit, quam pestis sublatis omnibus inquilinis, paulò antè vacuaverat, omni ad vitam tuendam subsidio destitutam, cœpítque indè vestigare ægros, ultro se in domos ingere,

rere, diu noctūque montes, & valles percurrere, concionibus, & exhortationibus tum suum institutum, tum civiū spirituale periculū inculcare: effecitq; tandem hac Apostolica contentione, ut alios de eo sensus conciperent indigenæ, & quem aversati fuerant, studiosè prenserant. Sed bonō seriū agnitō, diu illis frui non licuit, sublato paulò pōst eadem lue ipso P. Paulo. *Ex Alegambe Vitemis.*

I. In Insulis Philippinis, anno 1650. P. Franciscus Puche, Hispanus. Arduas Missioves sibi deposcebat, vestes ejus intimæ meri centones erant. Ægrum senacionem alicubi inventum, ad suum conclave deportavit, sua illum veste contexit, cibō refecit, in fide instruxit, baptismō expiavit, & paulò pōst morientem in cœlum expedivit, mirè latus hujus animæ lucrō: veste verò, qua senem contexerat, non nisi festis diebus utebatur. Accurrit aliquando manè ad Collegium nostrum, loci illius Decanus, monitus nostros de flammis, quæ è domo nostra videbantur erumpere. Facta

om-

omni diligentia nihil aliud deprehensum, quam quod eo tempore P. Franciscus inter ardentissima suspiria acriter se diverberaret.

4. Lugduni in Gallia, anno 1628. P. Ignatius Pomponius, Gallus, gloriofa morte cum Sociis 9. occubuit, qui capita sua pro peste afflitorum salute devoverant. Anno sequente non ignobiliore morte prostrati sunt unus, & virginis, in diversis locis Provinciae Lugdunensis. Extra hanc provinciam in Gallia tredecim. Feracior gloriosorum funerum, & coronarum fuit in Gallia annus 1630. quo sublati sunt unus supra viginti.

## XVI. OCTOBRIS.

**L**I Nopinatus casus ferè disturbavit expeditiōnem, quam Malacæ S. Xaverius magno labore promovebat contra Acenos Mahometanos. Jam classis navium quinque stabat in procinctu, miles non multus, sed alacer, & fortis ardebat ad prælium; effusa in portum cum præfecto civitas, calentibus votis,

&amp;

& lacrymis iter felix precabantur, Xaverius in æde DEIparæ de Monte Superos, ut secundarent, fatigabat; & jam sublatis anchoris ibant in altum, cùm repente in oculis omnium ( ô abyssum judiciorum divinorum! ) navis Præatoria scopulis impæcta, dissolvitur, & profundo sorbetur. Oritur clamor, & periclitantium, & spectantium, accurritur tñndique ad juvandos naufragos, è quibus nemo quidem periit, sed consternati omnes accusabant temeritatem suam, quod tantillis copiis expeditiōnem tantam suscepissent, utique contra voluntatem DEI, ut ipsi ex hoc eventu ariolabantur. Nec parcebant, mobilis vulgi linguae vel Præfecto urbis, vel Xaverio, jāmque sermones in seditionem ibant. Mittit ergo Præfectus Mellus hominem, qui Xaverium accersat quantocyus ad sedandum tumultum: Faciebat ille tunc rem Divinam, jāmq; ex DEO cognoverat, quid ageretur. Post sacrificium, antequam nuncius exponeret desideria Præfecti, jubet illum redire ad herum, atque monere, ut bo-

bonô esset animô, DEUM non defuturum causæ suæ. Ipse interea coram ico-  
 ne Virginis Matris prostratus, multa  
 prece, & lacrymis rem agebat nunc  
 cum Filio, nunc cum Matre, ut affi-  
 ctis propitios se præstarent. Post hæc  
 descendit ad mare, Præfectum ani-  
 mat, populum oratione opportuna de-  
 mulcet, jubébatque sperare meliora. Itur  
 ergo iterum in consilium, cives obsti-  
 natè damnant expeditionem, milites  
 videntes, Martem spirare Xaverium,  
 poscunt illam, quos firmat Xaverius lu-  
 culentô vaticiniô, de adfuturis eodem  
 die duabus navibus ante solis occasum,  
 quibus classis esset augenda. Suspensis  
 in hunc eventum animis omnium, cùm  
 horâ ante solis occubitus illæ advenis-  
 sent; incredibile est, quantâ lætitia urbem  
 impleverint, quot indè Xaverio factæ  
 sint gratulationes, applausus, amplexus.  
 Decernitur ergo iterum expeditio,  
 sed non una adhuc difficultate impedi-  
 enda, ut clariùs appareret felicem e-  
 ius exitum non civitati dissolutæ, &

per.

pervicaci , sed meritis Xaverii datum.  
*Bartol. in Vita lib. 2. num. 31. & seqq.*  
*Eodem die obierunt.*

2. In sylva Trevirensi , annô 1588 .  
 Richardus Biler , Joannes Soppius , No-  
 vitii , Germani , ab hæreticis pro eo ,  
 quo in Jesuitas feruntur odio , trucida-  
 ti. Corpora nudata feris objecta , sed  
 post dies aliquot ab ipsis illæsa reperta ,  
 licet grassantibus eo loci agminibus lu-  
 porum.

3. Duaci in Belgio , annô 1652 . P.  
 Martinus l' Hermite , Belga , orandi ,  
 & se afflictandi studiô insignis . Quam-  
 vis omnis ejus ferveret oratio , in illa  
 tamen , quam pro injuriosis in se fun-  
 debat , vel maximè exardeſcebat ignis .  
 Calumniam enim aliquam , vel aliud  
 mali à malevolis passus , illico se reci-  
 piebat in cubiculum , & prostratus ad  
 pedes Crucifixi , ardenter ingeminabat :  
*Domine dimitte illis , non enim sciunt , quid*  
*faciunt . Per viscera , per vulnera tua , nè*  
*tribuas illis hoc peccatum . Ità orantem*  
*tam liquida voluptate perfundebat DE-*  
*US , ut nihil ei jucundus esset , quām*  
*atro-*

atrocem aliquam calumniam pati. Nihil erat tam arduum, aut odio vel invidiæ obnoxium, quod à superioribus sibi commissum, citra ullum humani oculi metum obedienter non perficerit. Majoribus festis occurrentibus palam in triclinio se cædebat. Visus est aliquando Armenteræ inter jacentium sub dio militum ægrorum acervos, per diem integrum reptare ad capita singulorum, atque eos expiare, & solari.

4. Crumlovii in Bohemia, annô. 1625. P. Joannes Janus, Germanus opima charitatis victima cecidit; postquam, & miro ardore se pestiferorum curæ devovit, & ea dedit zeli sui specimina, ut cum deductum, noctu terræ mandare vellet Rector, Magistratus se interposuerit, atque clara die, insignique pompa funus deduxerit, cui viri Senatorii humeros supposuerunt, adhibitis funeralibus, & solemnni Ecclesiasticorum comitatu.

## XVII. OCTOBRIS.

I. **A**nnô 1600. gravem dedit epi-

epistolam Vallisoleti Doctor Joannes Garcia Coronel , primarius in Academia Vallisoletana Theologiae Professor, Romam ad P. Joannem Bapt. Plumbinum Procuratorem Generalem Augustinianorum , pro doctrina Molinæ de Auxiliis Gratiæ, & contra Prædeterminationes physicas. Exponit ibi disertè , quomodo ferè omnibus doctis per Hispaniam suspectæ sint, & invisa Prædeterminationes illæ ; Librum autem Molinæ audierit summis encomiis efferti. Certè : inquit , quæ contra illam ( Molinæ doctrinam ) objiciuntur , non multi ponderis sunt , & facile solvuntur. Authoritas virorum , qui contradicunt , me moveret , nisi satis animadverterem : his particulares respectus misceri , quos penetrare non est difficile , &c. *Eleuther hist. de Auxil. lib. 2. cap. 13.*

2. In Belgio Duacenum Collegium gravis involvit hæreticæ plebis tumultus anno 1578. Circa decimam diei horam cum vexillo , & tympano insana colluvies accurrit ad Collegium , atque

edictum promulgat , ut Socii omnes  
 confestim urbe excedant : Quarenni  
 Rectori : cuius imperio hæc gererent-  
 tur ? respondent : Populi . Poscenti :  
 quid causæ esset ? reponunt : sic visum  
 plebi . Atqui Magistratum adibimus ,  
 inquit Rector ; at illi : penes se auctori-  
 tatem Senatus esse ; proinde maturarent  
 egressum , aliàs ignominiosè ejiciendi .  
 Cedendum ergo fuit furentibus ; di-  
 missæ scholæ , discessum inter armatas  
 cohortes , & plaustra conviciorum , pro-  
 sequentibus magnò numerò discipu-  
 lis , & civibus honestioribus . Aqui-  
 cintum se receperunt nostri ; eō statim  
 Senatus , & Academic Thomam Sta-  
 pletonium , Theologiæ Professorem ,  
 communi nomine ablegârunt , rogan-  
 tes , nè longius abeant ; sperare enim  
 se , ubi impetus populi refederit , actu-  
 tum revocandos . Nec aliter evenit .  
 Sacchini bīs Soc. p. 4. lib. 6. no. 144.  
 Et.

Eo-

*Eodem die obierunt.*

3. Nangasachi in Japonia, an. 1637.  
 P. Marcellus Franciscus Mastrillus, Italus. Admiranda utebatur familiaritate cum S. Francisco Xaverio, à quo in extremo vitæ periculo, illustri miraculo sanatus fuit, atque iussus Indorum saluti se devovere. Vir innocentissimæ vitæ, incredibili ardens desiderio fundendi pro Christo sanguinem, multisque à DEI·para V. Sancto Eustachio, aliisq; Sanctis ornatus gratiis. In Japonico itinere, multa, & egit mira, & prædixit vera. Vix Japoniam solicite quæsitam attigerat, cùm captus à barbaris, visus est toto capite collucere, & inter orandum in carcere, conspectus in splendoribus Sanctorum, & à terra sublimis. Aquis primū infusis, & violentè exprefsis, deinde candardibus instrumentis cruciatus, in foveam demissus est, Japonico more capite deorsum verso. Cum quarto jam die adhuc esset superstes, extractus indè, gladio subjectus est; sed non nisi tertio ictu caput avulsum, ingeminanti JESUM, & MARIAM. Mox

à morte , compluribus in Europa conspectus est gloriosus, variòsque variis laborantes morbis adjuvit.

4. Granatæ in Hispania, anno 1556.  
 P. Alphonsus, seu Basilius, de Avila, Hispanus, concionator verbo, & opere potens. Conciones ejus dicebantur Tuba divina, tonitru, ignis, fulmen cœlestis ; nunquam enim ascendebat cathedram, nisi cruenta flagellatione in se excitasset flamمام charitatis. Et tamen rogatus in extremis , ut aliquid diceret pro ædificatione Sociorum, dixit : Utinam, Patres , lingua hæc, quæ Ecclesiastæ munus obiit, in culina potius fuisset lacernula ad lebetes defricandos, & abstergendos ! Iniquos quosdam Judices, qui religiosum Sacerdotem publicò suppliciō affecerant, palam die Domini-  
 co pro concione citavit ad tribunal Ju-  
 dicis vivorum , & mortuorum, ubi se-  
 quoque comparitum dixit ; futurum autem, ut, quem hic audire noluerint  
 monitorem, ibi sint habituri Fiscalem.  
 Post paucos dies religiosè decessit P. Ba-  
 silius, eadémque nocte existinctus est  
 feralis

feralis sententiæ author, quem alter quoque brevi secutus est ; familia utriusque ad stipem corrogandam redacta.

5. Callisii in Polonia , annō 1605. P. Joannes Cnapius , Polonus , sancta heroum Charitatis morte defunctus in obsequio pestiferorum , vir exquisitus in religiosa disciplina, & animarum zelo flagrans.

## XVI OCTOBRIS.

I. **U**Lyssipone in Lusitania , annō 1553. in Collegio nostro S. Antonii apertæ sunt scholæ publicæ , Rege promovente , & urbe petente. Quinque primūm Classes inferiores cum Theologia Morali patuerunt, tanto discipulorum concursu , ut in ipsa illa Theologia , quæ minus numerosa esse solet, quadringenti numerarentur Auditores. Alias classes, præter numerum , & alacritatem dissentium , egregiè ornavit excellentia Professorum, Cypriani Suarii , & Emmanuelis Alvari : quorum alter Rheticam , alter Grammaticam præclaris illustravit monumentis , quorum etiamnum fructu-

fissimus in scholis usus est. *Orland. hiſt.*  
*Soc. p. I. lib. 13. num. 53.*

2. In Japonia primam expeditionem  
 in regiam urbem Meacum suscepit an-  
 nō 1559. 8. Septemb. P. Gaspar Vil-  
 lela, sed obſtaculis, periculisque impe-  
 ditam; ut à grè hoc die Sacajum tenue-  
 rit. Jam repentinâ malaciâ in medio  
 cursu defigebant navim aërei spiritus,  
 regno suo timentes; jam horribili tem-  
 peſtate obruebant, omniāque move-  
 bant; ut vel perderent, vel averterent  
 Evangelii præcones. Fuit, quando  
 velis plenissimis volans navis repente  
 constitit immobilis. Ergo Ethnici cir-  
 cumire vectores, & stipem viritim exi-  
 gere, qua ventum emerent ab idolis  
 suis. Cùmque ad Villelam venissent,  
 contendérēntque, ut ipſe quoque sym-  
 bolam conferret, negavit ille, docens,  
 non ab alio, quām à Conditore cœli, &  
 terræ DEO sperandam, petendámque  
 opem. Illico conclamatūr: ipsum in-  
 fortunii esse causam, parūmque ab-  
 fuit, quin præceps in mare ageretur,  
 nisi DEUS opportunō ventō navim  
 sol-

solvisset. *Sacchin. hist. Soc. p. 2, lib. 3. n. 164. &c.*

*Eodem die obierunt.*

3. Goæ in India Orientali , annô 1553. P. Gaspar Barzeus, Belga, vir verè Apostolicus, S. Xaverii discipulus in prædicando Evangelio , & laborum æmulus, semper ab illo magni habitus. Laborum tantum sustinuit , quantum denis operariis non ignavis onerandis sufficeret. Mira egit pro re Christiana, præsertim in emporio Ormusiensi. Inter extrema pericula intrepidus, sentiebat se omnia posse in eo , qui imbecillitatem suam confortabat. Plura, eaque mira dat ejus vita.

5. Urgellæ in Hispania, annô 1605: P. Joannes Ricus, Hispanus, Ecclesiastes egregius ; sed cùm Majoricæ Rector , præter morem ibi concionaretur idiomate Castellano elegantiore , Alfon-sus Rodriquez , qui ejus erat Socius, audivit à DEO : *Rector tuus expiabit concionem hanc igne purgatorio.* Qua re intellecta, P. Joannes nunquam dein-

ceps eo idiomate usus est, orandi, & corpus vexandi studio assiduè intentus. Cùm pro mortuo oraret Alphonsus, vidit eum radiis undique, sed potissimum capite collucentem, & velut coronatum.

5. In America apud Hiroquæos, an. 1646. P. Isaacius Jogues, Gallus. Incredibili ardebat patiendi desiderio: unde, cùm aliquando totam noctem coram venerabili Sacramento humiliatus, peteret copiam, multa & acerba patiendi, responsum audivit: *Exaudita est oratio tua; fiet tibi, sicut à me petiisti. Confortare, & esto robustus.* Hurones ergo cùm excoleret in Nova Francia, captus ab Hiroquæis summè barbaris, admiranda passus est, avita planè veterum Martyrum fortitudine.

## XIX. OCTOBRIS.

I. **M**onasteriense in Vestphalia Collégium institutum est anno 1588. Acriter se illi opposuerunt nobiliores duo è clero, omnes nervos intendentes, ut Jesuitæ vel non admittentur, vel turpius ejicerentur. Sed in

in caput ipsorum brevi recidit ignominia. Cædis enim patratæ rei, non solum dignitate privati, sed civitate pulsi sunt. Festivius quiddam evenit hæretico ministello. Circumiacentes hæreticos non leviter urebat propinquitas Jesuitarum Monasterii receptorum. Cùm igitur minister reformati Evangelii in territorio Osnabrugensi incidisset in quosdam cives Monasterienses, non potuit sibi imperare, quin acriter illis exprobraret admissionem Jesuitarum. Illi, ut erant viri probi, & simplices, auditio Jesuitarum nomine flexo poplite, & capite aperto venerati sunt Sanctissimum JESU nomen. Quod cùm iterum, iterumque facerent, stomachari Prædicans, & vix non disrumpi; tandem aperte denunciat, nequissimum genus hominum Jesuitas, non honore, sed omni probro dignos esse; at illi tum quoque caput aperuerunt. Sic confusus, & in rabiem actus impudens rabula in fugam se conjecit, nè cumularet honores iis, quos infames volebat, *Sacchin. hist. Soc. p. 5. lib. 8. n. 88, &c.*

2. In Helvetia Lauffenum oppidum  
annô 1588. Ecclesiæ restitutum est. In-  
stituerunt Episcopus Basileensis, &  
Nuncius Apostolicus, etiam Pontificis  
interposita authoritate, ut eò de Socie-  
tate quispiam mitteretur. Missus ex  
Collegio Lucernensi zelosus, & indu-  
strius Sacerdos Jodocus Itæus, qui men-  
sis unius spatiô, ità civibus, & Prælatis  
prædictis suam probavit operam, ut  
statio illi prorogata sit in menses qua-  
tuor, & Socius laborum datus Sacerdos  
alter è nostris. Hi tam dextrè, for-  
titérque cœptum opus promoverunt,  
ut tota civitas cum pagis quinque, &  
Præfectura Zuingensi, ejecto Prædi-  
cante hæretico, & occlusâ synagogâ  
Lutheranâ, ad Ecclesiam Romanam hoc  
die ultro redierint, contestati, eam se-  
usque ad sanguinis profusionem, &  
mortem propugnaturos. *Idem ibid.* n.  
82.

*Eodem die obierunt.*

3. Bivonæ, annô 1564. P. Petrus  
Venuſtus, Italus, A. S. P. Ignatio mis-  
ſus.

sus in Siciliam , Novitios isthinc religiosè instituit, ac digna egit Apostolico viro. Inter alios Sacerdotem quendam publica scandala dantem aggressus, monuerat suaviter, fortiterque, ut offendiculo esse desineret. Qui monitoris impatiens, redeuntem ex agro Patrem Petrum à tergo invasit, ac tertio vulneratum in capite prostravit. Inventus Pater à Bivonensibus , cùm volutaretur in sanguine suo, rogatusque: num nosceret percussorem ? affirmavit, sed nunquam prodere voluit, dicens : *Sinete illum: DEUS illi ignoscat.* Simulque JESU Nomine pronunciato, exspiravit, relictâ post se magnâ sanctimoniae famâ.

4. In Lotharingia , anno 1637. P. Joannes Worthingtonus, Anglus, operarius tam extra , quam intra carcerem Apostolicus. Post aliquot annorum labores Apostolicos comprehensus , carceris molestias toleravit biennio , tanto animarum fructu, ut ipse scripserit : Tot, tamque frequentes ad expiandos animos ad me veniunt ( in carcere )

rem ) ut hebdomada qualibet in carcerre plures, quam in 6. vel 7. hebdomadis foris liber , excipiam confessiones. Denique proscriptus ex Anglia venit in Belgium, & ad Missiones castrenses applicatus, plenus dierum , & meritorum migravit ad Societatem triumphantem.

*Ex Tannero.*

5. Lovanii in Belgio , anno 1608.  
 P. Martinus Delrio, Belga. Illustri genere ortus, summisque honoribus illustris, relictis Cancellarii Brabantiae , & regii Fisci Procuratoris muneribus, Christum pauperem secutus est. Ad Societatem attulit non solum ingentem nominis famam , linguarum plurimarum peritiam, ingenium omnigena eruditione prophanarum scientiarum instructissimum ; verum etiam virum bonum ad normam Evangelii probè efformatum. In Societate repuerascens, tam humilem, docilémque se præbuit tyronem, quam eminentem , & scientiarum omnium varietate ad miraculum usque conspicuum , olim egerat Doctorem. Theologicis exultus studiis ,

diis, laureaque Doctorali ornatus, & acutissimum in speculativis, & solidissimum in sacris literis interpretandis egit Magistrum. Singularis promicabat ei in vultu candor animi, & castimoniæ, à prima adolescentia servata, nitor. Compendium vitæ ejus religiosæ dici potest humillima obedientia, & obedientissima humilitas. Scripsit, ediditque vir doctissimus complura tum ante, tum post initam Societatem: inter quæ celebrantur passim, & in judiciis adhibentur, ejus Disquisitionum Magicarum Libri 6. in Tomos 3. distin-  
cti. *Sotuell.*

7. PP. Franciscus Ronsillus, & Georgius Blanerius. Navigi præatoria, qua-  
vehebantur, vadis impacta prope Ne-  
rium Gallæciæ promontorium, triste  
naufragium fecit. Pauci ope tabula-  
rum, aut brachiorum remigio, in lit-  
tus evaserunt; plurimi vel hausti flucti-  
bus, vel rupibus illisi, & obtriti sunt.  
Inclinata sensim unum in latus carina  
malum ingentem ita demisit, ut ejus a-  
pex sederet in terra, pontemque veluti  
ster-

sterneret, quo dum utuntur è vectori-  
bus præcipui, ac terram salvi obtinent,  
sacerdotem utrumque hortantur saluti  
consulere. Illi verò facturos se nega-  
runt, donec unus restaret in navi, &  
adhuc trecenti supererant, quos dum  
peccata confitentes audiunt, decuma-  
nus repente fluctus omnes obruit anno  
1596. ejecta cadavera in facello proxi-  
mo sepulta sunt. Ronsillus in Hispania,  
Blanerius in Belgio natus erat.

## XX. OCTOBRIS.

**L**A NNÔ 1562. Jacobus Lainius  
Præpositus Generalis Societa-  
tis, præclaram habuit dissertationem  
in Concilio Tridentino, de Institutio-  
ne Episcoporum, an sit immediatè à  
DEO, ut volebant Episcopi Hispani,  
vel mediante Pontifice Romano, tan-  
quam Christi Vicario, prout sentiebant  
alii, Pontificis studiosiores. Ferve-  
bant partis utriusque studia ferè usque  
ad contentionem. Lainius extra ordi-  
nem postremus disputavit, & integrum  
tempus solus explevit. In exordio fer-  
mo-

monis commemoravit , ter se illi Synodo interfuisse sub Paulo , sub Julio & sub Pio Pontificibus ; sempérque se usum sinceritate loquendi absque fisco , & respectu , eādem etiam se usum professus est ; nullam enim sibi suppetere rationem aliter agendi , ut pote nihil aut quārenti , aut speranti , aut metuenti . Postea quæstionem ingressus , dixit : **Quatuor à se suscipi :** Quæstionis explicationem , suæ sententiæ expositionem , alienarum confutationem , & suæ comprobationem . Eam porrò tenuit ipse , latéque ac solidè propugnavit sententiam , qua in Episcopos à DEO derivatur potestas , non immediatè , sed per Christi Vicarium , Divi Petri Successorem , loquendo *de Potestate Jurisdictionis* , de qua potissimum lis erat ; *Potestatem Ordinis* eos accipere immediatè à DEO concessit . Omnia tanta vi rationum , & eloquentia deduxit , ut multi Patrum , oppositam sequi sententiam , vel aperte eam desuerint , vel mentem suam uberiùs , & accommodatè ad sensum Lainii declarárint .

rârint. *Pallavicin.* in *hist. Conc.* *Trid. lib.*  
*18. cap. 15. Sacchin.* in *hist. Soc. lib. 6. n. 85.*

*Eodem die obierunt.*

2. Badenæ in Germania, anno 1573.  
 P. Georgius Schorichius, Germanus, à  
 S. P. Ignatio Societati adscriptus, atque  
 à culinæ officiis ad literas ingenium  
 transferre jussus, in Germania profide  
 tanta gessit: ut Dux Albertus eum de-  
 legerit ad inferiorem Bavariam ad fi-  
 dem Orthodoxam reducendam. Quod  
 ille feliciter præstítit, adeoque Bade-  
 nam missus ad similes labores, venenô  
 ab hæreticis propinatô, sublatus est.

3. Constantiæ in Germania, anno  
 1635. P. Balthasar Wegelin, Germa-  
 nus. Per annos 30. Collegii Procu-  
 rator accuratus, unaque Operarius in-  
 defessus, laureatam mortem ex charita-  
 te pestiferis exhibita obtinuit, unà cum  
 Sociis viginti, & uno per Germaniam  
 sparsis.

4. Posnaniæ in Polonia, anno 1655.  
 P. Stanislaus Woysza, Ruthenus. Cùm  
 informis, & ferè monstrosum natus esset,  
 finè

sinè cranio , & ferè sinè forma homini-  
nis , ope S. Stanislai Kostka , cui obla-  
tus fuerat , plenè persanatus est . Ne-  
mo illo promptior sive ad infirmos , si-  
ve ad sanos juvandos Sacramentalis pœ-  
nitentiæ remediô . In animas purga-  
torii quoque prolixè liberalis , sæpe il-  
las deposcendi auxiliî causâ ad se ven-  
titantes habuit . Injuriarum toleran-  
tissimus , pro quodam sibi injurioso per  
annos 13. statis diebus per singulas  
hebdomadas certas orationes , & mor-  
tificationes DEO offerebat . Matura  
denique cœlo ejus Apostolica charitas ,  
in arena peste infectorum , quibus in-  
defessus deserviit , coronata est .

5. Lovanii in Belgio Franciscus Gruy-  
thuysen , Scholaisticus Belga . Non ex-  
pectatô Sacerdotiô , properavit in glo-  
riosam pestiferorum arenam , illique  
florem ætatis devovit , cum Sociis un-  
deviginti , quos per diversa Belgii lo-  
ca ejusdem gloriæ confortes habuit .

## XXI. OCTOBRIS.

I. **E**x portu Sancianensi, anno 1552.  
 literas dedit S. Xaverius ad P. Franciscum Perez, quas ita orditur.  
*Francisce Perez, mando tibi in virtute S: Obedientiæ, nè post visas hasce meas literas hæreas amplius Malacæ, sed quam primùm poteris, expediás te ad navigandum in Indiam, &c. scilicet Collegii Coccinensis futurus Rector; Rectori autem mandavit, ut eodem die, quo veniret Perez, traderet ipsi officium. Quod exordium non formatum juxta stylum hodiernum, videri posset duriusculum, & præferre non parum despoticæ potestatis; sed rationem hujus styli, & mentis suæ paulò pòst in iisdem literis aperit humillimus, & suorum amantissimus Xaverius, subjungens: *Quamquam hæc, & his plura, majoraque confidebam, vos sola voluntatis meæ indicatione finè mora facturos; tamen ad majus vestrum meritum, interpono vim potestatis mibi traditæ. Unde patet, melius esse, imperanti parere Superiori, quam satis-**

tisfacere suadenti, aut petenti. Multum enim respectus humani habere, solet hæc obediendi ratio. *Epist. Novar. lib. 7. ep. 8.*

2. In India Goæ, anno 1548. ipso hoc die sacro S. Ursulæ, solemní pom-pâ delatum est ad templum Societatis Caput unius Virginis, & Martyris è comitatu S. Ursulæ. Cùm enim in itinere ventorum impulsu návis, qua vebantur aliquot è nostris, impulsâ est in arenas, & syrtes, excussóque gubernaculo, omni spe salutis essent destituti ; P. Gomius protulit in publicum sacrum Caput, invocatáque ab omnibus Sancta Martyre, salvi evaserunt repente, non sinè manifesto prodigio. *Orland. hist. Soc. p. 1. lib. 8. n. 119.*

*Eodem die obierunt.*

3. Nangasachi in Japonia, an. 1633. P. Julianus Nacaura, principe Japoniæ stirpe natus, atque olim à Rege Bungi ad Gregorium XIII. Pontificem Max. Legatus, ad obedientiam Sedi Apostolicæ deferendam. Româ redux, in Se-  
cie-

cietatem adscriptus est, in qua probum religiosum, & impigrum operarium cùm egisset, ad scrobem Japonicam odiō fidei raptus est. Cùm duceretur, populum comitantem allocutus, dixit : Illum se, illum Julianum esse, missum enim Romam à Japonia saniore, & mihiore, pro illa Romana, & vera fide se nunc vitam libenter depolare. Triduanō tormentō gloriam meritus æternam decessit. Eodem mortis genere sublati cum illo sunt Petrus, & Matthæus Novitii Japones.

4. Panormi in Sicilia, anno 1656. P. Aloysius la Nusa, Siculus, Illustrissimis ortus natalibus, patriæ suæ Apostolus, innumerabilium animarum lucris, prædictionibus, & signis conspicuus. Ecclesiæ munus per annos ferè 40. persanctè gessit. Viderunt quidam ex diligentis fronte splendidissimum radium promicantem, & auditores illuminantem ; alii conspexerunt Angelum concionanti assistentem ; alii ex orantis ore fulgidum radium in cœlos vibratum, aliis visa est ejus anima, comitantibus

SS.

SS. Ignatio , & Xaverio , aliisque deSocietate , & innumeris , quos cœlo lucratus fuit , cœlos descendere.

5. In Peru, anno 1622. P. Emmanuel Ortega, Lusitanus, magnus in Lusitania, Brasilia, Paraquaria , & Provincia Peruana operarius , pro DEI gloria, & animarum salute. Tempore ingentis cuiusdam exundationis noctu per horam circiter natavit ad baptizandos Indos, qui mergebantur , cum manifesto vitae discrimine. Admiranda alia gessit , passus est animarum causâ. Coadjutor spiritualis Formatus cum esset, oblatum sibi 4. Votorum professionem non admisit , nè quid laxamenti in Instituto fieret sui causâ.

6. Regiomonti in Prussia , an. 1653: P. Joannes Kihn Prutenus , cum in vasta hæretica urbe, quam dira pestis depopulabatur , Catholicis Sacramenta , hæreticis ea , quæ poterat subfidia strenue ministraret , non sine stupore catholicorum , glorioso agone consummatus est vir zelosissimus,

## XXII. OCTOBRIS.

**I.** ANNÔ 1552. JULIUS III. PONT. MAX. confirmavit Privilegia Societati concessa à Prædecessore suo PAULO III. quoad Dispensationem circa Jejunia, & cibos prohibitos, atque Absolutionem à quibuscunque casibus hæreseos in foro conscientiæ, quæ, & similia Privilegia voluit non comprehendendi sub quibusvis derogationibus, etiam in strictissima forma. Insuper concessit, ut cum facultate Generalis, & aliorum, quibus ipse delegaverit, possint nostri ex rationabili causa postponere Recitationem Horarum, Canon. Sacrificio Missæ, & Infirmis commutare in levius aliquid, &c. *Bullar. Societ.*

**2.** In Indiam epistolam dedit S. Xaverius ad P. Franciscum Henricum laborantem in Travancoride, sed desiderantem inde excedere alio, tibi fructuosior esset ejus labor. Docet eum Sanctus, id non esse à bono, sed maligno spiritu optante, regionem illam de-

destitui omni operario Evangelico, ut nec parvuli, qui moriuntur, perveniant in cœlum, utpote baptismi expertes. Genus est, inquit, insidiarum ejus, majorem alibi divini obsequii spem ostentare, ut videlicet solicitet, atque avertat eos, qui utiliter operam navant DEO ibi, ubi sunt. Itaque vereor, nè te suo illo artificio aggressus, idcirco solicitet : ut ex istis abigat locis. At memento, te octo mensibus, quibus isthic versaris, plures animas conservâsse, moribundis baptizandis infantibus, quam omnibus annis, quibus in Lusitania, & India fuisti &c. *Epist. vet. lib. 2. ep. 8.*

3. Aliam dedit idem Sanctus epistolam anno 1553. ex Sanciano Sinarum portu ad Franciscum Peram, qua ex amplitudine, & ardore Spiritus sui Apostolici significat : se jam in procinctu esse ad solvendum in Sinense imperium conducto ducentis aureis mercatore quodam Sinensi, qui eum expofiturus esset ante portam urbis Cantonefis, & curaturus, ut ad Gubernato-

rem

rem dederetur. Quæcunque fors apud hunc sibi contingere, paratissimum se esse ad omnem, sive sint vincula, & carceres perpetui, sive tormenta immanissima, cùm melius sit hæc pati, quàm negligere Evangelii propagacionem. *Epist. Vet. lib. 4. ep. 15.*

*Eodem die obierunt.*

4. Nangasachi in Japonia, an. 1633. P. Joannes Matthæus Adamus, Italus. Ærumnas plurimas perpessus Evangelii, & animarum causâ tandem comprehensus, & fame cruciatus, extremos quinque vitæ dies in tormento Japonico egit, de furca in fossam suspensus è pedibus, indè ad astra elatus.

5. Callisii in Polonia, anno 1634. P. Blasius Plozzinius, Polonus. Cùm adolescentis insigni virtute præstaret, iussus est ab eo, cui erat in obsequiis arenati terræ pluviam à DEO flagitare. Paruit Blasius, non diu oravit, & cœlum sudum in pluvias affluenter solutum est. In Societate religiosum egit ad legum normam egregie compositum. Dixit duo

duo se petiisse à DEO : ut, nè Domesticis molestus esset, non diu, sed acer- rimè ægrotaret, nec diu in vivis super- stes esset. Utrumque obtinuit , ac in- super notitiam diei sui extremi , quem prædixit.

6. Brunæ in Moravia , anno 1648. P. Samuel Richter Moravus. Salutis animarum fitientissimus , promptissi- sum se ad illas juvandas in quavis oc- casione præstabat, relictō etiam aliquan- do poculō , quo laboribus fessus sitim levare volebat. Sibi dictum censebat illud Psalmographi : *Tibi derelictus est pauper, orphano tu eris adjutor.* Adjuvit strenue , donec in obsequio pestifero- rum caderet gloriosè.

## XXIII. OCTOBRIS.

I. Anno 1597. ab Inquisitione Ge-  
nerali Hispana expedita sunt  
Romam Testimonia authentica de sen-  
su variarum Academiarum , & Docto-  
rum Hispaniæ circa Controversiam fer-  
ventem inter Ordines PP. Prædicato-  
rum , & Societatis de Auxiliis Divinæ

Gratiæ. Mandaverat enim suprema Inquisitio Hispana Academiis Salmanticensi, Complutensi, & Siguntinæ: ut suum de Controversia illa judicium perscriberent, idemque ut facerent, doctissimos quosque in Hispania viros rogaverat. Provincialibus item utriusque partis injunxerunt, ut, quod de Gratia sufficienti, & efficaci sentirent, scripto consignarent, ad sedem Apostolicam mittendum. Obtemperatum ab omnibus accurate. Digesta sunt omnia in Tomos 3. & Romam expedita anno, dieque predictis, ad informandam Sedem Apostolicam. Eleuth. hist. de Auxil. lib. 2. cap. 26. ubi ostendit: ex Episcopis, aliisque Doctoribus, quorum judicia Romam missa sunt, duplo plures fuisse pro Doctrina Molinæ, quam contra illam.

2. In Gallia Guilielmus à Prato, Episcopus Claromontanus, anno 1560. inter mortales desiit, Praesul in omnes partes optimus, ac memoriam aeternam dignus, atque à DEO datus Societati, collocandæ, & educandæ in Galliis.

Triz

Tria Collegia Societati fundavit munificientissimè temporibus difficillimis (quando scilicet illa in suis initii non dum satis cognita, pro inutili, imò noxia habebatur) Billomense, Mauriacense, & Pariense, quod regiâ suâ munificientiâ gloriose consummavit Ludovicus Magnus, Rex Christianissimus.  
*Saachin. hist. Soc. p. 2. l. 4. n. 92.*

*Eodem die obierunt.*

3. Saffari in Sardinia, anno 1635. P. Joannes Andreas Manconius, Sardus, excellenti virtute, & prædicandi gratiâ celebris. DEI-paræ V. cultui addictissimus, ejus aspectu multoties est honoratus, sed passim se illi sub Cruce spectandam obtulit. Semel tamen, cum ille vexaretur importuna cuiusdam fœminæ specie, identidem sese ingerente, ideoque mœsto esset animo, Cœli Reginæ comitantibus SS. Catharina, atque Cæcilia admirabili pulchritudine, & splendore conspicuam se illi objecit, dixitque: *Vide, an pulchritudo, quæ corrumpitur, cum hac possit ulla ex parte com-*

*parari?* Ante mortem rogatus , ecquid illi maximo esset solatio in illo articulo ? Quòd , inquit , nullam consolationem ipse mihi unquam indulserim.

4. Leodii in Germania , annō 1634. Rudolphus Rusellus , Anglus , Scholasticus . Vitæ innocentiam nulla gravi noxa temeratam , ut insigni virtutum apparatu ornaret , præter accuratam legū custodiam , duobus hisce usus est admiculis . Nullam temporis particulam sibi elabi sinè fructu sinebat , nec adamantinum suum decretum colloquendi semper de rebus piis , unquam violavit .

5. Hispali in Hispania , annō 1647. Joannes de Soria Coadjutor , Hispanus , concione audita facius , relictā mercaturā , & sponsā Societatem ingressus , semper in illa religiosè vixit , maximè postquam à gravi morbo per S. Ignatium miraculō est liberatus . Nullum diem elabi sinebat , quin regulis , bis quotidie consideratè legendis , aliquid temporis impenderet . Votō se obligavit , ad vitandum quodvis delibera- tum veniale peccatum , Sabbatho totius heb-

hebdomadæ defectus confessione expiabat, quamvis id aliquoties per hebdomadam egisset, & veniâ gauderet, etiam quotidie communicandi.

## XXIV. OCTOBRIS.

I. **T**AURINI in Pedemontio, an. 1568.

Apertæ sunt Scholæ, magna exultantium civium gratulatione, & commoditate; post erectum anno præteritô Collegium, non sinè specialis Providentiæ divinæ argumentis. Templo illata sunt solemnissimâ pompâ, quinque Sanctorum corpora, è quibus tria fuerunt SS. Martyrum è legione Thebaorum, Solutoris, Adventoris, & Octavii; quartum Sanctæ Julianæ Virginis, quæ prædictorum Martyrum collegit, servavitque reliquias; quintum S. Gufsolini Abbatis ad S. Solutorem, qui virtutis excellentiâ famam Sanctitatis meruerat. Scholis, & Collegio præfuit primus Rector P. Jacobus Acosta, quem celebrem fecit victoria de duobus Hugonottis reportata. Primus in arenam descendere præsumpsit discipulus, qui

facili negotio subactus est. Discipuli ignominiam suam ratus magister, ipsum se congressorum denunciavit, ac Taurinensibus, & Jesuitæ ostensurum: quid intersit inter discipulum, & magistrum. Et erat literaturâ suorum non mediocriter tinctus, nec ulli cedebat audaciâ, & verborum profluvio. Postridie commissum publicè certamen tres horas tenuit. Ter itâ victus hæreticus, ut tanquam intercluso spiritu, non posset hiscere, & quisque videret protligatum esse. Ad extremum pudore suffusus, quamvis in fronte admodum perficta, itâ discessit, ut diceret: conventurum se Acostam privatim. At comparuit nunquam, & petulantem illi linguam infamia egregiè frenavit.  
*Sacchin. hist. Soc. p. 3. lib. 3. num. 116.*  
*& n. 173. & p. 4. lib. 3. n. 67.*

*Eodem die obierunt.*

2. Conimbricæ in Lusitania, anno 1604. P. Hieronymus Carvalius, Lusitanus. Orationi sex quotidie horas dabant, & genua centies submittebat. Pauper-

pertatem tam tenerè coluit, ut in ejus  
veste curiosus quispiam nonaginta nu-  
merarit assutos centones. Solicitus a-  
liquando de pœnis Purgatorii toleran-  
dis, vidi apparentem sibi Virginem  
DEI-param, audivitque dicentem: Me-  
tum poneret, se non solum in hac vita,  
sed etiam in Purgatorio gementium es-  
se Advocatam. Cùm 45. esset anno-  
rum, scripsit sibi adhuc quindecim su-  
peresse annos vitæ, atque ita evenit.

3. Rhotomagi in Gallia, anno 1626.  
P. Joannes le Sec, Gallus, charitate, ac  
zelo præstanti, caput suum bis in obse-  
quium pestiferorum devovit. DEIpas-  
ræ cultui addictissimus, assiduè illam so-  
licitabat, ut cui ipsa ad Societatem adi-  
tum aperuisset, etiam perseverantiam  
impetraret. Exercitia spiritualia in-  
choatus, dixit extrema sibi futura, &  
diem obitūs, qui ita evenit, nominavit.

4. Murciæ in Hispania, anno 1558.  
P. Marcus Antonius Fontova, Hispanus.  
Vices agebat Præpositi Provinciæ Ara-  
goniæ, qui in Urbem profectus fuerat;  
sed cùm lues contagiosa quasdam Hi-

spaniæ partes corripuisset, heroico charitatis obsequio se ipsum immolavit, ceciditque charitatis victima cum Sociis duobus. Valentiæ eodem anno ex eadem causa occubuerunt Coadjutores duo, plures Barcinone cum Rectori suo P. Joanne Gesti; Anno sequente Murciæ P. Gaspar Lopez. Annô 1560. Gandiæ extinti quatuor eodem charitatis igne.

5. P. Michaël Turrianus, Complutensis Academiæ Rector, antequam Societati nomen daret, ab eadem Romam missus ad propugnanda ibi ejus jura. Romæ cùm degeret, occursum, aspergumque nostrorum hominum ità refugiebat, ut nè sustineret quidem in sermone mentionem de illis fieri, malevolorum obtrectationibus circumventus. Itaque vix Joannes de Vega, Orator Catholici Regis ab eo exoravit, ut ipsum P. Salmeron obiter noctu secretis ædibus conveniret. Multis precibus ab eo obtinuit P. Salmeron, ut idem beneficium præstaret Ignatio. Venit in conditum pomerii locum Turrianus oratione

tione meditata contra Ignatium, tanquam certissimum præstigiatorem munitus. Quem ubi conspexit Ignatius, & comiter, ut solebat, salutavit; ille percusus aspectu viri, ejus comitate, atque adeò *Spiritu, qui loquebatur*, vixus ruit in amplexum, & desine, inquit, plura, tuus sum, quid me jubes facere? Post quadriennium suscepimus ad Societatem, eum S. Ignatius pupillam oculi sui vocitabat. Ejusdem nomen S. Borgias in libro vitæ scriptum vidisse fertur. Cùm parotide laboraret, ac lapsus humor in guttur, cibi, & vocis meatum intercluderet, quo die migravit è vita, constitit humoris fluxus, ac liberas, apertasque fauces tamdiu reliquit, dum sacrô viaticô reficeretur, quôpiè ac religiosè sumptô iterum occluso gutture est oppressus, anno 1593. ætatis suæ 85. *Juvenc.* 779.

## XXV. OCTOBRIS.

I. **A**NNÔ 1552. Epistolam dedit S. Xaverius ex Sanciano Sinarum insula ad P. Gasparem Barzæum, Goa-

ni Collegii Rectorem, Virum funditus  
 sanctum, & Apostolicum. Inter ce-  
 tera: Memento, inquit, quæ apud te  
 reliqui præcepta, lectitare, atque ob-  
 servarè sedulò, maximè verò illa, quæ  
 ad submissionem animi pertinent, in  
 quibus jubebam te exerceri quotidie.  
 Vide etiam, atque etiam, nè circum-  
 spiciens ea, quæ DEUS per te, ac So-  
 cios universos effecit, obliviscaris tui.  
 Mihi verò pro mea erga vos omnes  
 charitate, pergratum esset, vos unà  
 cum animis vestris considerare, quām  
 multa DEUS vestrō vitiō facere omit-  
 tam; atque hæc malim vos intueri, quām  
 quantas res per vos DEUS faciat. Nam  
 prior cogitatio pudorem, ac demissio-  
 nem animi afferet vobis, vestræ imbe-  
 cillitatis, miseriæque admonitis; po-  
 sterior autem facile in elationis, & ar-  
 rogantiæ discrimen adducet, nixos alie-  
 nis bonis, præclarisque facinoribus,  
 hoc est Divinis. Circumspice, quæso,  
 quām multis hæc perversa cogitatio  
 periculum creârit; quām exitialis hæc  
 Societati pestis, si semel in ea serpe-  
 re

re cœperit, sit futura. *Epist. Vet. lib.*  
4. ep. 14.

*Eodem die obierunt.*

2. Neti in Italia, anno 1637. P. Michaël Montaltus, Italus, eximius DEIparæ V. cultor. Festa ejus præveniebat jejuniō, pane, & aqua definitō, & insomni nocte, quam orando, & pia legendō transigebat. Ipfis festis diebus eam, quam è charta in cubiculo habebat, DEIparæ imaginem floribus adornabat, atque coram ea Formulam Votorum Societatis, & alteram se illi devovendi renovabat. A carnibus, etiam cùm Concionatorem ageret, abstinebat, plerumque pane cibario, & aquâ contentus, somnum non in lecto, sed in sella, pallio obvolutus capiebat.

3. In Brasilia, anno 1645. P. Antonius de Mattos, Lusitanus. Hollandico carcere per biennium maceratus, opinionem sanctitatis indè extulit. Cùm valeret, noctu somnum capiebat stans, & baculo innixus, ut faciliūs excitaretur ad laudem DEO persolvendam.

Cùm Collegia vel Provinciam regeret, responsum ad interrogata non dabat priùs , quàm conjectis in Crucifixum, vel humili deflexis oculis animum colle- gisset. Quibusdam preces ejus expe- tentibus dixit facturum se, sed ipsi hoc, illudve occultum peccatum caverent. Quendam mari se committere non au- dentem ob metum piratarum monuit, ut certa peccata occulta expiaret , & certa quædam pietatis officia obiret, sic securum navigaturum; atque ita evenit.

4. Landspergæ in Germania , annô 1636. Magnus Angerer , Coadjutor , Germanus. Per annos 22. magnô im- pigritatis exemplô pistorem , hortula- num, & omnia egit, citra ullum laboris tædium, citra ullum pietatis detrimen- tum. Inter laborandum Marianum Rosarium mordieus ore tenebat , mani- bus occupatis, dentibus illud versabat , & linguâ DEI param salutabat rarâ indu- striâ.

## XXVI. OCTOBRIS.

I. A Nnô 1578. supplicem epistolam dedit ad Præpositum Genera- lem

lem Everardum Mercurianum, Guilielmus Alanus, Sacerdos piissimus è præcipua nobilitate Anglicana, qui orta persecutione Catholicorum in Anglia recepit se in Belgium, & profugos ex Anglia juvenes Catholicos colligebat in Seminarium quoddam Duaci, piorum eleemosynis sustentandos. Suasum subinde Gregorio XIII. Pontifici Max. ut simile Anglicanum Collegium institueret in Urbe, futurum columen collabentis Ecclesiæ Anglicanæ. Pontifex, ut erat in omnem occasionem juvandæ, & propagandæ Ecclesiæ intentissimus, erexit novum Seminarium, facileque colleæti sunt adolescentes Angli non pauci, quibus Præpositus est Mauritius quidam Kolenocius; adjuncti duo è Societate, qui administrationis, ac disciplinæ domesticæ formam præscriberent, ac in usum ducerent. Illecti adolescentes humilitate, & comitate nostrorum optabant ipsos præscribi Seminario, quod etiam visum est Alano; ideoque honorificas, felicésque dedit literas

ras ad Everardum Generalem , ut Societas ejus Seminarii susciperet gubernationem. Renuit Everardus graves ob causas ; sed cum juvenes non contenti Præfecto suo , eò descendissent, ut maluerint deserere Seminarium : Pontifex revocatos quiescere jussit, curámque , & administrationem omnem Societati demandavit. Et favit Pontificiæ dispositioni, ac Societatis curis DEUS , dando tam felicia domui illi incrementa , ut plurimos piissimos Confessores , tum fortissimos Martyres aluerit , alatque etiamnum. *Sacchin. hist.*  
*Soc. p. lib. 7. n. 10. & seqq.*

*Eodem die obierunt.*

2. Toleti in Hispania , anno 1584. P. Franciscus Strada , Hispanus , Ecclesiastes tanti spiritus , ut ei vix parem habuerit Societas. Incredibili vi dicendi percellebat , conterebat , & in quam vellet partem flectebat corda , etiam juvenis , nondum Sacerdos , nec sublimiore literatura tinctus. Concionibus suis , & S. P. N. Exercitiis scitissimè

simè traditis , velut duplii quodam Eliæ Spiritu , concussit Italiam , Belgium , Galliam , Lusitaniam , & Hispaniam ; odia internecina inter cives , & civitates composuit , religiosas domos ascetis implevit , Societati complura Collegia erexit . Rogatus à P. Ribadeneira , unde illi esset ea vis in dicendo ? ingenuè respondit : sibi inter dicendum , radium quendam , & impulsum cœlitus illabi , quo totis præcordiis intimè commoveretur . Labori , & orationi intentus , modicum dabat somno , & expertus est , sibi dormienti à DEO infusam tantam homiliarum Divi Chrysostomi peritiam , ut illo licet antea nunquam lecto ita concionaretur , ac si totum absumpsisset . Tantus cum esset , indignum tamen Societatis instrumentum semper , & animitus se reputabat .

3. Coloniæ in Germania , an. 1574 . P. Leonardus Kesselius , Belga . P. Francisci Stradæ concionibus Societati genitus . Vir potens docendo , & agendo , præsertim in Colonia Agripina ab hæresi servanda . Cùm ibidem peste infectis

fectis serviret , non animas tantum , sed corpora quoque divinitus curabat ; ut passim diceretur : quotquot Kesselio sua peccata aperirent , protinus convalescere , & vitam instituere magis probam . Incredibili tenebatur desiderio S. Patrem tunc adhuc superstitem videndi , & alloquendi , ideoque petiit Romam eundi veniam . Sed S. Pater piis ejus votis cumulatè annuens , Coloniæ se illi videndum miraculosè præbuit.

4. Nangasachi in Japonia, an. 1633. P. Antonius de Sonsa, Lusitanus , odiò fidei primò exilium perpessus , deinde redux in Japoniam , aquæ in os infusæ , & violenter expressæ tormento cruciatus , demum in fossam capite deorsum suspensus , octavo die gravem illum agonem feliciter consummavit.

5. Romæ , anno 1556. P. Andreas Frusius, Gallus , non minus vitæ probitate , quam doctrinæ laude spectatissimus , adeò , ut illum S. Ignatius , aliquique Angelo similem judicarent . Linguarum , Latinæ , Græcæ , Hebraicæ erat pe-  
ritissi-

ritissimus; Theologus, Jnrisperitus,  
Medicus, Mathematicus insignis, præ-  
stans Musicus, præclarus Orator, Poëta  
summus, & omnino Extemporaneus.  
Exercitia Spiritualia S. Patris ex Hispa-  
nico Latinè interpretatus est, isque liber  
primus è Societatis lucubrationibus, ty-  
pis prodiit in lucem. *Sotuell. in bibl. Soc.*

## XXVII. OCTOBRIS.

I. **G**OÆ in India, anno 1578. sole-  
mnis celebratus est Baptismus.  
Sacro fonte abluta est Neptis Mealis,  
Regis, ad quem regnum Idalcanis de-  
jure pertinebat. Eodem die post me-  
ridiem Rudolphus Aquaviva viginti,  
catechumenos lustralibus aquis tinxit,  
inter quos fuit vir Maurus genere, qui  
nullius hominis suasi, ex Balegate ve-  
nit, baptizari petens, & quidem sinè  
mora, quod diceret se nescire, quando  
esset moriturus. Factum satis pio de-  
siderio. Ecce autem statim à baptismo  
tantò sanguinis profluviò soluta illi est  
narium vena, ut anima corpore soluta,  
tempore eodem, & militantem, & tri-  
umphantem ingressa sit Ecclesiam,  
DEO

DEO divitias bonitatis suæ mirabiliter  
spargente. *Sacchin. hist. Soc. p. 4. lib. 6.*  
*n. 228.*

*Eodem die obierunt.*

2. Valentia in Hispania , an. 1615.  
P. Petrus Bellidus, Hispanus. Oratio-  
ni præter horam ordinariam duas alias  
dabat manè , vesperi tot, quot obedien-  
tia, & ratio officii permittebat. Inci-  
piebat Meditationem à Christi Passio-  
ne , deinde ad attributa divina mentem  
erigebat , denique voluntatem suam  
divinæ mactabat in holocaustum ; visus  
ab oratione prodire toto vultu illustri.  
Multos monuit de rebus secretissimis.  
Sub mortem dicente quodam : *Sursum  
corda* ; respondit : Jam est ibi. Perso-  
na quædam sanctitatis opinione illu-  
stris , cùm rogâisset Dominum : an om-  
nes nostri , qui in eo Collegio degebant,  
salvi essent futuri , & an cum Purgato-  
rio ? Responsum accepit : Salvandos o-  
mnes , sed tres tantum sinè Purgatorio ,  
inter quos Pater Bellidus. Hoc cùm  
Patri Petro sub mortem referret Supe-  
rior,

rior, lætus subjunxit: Gloria Patri, & Filio, & Spiritui Sancto, & felix decessit.

3. Burdigalæ in Gallia, anno 1620.  
 P. Guilielmus Bailius, Gallus. Mirabilis instructus erat vi ad agendum cum hereticis ita, ut pauci cum illo agentes abierint non conversi. Vocatus ad ægros disponendos ad mortem, antequam domo prodiret, inclementer se pro illis cædebat. Ad pulpitum sacram non ascendebat, nisi acri flagellatione præmissa, ciliciō indutus, & lingua per aquam lustralem expiatâ. Santonas Calvini erroribus infectissimos, eo purgavit studio, ut à S. Eutropii, Santonum Apostoli temporibus nullus visus sit, ita Religionis negotium promovisse. Magorum, Sagarūmque artes tam solerter deprehendebat, ut nunquam aberrârit. In Sacrificio divino, cum Venerabilem hostiam communicaturus manu tenebat: Da mihi, ajebat, Domine JESU animas, pro quibus victimæ factus es salutaris. Zelo animarum, & celebritate nominis sui eò devenit, ut velut proverbiō appellarentur *Bailii*, qui

qui in eo genere maximè strenui essent.  
*Sotuell. in Bibl. Soc.*

4. Romæ, annô 1705. P. Thyrſus Gonzalez, præpositus Generalis Hispanus. Societati præfuit annis 18. communi judicio, & fama, etiam Curiæ Romanæ, Vir Sanctus, & Doctissimus. Societatem gubernavit juxta instituti rigorem, accuratus in munere suo, humanorum negligens respectuum, in adversis fortis, & constans.

## XXVIII. OCTOBRIS.

I. **N**atalis est hic dies Collegii Germanici in Urbe, S. Ignatii zelo, & cura primū conditi. Cœptum est nobilissimum hoc opus sub Julio III. Pontifice, suadente Cardinale Morono, qui Nuncium Apostolicum in Germania egerat, operam verò, curam, & dexteritatem omnem impendente Ignatio. Nullum enim visum est præsentius subsidium ad juvandam inlytam Nationem Germanam, ab heresi ferè oppressam, quam si in ipsa Roma, velut sinu Magistræ gentium, educa-

ren-

rentur, & bonis literis, moribúsque  
formarentur juvenes Germani, qui do-  
ctrina sana, & zelo Apostolico Patriæ  
subvenirent. Collecti sunt initio ju-  
venes quatuor supra viginti, quibus  
à Pontifice iussus est S. Pater scribere  
leges vivendi, & studendi, totamque  
Domum per suos gubernare. Sumptus  
necessarios benignè suppeditabat Pon-  
tificis, & quorundam Cardinalium li-  
beralitas. Sed brevi factum est, ut tam  
præclarè cœpta penè conciderent;  
sublato è vivis Julio Pontifice. Paulus  
enim Quartus, orto inter ipsum, & Im-  
peratorem bellò, subsidia consueta sub-  
traxit, Cardinalium quoque largitiones  
in publica annonæ caritate desinebant;  
nec deerant ex ipsismet, qui Ignatio  
suaderent ejus Collegii dissolutionem  
temporibus tam inquis. At illi mens  
fuit alia, tamque generosa; ut Cardina-  
li Augustano reposuerit: *Subtrahant se  
omnes, quos ea cura gravat; sustinebo solus,  
etiam si me venumdari propterea oportet.*  
Et sustinuit juvante DEO. Invenimus  
enim jam non paucis auctorum partem  
aman-

amandavit ad varia Collegia nostra extra urbem , partem in urbe detinuit , suisque impensis aluit , etiam cum res satiis angustæ domi essent . Prospiciebat enim divinitus edoctus , fore tempus , quod id Collegium , ut numero personarum , ita reddituum copia abundaret , cresceretque in summam Ecclesiæ Germanæ utilitatem , hærefeos autem ruinam . *Bartol. in Vita S. Ign. lib. 4. n. 18. Orland. hist. Soc. p. 1. lib. 12. n. 8.*

2. In Hispania splendidum Societati , imò universæ Ecclesiæ ortum est lumen , nascente anno 1510. S. Francisco Borgia , primogenito Joannis Duci Gandiae , futuro Societatis Præposito Generali Tertio . *Sacebin. hist. Soc. p. 3. lib. 8. n. 37.*

3. Romæ , anno 1568. B. Stanislaus Kostka , postquam à laboriosissimo itinere per aliquot dies est refectus , die SS. Apostolis Simoni , & Judæ sacro , Tyronibus Societatis in Domœ Professa est aggregatus . *Sacchin. hist. Soc. p. 3. lib. 4. n. 62.*

4. Ibidem anno 1604. habita est co-

ram Clemente VIII. Congregatio , & Disputatio 33. de Auxiliis Gratiæ. Voluit Pontifex disputari de Scientia Media, quæsitumque : *An S. Augustinus ante absolutum Decretum Divinæ voluntatis agnoverit , dari in DEO cognitionem certam, & infallibilem contingibilium , dependentium à causa libera : qualem Molina DEO per Scieniam medium tribuit ?* Affirmativè respondit P. Bastida, latèque probavit ex Sacris literis , & S. Augustino. Eleuther. hist. de Aux. lib. 5. cap. 43.

5. Annô 1707. Pontifex Maximus Clem. XI. epistolam dedit ad M. Ducem, seu Czarum Moschoviæ Petrum Alexewicium, qua significat : multum solatii se cepisse , ubi ejus Allegatus declaravit: ipsum constituisse , Catholicis per universas ditiones suas liberum & publicum concedere Religionis suæ exercitium , insuper fundare Conventum PP. Capucinis , & Collegium PP. Societatis JESU , ad erudiendam bonis literis, moribúsque probis juventutem : *quod consilium, inquit, magnam profectiō populis tuis utilitatem est allaturum ;* denique

que Missionariis Chinensibus liberum  
permittere passum per terras sibi sub-  
iectas. *Ex literis Româ datis.*

*Eodem die obierunt.*

6. In India Orientali , anno 1568.  
P. Franciscus Lopez, Lusitanus. Post  
multos animarum causâ exantlatos la-  
bores, cum Coccinô Goam navigaret, à  
Mauris comprehensus, & multum diú-  
que solicitatus est, ut ad Mahometem  
deficeret ; Execranti impium facinus ,  
hasta in pectus adacta , caput acinace  
fissum, corpus in mare projectum.

7. In mari. 1596. P. Georgius Val-  
lier, & P. Franciscus Rosillius , Hispani.  
Cum Exercitu Martini de Padilla in  
Angliam navigare jussi , horrida tem-  
pestate noctu involuti sunt. Deficien-  
te evadendi spe , Patres omni , qua po-  
terant ope , juvabant perituros , donec  
ipsi quoque haurirentur. Pauci , qui  
variâ industriâ evaserunt , testati sunt :  
in densissimis illis tenebris, in quibus al-  
ter alterum videre non poterat, Patrum  
circumcurrentium , & Christi Crucifixi  
imaginem circumferentium, vultus tan-

to splendore fulsisse, acsi meridiano sole illustrarentur.

8. Mexici in America, anno 1572.  
**P. Franciscus Bazanus, Hispanus.** Indias expetiit, ut experimento probaret, quemadmodum ipse ajebat, an arbor inutilis eò translata aliquid boni fructus sit allatura. In Societate sedulò splendorem familiae Marchionum S. Crucis, & ingenium, doctrinamque occultavit, delituítque per quinque annos sub Francisci Aranæ nomine, inter labores domesticos sedulus, & modestissimus Coadjutor. Re postea comperta studiis iterum est applicatus, & sacris Ordinibus initiatus transmisit in Americam, tam in itinere, quam regione illa insignia præbens Viri Apostolici argumenta.

## XXIX. OCTOBRIS.

I. **A** Nnō 1645. Congregatio Lusitana PP. Benedictinorum sequuta exemplum Congregationis primariæ Caſſiniensis, Exercitiorum Spiritualium libellum vindicavit S. Ignatius;

tio; declaravítque eum non esse à quopiam Benedictino monacho, ut recens quidam Historiæ Benedictinæ author perperam scripserat, compositum. Quam suam sententiam publicò Decreto firmatam communicavit hoc die Societati. *Bartol. in vita S. Ignatii. lib. 1. n. 12.*

2. Vilnæ in Litvania, anno 1579. in Collegio Societatis per Valerianum Episcopum fundato, Studium Generale, seu Academicum, & Universitatem Scientiarum, bonarūmque Artium, instituit Gregorius XIII. à Societate in omnibus, ac per omnia, moderandam, ac gubernandam: illique Privilegia quarumvis aliarum universitatum gratiōsē concessit. *Bullar. Cherub. Constit. 102. Gregor. XIII. incip. dum attenta, &c.*

3. In litore Malabarico P. Antonius Abrerus vela faciebat cum P. Bernardino Sinensi. Orta subito Cocinum inter, & Culanum hac die 1611. fœda tempestas classem sex naviis majoribus, & aliis minoribus bene multis constantem, & Asiaticis onustam mercib[us] fregit. P. Abrerus ducentos Ethnicos,

thnicos, nullis antè monitis, & adhortationibus victos, ad sacrum baptisma perduxit. P. Bernardinus milites<sup>1</sup> omnes, quorum ingens erat numerus, salutari confessione expiavit, neque suæ priùs vitæ consulere sustinuit, quām eorum salutem sempiternam in tuto collocasset. Eversa demum navi jactabatur undis, cum ad B. Ignatium ore, animoque conversus, cernit oblatam ex improviso adnatare trabem. Huic se applicat, pérque iratos fluctus diu jaetatus ad littoris cautes ejicitur. Exciverat indigenas procellæ fragor, & prædæ spes. Ab iis haud dubiè spoliandus, & necandus Ignatium rursus appellat, cuius ope mitigata barbarorum feritas incolumem accepit ad littus. Servatam Superūm beneficio vitam dolor propemodum ademit. Paululum in litore processerat, cùm incidit in cadaver Socii charissimi P. Antonii Abreri. Triste, ac dulce onus mœrens ad PP. Franciscanos deportavit, quo rum in æde sacra sepultum est. *Juvencius* fol. 486.

*Eodem die obierunt.*

4. In Japonia prope Fuximam anno  
1633. P. Matthæus de Couros, Lusitanus,  
vir verè Apostolicus, tam in agen-  
do, quam patiendo. Ecclesiam illam  
non solum excoluit maximis laboribus,  
ut Missionarius: sed etiam pro Episco-  
po gubernavit annis 9. Societati Japo-  
nicæ bis præfuit Præpositus Provincia-  
lis, temporibus difficillimis, & ardente  
persecutione. Admiranda sunt Divi-  
næ Providentiæ argumenta, quibus in-  
ter summa, & assidua pericula famu-  
lum suum protexit, ad solatium afflictæ  
illius Ecclesiæ. Jam per montium in-  
accessorum juga, per sylvas, & vepre-  
ta vagabatur, ut instantes falleret ex-  
ploratores; jam flumina, & maria per-  
errabat, jam per alias, & alias Provin-  
cias irrequietus cursitabat. Aliquan-  
do in cæco subterraneo specu per men-  
ses octo commoratus est; subinde fa-  
tellites fugiens in arcta delituit latebra,  
qualem memoratur S. Felix subiisse, a-  
raneo opere repente prætextam. Inter  
tot

tot vitæ discrimina , & quotidianas mortes tabescens , decrevit tandem indulgere veteribus desideriis , quibus actus fuit in Japoniam , & Meacensi Magistratui ultro se sistere : si forte placeret DEO , ut inter flamas patret cœlum . Sed aliter DEO visum . Mox adfuit quispiam , qui evocatum P. Matthæum ad juvandum hominem leprosum , in semoto mapali degentem ex urbe deduxit ad ægrum : ubi ipse met , ærumnis fractus placidè exspiravit , Japonicæ suæ expeditionis anno 43. *Sotuell. in Bibl. Soc.*

5. Antverpiæ in Belgio , anno 1625 , cum in populum magna strage grassaretur lues contagiosa , hoc die gloriose occubuit Thomas Verleyn Belga , Coadjutor , unus è 15. heroibus , qui in ea urbe sub vexillo charitatis meruerunt , & felici clade sublati sunt .

### XXX. OCTOBRIS.

I. **G**regorius XIII. anno 1576. confirmavit , extenditque Privilegium Societatis , ædificandi , & habi-

tandi ubique, etiam intra cannas aliorum Ordinum. *Bullar. Soc. Constit.* incip. *Salvatoris Domini nostri, &c.*

2. Institutam in Collegio Romano, recenter fundato à Gregorio XIII. Lectionem de Controversiis fidei, primus hoc die, anno 1576. tradere cœpit P. Robertus Bellarminus, aptissimus ad id munericis visus, tum ob ingenii, ac eruditionis excellentiam, tum ob linguarum Græcæ, & Hebraicæ peritiam, & comparatam septennio Lovani in Belgio, agendi cum hæreticis experientiam. Nec fefellit opinionem de se conceptam. Ità rem egit, ut non solum quotidianis lectionibus satisficeret: sed pro vastis Controversiarum suarum voluminibus multam coaceraret materiam. *Petrasan. in vita lib. 2. c. 5.*

3. In Valle Tellina Collegium recenter inchoatum, anno 1560. dissipatum est à Grisonibus, seu Rhœtis, Vallis dominis, hæresi jam infectis, ac pro ea tam ardenter zelantibus, ut si alicubi vel unus esset Lutheranus, pro ipso daretur prædicans, atque ex publico

blico aleretur. Socii, quamvis sub...  
 titulo Magistrorum tantum essent in-  
 gressi, & à Concionibus publicis ab-  
 stinerent, exturbati. Sed dum in una  
 valle Societatem non tolerat satan, DE-  
 US illi aditum , stabilémque possessio-  
 nem aperuit in pluribus vicinæ Sabau-  
 diæ, imò in tota ditione Ducis Sabaudii  
 per Antonium Possevinum , non pri-  
 dem Societati aggregatum. *Sacchin. hist.*  
*Soc. p. 2. lib. 4. num. 56. 5c.*

*Eodem die obierunt.*

4. Moguntiæ in Germania , annō  
 1620. P. Joannes Sylvorstius , Belga ,  
 Groeningæ Catholicis operam præcla-  
 ram præsttit , non minore fructu, quām  
 labore. Ab hæreticis igitur raptus in  
 vincula , viso eminus carcere , procum-  
 bens in genua , gratias DEO retulit  
 pro tanto honore. Pro tribunali fi-  
 denter respondit : se non minùs ausum  
 isthuc venire ad hæreticos converten-  
 dos , quām ipsi sunt ausi Antverpiam  
 ire pro Catholicis pervertendis. In  
 periculis , & angustiis magnâ fiduciâ

**DEO** dicere solebat : *Tuus sum ego , sal-vum me fac.*

5. Posonii in Hungaria, anno 1634. P. Georgius Kaldi, Hungarus, vir acris ingenii, eloquentiae, & virtutis. Multa egregie dixit, ac scripsit contra haereticos. Biblia sacra ab illis depravata, restituit integritati suae , & Hungarico idiomate edidit. Gabrielem Bethlehemum, Transylvaniæ principem victoriis insolentem, palam Tyrnaviæ corripuit, quod tot millia Christianorum Turcis prodidisset. Eapropter extrema illi timebantur, sed ea libertate majorem ab eo principe retulit estimationem, & honorem, donatus etiam luculento pecuniae subsidio pro Bibliorum sacrorum impressione.

6. Caltagiroriæ, anno 1622. P. Franciscus Farsia, Italus. Licentiūs vivens in saeculo, cum forte occurisset Venerabili Eucharistiæ, quæ per plateam deferebatur, erumpens inde radius ita hominem perstrinxit , mutavitque, ut subito in alium mutatus, ad Societatem se receperit, & plures exemplum suo ad fru-

frugem reduxerit. Eximus deinceps fuit in cultu SS. Eucharistiae, ac potissimum in iteranda crebrius communione spirituali, & dignabatur illum subinde DEUS cœlestibus visis, & solatiis, sapore quoque, & odore admirando in usu ejusdem Sacramenti.

### XXXI. OCTOBRIS.

I. **P**Ostquam Pechini apud Sinas, post obitum P. Matthæi Ricci, viri Apostolici, & quasi Parentis Ecclesiæ Sinensis, multo labore, & singulari Imperatoris gratia, Villam suburbana, valde opportunam, pro ejusdem sepultura comparârunt Socii ( non enim licet in urbibus sepelire defunctos ) delatum est illuc defuncti corpus, non eâ pompâ, quâ Sinæ utuntur, & est triumpho, quam funeri similior ; sed eo apparatu, qui Christianos, & Religiosam modestiam decebat : solemnibus verò exequiis dicta dies prima Novembris. Interim tumulo paratus est locus, divinóque consiliō factum : ut qui per universam

vitam expugnârat idola , mortuus ea  
 secum sepeliret. Erat in ea Villa ædi-  
 ficium non inelegans, in cuius aula pri-  
 maria ara consurgebat ingens è lapide;  
 cui insidebat monstrum grande, à ca-  
 pite ad calcem inauratum ( quod Sinæ  
*Ticam* vocant, atque telluri , thesauris-  
 que præesse fabulantur ) in capite co-  
 ronam , manu sceptrum gestans. Plu-  
 tonem veterum gentilium Europæo-  
 rum referebat. In utroque pariete  
 picti videbantur decem Inferni prin-  
 cipes, qui reorum scelera cognoscen-  
 tes, ad meritas dam habant pœnas. An-  
 te eos stabant dæmones multò terribi-  
 liores, quàm nos pingimus , variis pœ-  
 naliū instrumentorum signis instru-  
 eti, atque horribiles. Damnatorum  
 quoque supplicia ità repræsentaban-  
 tur, ut spectantibus horrorem incute-  
 rent; nam alii in lecticis ferreis torre-  
 bantur, alii ferventi oleo coquebantur,  
 alii in frusta discerpebantur, alii medii  
 secabantur, alii à canibus lacerabantur,  
 &c. Ceterūm hæc inferorum terricu-  
 lamenta dæmon ità composuit: ut non  
 so.

solum sceleratos non coercent, sed  
incitarent. Facillimum enim illa eva-  
dendi modum adstruebant: si nimirum  
certo ritu adoraretur idolum, & mini-  
stris ejus aliquid stipis offerretur. Ido-  
la igitur omnia dejecta, concremata,  
& deleta; ara ipsa diruta, parietum  
in fano pictura calce incrustata est.  
Tum in recenter erecta decentiore,  
ara elegans Salvatoris nostri imago hoc  
die collocata est; tumulus aptatus, in  
quo deponeretur defuncti corpus, &  
locus pro cemiterio designatus. *Tri-*  
*gautius in expeditione Sinensi lib. 5. cap. 21.*

*Eodem die obierunt.*

2. Corcagiæ in Hibernia, an. 1604.  
Dominicus Colinus, Coadjutor, Hiber-  
nus. Claro satus genere, contra Secta-  
rios Centurio militavit in Gallia, deinde  
in Hispania Dux classarius per annos  
octo; semper, & miles bonus, & vir-  
probus. In Societatem receptus, mis-  
sus est in Hiberniam ad populares suos  
juvandos, ubi captus ab haereticis, va-  
riéque solicitatus, ut ad eorum castra  
transiret, cum fortis in fide, & religio-

ne persisteret , crudeliter tortus , & manib[us] post terga revinctis , in veste Societatis ad patibulum raptus est . Escal[is] gravissimè monuit Catholicos , nè spe , metuve , aliisque haereticorum artibus sinerent se perverti . *Suspicite* , inquietabat , in cælum , & priscam fidem , quam præclari majores vestri sunt professi , non degeneres perseveranter conservate , pro qua , & ego nunc , ut videtis , mortem oppeto . Mox perturbatus , & excarnificatus est .

3. Majoricæ , annô 1617 . Alphonsus Rodriguez , Hispanus , notæ Sanctitatis Coadjutor , à Christo Domino , & ejus Matre sanctissima tenerimè dilectus , plurimisque singularibus gratiis ornatus . Inviserunt aliquando ægrotantem , dirisque doloribus cruciatum , atque ad lectuli pedem confidentes , dulci colloquio recreârunt , ac persanârunt . Pia simplicitate dixit aliquando : *O Mater DEI , si tantum me amares , quantum ego te !* Respondit illico DEI - para : *Falleris , mi Alphonse , plus ego te amo , quam tu me .* Alias , cum Patris cuiusdam comes fuisset , ac largo sudore ma-

madidus orationi instaret, DEI para V.  
sudorem illi, lacrymásque abstersisse  
traditur. Multa illi arcana, & futura  
revelata; & vix quidpiam erat, quod  
oratione non impetraret. Merebatur  
has cœli gratias, & solatia profundissima  
sui demissione, & acri mortificatione.  
Dirè se flagellabat, jejuniis macerabat,  
cibos sale non condiebat, in omnem se  
afflictandi occasionem assiduè intentus.

4. Lugduni, in Gallia, anno 1663.  
P. Theophilus Raynandus, Gallus Ni-  
ceensis. Quanta fuerit viri eruditio,  
patet tum ex 19. Tomis in folio de edi-  
tis materiis diversissimis, tum ex elogiis,  
quibus eum honorârunt doctissimi, pri-  
mæque dignitatis Scriptores. Doctri-  
nam tantam ornârunt non mediocria  
virtutum decora. Regularum religio-  
farum in primis observans, cibi parcus,  
castimoniæ tam studiosus, ut necessaria  
cum mulieribus colloquia verbis ad-  
modum paucis definiret. Vocationis  
suæ tenacissimus, etsi subinde nec ad-  
versa deessent, nec solicitatores, qui  
en magna, & splendida promittebant ex-  
tra

tra Societatem : datam ei fidem , omnibus aliorum promissis habuit potiorem . *Sotuell. in Bibl. Soc.*

## I. NOVEMBRIS.

I. **P**AULUS III. PONT. MAX. ANNÔ 1549.

**P**rivilegia plurima Societati largitus est ad melius regimen ejusdem , & ministeria , per Constit. incip. *Licet debitum pastoralis officii , &c.* Bullar. Soc.

2. In India , cùm Chiaulenses Christianos viseret P. Gaspar Barsæus , vir sanctitatis famâ , & zelô Apostolicô clarus ; occurrit venienti cum clero populus , omissis , quos in eum festum diem adornârant , ludis cannarum , & taurorum ; supplicant , urgéntque , ut de sacro pulpito audiri , nè gravetur . Excusat ille , quòd id sinè Vicarii offensa fieri non possit . Sed tumultu à populo concitato , misit ipse Vicarius , petiitque , ut populo satisfaceret . Auditus est extemporaneus Orator , egusto , ut iterum audiri mereretur . Nondum finierat prandium , cùm adfuit vir primarius , qui civitatis nomi-

ne

ne instituit , ut nè gravaretur iteratòfam  
mentem populum verbô DEI refice-  
re , quandoquidem ejus præsentia diu  
frui non licet , Vicario assentiente ,  
ducitur in campum apertum , cùm tem-  
plum nullum caperet auditorem . Ubi  
excitatum pulpitum conscendit , eo  
verborum pondere , & affectuum ar-  
dore dixit : ut vastum illud auditori-  
um , plorantium fletu , & misericordiam  
poscentium clamore assiduè resonaret .  
Finita concione primores urbis flexo  
poplite , cum lacrymis obsecrârunt , ut  
S. Sebastiani templum , & annum re-  
ditum pro fundatione Collegii admit-  
teret . Sed festinanti ad alia de his  
tractare non licuit . *Bartolus Asiat.* *bif.*  
*lib. 5. num. 24.*

3. Apud Sinas solemini apparatu ce-  
lebratæ sunt exequiæ P. Matthæi Ric-  
cii , de quo heri . Quamvis enim San-  
ctis Omnibus festus esset is dies , quia  
tamen Sinenses , etiam Christiani so-  
lemnissimè , & non lugubri paratu , ce-  
lebrant funera suorum , visum est ma-  
gno illi Servo DEI id honoris non de-  
bet

negandum. Convenere Neophyti omnes, cereis suis, suffitibusque instruti ad agendam celebritatem; Missa prima de Omnibus Sanctis, qua potuit, pompa, & Musicorum concentu, cantata est, eâ peractâ, Patris tumbâ è loco, ubi asservabatur, in ædem sacram delata, cœptumque recitari Officium Defunctorum, cui altera Missa funebris successit, ac denique post solitos Ecclesiæ ritus, in præparato fornice Defuncti depositio, inter veras, largasque Christianorum, præsertim Doctoris Pauli, unius è primariis Mandarinis acrymas. *Trigautius in Expedit. Sinensi lib. 5. cap. 21.*

*Eodem die obierunt.*

4. Ximabaræ in Japonia, anno 1622.  
P. Petrus Paulus Navarrus, Italus, cum duobus Sociis Japonibus, Dionysio Fugixima, & Petro Onizucca, odiô fidei combusti. Pro morte tam gloriosa paravit se P. Petrus præmissis Confessione generali, & Exercitiis S. Patris. Auditâ mortis sententiâ, Rosario è collo pendente

dente, velut torquatus, cilicio insuper armatus, ivit ad rogum, Sociis præcinnens Litanias; cecideruntque felices victimæ Fidei, & Charitatis Christianæ.

5. Limæ in India Occidentali, anno 1592. P. Joannes de Atienca, Hispanus. Inter orandum ardentius Vallisoleti, sentire sibi visus est humeris suis insidentem Indum, atque identidem flagitantem *Veni, ergo juva me, veni, ergo juva me!* Igitur sine tergiversatione, & viriliter juvit apud Peruanos, superatis gravibus difficultatibus magno animo, prudentia, & zelo.

6. In Gallia propè Biterras, anno 1629. P. Claudius à S. Columba, Gallicus. Cultui Venerabilis Sacramenti, impensisimè addictus, singulis propè horis illud visitabat in Sacello domestico, ibique etiam noctes magna ex parte ducebat insomnes. Si aliquando sacris operari non posset; Communione spirituali, ut vocant, centies repetita per diem, damnum compensare nitebatur. Occubuit pestifera lue, quâ tactis in pago quodam operam præsttit indefessam.

7. Eo-

7. Eodem in obsequio , anno 1618 . felicem , & laboriosam animam posuit Duaci P. Gerardus Vervianus postquam bis de contagiosa morte triumphavit superstes.

## II. NOVEMBRIS.

1. **A**nnō 1567. prima in Peruviam, Indiæ Occidentalis regionem, suscepta est à Societate expeditio , postulante , urgente , & sumptus omnes largè suppeditante Philippo II. Rege Hispaniarum. Ante octiduum parata jam profectione, ità Oceanus insolescere cœpit, ut ab inferorum satellitibus concitari videretur ad absterrendos Evangelii præcones. Sed viros fortes, præsertim in causa pia non terrent, sed animant pericula. Postquam Calendis Novembribus deseruit mare , postridie vela data mitioribus jam ventis. Prospera fuit , nec infructuosa navigatio. Sociis vectores omnes , inter quos complures regii Ministri , ad eximiam modestiam , & pietatem componentibus. *Sacchin. hist. Soc. p. 3. lib. 3. n. 265.*

2. Romæ, annô 1578. Prælectiones Theologicas exorsus est P. Franciscus Suarez, & quidem auspiciatissimè. Ipsum enim Pontificem Max. Gregorium XIII. Auditorem habere meruit primæ Lectionis suæ. Dedit id gratiæ Pontifex humanissimus, tum eminenti doctrinæ viri, quam fama secundissima longè, latèque celebrabat ; tum excitandæ aliorum Auditorum aviditati. Primo aspectu visus est Suarez quibusdam famâ suâ minor ; quod annum secundum supra trigesimum nondum explèisset, at ubi audiri, atque thesauros eruditionis suæ aperire cœpit, communi suffragio superasse famam, & Pontificem auditorem meruisse, est pronunciatus. *Maffeius in vita cap. 8.*

3. Anno 1686. P. Carolus de Noyelle. Præpositus Generalis literis datis ad P. Thomam Ujeyski, olim Episcopum Chijoviensem, amplas ei gratias egit pro felici labore impenso conciliandis Patribus Ordin. S. Basili, cum Illustrissimo Russiæ Metropolita, qui compluribus annis dissidebant, nec vel

vel Nunciorum Apostolicorum indu-  
stria , nec Curiæ Romanæ authoritate  
componi poterant. Commissum de-  
nique negotium ferè desperatum Patri  
Thomæ , qui sua comitate , prudentia ,  
& sanctimoniaz opinione ità partes cir-  
cumegit , ut plenè , & huic , & illi fue-  
rit satisfactum , & pax æternô decretô  
fancita. *Brietius in vita cap. 41.*

*Eodem die obierunt.*

4. Duaci in Belgio , annô 1609. P.  
Georgius Colibrant , Belga , afflictandi  
sui singulariter studiosus. Modum po-  
nere jussus tot suis mortificationibus  
obedienter respondit , se quidem pari-  
turum , sed DEUM vices suas acturum ,  
& suppleturum. Nec multum fluxit  
temporis , cùm acerbissimis calculi do-  
loribus cruciari cœpit. Familiare illi  
fuit hoc acroama : *Ad vitam æternam.*  
*Ad hanc dirigebat , & trahebat omnia.*

5. In Germania , annô 1642. P.Lau-  
rentius Passokius , Silesius. Præclaræ  
operæ in castris Catholicis positæ insi-  
gne præmium tulit , mortem gloriosam.

Cùm

Cum enim tribuni cuiusdam in Lipsien-  
si pugna vulnerati, confessionem exci-  
peret, ab hoste hæretico victore depre-  
hensus, interrogatus est, quis esset? di-  
xit se Sacerdotem esse Catholicum.  
Jussus MARIAM Virginem DEIpa-  
ram execrari, non tantum renuit, sed  
in amplas ejus laudes erupit. Gladiô  
igitur percussus, & glande plumbea  
trajectus, feliciter occubuit. In ea-  
dem acie, eodemque opere deprehen-  
sus P. Matthæus Cramerus, Bohemus,  
simili nece sublatus, simili laurea do-  
natus est.

6. Granatæ in Hispania, anno 1611.  
P. Aloysius Ponce Hispanus, Ducis de  
Arcos filius. Quantum eminuit forte  
nascendi, tantum se deprimebat spiritu  
solidæ humilitatis, promptus ad omni-  
um etiam abjectissima obsequia. Re-  
rum terrenarum usu ita se privavit, ut  
nihil etiam tenue acciperet, daréique,  
nisi petita priùs, & obtenta facultate.  
Confessionalem sedem tam diligens oc-  
cupabat, ut diceret, se nisi hoc titulo,  
non mereri panem quotidianum. A

me-

medico monitus de morte imminente,  
*Benedictus*, inquiebat, *DEUS*, qui me  
 beneficium tantum dignatus es, ut desideratam  
 illam horam videam, quā moriar in ejus  
 domo.

### III. NOVEMBRIS.

**I.** Ecce potentiam in brachio suo.  
**F**Magnus Indiarum Apostolus  
 Xaverius, illud Romam vehebatur ex  
 India anno 1614. Æquum videbatur  
 Claudio Aquavivæ, Præposito Gene-  
 rali, ut non sola India gloriaretur no-  
 vi Apostoli sacro Corpore, sed paret  
 saltēm aliqua illius frueretur Europa.  
 Jussit ergo à Corpore adhuc integro,  
 & incorrupto, Goæ quiescente, præ-  
 scindi Brachium, ac Romam devehi. In  
 itinere incidit navigium, quo sacra li-  
 psana vehebantur, modicum, & non  
 armatum (cercorum vocant) in Batavos  
 privatas, qui prædam conspicati, har-  
 pyarum instar advolabant. Cūm non  
 suppeteret modus evadendi, vel se de-  
 fendendi Rector Domus Probationis—  
 Goanæ, Sebastianus Gonzalez, qui sa-  
 crum

crum pignus vehebat , arreptō Brachiō Xaverianō prodit ad navis marginem , & reliquis in genua procumbentibus , mandat hostibus jam jam assultum parantibus , nè propriūs accedant . Mira res ! illico hostilis myoparo ita stetit defixus , ac si subito gelū mare duratum fuisset . Interim cercurus feli citer evasit , attonitis hostibus , Romā que tenuit cum thesauro suo . *Bartolus in vita lib. 4. num. 40.*

2. Duacenum in Belgio Collegium exemit S. Pius V. anno 1568. ab omni Universitatis Duaci existentis jurisdictione . Cùm enim Lectiones Scholasticæ jam inchoandæ essent , & Illusterrimi hospites invitati essent , misit ad Collegium Magistratus Academicus , inhibendo : nè quid tentaretur , nostri , si Scholas aperire vellent , debere ipsos primū Academiæ jura mentum præstare , seu incorporari eidem . Composita res est ad tempus , donec Romā venirent responsa , permisumque , ut scholæ inchoarentur . Interim S. Pontifex interposuit autho rita-

ritatem suam , & missis ad Academiam literis , hac die datis , decrevit , declaravitque , ut Collegium cum omnibus Studiofis suis exemptum esset à jurisdictione Academiæ , & secundum Institutum suum liberè doceret juventutem .  
*Sacchin. hist. Soc. p. 3. lib. 4. n. 208.*

3. Decreto 8. Congregationis Generalis XIV. statutum est : ut quotannis per universam Societatem celebretur Commemoratio omnium in Societate defunctorum , eo die , qui à Commemoratione omnium Fidelium Defunctorum primus occurreret non impeditus ; Sacerdotes omnes sacrum facerent paratu nigro ; ceteri verò Coronam , seu tertiam Rosarii partem recitarent pro iisdem Defunctis in Societate .

*Eodem die obierunt .*

4. Eboræ in Lusitania , anno 1608 . P Antonius Pinas , Lusitanus . Nimiùm gracili cùm esset corpore , & à medicis vix tribus , aut quatuor annis victurus di-

diceretur, ad Societatem admissus non est. At ille medicis in faciem resistens : Ego, inquiebat, & in Societate vivam , & vobis omnibus superstes ero, quod & evenit. Ter se ad obsequia pestifero- rum exposuit, sibiitque labores gravissimos victor. Fratris Germani literas ita, ut venerant, obsignatas, per tres annos in cubiculo habuit, iis pro atramen- tario tegendo usus.

5. Hispali in Hispania , anno 1609. P. Melchior de Saniuan , Hispanus. E tyrocinio suis reddi debuit, ut furentem Parentem, virum nobilem compesceret, at ille votō conceptō se obligavit ad redeundum; id quod præstitit. Gubernationi Collegiorum, & Provinciarum maximam ætatis partem impendit, eō memorabilis, quod mira suavitate acerri- mus esset religiosæ disciplinæ vindex. Quotidie diem claudebat mortis immi- nentis memoriâ, & meditatione.

6. Ingolstadii in Germania , anno 1634. Michaël Alber, Germanus, Coad- jutor. Strenuus in obsequio pestifero- rum, invidenda morte occubuit , post

amissos in eodem obsequio Socios quatuor: inter quos laudatur zelus Patris Thomæ Resch, quod intra 13. annum spatium, recensuerit ad centum, & undecim millia capitum, quæ pro sacro pœnitentiaæ tribunali à noxis suis absolvit.

#### IV. NOVEMERIS.

**L**FESTUM S. CAROLI BORROMÆI CARD. & Archiepiscopi Mediolanensis, ob oculos nobis penit ejusdem singularem, munificam, & constantem benevolentiam erga Societatem. Cùm sacris Ordinibus initiatus, se ad primam hostiam DEO offerendam præpararet: adiit domum Professam Romanam, in qua Sacris S. Ignatii Exercitiis excultus est. Post celebratum primum Missæ Sacrificium, secundum obtulit in Sacello ejusdem domûs, quô S. Pater usus est. Cùm ad sanctiorem vitam aspiraret, elegit pro directore P. Joanneim Bapt. Riberam, cuius dum maximis passibus ad culmen perfectionis tendebat. Primis Sacerdotii sui

sui annis quolibet anno, postea bis in annos singulos animum excolebat Exercitiis S. Ignatii, semper adhibito è Societate directore aliquo, imò alios quoque, quos poterat, inducebat ad eadem absolvenda; specialiter Clericos Seminarii sui singulos iisdem exerceri curabat, tum in ipso ad illud ingressu, tum ante susceptionem sacrorum Ordinum, concinnavitque pro illis habitaculum multis distinctum cellis, cui titulum adscripsit: *Asceterion.* Quotiescumque iter suscipiebat, adesse sibi voluit comitem è Societate, ac vespere ab eo proponi puncta Meditationis. Confessario ordinariè utebatur Patre Adorno, quem ità reverebatur; ut transiens cubiculum ejus caput reverenter inclinaverit. Mediolani Collegium, & domum Professam fundavit. Domum Probationis Aronæ; præterea author fuit, ut in Helvetia duo fundarentur. Collegia: Lucernense, & Friburgense. Nec mori voluit sine assistente sibi P. Adorno, cui post mortem gloriofus apparuit, prædixitque brevi se-

cuturum. *Lancicius tom. 2. Opusc. 17. cap. 3. Nadasi in Anno dier. Memor. 13. Jan. de P. Francisco Adorno.*

2. S. Franciscus Xaverius an. 1549. epistolam dedit ad Socios Goanos, in qua illos monet in primis, ut in defectu Concionatorum studeant populum ædificare probæ vitæ exemplis. *Boni, inquit, apud improbos vita exemplo assidue concionantur, atque adeò plus, quam concionatores è suggestu sæpe proficiunt; cùm longè plus momenti ad permovendum sit in factis, quam in dictis,* Deinde obnoxè commendat, ut sui ipsorum curam habent. *Magnopere hortor, ut vobis ipstis, quod caput est, primum attendatis. Qui enim sibi nequam est, cui bonus erit? Quomodo alios curare potest, qui seipsum negligit? Quomodo attentus, ac diligens erit in rebus alienis, qui est dissolutus in suis, &c.* Epist. Veter. lib. 3. ep. 6.

*Eadem die obierunt.*

3. Ulyssipone in Lusitania, an. 1599. P. Petrus de Fonseca, Lusitanus, magnum Societatis in Lusitania columen, tum

tum ob religiosam prudentiam, ac sanctimoniam, tum ob doctrinam, & libros editos, tum ob res gestas, sive à privato, sive à Rectore Conimbricensi, Præposito Ulyssiponensi, Assistente Romano. Philippus II. Hispaniæ Rex maximis quibusdam negotiis ipsum adesse voluit. Domos Orphanorum, & Catechumenorum, Seminarium quoque Hibernorum suâ industriâ erexit. Domum Conversarum inchoavit, Xenodochia stabilivit, Fratres B. Joannis DEI in Lusitaniam evocavit, & plura alia bono publico indefessus instituit. Miræ fuit modestiæ in opinione sua submittenda sententiæ alienæ; miræ efficacitatis in tranquillandis mentibus perturbatis, miræ tranquillitatis in rebus turbidis, & afflictis. Si à quo offensus fuisset: *Ego verò ajebat, bene illi faciam, velit, nolit.* Omnis ejus vitæ series instar horologii fuit: ità omnia ejus negotia in horas suas scitè distributa erant.

4. In Japonia, anno 1614. P. Jacobus de Mesquita, Lusitanus, quam an-

nis 48. magno labore excoluit. Tres Japonicorum Principum Oratores ad Obedientiam Gregorio XIII. Pontif. Max. deferendam deduxit in Europam. Redux in Japoniam, cum gravissima persecutio misceret omnia, è regno proscriptus, exul ærumnis confectus, in tenui pescatoris casa contabuit.

5. Syracusis in Sicilia , anno 1621. Michaël Florius , Coadjutor , Italus. Quamvis eleganti , quem diuturno labore excoluerat , præcesset horto ? nullum illius fructum delibavit unquam. Ad extremam usque senectam , vesperi ad sanguinem usque se cædebat quotidie. Sub agonem ipsius comparuit ad portam Collegii homo ignotus , qui compluribus accensis facibus , eam ædium partem , in qua Michaël moriebatur , miro lumine illustravit.

## V. NOVEMBRIS.

I. **S**anctus Xaverius è Japonia epistolam dedit anno 1549. ad Petrum de Sylva , Præfectum Malacensem , quâ inter cætera commendat illi

Ja-

Japones pauperes, qui jam sunt, ac futuri sunt Christiani. Utitur autem ingenioso conceptu à lucrosa Lusitanorum negotiatione ducto. Quod si, inquit, tantum mihi fidei tribueres, ut sumere me sineres officium tui in his locis Procuratoris, spondere ausim, effecturum me : ut quamcunque mihi commiseris pecuniam, eam tibi plus quam centuplicato foenore repræsentem; idque lucro à periculis itinerum & naufragiorum planè seculo. Scire aves, quod hoc sit genus compendiosissimæ nundinationis? Misis ambagibus dicam. Induc, sodes, in animum, largiri nobis, quod dividamus egentibus harum terrarum Christianis, qui modò sunt, & qui mox sient. Hujus sic collocatæ sortis, spondeo fidejussore Christo, plus quam centuplum in cœlo tibi reddendum, &c. *Epist. Veter. l. 5. ep. 15.*

2. Annō 1561. expediti à Pio IV. in Ægyptum ad Copthorum Patriarcham, Alexandriam tenuerunt PP. Christophorus Rodericus, & Baptista Elianus.

In itinere cùm Christianos , qui eadem navi vehebantur , ad normam probi- Christiani facile composuissent , non parum negotii habuerunt , in dissol- venda prava quadam Sodalitate , quam inierant inter se decem nobiles juvenes . Creabatur singulis hebdomadis Præ- fectus , cui ceteri parerent ; leges sibi condiderant , quarum transgressores certâ pecuniâ mulctabantur ; omnia au- tem Bacchum , & Venerem spirabant . Effecerunt tamen Patres , præfertim orationibus ad DEUM fusis , ut improba illa Sodalitas in sanctam converteretur . Sensim enim pudere cœpit petulantes illos insolentiæ suæ , videntes etiam vi- lissimos alios ad omnem probitatem in eadem navi compositos . Ergo tandem decreverunt mutare stylum , oppositás- que sibi scribere leges . Qui obscœ- num verbum proferret , aut jurare au- diretur , qui statutas preces negligeret , &c. mulctam penderet . Factum de- nique , ut electus Præfectus omnibus imponeret mandatum de noxis suis per confessionem Sacramentalem expiandis .

Et

Et sic insolens illa de grege Epicuri decuria, in sanctam versâ est cum omnium admiratione Sodalitatem. *Sachin. hist. Soc. p. 2. lib. 5. n. 135. & seqq.*

3. Fulda in Germania, an. 1573. gravissima concitata est ab hereticis Nobilibus, & quibusdam insolentioribus Ecclesiasticis, in Nostros tempestas. Cittati sunt hodie ad Concilium, quod ipsi conflârunt. Sed Abbas, civitatis Dominus, & Romani Imperii Princeps, vetuit illud audire, suâmque protectionem cumulatè promisit & præstítit. *Sachin. hist. Soc. p. 4. lib. 1. num. 91.*

*Eodem die obierunt.*

4. Xaoceæ apud Sinas, anno 1593. P. Franciscus de Petris, Italus. Magno labore, nec minore periculo, rem Christianam promovit apud Sinenses. Coadjutori, in Vocatione sua firmando dixit se ad Societatem à DEI para Virgine invitatum disertis verbis: *Ingredere Filii mei Societatem, & in ea vacatione persevera.* Mortis suæ tempus non semel ex vero prædixit. Leni febricula

tentatus accersivit P. Riccium , quem  
arctissimè complectens : Vale,inquit, mi  
Pater, DEUS me vocat , paucisque pōst  
horis expiravit. *Juvencius l. 19. part. 5.*

5. Limæ in India Occidentali, anno  
1613. P. Stephanus Paez, Hispanus. Ad  
animarum salutem in illis partibus ef-  
ficaciùs procurandam , usus est cultu, &  
ope singulari DEIparæ Virginis, cuius  
Sabbata, panis & aquæ levamentō con-  
tentus, transfigebat. Ad perfectionem  
religiosam, per heroicas de se relatas vi-  
ctorias contendebat. Mortui corpus  
cūm ad templum deferretur, visus est  
S. Ignatius ab ara maxima illi obviām  
ire, & P. Stephanum summa gratulati-  
one excipere.

6. Vallisoleti in Hisp. anno 1642. P.  
Ludovicus de Valdivia, Hispanus. Post-  
quam in Americam se transtulit , pri-  
mùm in Provincia Peruana insignem  
Novitiorum Magistrum,& post trienni-  
um Theologiæ Professorem egit. De-  
inde ad fundandam Provinciam Chi-  
lensem translatus , multa pro Indis pas-  
sus est, & egit contra quosdam violen-  
tos

tos illorum oppressores. Denique ut Regem ipsum certius informaret de misero illarum gentium statu, in Hispaniam remigravit. Rex agnita hominis prudentia, & dexteritate, infulas ei Episcopales obtulit, sed repulsam passus, instituit, ut Regii Visitatoris munus in illis regionibus admitteret, regiaeque suprema authoritate statueret, quidquid ad pacificandos populos illos, & promovendam religionem adverteret necessarium. Accedente praepositi Generalis Claudi assensu, munus, arduum sanè, admisit Valdivia, Oceanum remensus est, auctoritate regia universam provinciam inspexit, supra decem Indorum millia iniqua servitute exemit, Hispanorum quorundam violentiam coercuit, rebusque ex sententia, & commodo Religionis, compositis repetiit Hispaniam, ut Regem de gestis informaret. Qui probatà Patris operâ, iterum illi dignitates varias obtrusit, sed Valdivia longè post humilitatem religiosam habuit. *Sotuellus in Bibl. Soc.*

7. In Perside, anno 1660. P. Ale-

xander de Rhodes, Gallus. Primus cām uno Socio lumen Evangelii intulit in regnum Tunchin, Sinis finitimum, spatiōque annorum trium supra quinque hominum millia Christo subjecit , inter quos non pauci Mandarini , aliique è prima Nobilitate. Cūm à rege juberetur regno exesse, ità per idoneos Cathechistas rem Christianam promovit , ut intra triennium numerus fidelium creverit ad 30. millia. Simili felicitate fidem propagavit in Cocincina: verūm & indē ejectus, rediit in Europam, conscriptisque Sociis migravit in Persidem, ubi post annorum aliquot gloriofos labores, adiit iter Æternitatis, quievitque in Domino. *Sotuell. in Bibl. Soc.*

## VI. NOVEMBRIS.

I. **C**Um Fulda ad datam heri citatio-  
nem non comparuissent nostri, hodie ab iisdem hæreticis nobilibus , & insolentibus Ecclesiasticis , lata est sententia proscriptionis, ut intra decimum quartum diem Fuldā excederent , si cunctentur , se validiore brachio ada-  
ctu-

cturos. Quò cùm progressam rem vi-  
deret Abbas, optimus, ad opem Cæsaris  
confugit, miraque felicitate, ac celeri-  
tate, præter opinionem omnium impe-  
travit mandatum: nè quis vel Abba-  
tem, vel Catholicos, ac nominatim, nè  
quis quempiam è Societate læderet.  
Quo promulgato, quies nonnulla re-  
diit, atque Abbas rem ad meliorem sta-  
tum reducere conatus est. *Sacchin. in  
hist. Soc. lib. 1. part. 4. num. 91, & 92.*

2. Duacena quoque tempestas, ab  
hæreticorum furore concitata, deto-  
nuit. Senatus furentis plebeculæ ple-  
biscitum rescidit, & honorificō editō  
decretō Societatem summis ornatam  
laudibus, nè redire gravaretur, orabat,  
missis à Senatu, & Academia Legatis  
Stapletonio, & Ferrario. Ità quinto-  
decimo ab excessu die ad pristinas se-  
des, & labores redierunt Socii, eò ci-  
vitati chariores, quò majore temeritate  
fuerant ejecti. *Idem ibid. n. 146.*

3. Romæ, annō 1699. Eminent.  
Cardinalis Bullonius, Societatis aman-  
tissimus, & amiciissimus, ad Domum  
Pro-

Probationis Tyronum nostrorum se recepit , spiritualibus S. P. N. Exercitiis novem dierum spatio vacaturus : ut se pararet imminenti solemnitati , & muneri , aperiendæ scilicet Portæ sanctæ pro Anno sancto Jubilæi Magni. Quod munus Pontifex ipse obire consuevit , sed Innocentium XII. adversa valetudo impedivit.

4. Hac die annō 1601. Cardin. Bellarminus literas dedit ad Ericum à Lotharingia Episcopum , & Comitem Virodunensem , qui per Bellarminum admissionem ad Societatem impetratrum se speravit , quam à Pontifice maximo , & Aquaviva impetrare non potuerat. Honorum ille lucem fugiens , delegerat Societatem , ubi delitescere tutò posset , in qua scilicet præclusum , interposita voti religione , sacris dignitatibus aditum noverat , Romamque contendebat annō 1596. in comitatu 20. adolescentium nobilium pari desiderio æstuantium , ut peteret à summo Pontifice veniam pedi pastoralis depnendi. Etsi autem iter ingressus erat diffi-

dissimulato consilio, latere tamen omnino non potuit, ac Mussipontani Collegii Rector illud subodoratus, ad Claudium Aquavivam scripserat, quanti interesset publicæ rei, ut vir tantus Ecclesiæ sibi commissæ gubernacula non abjiceret. Monitus à Præposito Generali Pontifex, Ericum in statione iussit consistere. Gravior Aquavivam de illius comitibus augebat solicitude. Profugerant è Gallia genere omnes, & pietate clari, sed insciis plerique, invitisque parentibus. Satiùs igitur induxit, ut illorum bona pars cum Erico rediret in patriam. Quinos Romanis tyronibus addidit, alios remissos ad Virodunensis Probationis domicilium, non nullos in aliud tempus distulit, molestiam, & turbas ab eorum parentibus orituras reformidans. Quod Ericus nec per Bellarminum obtainere potuit, hoc ejus consanguineus adeptus Carolus à Lotharingia, qui Societatem amplexus anno 1622. dignum se Ignatio alumnum præbuit. *Juvencius* fol. 907.

*Eodem die obierunt.*

5. In Syria, anno 1653. P. Joannes Amieu, Gallus. Per annos 18. multum laboris impendit Missionibus illis. Alepi Sodalitia duo Maronitarum erexit, tertium Armenorum, Francorum cœtum, restituit. Missiones Damascanam ac Tripolitanam instituit, Sidoniam stabilivit, ibique Francorum Sodalitium posuit, multa perpessus. Familias integras tum à Mahumete, tum à Græco schismate abduxit. Maroniticam tempestatem prudenter tranquillavit, & pro Romano Maronitarum Collegio utiliter laboravit, Vir Apostolicus, & rebus magnis agendis omnino idoneus.

6. Limæ in Peruvio anno 1614. Alphonsus Ovandus, Novitus Hispanus. Virginitatis florem ut non solùm integrum, sed undequaque nitidum, & virginem conservaret, multa, & acri mortificatione corpus atterebat, ciliciis asperrimis undequaque coniectum, & flagris laceratum. Per DEI - param  
Vir-

Virginem insigni orationis dono excelluit, ejusque sola cogitatione dulcissimis diffuebat lacrymis. Illi offerebat, quidquid ageret, totusque in id incumbebat, ut digna tali Regina offerret. In nullam legem nostram peccare visus est, nec unquam verbum otiosum loqui auditus.

7. Madriti in Hispania, anno 1669.  
 P. Joannes Antonius Velasquez, Hispanus. Postquam Collegia Monfortense, Segobiense, Abulense, Methymnense, Vallisoletanum, Salmanticense, totamque Provinciam cum laude gubernavit. Madritum evocatus à rege Filippo IV. constitutus est Consultor Congregationis ibidem erectæ, de Immaculata Conceptione DEI - paræ Virginis tuenda, quo in munere per annos aliquot egregiè versatus est, editis etiam duobus Tomis in fol. de eadem Concept. Immacul. ac tertio de MARIA Advocata. Alios 3. eruditos Tomos edidit in Psalmos, & Epistolam S. Pauli ad Philipp. septimum de Augustissimo Eucharistia Sacramento. Pruden-

dentia , eruditione , & virtute viri captus Rex prædictus , imposuit eidem , ut semel singulis hebdomadis secretò se accederet , admenerétque , si quid pro bona regni administratione desideraretur , at ille non minùs humilis , quàm sapiens , negavit homini è Societate id munéris convenire . *Sotuell. in Bibl. Soc.*

## VII. NOVEMPERIS.

I. **D**Idacus Alvarez , ex sacro Prædicatorum Ordine , annô 1596. Romam venit , acturus totis viribus contra librum Molinæ de Concordia liberi arbitrii cum auxiliis gratiæ . Convenit sinè mora Cardinalem Alexandrinum Protectorem Ordinis sui , ex eodem assumptum ad Senatum Patrum Purpuratorum , ejusque patrocinium in negotio gravissimo imploravit . Ex parte Societatis , ubi intellexit Claudio Aquaviva Præpositus Generalis , Controversiam ex Hispania trahi Romam , omnes omnium Provinciarum Ordinis sui Superiores , Doctorésque per literas consuluit , an istud certamen totius Societatis

tis nomine esset suscipiendum ? Ad quod mirâ concordiâ , ac velut ore uno responsum ab omnibus est in hanc sententiam . In libro P. Molinæ nihil apparere , quod acriorem mereatur censuram ; idéoque abdicandum , vel destituendum non esse justa defensione . Ceterùm videri satis fore , si Provincia ipsius tutelam libri suscipiat , agátque causam illius . Quod attinet ad doctrinam de Efficacia Auxiliorum Gratiæ , cùm per totam Societatem , & in omnibus ejus scholis rejiciatur sententia Præ-determinantium physicè voluntatem humanam ; de hac Controversia suscipi posse certainen nomine totius Societatis Claudio his acceptis responsis , admiratus tam diversarum mentium in unam sententiam , sinè mutua communicatione conspirationem , constituit ab hoc unanimi consilio non discedere . Sed adversariis placuit , non totam concitare , & impugnare societatem ; satis gloriosam arbitrari reportaturos se viatoriam ; si Molinam debellâssent . *Eleuther. hist. Auxil. Grat. lib. 3. cap. 1.*

*Eodem*

*Eodem die obierunt.*

2. Genuæ in Italia, annō 1657. P. Augustinus Centurionius, Italus. Post Rempublicam Genuensem, cui Dux præfuit, magna cum laude administratam, gravissimisque aliis negotiis in variis ad Reges legationibus perfunctus, in Societatem se recepit Septuagenario major. Malebat in eam vineam vel undecimā horā venire, quam non venire. Adhuc secularis, cum Ducis munus gereret, quotidie Pane Anglico vescebatur, ut indē robur, gratiamque traheret ad illud recte administrandum. Securius tamen judicabat in Religione, quam seculo mori. Tota ejus familia religiosa dici potest, cum & pater illius, & mater, fratres, sorores, filii, filiae, variis religiosis Ordinibus sese addixerint raro exemplō. Vixit in Societate non toto biennio, sed virtute cœlo matura.

3. Messanæ in Sicilia, annō 1622. P. Cæsar Cossus, Italus. Somno quatuor tantum horas, reliquum orationi dabat.

dabat. Diebus 15. antefestum Assumptionis DEI-paræ Virginis, totidémque ante festum S. Michaëlis jejunabat. Nunquam extra consueta tempora, etiam in summis caloribus bibit, nunquam ullis cibis oleum, salémque adhibuit, Sabbatis nihil cocti cibi admisit. Pro meritorum augmento in supremo senio biennem cæcitatem non minus alacriter, quam fortiter tulit.

4. In Boetica, anno 1621. Joannes de Aguilar, Coadjutor, Hispanus. Maluit in Societate Coadjutorem temporalem, quam in celebri alio Ordine, ad quem invitabatur, Sacerdotem agere. Procuratorem ruralem per annos 30. non minus religiosum, quam laboriosum egit. Duas horas, antequam alii surgerent, in oratione posuerat. Modico pane contentus, ipse agrum colebat, ipse seminabat, & granum excutiebat, vespere non prius cibum sumebat, quam recitatô DEI-paræ Virginis rosariô. Domum à laboribus redux non refectionem quarebat, sed jejunia stringebat, ubique sui domitor severus.

## VIII. NOVEMBRIS.

I. **S**P. N. Ignatius anno 1607. infis-  
gni miraculo sanavit eximum  
quendam virum è sacra D. Dominici  
Familia, P. Alvarum Molina defini-  
torem, & aliis gestis officiis clarum. Ja-  
cuit in America Limæ octo annorum  
paralyticus, ut nec pedem, nec ma-  
num, nec linguam in voces articula-  
tas movere posset; neque ullum resta-  
bat humanum remedium. Conti-  
git, ut P. Jacobus Oheda, ejusdem  
Ordinis Theologiaz Professor, Societa-  
tis, & S. Ignatii amantissimus, ægrotō  
offerret legendam vitam S. Ignatii à  
Ribadeneira scriptam compendiō. In-  
ter legendum sensit æger singularem  
erga Sanctum in se crescere fiduciam,  
quæ eō evasit, ut ipse die Sanctorum  
Omnium votō conceptō, de ipsius  
festo quotannis præviō jejuniō, & aliis  
quibusdam pietatis exercitiis celebran-  
dō, se ipsius intercessioni humiliter  
commendārit ad impetrandam sani-  
tatem. Iterabat hæc pia desideria, &  
pre-

preces per totam octavam , cùm sub  
 vesperum interiori iussu subitō moneri  
 se sentit : *Surge , & ambula* ; cui veci co-  
 mes impetus quidam animi adfuit , quo  
 excitabatur ad exiliendum è sedili , in  
 quo collocatus fuerat . Surgit ergo ,  
 stat super pedes suos , format gressus ,  
 denique fidenter confert se ad locum ,  
 quò Patres convenerant ad publicam  
 Thcologicarum Thesium propugna-  
 tionem . Improvisus hospes quanto  
 stupore defixerit omnes , vix credibile  
 est ; postquam autem ordine narravit  
 omnia , quomodo per S. Ignatium sit  
 fanatus , omnes stupore in gaudium  
 converso , intermissa disputatione , ad  
 agendas DEO gratias , hymnum Eu-  
 charisticum : *Te DEUM &c.* solemniter  
 decantârunt . Indè Patribus no-  
 stris rem , ut gesta erat , nunciant , quam  
 & instrumento legitimo , autoritaté-  
 que juridica confignârunt . Audito  
 hoc miraculo Christophorus Mesa , So-  
 cietatis adhuc tyro , ad viam æterni-  
 tatis iam comparatus , ubi didicit no-  
 stros convenire pro gratiis DEO agen-  
 dis

dis ob sanitatem Patri Prædicatori per S. Ignatium concessa, petiit à DEO, licet sibi surgere, & cum Sociis hymnum Eucharisticum absolvere. Obtinuit petitum, & exinde consanescens, integræ restitutus est valetudini. *Barzol. in Vita S. Ign. lib. 5. n. 10.*

*Eodem die obierunt.*

2. Romæ anno 1612. P. Bernardinus Piccius, Italus. Severus in se ipsum corpori negabat, quidquid bonâ conscientiâ poterat, infligebat pœnas, quas poterat. In laude Divina assiduus dicebat hominem esse linguam aliarum creaturarum, ideoque debere illum etiam harum vice laudare DEUM. Si quando per valetudinem sacro operari non posset, Coronam B. V. recitabat, & mox vires sufficientes impetrabat. Fœminæ optanti lacrymarum donum, author fuit, ut B. V. lacrymas meditarentur, & Filio offerret. Fecit illa, & impetravit. Inter orandum aliquando visus est P. Bernardinus in aërem sublevatus, & cœlesti concentu recreatus.

3. Gandavi in Belgio, anno 1634  
P. Ni-

P. Nicolaus Jamot , Belga , Philosophiâ cum laude traditâ, ad pretiosiorem lauream aspirans , Gandavi pestiferorum obsequio se tradidit , ubi juvenem è domo ejectum , Sacramentis munitum , in humeros sublatum , viâ longissimâ ad Nosocomium deportavit, ac post heroi- cos alios labores nobili morte honora-  
tus est.

4. Traiecti in Belgio , anno 1571. Henricus Dionysius Belga, vir in scholis, & pulpito sacro præstans in docendo, disputando, & movendo. Inter alios zeli sui fructus habuit Nicolaum Stra- tium, Decanum Traiectensem , quem à vita liberiore ad formam Evangelicam adduxerat. Ut animum gratum Ma- gistro suo testaretur Decanus, testamen- tō cavit, ut eodem, quo P. Henricus, tu- mulo conderetur. Mira res ! bienniō pòst ea ipsa , quâ Decanus moriebatur nocte, P. Henrici tumulus occulta vit- tute apertus est, ut mortuum Decanum reciperet, quiesceréntque simul corpo- ra, quorum animus fuerat unus. Puel- læ, & nativitate mutæ , quæ ægro Patri

Henrico lac caprinum afferre consueverat, post mortem dicitur apparuisse, ac miseræ opem tulisse.

## IX. NOVEMBRIS.

I. **P**ater Julius Mancinellus, postquam in Missione Ragusæa, in Dalmatia, egregiè per biennium laboravit, fructu amplissimo, rogatu Regis Christianissimi, & Venetæ Reip. jussus est à Gregorio XIII. Pontifice ad Partes Turcicas operam suam transferre. Anno igitur 1583. cum Sociis quatuor Constantinopolim attigit heri, mox Galatam, seu Peram (quod est oppidum urbi Constantinopolitanæ proximum, & oppositum in altero sinū marini litora) concessit, ad auspicandam ibi perpetuam Societatis Missionem, quam Sixtus V. firmavit, & etiamnum ibi perdurat. Ibi non tam Turcis convertendis, quod periculosissimum, quam Christianis excolendis, & apostatis ad Ecclesiam reducendis, operam impendunt Socii. Exceptus est Mancinellus cum Sociis singulari benevolentia à Con-

Consulibus Gallicæ, ac Venetæ nationis, consignatūmque illis est ex voluntate Pontificis vacuum cœnobium S. Benedicti cum templo : ubi muniis Societas insistentes , proximorum saluti fese impenderunt. *Sacchin. hist. Soc. p. 5. lib. 3. num. 23. Tanner. in Soc. Apost. Imit.*

*Eodem die obierunt.*

2. Madriti in Hispania, anno 1656. P. Joannes de Guadarrama , Hispanus. Quamvis ingenio , & eruditione excelleret, Grammaticâ tamen solâ occupari voluit, & quibus potuit viis , Professionem quatuor Votorum fugit. Catenam latam plenam ferreis aculeis diu, noctûque gestabat, etiam in morbo , & arduis Missionibus , quas pedibus sinè viatico obibat, adjiciebatque quotidie flagellationem sui cruentam per horæ dimidium. Integrâ horâ orabat expensis in modum brachiis , vel prostratus in terram ; miro interim odore sæpe fragrans. Cùm æger sitî arderet , cuidam aquam offerenti respondit : Non ; quia est contra regulam , Et volo esse fidelis

*DEO etiam in minimo.* Cardinalis Tolitanus eum tanti faciebat, ut iis, qui confiterentur 80. indulgentiarum dies concederit.

3. Conimbricæ in Lusitania, anno 1553. Alphonsus Vasius, Scholasticus Lusitanus præcipuô studiô intentus erat, ut coram Deo versaretur ubique, jamque usu ipso rem sibi facilem reddiderat. Christum reverebatur in Superiori, Apostolos in Patribus in aliis alios Christi discipulos. Horæ plures illi oranti, & lacrymis mananti suaviter fluebant. Per quinque menses lecto affixus, nullo die omisit matutinæ orationis horam, vesperi aliâ quoque adjectâ, præter duplex Examen. Sic religiosè occupatus quievit in Domino.

4. Caleti in Gallia, anno 1606. Remigius Croisius, Belga. Cùm enim post captum ab Hispanis Caetum, urbem Galliæ maritimam, oratu Præfecti edidissi essent nonnulli è nostris, qui civibus præsidio, & contagiosa lue laborantibus auxilio essent, Frater Remigius, dum nulli parcit labori prædictâ mortis horâ, gloriose occubuit. X. NO-

## X. NOVEMBRIS.

I. **E**pistolam dedit S. Xaverius ad P. Franciscum Mansillam, in India laborantem, ac tædiosum ob fructus parcitatem. Excitat ergo, & solatur illum, commendatque plurimum etiam refractarios. Summope-re, inquit, te oro, atque obsecro, Fra-  
ter charissime, ut erga istam nationem benevolentiam, & charitatem præ-  
feras non vulgarem, tēque vicissim di-  
ligi ab omnibus, & amari velis. Sic  
enim habeto, si ab eis diligaris, fore,  
ut istorum animos flectas, quocunque  
libitum fuerit. Itaque eorum imbecil-  
litatem, infirmitatemque moderatè, ac  
sapienter feres, atque illud tecum ani-  
mo reputabis, si minus tales nunc sint,  
quales esse velis, certè aliquando futu-  
ros. Quodsi quidquid velles, nequi-  
veris ab illis impetrare, accipies, quod  
datur; quod idem me facere solitum  
non ignoras. Hoc autem erga illos  
animo eris, ut talem eis te præbeas, qua-  
lem bonus pater improbis filiis, ut nun-

quam eis consulere desinas , quamvis cernas, multis eos vitiis coopertos , &c.  
*Epist. Veter. lib. 1 . ep. 7.*

2. Romæ habita est anno 1603. coram Clemente VIII. Congregatio , & disputatio 20. de Auxiliis Gratiæ ; propositumque : *An omnia , quæ Molina docet circa actus omnes , qui elici possunt à libero arbitrio , simul cum his , quæ de lege dixit , ea omnia dicat , & afferat in ordine ad affectum Justificationis ? Et an ex his , quæ de libero arbitrio , & lege affirmat , resultet immediata , ac proxima , vel remota præparatio ad justificationem , & gratiam ?* Pro Molina respondit P. Ferdinandus Bastida , ostenditque manifestè , neutrum doceri à Molina.

3. Annō 1601. egregiam pro Molina dedit Epistolam hac die Academia Complutensis , quam cùm Doctor Petrus Michaël Academiæ Procurator Clementi VIII. consignaret in manus , respondit Pontifex : Non deesse , qui dicent Censuram illam non fuisse è sensu Magistrorum Complutensium , sed compositam , & dictatam à Patribus So-

Societatis. Doctor ergo prædictus cum Doctores Complutenses de hoc dicto certiores fecisset, dederunt illi anno sequente 5. Aprilis aliam Epistolam, sanctè contestantes, omnino suam esse Censuram illam, datam ad requisitionem sacræ Inquisitionis. *Eleuth. hist. Auxil. lib. 4. cap. 35.*

4. Annō 1659. ab Alexandro VII. Pont. Max. solemniter in sacrum Purpuratorum Ecclesiæ Patrum Senatum relatus est P. Sfortia Pallavicinus, quam tamen dignitatem constanter recusavit, donec Præceptō Obedientiæ Sanctæ adigeretur. *Sotuellus in Bibl. Soc.*

*Eodem die obierunt.*

5. Camberii in Gallia, annō 1623. P. Antonius Suffren, Gallus. Post domicilia, & Provincias cum laude gubernatas, cum in gravem morbum incidisset, & preces pro eo indictæ es- sent, cuidam Fratri Coadjutori impensis oranti facta adspectabilis DEI para V. dixit, P. Antonium eō morbō non moriturum, & convaluit. Cùm autem

aliquot post annis P. Joannes Suffren ejus frater editis praeclaris spiritualibus libris clarus, periculo morbo conflictaretur, P. Antonius inter sacrificandum DEO caput suum devovit pro illo in vita retinendo, tanquam utiliore. Ab ara redux illico à febri, quæ ei fat alis fuit, correptus est, P. Joannes convaluit.

6. Antverpiæ in Belgio, anno 1626. P. Guilielmus de Pretere, Belga. DEI paræ Virginis amori, & honori toto corde, ac animo addictus, per annos 20. tria ejus Sodalitia accuratissimè gubernavit, quibus quartum deinde addidit. Dictabat se honori Mariano propugnando esse paratum longissimè vivere, dilata beata æternitate. Multos, etiam primæ notæ ad fidem orthodoxam, & varios Ordines religiosos perduxit serviens animabus indefessè in quavis occasione, etiam cum capitibus periculo praesente.

7. Florentiæ in Italia, anno 1630. P. Marcellinus Albergottus, Italus. Meditatus de peccatis venialibus, cùm vide-

ret

ret ea omnia in hac vita vitari non posse, fervida moriendi cupidine accensus, petiit, ut peste afflatis servire, adeoque finem peccandi facere, posset. Imperavit utrumque, illud à Superioribus, hoc à DEO. Cùm Florentino Collegio præcesset Rector, rogatus à P. Ministro, quid in rebus angustis capendum esset consilii? Respondit: Subsidiū quærendum est in Oratorio. Quæsivit Minister in armariolo oratorii, sed nihil invenit. Ubi autem occurrit, Patrem Rectorem videri intelligendum de oratione ad DEUM fundenda, instituta hæc est ferventer coram Venerabili Sacramento, & postridie lautum auxilium ex insperato allatum est Collegio.

## XI. NOVEMBRIS:

I. **C**ollegium Methymnæ Campi in Hispania, anno 1552. insigni vexatione exercitum est. Abbas loci, & Vicarius idem Episcopi, nesciuntur qua de causa, ipsa D. Martino sacra luce, per tabellionem edixit, nè nostri Confessionibus, concionib[us]que ope-

ram darent, priusquam de vita, doctrináque ipsorum cognosceretur. Nova res, & insolens visa Patribus, ut qui Abbate ipso nec inscio, nec invito fungi muniis suis cœpissent, imò & literas Apostolicas, & Privilegia inspicienda dedissent. Protinus ergo Rector Collegii, cum uno è Patribus Doctore, Abbatem conveniunt, exploraturi, quid maleficii in Sociis notasset. At ille, simul ac in conspectum venerunt, ignominiosissimis verbis illos proscindere, ut seductores, latrones, &c. parumque abfuit, quin baculô, quem manu gerebat, pulsatos abigeret, abripit tamen in vincula, & carceres jussit; nec nisi urgentibus summis amicorum precibus, sub noctem dimisit, insigni dato specimine: quò passiones hominem abripiant, si non domentur mature. *Orlandin. hist. Soc. lib. 12. p. 1. n. 50.*

2. Annō 1590. feliciter in Urbem rediit P. Robertus Bellarminus, emen- so itinere laborioso, & periculoso in- Galliam, & ex Gallia cum Card. Hen- rico Cajetano, à Sixto V. expedito ad sub-

subveniendum afflīctæ Ecclesię Galli-  
canæ. Quæ expeditio ut feliciùs pro-  
cederet , visum est Pontifici , addere  
Legato comitem P. Bellarminum. In-  
gens, qua ibatur , fuit populorum stu-  
dium videndi Bellarminum, editis Con-  
troversiarum Tomis jam famosissimum.  
Ipsi hæretici avebant nōsse vultum vi-  
ri, qui in regno ipsorum tantam feci-  
set confusionem. In ea legatione duo  
illum fecerunt celebriorem , alterum ,  
quod à Cardinale nullatenus adduci  
potuerit , ut aliquid consilii daret in  
negotiis politicis , alterum , quod eo  
ipso anno eventuram Pontificis mortem  
non semel prædixerit, quamvis ille in-  
tegra uteretur valetudine. Reduci in  
urbem post fata Sixti , non diu attritas  
vires reficere licuit. Admotus enim à  
Gregorio XIV. inter alios emendationi  
sacrorum Bibliorum , quam cœperat  
Sixtus , eam præstítit operam, ut ipsius  
potissimum labori debeamus editionem  
Sixtinam , qua nunc utimur. Petrasan-  
cta in Vits l. 2. c. 9.

3. Claudio Aquaviva censuit , ut ,  
 cùm integrum Xaverii corpus Oriens  
 possideret , ejusdem aliqua patre Occi-  
 dens frueretur . Goani Patres veriti ,  
 nè quid oriretur tumultus à civitate , si  
 res palàm fieret , nocte tacita in ædem  
 sacram , ubi corpus Beati depositum af-  
 servatur , se hac die contulerant annô  
**1614.** Contremuit ædes tota ter , & in-  
 genti metu omnes concussit . Cùm  
 trepidi referrent gradum , unus animo-  
 sior ceteris , vocem tollens , orare san-  
 ctum institit , ut qui suis majoribus tam  
 audiens dicto semper fuisset , eandem  
 obedientiam demonstraret exemplo  
 memorabili , nec sacri corporis partem  
 Europæ supplicant denegaret . Visus  
 est annuere Xaverius , & sedato terræ  
 motu , Patres ædem ingressi partem bra-  
 chii , quæ protenditur à cubito ad car-  
 pum cum ipsa manu desecuerunt . Ca-  
 ro mollis , & lenta , ut corporis vivi ap-  
 paruit , fluxitque rosei , & puri sanguini-  
 sis magna vis , quam linteō reverenter  
 exceptam Patres ad Philippum IV. in

Hi-

Hispaniam miserunt Sacrum pignus  
P. Sebastianus Gonzalez Rector de mus  
probationis Goanæ, qui petebat urbem  
Indicæ Provinciæ Procurator mirabili-  
ter prædonum incursu liberatum, Ro-  
mam feliciter devexit.

*Eodem die obierunt.*

4. In Germania, annô 1631. P. Jo-  
annes Arnoldi, Germanus, impiger o-  
perarius in sylvescente vinea DEI.  
Cùm divinis operatus, à sacro, & con-  
cione rediret: apparatus sacer à rusti-  
cis hæreticis direptus, mox in ipsum  
Patrem facto impetu graviter eum su-  
dibus delumbârunt, deinde ascia per-  
fracto capite, arbori est alligatus. Ju-  
gulum illi præscindens barbarus rusti-  
cus, *In nunc, inquietabat, & hoc ore, si potes,*  
*tuum illud, Dominus vobiscum, procla-*  
*mato.*

5. In Philippinis insulis, annô 1649.  
P. Vincentius Damianus, Italus. In  
ipsis Indiis, Indias magis abstrusas, &  
barbaras scrutatus, apud Jubigenes,  
&

& Bacerenses heroë Apostolico digna  
gessit, ac passus est, donec in Crucifixi  
amplexu, odio fidei lanceâ confixus,  
candidam innocentiae stolam, nulla  
graviore noxa unquam inquinatae, tin-  
xit in sanguine suo, & Agni.

6. Consentia in Italia, anno 1653.  
P. Theodorus Massimianus, Italus, exi-  
miæ virtutis famâ, potissimum autem  
orandi assiduitate, coram Tabernaculo  
Eucharistico clarus. Ipsa, qua decessit  
nocte, Sanctimoniali singularis pietatis,  
per quietem objecta est species lectuli  
holosericô aureo, floridoque pretiosè  
instructi; cumque interrogaret: cui-  
nam sponso cœlestis hic thalamus pa-  
raretur? audivit, parari cuidam virtu-  
te insigni, tunc è vita migrant. Hoc  
responso accepto expperrecta, illico æris  
nostrî campani mortuale signum audi-  
vit, didicîque eum tunc vitâ functum.  
Neque alienum esse à vero objectum  
illud lectuli schema crediderunt ii, qui-  
bus tam Sanctimalis illius, quam P.  
Theodori virtus perspecta erat.

## XII. NOVEMBRIS.

I. **I**ndiarum Apostolus S. Xaverius anno 1552. è portu Sancianensi dedit Epistolam ad Dominum Jacobum Pereiram , sibi amicissimum, & erga se munificentissimum. Scribit in primis se stare in procinctu ad solvendum in Sinas , modò mercator Sinensis grandi pretio, ab ipso hoc D. Pereira accepto, conductus , fidem non fallat. Si fefellerit , significat se aliâ viâ tentaturum ingressum in Chinam, scilicet cum Legato Regis Sionis , quem intellexit mittendum ad Imperatorem Sinarum. Ad dit denique : Faxit DEUS , ut in Sinarum Regis aula aliquando nos videamus ! nam & Pereira nomine Regis Lusitaniae iturus erat ad Sinarum Regem ; sed invidiâ Præfecti Malacensis detinebatur. Me quidem subjungit Xaverius , si in Sinas penetravero , aut servum in Cantonis carcere , aut certè in Pechini regia vinclum offendes. DEUS nos pro sua immensa benignitate , in Sinarum regno , sin minùs , certè in

in cœlesti, jungat, & copulet. Amen.  
*Epistol. Veter. lib. 4. epist. 16.*

2. Ex eadem insula Sancianensi eodem tempore aliam dedit idem Sanctus epistolam ad P. Franciscum Perez, Malacæ manentem, quâ significat dimissum esse à se ex Societate Fratrem Pereiram, mandatque Perezio, ut eum nec sub tectum recipiat, nec Goæ recipi patiatur, nec in eadem cum ipso navi iter agat ; suadeat autem illi, ut se recipiat ad PP. Franciscanos, vel Dominicanos, juvétique illum in eo negotio pro posse. In epilogo epistolæ : Ora, inquit, pro nobis divum Numen, nam periculum diræ servitutis præsentissimum adimus apud Sinas. Sed consolatur nos hoc reputantes, quod persuasissimum habemus, longè præstare captivum, & vincitum esse solo DEI amore, quam libertatem, quantumlibet jucundam, ignavâ ingratâque fugâ laborum Crucis Christi emere. *Epist. Recent. lib. 7. epist. 12.*

*Eodem die obierunt.*

3. Romæ annô 1615. P. Fabius de Fabiis, Italus, de stirpe Magnorum illorum Fabiorum. Generis claritatem illustravit religiosa excellenti virtute, & præclarè gestis muneribus, Magistri Novitiorum, Rectoris, Provincialis, Secretarii, Assistantis. Quidquid ageret, etiam in pusillo corpore magnum se Fabium prodebat. A tauro ferociente in cornua sublatus, & malè quassatus, cùm moneretur, ad S. Xaverii brachium, tunc ex India allatum, votum conciperet, negavit se valetudinem miraculô quæsitam velle; malle, quod malit DEUS.

4. Brunæ in Germania, annô 1643. P. Philippus Streidt, Bohemus. Ubi que divinis, & sui reconciliationi intentus, etiam apud vulgus Sancti nomen meruit. P. Martinus Stredonius Provincialis, vir eximiaæ sanctimoniacæ famâ notus, de illo inter plura sic scripsit. Nullam dici horam, quâ non totam animam in DEum reflecteret, ipsi unquam elapsam esse, exploratissimum est. Examini

minis particularis curam tam altè sibi impresserat, ut eo die, quô illud negligenter, se nec dignum pane religioso, nec filium Societatis putaret. DEI-param Virginem ingeniosis pietatis industriis venerabatur, cuius præsidio constantem vitæ innocentiam credebatur conservâsse.

5. Londini in Anglia, anno 1606.  
**Parvus Joannes**, seu **Nicolaus Odoenus**, **Anglus**. Sub adscito Joannis Parvi nomine diu latuit, & in pusillo corpore magnam vim animi prodidit. Excelluit ingenio ad fabricandas latebras, quibus Patres, & sacer apparatus tegerentur, multisque annis sub specie famuli illis servivit. Deprehensus tandem, & in carcerem conjectus, admiranda toleravit. Iterum liber, iterumque captus, acerrimi tormentis per plures dies cruciatus est, ut proderet latebras factas. Sed ille persistit infraetus, nec verbum ullum ei extorqueri potuit, quod alicui noceret. Timentis non tantum non cessit, sed voluntarias mortificationes adjiciebat, cilicio-

nun-

nunquam depositô , etiam in carceribus , donec fortis , & sancta anima , visceribus tormentorum immanitate jam effluentibus, è lacero corpusculo feliciter evasit.

### XIII. NOVEMBRIS.

I. **H**oc etiam die ex insula Sinensi , Sanciano anno 1552. qui extremus ei fuit in vita mortali , epistolas dedit ad Socios S. Xaverius. In data ad P. Gasparem Barzæum Rectorem Collegii Goani , scripsi , inquit , ad Franciscum Perez, ut Malacâ discederet quâm primùm , & cum omnibus Sociis in Indiam se reciperet. Etenim nunc quidem tanto bono indigna videatur civitas illa , quæ causa fuit tanti mali , quod iter nostrum in Sinas , divinæque gloriæ amplificationem , per summam injuriam impediverit. Iterum tibi mando , ut recentissimum illud mandatum meum summo studio , diligentiâque conficias; hoc est, ut transfigas cum Episcopo, ut Malacæ Excommunicationes rite pronunciandas curret,

set, in quas inciderunt ii, qui nostro itineri obstatiterunt, siquidem Legati Apostolici nomine Sinas petebam. Id adeo mihi curæ est duabus de causis, primùm, ut Malacensis Præfectus intellegat, quām grave in se admiserit sce-lus, & quām gravem pœnam incurrit; nè posthac is sit in alios, qui fuit in me. Deinde ut nostri Ordinis homines, qui deinceps rei Christianæ causâ Malacam, Moluccum, Japoniam, Sinas petent, retinere audeat nemo. Et quoniam plerosque homines hodie magis pudet hominum, quām DEI, qui cunque ejusmodi sunt, tantæ notæ, atque ignominia metu, à tam projecta audacia absterreantur, &c. *Epist. Vet. lib. 4. ep. 17.*

2. In Sardinia, anno 1564. Calari, quæ urbs Proregis sedes est, pridem ar-denter desideratum, hodie tandem e-rectum est Collegium, post a lventum Sociorum decem. Effusa obviam civi-tas, prolixis omnium ordinum studiis excepti sunt hospites, nec quidquam omissum, quō cives optimi alacritatem,

&amp;

& humanitatem suam testari possent.  
Sacchin. hist. Soc. p. 2. l. 8. num. 56.

*Eodem die obierunt.*

3. Petricoviæ in Polonia annô 1607. Paulus Kostka, Polonus, Beati Stanislai Kostka Germanus, sed in illum iniquior, dum Viennæ studerent. Videtur DEUS id dedisse meritis, & precibus Beati adolescentis : ut Paulus tandem saperet, & cœlestia præ terrenis haberet. Ergo ad saniora conversus, totum se, & sua impendit divinæ gloriæ, erecto Patribus Franciscanis Praesnicii templō, & cœnobiō ; Parochiali Ecclesia, & Xenodochio proventibus aucto ; & fortunis suis tam liberaliter in pauperes disper- sis : ut regnō cœlorum omnino se matu- rum ostenderit. Sub hæc impetratâ à Claudio Aquaviva copiâ ingrediendi Societatem, quam diu, multumque quæ- siérat, dum in procinctu est, ad Societa- tem triumphantem, ut spes est, migra- vit.

4. Viennæ Austriæ annô 1669. Jo- annes Bucellenus, Italus Brixiensis, præ- ter

ter Collegia varia, Provinciam Austriae  
gubernavit rara laude suavitatis, & for-  
tis executionis. Missæ Sacrificium eo  
animi ardore obibat : ut è secularibus  
complures eam operirentur horam, quā  
ille celebrabat. Horas Canonicas ùt  
plurimūm ante Ven. Sacramentum hu-  
mi prostratus recitabat. Annua S.Pa-  
tris exercitia pridie præmissō jejuniō  
auspicabatur ; è quibus semper se ipso  
major prodibat. Corpus exquisitis  
modis vexabat, etiam in modicis nihil  
illi indulgendo, quod non extorqueret  
aperta necessitas. Observatus est in  
triclinio, & aliis confessibus, per annos  
30. & amplius, nunquam se reclinasse :  
in cubiculo etiam sedili utebatur sinè  
reclinatorio. Hyemali tempore nulla  
admittebat manuum tegumenta, nihil  
in cibis delicatum, nullum in cubiculo  
administrum, etiam in senili ætate, &  
munere Provincialis ; quo perfunditus,  
Bibliothecæ publicæ curam suscepit,  
libros accuratè componebat, & quot  
hebdomadis mundabat, ipsum quoque  
verrendo pavimentum. Tam humili-

lem

lem virtutem , & constantem in se au-  
steritatem , singularibus identidem fa-  
voribus honorabat DEUS. *Sotuell. in  
bibl. Soc.*

5. Constantiae in Germania an. 1625.  
P. Paulus Layman, Germanus, vir quām  
profundē doctus, tam humilis, & mode-  
stus. Quantus fuerit in Theologia,  
Morali, & Jure Canonico, locupletes sunt  
testes Volumina edita, avidéque à doctis  
direpta. Consulebatur passim, etiam ex  
locis admodum remotis; & responsa ha-  
bebantur pro oraculis : sed ipse videba-  
tur nescire eruditionem suam ; tam pa-  
rum illâ afficiebatur. *Sotuell. in bibl. Soc.*

#### XIV. NOVEMBRIS.

I. **P**ater Edmundus Campianus, glo-  
riosus Christi athleta , post tole-  
ratos jam acerbissimos equulei crucia-  
tus , anno 1581. adductus est in aulam  
dictam Vestmonasterium, cum P. Tho-  
ma Cotamo , ubi recitatō accusationis  
libellō , jubentur ad sese purgandos ,  
pro more recepto manum sustollere ,  
quod cūm fecissent alii , qui aderant in  
eadem causa Catholici, Campianus au-  
tem

tem ob brachia vi tormentorum dissolu-  
ta, manum attollere non posset, unus  
de Sociis accessit, & reverenter de oscu-  
latus, modicè manum ejus extulit. Tum  
**Campionus** : Profiteor coram DEO, &  
Angelis ejus, & hoc, cui adsto, tribuna-  
li : me nec criminis læsæ Majestatis, nec  
perduellionis, nec ullius in patriam con-  
jurationis reum esse. Idem profitenti-  
bus, & aliis Christi Confessoribus abdu-  
cuntur omnes in carcerem, post dies ali-  
quot perimendi. *Sacchin. p. s. hisp. Soc.*  
*lib. i. n. 243.*

2. Annō 1598. Madriti in Hispania  
egregiam dedit epistolam Maria Impe-  
atrix, Caroli V. Filia, Maximiliani II.  
Imperatoris conjux, Rudolphi II. &  
Mathiæ Imperatorum Mater, ad sum-  
mum Pontificem Clementem VIII. quâ  
ei eximiè, & materno planè affectu,  
commendavit Societatem, ac speciali-  
ter causam P. Molinæ, & libri ejus, ut-  
pote in Lusitania, & Hispania rite ap-  
probati à SS. Quæsitoribus, aliisque vi-  
ris doctissimis. Adjunxit huic qua-  
tuor alias epistolas ejusdem senten-  
tiæ, ad Card. Aldobrandinum, Ma-

drucium, & S. Severinæ, atque ad Duce-  
m Sessæ, cui impensè commendavit,  
ut latè per Urbem spargeret, quod à  
plerisque tunc ignorabatur, scilicet li-  
brum Molinæ judiciô contradictoriô,  
ut ajunt, à supremo Lusitanæ Inquisi-  
tionis Senatu examinatum, & commu-  
nibus suffragiis etiam PP. Dominica-  
norum absolutum esse. *Eleuther. hist. de  
Auxil. lib. 3. cap. 5.*

### *Eodem die obierunt.*

3. Ferrariæ in Italia, anno 1598.  
P. Benedictus Palmius, Italus, ab ipso  
S. P. N. suscepitus, magnum, & insi-  
gne dedit Historiæ Societatis argumen-  
tum. Concionando tantopere valuit,  
ut Auditorum voluntates videretur in  
linqua circumferre, & dicenti fuerit  
acclamatum, *Beatus venter, quite porte-  
vit.* Primus inter Italos vota 14. fuit  
professus, primusque Concionator è  
Societate à Pontifice assumptus.

4. In regno Bengala Indiæ Ori-  
entalis, anno 1602. P. Franciscus Fer-  
nandius, Lusitanus. Dum totum se

impedit saluti barbarorum, orta inter eos, & Lusitanos rixâ accurrit Pater, ut partes componeret. Sed à furente turba probris, & pugnis pessimè acceptus, atque ad carcerem abreptus, in ferro, & ærumnis diem supremum obiit, si non fidei, certè pacis, & charitatis victima.

5. Apud Sinas Anno 1628. P. Nicolaus Trigautius, Belga. Quamvis corpore esset admodum debili, non dubitavit tamen arduam in Indiam Missionem petere. Eâ impetratâ, tantæ corpori accesserunt vires, ut omnibus immensi itineris incommodis sufficerent; imò etiam ad remetiendum iterum, iterumque idem iter, quando inde expeditus fuit Romam Procurator, fuerint sufficientes. In vastissimo illo imperio aliquando duras, ternasque provincias: Galliæ, Hispaniæque pares, ob paucitatem operariorum curandas habuit, quas Apostolicis passibus peragrabat; donec fatigente corpore, requievit à laboribus suis. Multis editis libris Latino, Sinicóque idiomate, rem Christianam promovit. *Sotvel. in bibl. Soc.*

## XV. NOVEMBRIS.

I. IN Japonia anno 1551. cùm S. Xaverius in regia Bungensi dies 40. egisset, cum ubere animarum conversarum proventu, & non una insigni victoria in publica coram Rege, ac proceribus disputatione Bonzios profligasset; abitum parante navi Lusitana, convenit Regem, quem constanter habuit benevolentissimum, vale, ac salutaria illi daturus monita, siquidem sacro Fonti se nondum præbuit idoneum. Monuit ergo, ut agnitam veritatem cordi haberet, atque sic uteretur temporalibus, nè bona amitteret æterna. Interea Bonzii repetitis cladibus efferati, desperata coquebant consilia, non solum de Xaverio, sed Lusitanis omnibus cum ipso Rege suo, quemadmodum Amanguccii fecerant, tollendis; prius tamen semel adhuc disputationis aleam tentare voluerunt, evocato ad illam Bonziorum totius Japoniæ doctissimo, Fucarondono. Cer-

tamini dies sequens designatus. *Bar-*  
*tolus in Vita lib. 3. nnn. 41.*

2. Anno 1615. post obitum glorio-  
 ſæ memorię P. Claudi Aquavivæ, in  
 Congregatione VII. Generali, electus  
 est in Præpositum Societatis Genera-  
 lem P. Mutius Vitelescus, Italus, pa-  
 tria Romanus, illustri, & antiqua fami-  
 lia oriundus: postquam insigni cum  
 laude gubernavit Romæ Collegium  
 Anglorum, deinde Collegium Neapo-  
 litanum, Provincias Neapolitanam,  
 & Romanam, atque Assistantis Italix  
 munere functus fuit. Triginta ferme  
 annorum spatio sapientissimè Societa-  
 tem gubernavit. *Sotvellus in Biblioth.*  
*Soc.*

3. Idem P. Mutius hoc die ann⁹  
 1639. prolixam, præclarāmque dedit  
 epistolam ad Patres, Fratrésque Socie-  
 tatis, de celebrando Anno seculari, &  
 Jubilæo ejusdem, quod quomodo fa-  
 ciendum sit, instruit. Vult in omni-  
 bus instaurari primævum Societatis  
 spiritum, præcipue per accuratum  
 studium Orationis, per assiduam Chri-  
 sti

sti patientis Meditationem , per S. Patris Exercitia spiritualia , per efficacem ordinationum executionem , procurandam potissimum à superioribus , & per Jubilæum ab Urbano VIII. Pont. Max. concessum Societati . *Ex Epistolis Generalium.*

*Eodem die obierunt.*

¶ In Paraquaria , anno 1618. P. Rochus Gonzales de S. Cruce , Indus. Totus in animarum salutem effusus , varios isthic populos mitigavit , & Christo subjecit. Ipse barbaris mapalia concinnabat , leges , & agros dabat , agriculturam docebat , rempublicam , & magistratus ordinabat , communis omnium , rusticus , pater , magister , præfectus , & omnia. Post sacrum , ab irruentibus conjuratis clavâ ligneâ , silice armatâ , percussus , caput confractum , & resectum . Quinquaginta tres barbari testati sunt , auditas à se prodeuntes è truncato corpore has voces : *Occidistis eum , qui vos diligit : occidistis corpus meum , & ossa mea contrivistis ; at*

*non animam, quæ jam versatur inter Beatos in cælo. Multæ vobis calamitates evenient ob mortem meam. Quia venient filii mei, pœnas repetituri ob violatam DEI Matris imaginem.* At illi: Hem, præstigiator ille adhuc loquitur! Mox evulsum illi cor è pectore, unà cum teli cuspipe, quâ confixum erat, injecerunt in ignem: sed combustō telō, cor integrum inventum, & anno 1633. Romam perlatum.

5. Ibidem, eadem tempestate involutus occubuit P. Alphonsus Rodriguez Hispanus, non uno Indico acinace concisus. Corpora circa templum raptata, igni bis injecta, unà cum eburneo altero, & altero plumbeo Crucifixo. Sed tam corpora, quām Christi Crucifixi simulacra, integra reperta sunt postridie inter cineres templi combusti.

6. Antverpiæ in Belgio, anno 1624. P. Adrianus Mangotius, Belga. Animarum salutem ardenter movebat verbō, calamō, & exemplō. In extrema ætate tam gravem memoriæ passus est

est defectum, ut præsentissimus sibi, nè nominis quidem proprii meminerit. Habuit tamen in promptu paucas voculas, quas opportunè promebat. Si quid in laudem ejus diceretur, dicebat: *Miser sum.* Si quis compassionem ducitus, miraretur ægritudinem ejus, dicebat: *Dominus est,* cuius scilicet dispositione justissima hæc evenerunt. Si contentiosè disputantes, vel altercantes audiret, monebat: *Fratres sumus.* Alias infracto signaculo obseratum os habebat, nec nisi lacrymis loquebatur.

## XVI. NOVEMBRIS.

I. IN Japonia coram Rege Bungi celebri certamine concurrerunt, Indiarum Apostolus Xaverius, & Fucarondonus Bonziorum Princeps, atque oraculum Japonum. Initio non levis Regem incessit metus, nè Xaverius par non esset versatili hominis ingenio, & linguae; sed cum non nisi absurdam Pythagoræ metempsychosim, & extremam libidinis fœditatem, quæ viget in Japonia, propugnandum

dam suscepisset, Xaverius vi tanta rationum bruti illius redarguit impudenteriam, ut motô omnibus stomachô, ac Rege Jubente, aulâ sit ejectus. Exaruit belluino furore Bonziorum natio, parumque abfuit, quin cum Xaverio Lusitani omnes, & Rex ipse perirent. Monebant, urgebantque Xaverium, Lusitani, ut in navim se reciperet, & cum ipsis solveret in Indiam; at ille quodvis discrimen pro Christo subire maluit, quam fugam arripere, sibi turpem, neophytis scandalosam, hostibus optatam. Persttit ergo intrepidus, ac Deo protegente illæsus.

*Bartolus in vitalib. 3. num. 43. & seqq.*

2. Annô 1656. fortem dedit Epistolam ad Patres, Fratresque Societatis P. Goswinus Nickel Præpositus Generalis, de vitando spiritu Nationali, & Provinciali, ob ingentia, quæ affert, damna. Nam 1. Illo prædominante, Societas salva esse non potest, dividit enim se, separatque membra à se invicem, & à corpore. 2. Injuriam facit hic spiritus Christo, cuius membra

bra sumus omnes , qui nos in unum  
 corpus redegit , & suam Societatem  
 appellavit . 3. Obscurat bonum no-  
 men Societatis , scandalum dat ad-  
 versariis nostris , dum audiunt digla-  
 diari inter se Jesuitas , & unam Pro-  
 vinciam , vel nationem pugnare con-  
 tra aliam . 4. In apertum discrimin-  
 adducit Societatem , quæ ut sine  
 charitate , & animorum consensione  
 stare non potest , ita nec subsistere  
 cum spiritu nationes , & provincias  
 collidente . 5. Spiritus nationalis est  
 certissima pestis , & mors Charitatis ,  
 ideoque ignotus omnino fuit primis  
 Patribus , qui ex diversissimis collecti  
 nationibus , unam planè Angelicam  
 conflârunt Societatem , non solùm in  
 una provincia , sed in una domo vi-  
 ventes , ut unius moris , & spiritus  
 charitate omnes conflante in unum .  
 Unde , quod Augustinus dixit ad Ec-  
 clesiam in Psal . 121 . opportunè appli-  
 cat Societati , *O Jerusalem ( ô Socie-  
 tas ! ) quæ ædificaris iut civitas , cuius  
 participatio ejus in idipsum : fiat pax in*

*virtute tua, fiat pax in dilectione tua, quia  
virtus tua dilectio est.* Ex epistolis Ge-  
neral.

*Eodem die obierunt.*

3. In America apud Tepeguanos, anno 1616. P. Ferdinandus de Tovar, Indus. Illustri, & benefica erga Societatem stirpe ortus in Nova Hispania, cum adhuc puer, videret matrem, adornantem scriniolum pro asservando capite Patris Gundisalvi de Tapia, recenter in odium fidei cæsi, scrinio-  
lum autem illud esset nimis angustum, dixit Ferdinandus ad matrem: Nimis angustus est loculus iste pro hoc capite. *Serva hoc scrinium, mater, meo ca-  
piti, nam & ego sic cædar.* In Societa-  
te totus effusus in Tepeguanorum sa-  
litem, cum veneficus quispiam illos concitasset in Patrem, & omne nomen Christianum, Pater Ferdinandus clavâ profligatus, & lanceâ confossus, occubuit, insultantibus barbaris, ut suum nunc *Pater noster, & Ave Maria,* decantaret.

4. Madriti in Hispania, anno 1629.  
 P. Caspar Sanctius, Hispanus. Humaniores literas rarâ constantiâ docuit per annos 30. & quidem per annos 12. cursu nunquam interrupto, etiam per triennium ; quô Collegium rexit. Nunquam visus est iratus, nunquam mentitus, nunquam alicujus gravis noxæ reus ; humilitate autem, & religiosa simplicitate semper conspicuus. Hucti iussus Dæmon ab exorcista in templo osculari pedes P. Gasparis, se abjecit, eosque est osculatus, Gaspare illum, ut mendacii patrem arguente. Applicatus tamen Explicationi S. Scripturarum tradendæ in Collegio Complutensi, tantô studiô, & ingenîo id egit, ut 10. Tomos egregios interpretationis suæ ediderit. *Sotvellus in bibl.*

5. In Frisia anno 1651. P. Daniel Stullius Belga. Apostolico suo spiritu multum profecit apud eam gentem. Inter magis arduos labores , illo se stimulo excitabat : *Bono animo esto Daniel. Bene tibi erit. Magna illa gloria parvo pretio non emitur.* Eucharistiam à cu-

jusdam nauseante stomacho ejectam ; intrepidus hausit. Cùm ægro malè de se merito Evangelica charitate ministaret , mortem indè , & vitam traxit immortalem.

## XVII. NOVEMBRIS.

I. **B**Onzios Japones cùm accepta heret ignominia , nec matura adhuc videretur , quam concitarent , populi seditio , certamen infaustum instaurare cum Xaverio decreverunt.

2. Parisiis cùm & scholarium nostrorum , & aliorum proborum cresceret notabiliter numerus , nec omnes caperent Sacelli angustiæ , novi jacta sunt fundamenta ab Episcopo **Cypri** anno 1588. Soli Convictores sexaginta supra ducentos , iisque melioris notæ numerabantur. Collegio satis frequenti additæ lectiones de S. Scriptura , Lingua Hebræa , & disciplinis Mathematicis , ut nihil jam deesset , quod ad perfectionem Academiæ desideraretur. Apparuit etiam communis Procerum erga Societatem pro-

propensio in conventu , qui de publicis rebus habitus est. Ubi cùm non nemo adversariorum agendum putaret , instaréque , de Societate vel ejicienda è regno , vel prohibenda docere ; qui hujusmodi propositionibus , & libellis excipiendis præerant , responderunt : Agendum potius esse , ut Collegia Societati quām plurima per Galliam struerentur. *Sacchin. hist. Soc. p. 5. lib. 8. n. 106.*

### *Eodem die obierunt.*

3. In Paraquaria anno 1638. P. Joannes de Castillo , Hispanus. Impigre satagentem pro re Christiana , Caciquii cujusdam , divinitatem sibi arrogantis , jussu , turba barbara invasit , fustibus delumbatum , nudumque per invia , & devia raptavit , multis vulneribus concidit , telis confixit , denique arbori in modum crucis alligatum , saxis capiti illisis , trucidavit. Baptizatos à Patre , ut quodainmodo expiaret , impostor ille , capita eorum

aqua calidâ abluit, linguas testâ rasit,  
quasi infectas sale Baptismatis, & pro-  
fessione fidei Christianæ.

4. Platæ in Hispania, anno 1626.  
P. Alphonsus Cortes, Hispanus. Scru-  
pulis vexatus cùm à DEIpara V. re-  
medium ardenter peteret, accepit ab  
illa monitum, ut esset magis addictus  
juvandis animabus Purgatorii. Ei-  
dem sollicito, num bene negotium  
salutis suæ ageret? respondit illa: *Bene  
ipsum, bene rem agere;* adjecit tamen: *ut  
ea, quæ ageret, majore perfectione exequi  
niteretur.* Adfuit etiam morienti, &  
liquidissimô solatiô clientem suum  
perfudit.

5. Romæ anno 1638. Petrus An-  
gelus Bonchristianus, Italus, Scholasti-  
cus. Familiarissima ei fuit ad eximi-  
am virtutem incitatio Vitarum B. A-  
loysii, & Joannis Berchmans lectio,  
quorum præcipuè imitabatur mode-  
stiam, silentium, & sui afflictionem.  
B. Aloysii vitam in sinu gestabat, &  
ante ac post sumptam sacram Syna-  
xim, caput ex ea legebat. Triduô  
ante

ante cineres carnibus omnino abstinebat. Morti vicinus, auditus est s<sup>e</sup>pe ingeminare: *Gaudeo Domine, quod sis immensus, infinitus, omnipotens, misericors, & summum bonum.* Volo, quod vis. Exulto, quod majestas tua sit tam grandis, tam bona, & amabilis. His intentus mori desit.

## XVIII. NOVEMBRIS.

I. **S.** Ignatius cum Sociis Romæ ab solvitur mirabiliter, ac liberatur juridicè ab atroci fœdaque calunnia, anno 1538. Comparuerat Romæ, & se in multorum gratiam insinuaverat quidam, religiosum eremitarum Augustinianum induitus, qui cùm etiam è cathedra præsumpsisset Lutheri commendare errores, notatus à Sociis Ignatii, ac privatim monitus, non tantùm non resipuit, sed ipsos monitores suos non dubitavit arguere hæreseos, & accusare. Ignatium, jactitabat, Compluti, Salmanticæ, Lutetiaz, ac novissimè Venetiis dam-

damnatum hæreseos , & rogo cum  
 scriptis suis addictum , fugâ sibi con-  
 suluisse , nominabâtque hujus rei te-  
 stes aliquot Hispanos sui similes .  
 Denique eð rem deduxit , ut Ignatius  
 cum Sociis , si non crederentur  
 hæretici , vehementi tamen suspici-  
 one laborarent , & ab hominibus  
 passim desererentur . At ille , ut or-  
 dinatè procederet , in primis ad Affer-  
 torem salutis suæ , principemque  
 Advocatum Christum recurrit , ad-  
 monuitque eum promissi , quô nuper  
 spoponderat , se illi , & Sociis Romæ  
 propitium futurum . Audiit , nec  
 opem distulit Salvator , indè illam  
 more suo præbens , unde minimè po-  
 terat sperari . Cardinalis , sacri Col-  
 legii Decanus , falsis de Ignatio ru-  
 moribus ità fuit præoccupatus , ut a  
 micorum quendam serio moneret , nè  
 quid commercii cum illo haberet . Is  
 ubi id ipsum ad Ignatium detulit ,  
 nihil commotior Ignatius , solùm  
 petiit , ut ipso admittente , posset cum  
 Cardinale loqui . Ad secretum ad-  
 missus

missus colloquium , ità ei suam probavit innocentiam , ut Cardinalis genibus flexis veniam ab illo precaretur , & post duarum horarum congregifam , honorificentissimè deducens , fidum se illi Patronum semper futurum sanctè testaretur , quod & præstítit . Sic animatus Ignatius , non habuit satis , privatim agnoscí innocentis , coram publico Gubernatoris Urbis tribunali convenit calumniatorem , ut publico decretō absolvetur innocentia . Et quidem in prima actione manifestè confudit hominem , producto propriō ipsius scriptō , quo , antequam à Sociis Ignatii argueretur hæreſeos , insigne scripſerat ad amicum elogium Sanctitatis Ignatii . Deinde opportunissima Divinæ Providentiæ dispositione evenit , ut eodem planè tempore Romæ adessent Judices illi tres , à quibus Compluti , Parisiis , & Venetiis dicebatur Ignatius esse damnatus . Rogati ergo , perlibenter testimonium dederunt veritati , non sinè encomio ipsius luculent-

lento. Adfuerunt & ex variis Urbi-  
 bus, in quibus laboraverant Socii,  
 testimonia gravissima Episcoporum,  
 & principum, non solùm de innocen-  
 tia, sed etiam sanctitate illorum.  
 Visum ergo fuit non paucis, & ipsi  
 Gubernatori, satisfactum esse cumu-  
 latè Ignatio tam præclaris documen-  
 tis, nec esse necesse, ut ad publicam  
 palinodiam adigerentur calumniato-  
 res, aut Decretô Judicis finiretur  
 causa. At ille non præsenti solùm,  
 verùm & futuris prospecturus tem-  
 poribus, ad summum Pontificem  
 recurrat, supplicavitque: ut nego-  
 tium Decretô publicô terminaretur.  
 Annuit Pontifex, nec Gubernator  
 amplius tergiversari potuit. Solem-  
 ni ergo perhonorifico decreto calum-  
 nias accusatorum detexit, ac diluit.  
 Ignatii verò doctrinam sanam, san-  
 ctamque vitam commendavit; DEUS  
 autem non multum dilatâ vindictâ  
 calumniatores severè castigavit. *Bartol.*  
*in Vita S. Ign. lib. 2. n. 24. &c.*

2. Coram Clemente VIII. habita est anno 1602. Congregatio Decima, & disputatio de Auxiliis Grat. Cùm autem Gregorius de Valentia. Theologus Societatis adversa laboraret valetudine, substitutus ei est P. Petrus Arrubal Professor Romanus. Proposuit Pontifex : *An Molina consentiat Cassiano quoad hanc Propositionem :* *Quòd homo in natura lapsa habeat naturale judicium ad cognoscendum bonum , & malum ; habeatque naturalem facultatem ad utrumque amplectendum , absque eo , quòd aliquam ponat distinctionem ?* Respondit Arrubal : Molinam illi non consentire. Quamvis enim in homine lapso agnoscat naturale illud judicium, & naturalem motum voluntatis: non tamen sine distinctione agnoscit. Distinguit enim semper, quòd tale judicium intellectus, & motus voluntatis solum valeat ad finem naturalem, non autem supernaturalem : qua distinctione non utitur Cassianus. Probavit utrumque. *Eleuther. hist. de Auxil. lib. 5. c. 14.*

3. Annô 1603. eodem die habita  
est Congregatio , & disputatio XXI.  
Quæsitum fuit : *An juxta S. Augusti-  
num, Liberum arbitrium, & Gratia sint  
duæ causæ partiales, concurrentes ad eun-  
dem actum efficiendum ?* Respondit P.  
Bastida , eam omnino esse doctrinam  
S. Augustini, probavitque latè. *Ibid.*  
*cap. 25.*

*Eodem die obierunt.*

4. Romæ annô 1575. P. Jacobus  
de Ledesma Hispanus. Romam ten-  
denti , ut Societatem ingrederetur, Au-  
gustæ Christus D. conspiciendum se  
dedit, bono animo esse jussit, promi-  
fitque futurum, ut castè , & perseve-  
ranter in obsequio DEI persisteret.  
Brixiae verò vidit, audivitque DEIpa-  
ram V. eadem , & auxilium in morte  
promittentem. Adfuere cum illa San-  
ctæ , Maria Magdalena , S. Catharina  
Martyr , & S. Catharina Senensis, quæ  
in recessu , cœlesti voce extollebant  
virtutem castitatis, canentes : *Quantum  
est donum castitatis, quod confert DEUS*  
*pie-*

pietatis ! Divina res est castitas , Divina sunt,  
 & præmia , quæ continenti dat DEUS.  
 Vixit in Societate excellenti virtute, at-  
 que doctrina, altioribus studiis diu præ-  
 fectus.

5. In Nova Hispania , aptid Tepe-  
 guanos , annô 1616. odio fidei à barba-  
 ris trucidati occubuerunt , P. Didacus de  
 Orosco , Marchionis Mortaræ nepos ,  
 P. Bernardus de Cisneros , P. Ludovi-  
 cus de Alabes , & P. Joannes de Valle ,  
 Viri ad tam gloriosum mortis genus  
 præclarè dispositi excellenti virtute ,  
 præsertim sui mortificatione , & Apo-  
 stolico zelo. Illud singulare occurrit de  
 Patre Ludovico , quod , cum eum adhuc  
 infantem , sacris undis tinctum , in li-  
 brum baptizatorum referret Parochus ,  
 & S. Dominici familia Religiosus , quod  
 dam præclaræ , cruentæque illius mor-  
 tis vaticinio , solius illius nomen , præ-  
 ter morem , grandi , & rubro charactere  
 in librum retulerit . Ajunt DEI param  
 V. ter ipsi locutam , & de genere mor-  
 tis odio fidei inferendæ , disertè certio-  
 rem fecisse , etiam die expresso , quō id  
 fu-

futurum esset. Ut igitur ad tam gloriosam mortem rite se disponeret, multa castigatione corpus exercebat, animum verò prolixa excolebat oratione, ad tres quatuorve horas producta.

6. P. Joannes de Valle. Mira industria, & labore Indos excolebat. Ut eos arare doceret, cibosque parare, factus est illis colonus, coquus, pater, frater, servus, & omnia. Arte pacificandi dissidentes, mirificè præstabat, unde *P. Joannes à Pace* dictus est. DEIparæ V. suprà quām explicari possit, addictus, in omnes artes eam colendi, & extollen- di assiduè intentus erat, responditque Virgo pari affectu Clienti suo. Trimestri ante mortem scripsit : se à Tepuanis odio fidei occidendum.

## XIX. NOVEMBRIS.

I. **C**UM Roinæ novum domūs Professæ templum, regali munificentia Alexandri Farnesii Cardinalis erectum esset, placuit Claudio Aquavivæ anno 1587. Reliquias S. P. Ignatii in illud referre hoc die, tempore sci- licet,

ficit, quo ex omnibus Provinciis mis-  
si Procuratores convenerant Romam.  
Conditæ sunt sub dextrum latus aræ  
majoris, cum inscriptione lapidi in-  
cisa: Ignatio Societatis JESU Funda-  
tori. Quæ quidem translatio mirò  
ornata est spectaculô. Nam tumbâ  
apertâ, in qua deposita erant sacra  
lipsana, viderunt illa quidam ex Pa-  
tribus præsentibus, stellis quibusdam  
conspersa, vividissimo splendore mi-  
cantibus, aurei unius magnitudine.  
*Bartol. in Vita S. Ign. lib. 4. num. 39.*

2. Londini in Anglia anno 1581.  
è carcere, in quem odio fidei com-  
pacti fuerunt, P. Alexander Briantus,  
aliique plures Confessores, evocati  
rursus sunt ad tribunal ad sententiam  
audiendam. Ceteros anteibat P. Ale-  
xander, crucem, quam in carcere si-  
bi fabricârat, manu præferens. In-  
cusatus ab hæretico audaciæ, jussus  
que, illam abjicere: Neutquam, in-  
quit. id faciam: Miles Christi sum, re-  
xillum ad mortem usque non deseram.  
Audacior alter cùm crucem illi eri-  
puis-

puisset ; Potes inquietabat, Crucem mihi extorquere de manibus , de corde non potes. Moriar pro eo , qui prior mortuus est pro me. Pronuntiata in omnes capitali sententia , vultu hilari , elataque voce occinuit P. Edmundus Campianus : Te DEUM laudamus , te Dominum confitemur ! Servinus subjecit : Hæc dies , quam fecit Dominus : exultemus , Et late- mur in ea ! Alii alia , omnes exultabant in DEO JESU suo. Sacchin. hist. Soc. p. 50. lib. 1. n. 246. Et seqq.

3. Anno 1696. cum elapsum esset novennium à postrema Congregatio ne Generali XIII. inchoata est sub P. Thyrso Gonzalez Præposito Generali Congregatio XIV. Quamvis enim indicta fuisset in diem 15. Nov. quia tamen aliqui adhuc non advenerant , qui sperabantur propediem adfuturi , dilatus est Conventus in hunc diem . Ex Decret. Congreg.

*Eodem die obierunt.*

4. In Nova Hispania, apud Tepegu-  
anos

anos anno 1616. P. Joannes à Fonte, Hispanus, odio fidei cæsus à barbaris, cum Hieronymo Moranta, & ipso Hispano. Fuit P. Joannes omnino indefessus in laboribus, & ærumnis. Ipse laterculos Indis conficiebat ad domos construendas, ipse aratra fabricabat, & ducebat, ipse sanis famulus, infirmis coquus, medicus, nutritius, pater, & omnia. P. Hieronymus verbo, & opere potens, plurimis saluti fuit, vel una concione convertit quingentos. Deprehensus est aliquando in loco ab arbitris remoto, altera manu Crucifixum gestans, altera acerbè se flagellans, & ubertim plorans, oransque pro Indorum salute, & concionum suarum efficacitate. Cædendum in fidei odium, prædixit Alphonsus Rodriquez. Ipsius, & Sociorum pro fide cæforum heri ac hodie, corpora, post tertium mensem reperta sunt humi strata ciliciis tecta, & planè recentia, duobus canibus illa custodientibus.

5. Romæ anno 1672. P. Joannes, Bapt. Giattinus, Siculus Panormitanus.

vir tam præstantis ingenii: ut omnes disciplinas liberales, quas tradit Societas, egregiè sit assecutus, & magna cum laude docuerit. Præter patriam, & Latinam linguam calluit Græcam, Hebraicam, Syriacam, Chaldaicam, & Arabicam; manibus quoque à natura instructus tam industriis, ut facile, quidquid faciendum occurreret, effecerit. Historiam Concilii Tridentini à Card. Pallavicino Italicè conscriptam, insigni elegantia in Latinum transtulit idioma, variisque conscripsit Tragœdias, & Comœdias, quas ferè quot annis agunt Romani Seminarii adolescentes, plaudente, & proficiente auditore. Inter literarios hosce labores non minùs illum exercebat virtutis religiosæ studium, atque animarum zelus, quibus juvandis, & frequenter ad populum dicebat conciones, & pœnitentibus nunquam defessas aures dabat. *Sotvell. in bibl. Soc.*

## XX. NOVEMBRIS.

I. **G**regorius XIII. Pont. Max. Facultatem olim à Paulo III, con-

ces-

bessam Societati , ut etiam non initiati  
sacris ordinibus , si tamen idonei es-  
sent, possent prædicare verbum DEI,  
renovavit , & extendit etiam ad Cleri-  
cos primâ tonsurâ tantum insignitos ,  
distinctè prohibendo , ne quis illos im-  
pedire præsumeret. *Bullar. societatis.*

2. S. Xaverius post acres in Japonia  
cum Bonziis concertationes , & quadri-  
ennem in Japonia commorationem , Re-  
ge Bungi ultimū salutato , inter Chri-  
stianorum lacrymas , & votorum nun-  
cupationes pro ejus reditu , solvit in  
Indiam anno 1551. In eo itinere de-  
cumana tempestate jactatus , grandi mi-  
raculo navim salvavit , sed grandiore  
scapham , quam cum hominibus quin-  
decim à navi avulserat tempestas. Cùm  
enim crederetur , vel statim interiisse ,  
vel navim nequaquam assequi posse ,  
Xaverius mente ad DEum elevata præ-  
dixit : Scapham ante triduum elapsum  
ad futuram salvis omnibus , quos ve-  
hebat. Nec fefellit eventus. Adfuit  
tardem , & ultro , commodéque ad na-  
vim accessit scapha ; cùmque ex illa e-

ducerentur amissi , ac rogarentur : quo-  
modo tanto tempore jactati , adesse po-  
tuissent? responderunt: se præsente Xa-  
verio timuisse nihil , ipsum omnibus a-  
nimos addidisse , imò & scapham rexis-  
se , idque juramentō affirmabant. Tum  
enim verò omnes occūpavit stupor , si-  
quidem , & qui in navi erant , Xaverium  
semper in oculis habebant , & qui in  
scapha jactabantur illius præsentia , &  
ope non carebant , communicante se  
**Apostolo omnibus** , etiam ultra vires  
naturæ. *Bartolus in Vita lib. 3. n. 50.*

3. Apud Sinas anno 1585. P. Roge-  
rius , & Almeida opportunissima occa-  
sione invitati Sciauquino discedentes ,  
ubi P. Ricciū cum Fratre Lancitani  
reliquerunt , in Sinarum interiora feli-  
cissimè penetrârunt , navigatione amœ-  
nissima per duos menses protracta. In-  
terim Riccius Sciauquini alterum pu-  
blicum baptismum insigni pompa in-  
stituit , baptizatis personis 20. selectis.  
*Sacchin. hist. Soc. p. 5. lib. 5. num. 163.*

*Eodem die obierunt.*

4. In Hispania anno 1581. P. Didacus Borassa, Hispanus. Romæ, Dilingæ, Parisiis, tanto nomine, ac frequen-  
tia Philosophiam docuit, ut alicubi  
*Philosophi cognomentum tulerit, à quin-*  
*gentis auditus. Ceterūm simplicitate*  
*religiosa, & obedientiâ cœcâ fuit illu-*  
*strior. Hirundinem in arbore seden-*  
*tem accipere jussus, ivit, & aviculam*  
*facilè cepit, atque ad Superiorem de-*  
*tulit, DEO vetera Patrum exempla*  
*restaurante, ac commendante.*

5. In Hispania Nova apud Tenera-  
pam anno 1616. P. Ferdinandus de  
Santaren, Hispanus, odiō fidei à barba-  
ris Tepeguanis cæsus, post multos la-  
bores illorum causâ exantlatos. Avi-  
dissimus ærumnarum dictitabat : *Velle*  
*ærumnâ carere, idem esse : ac velle Christo*  
*tergum obvertere, atque illum solum sub*  
*eruce relinquere. Per annos 23. horri-*  
*dam illam vineam infraetô animô co-*  
*luit, DEO tandem par labori incre-*mentum dante. Suprà 40. novatem-**  
*pla erexit, atque ut minimum quin-*

quaginta millia capitum sua manu baptizavit. Qui fidei felix progressus non potuit non exacerbare dæmones, & satellites eorum , ut ad opprimendos omnes Christi operarios conjurârint , & non paucos, de quibus præcedentibus diebus , sustulerint morte cruenta. Præluxit P. Ferdinandus neci suæ crebra, acrûque corporis sui castigatione , cui non proprias solùm adhibebat manus, sed subinde à duobus Indis arbori voluit alligari , & dira flagellatione concidi. Ante mortem rogavit barbaros , qua de causa , violentas manus sibi inferrent ? Respondere barbari satis supérque causæ esset , quod Christianus Sacerdos esset. Ità illi clavâ confractum caput , cerebrûmque dispersum.

## XXI. NOVEMBRIS.

I. **P**Ost obitum P. Mutii Vitellesci...  
Præpositi Generalis , ex ejus, dum viveret , scripto suffragio renunciatus est Vicarius P. Carolus Sangrius  
Affi-

Assistens Italiæ , qui Congregationem  
Generalem Octavam indixit , inchoa-  
vitque hoc die , anno 1645. à qua ele-  
ctus est Generalis P. Vincentius Ca-  
raffa. *Ex Decr. Congr. 8.*

2. Apud Sinas cùm P. Francisco Pe-  
trio concessa esset anno 1565. venia  
adeundi Cantonem urbem Sinensem ,  
datus est illi hodie Senatus , coram quo  
exponeret postulata sua. Exposuit il-  
le per libellum supplicem , se esse ho-  
minem literarum amantem , & præter  
scientias naturales , etiam cælesti qua-  
dam , & divina instructum se esse , ad  
quam florentissimo , & eruditissimo il-  
li regno communicandam , optare se  
ac petere stabilem locum , in quo pos-  
set figere domicilium , & pro Regis ac  
regni felicitate offerre DEO cæli , &  
terræ sacrificia. Quæsitum est ex il-  
lo : quænam esset illa cælestis , divinâ-  
que doctrina ? Respondit Pater , Doce-  
re se quomodo DEUS cæli , terræque  
Conditor sit colendus , cuius beneficiō  
homines vitam , & beatitudinem æter-

nam consequi possent , cultum autem illum consistere partim in certis riti- bus , partim , maximè , in observatione mandatorum ejus , qualia sunt , fidem , ac pietatem colere , parentes honora- re , proximum diligere , nemini inju- riam facere &c. Quibus auditis , Man- darini se invicem admirabundi inspe- ctantes , continuò vestem purpuream Damasceno textu afferrì jubent , eám- que humeris Patris injiciunt , tan- quam tesseram viri præstantis , ac eru- diti. Sed plus impetrari tunc non potuit. *Sacchin. hist. Soc.p. 3.lib. I.n. 140.*

3. In Lusitania anno 1617. Ve- nerab. P. Franciscus Suarez , jam an- nos viginti defunctus , insigni bene- ficio recreavit Fratrem nostrum Hie- ronymum de Sylva , Coadjutorem , hominem vitæ valde religiosæ , & P. Francisco , dum viveret , perfamilia- rem. Habebat is in more , ut diem Præsentatæ in templo DEI - paræ V. communione Eucharistica celebraret , constitutus autem in itinere quodam , cùm

cum copiam habere non posset divini epuli , deflexit in via ad desertum , quoddam Sacellum , ut saltem piis affectibus pasceret animam . Et ecce procedentem ad se videt Franciscum , sibi notissimum , Sacerdotali habitu induatum , auratam lævâ pyxidem gestantem , qui ubi dixit se divinitus missum ad eum consolandum , cælestem ei panem porrexit , desiitque videri liquecente præ animi deliciis Hieronymo . Maffejus in Vita P. Suar . cap . 24 .

*Eodem die obierunt.*

4. Romæ anno 1584. P. Franciscus Turrianus , Hispanus . Concilio Tridentino magna doctrinæ opinione atque autoritate interfuit , à summo Pontifice missus . Societatem amplexus est ætate jam gravis , at senecta utili adhuc , & viridi , inter tyrones magno planè humilitatis documento versatus . Illud multæ , atque reconditæ eruditionis suæ , ac positæ operæ in

K 5

per-

pervolutandis bibliothecis pretium tulit, quod, cum Pius V. festum Præsentationis è Breviario, ceu minùs antiquum, expungi passus esset, ille ex vetustissimis scriptis, atque Patrum authoritatibus, ita antiquitatem ejus Festi probaverit, ut restitutum sit. Cujus laboris præmium videtur fuisse piamors ipso hoc DEIparæ V. festo appetita. Virtutem eximiam admiranda eruditione, & copiâ editorum Librorum eximiè illustravit, supra quinquaginta recenset *Sotvell.* in *bibl. Soc.*

5. Ingolstadii in Germania an. 1634. Nicolaus Martinus, Scholasticus, Germanus, morum innocentia, magnô Indianum desideratarum zelô, atque heroicâ charitate insignis. Tertium philosophiæ annum agens, cum pestem latè grassari videret, advertit se jacturam Indianum, quas impetrare nondum potuerat, utcumque compensare posse gloriofo labore in obsequio pestiferorum. Annuente itaque superiori, solennibus verbis se devovit. DEO pro salute Sociorum: & biduo pðst

pōst suffocatus catarrhō , insignis victi-  
ma charitatis occubuit.

6. In castris Sigismundi III. Regis  
Poloniæ, ad Smolenscum, anno 1609.  
P. Fridericus Bartschius, Prutenus. So-  
cietatem Romæ ingressus, Viennæ Au-  
striæ Theologiâ excultus, Vilnæ in Lit-  
vania Theologicâ laureâ ornatus, datus  
denique est Sigismundo Regi arbiter  
conscientiæ. Propter eximias virtutes,  
excellentem doctrinam, & in conver-  
sando comitatem, Proceribus regni,  
aulicis, & ipsis hæreticis gratissimus,  
& venerabilis, secutus est regia castra  
sub Smolenscum in Russiam: ubi, dum  
militibus contagiosa lue infectis, im-  
pigre omnem impendit operam, con-  
tracta lue decessit. Corpus Vilnam  
jussu regis delatum, solemnibus exe-  
quiis, panegyri, & præsentia Serenissi-  
mæ Reginæ Constantiæ cum Principe  
Filio, est honoratum. *Sotvell. in bibl. Soc.*

7. Bruxellæ in Belgio anno 1658.  
P. Jodocus Andries, Belga, Ecclesiastes  
eximius, & indefessus per annos pro-  
pè 40. etiamsi subinde bis, vel ter in

diem dicendum esset. Fuerunt fidē digni, qui affirmārunt, vidisse se dicentem cælesti luce circumfusum, & aliquando stellam ejus vertici insidentem. Cūm advertisset, ex parvis libellis piis, vel patentibus foliis, in populum sparsis, ferè plus fructūs colligi, quām ex majoribus ; plurimos edidit, præsertim de Perpetua Christi Cruce, & de Perpetuo gladio Reginæ Martyrum retulitque uberrimum operæ pretium. Moriens, alacri voce exclamavit : *In Cælum ! in Cælum !* & abiit. *Sotvell.* in bibl. Soc.

## XXII. NOVEMBRIS.

**I.** **P** Franciscus Petrius cūm satis speciosè Professionem suam exposuisset Gubernatoribus, & Magistratui Sinensi, ut heri narratum, re infecta Macaum, unde venerat, se recipere coactus est. Quamvis enim non deessent Mandarini quidam, qui censerent, Viro tali, qui non aliud quæreret, quām DEI cœli, & virtutis cultum, posse concedi domicilium ; san-

ctior

etior tamen apud plures, & altiores fuit lex patria, de non admittendis peregrinis. Negotium quoque legationis Regis Lusitani ad Sinarum Imperatorem rejectum est, epistola tamen valde officiosa data ad Regem, quâ se purgavit Imperator. Patri Petrio spem domicilii fecerunt nonnulli Mandarini, si melius instructus lingua Sinensi veniret: ut opus non esset interprete. Sed videtur fuisse officiosa rejectionis excusatio. Curiæ divinæ nondum visum est tunc maturum negotium illud.  
*Sacchin. hist. Soc. p. 3. lib. 1. n. 142.*

*Eodem die obierunt.*

2. Guadixii in Hispania, an. 1601. P. Petrus Bernal, Hispanus. Magnam sanctimoniaz opinionem sibi comparavit, orandi, se mortificandi, & animas juvandi studiô, vitiis extirpatis. Contra jurandi consuetudinem tanto ardore dicebat; ut etiam parvuli dicitarent, se non juraturos, nè P. Bernal habeat, cur indignetur. Multa ex vero prædixit, & morbos periculosos impositione manuum fugavit. 3. Por-

3. Porti in Lusitania anno 1656. P. Nicolaus Nugentius, Hibernus, Magni Ecclesiastæ elogium meritus, patriam suam per annos 40. multo labore excoluit difficillimis temporibus. Angli Præsidis jussu tentus, quatuor annorum ærumnosum carcerem toleravit, non suo tantum, sed Catholicorum etiam ad ipsum confluentium magno fructu. Proscriptus denique ex Hibernia, in Lusitaniam se recepit; ubi & operarium, & Sociorum Superiorem insigniter egit, suò tamen gubernandi modò non contentus, quoties, posito magistratu, meminit obitæ gubernationis, à lacrymis sibi temperare non potuit. Morbos non paucos oblatò pro ægris sacrificiò divinò, feliciter curavit.

3. In monte Frigido in Hispania an. 1607. P. Ferdinandus de Alamo, Hispanus. Invitatus à Præposito Provinciae ad obeundas sacras Missiones, obtenu valetudinis debilioris subduxit se labori. At postea cùm Asceticas S. P. N. exercitationes obiret, apertum Christi

Christi latus intuitus , perfususque di-  
vino lumine , erubuit , & cum lacrymis  
Missiones petiit , quas Apostolicō pla-  
nè zelō obibat , ingenti animarum fru-  
ctu. Unde dæmon aliquando auditus  
est dicere , Allamellum ( ità eum per  
contemptum vocabat ) esse unum ex  
iis , quos haberet maximè inimicos.

### XXIII. NOVEMBRIS.

I. **D**ies hic magnum virum dedit So-  
cietati anno 1545. Hierony-  
mum Natalem , quem S. Pater , cum ad-  
huc uterque Parisiis vacaret studiis ,  
jam maximè idoneum vidit propositis  
suis , captabatque hominem omnibus ,  
quibus poterat , modis. Sed ille , quam-  
vis pietati apprimè deditus , remis ve-  
lisque fugiebat viam perfectionis , quam  
monstrabat Ignatius ; & cum hic ali-  
quando pressius instaret , Hieronymus  
productum Evangelii codicem exhi-  
bens ; En , inquietabat , quem ego se-  
quar ; non te , qui quem exitum habi-  
turus sis cum Sociis tuis , ignoro ; si-  
mūlque evolavit è conspectu . Sed  
inse-

insecutus est eum DEus, nec ullam animo quietem dedit , donec post annos complures , confirmata jam Societate , & Viris, rebusque gestis florente, præsertim postquam S. Xaverii ex India datas literas legit ; Romam se contulit , & ad obeunda Spiritualia Exercitia , quæ hactenus summè vitârat , annum applicuit. Ibi variis primùm agitatus spiritibus , tandem post decem , & octo dies , tam copioso cælitus perfusus est lumine , ut sine mora ulteriorē , hoc die votum emiserit , & scriptō consignârit de ineunda Societate , & vilissimis in ea officiis obeundis. Sic tandem annumeratus est Sociis , qui pridem potuerat esse unius de principibus ejusdem familiæ , magnóque deinceps usui fuit S. Ignatio , ad res magnas gerendas. *Orland. hist. Soc. lib. 5. n. 4. & seqq.*

2. In Lusitania , postquam Fr. Hieronymus de Sylva , à Ven. P. Francisco Suarez , divinitus spectabili , sacra Communione refectus fuisset , prout 21. Novemb. narratum , rediit ad Collegium

legium suum Portuense, certus nemini patefacere, quod sibi contigerat in via. Sed DEus, salva viri humilitate, rem gestam aperuit per Sanctimonialē è familia S. Claræ, quæ missâ ad P. Rectorem Collegii schedâ, impensè eidem commendavit Fratrem Hieronymum, tanquam virum DEO charum; exposuitque distinctè, quomo<sup>d</sup> à P. Suarez pridem defuncto, divinô epulô refectus suit. *Maffejus in Vita P. Suar. cap. 14.*

### *Eodem die obierunt.*

3. Pragæ in Boëmia anno 1613. P. Marcus Soldanus, Italus in obsequio pestiferorum extinctus, cum aliis, in simili per Boëmiam obsequio, similiiter coronatis. Multa egregiè gessit in commodum miserorum, ideoque *Pater pauperum* dictus. Jam autem in pestilentem illam arenam descenderat, exieratque salvus, & victor, quarta vice prostratus est, non tamen coronam amisit, ad quam paucis ante obitum diebus, ipsum vocaverant SS. Ignatius

&amp;

& Xaverius, qui se ei cum splendida plurimi socrorum corona spectandos dederunt. Morte sua securitatem perisse visus est superstitibus in eadem arena sociis, nemine post illum extinto.

4. Cartilionæ in Italia anno 1621.  
 P. Hector Lupatinus, Italus. Castimoniæ tam severus custos fuit à teneris, ut, ex quo rationis usum adeptus est, nullum fœminæ ullius ministerium, nedum familiaritatem admiserit. Patavii in lectulo Hectoris, philosophiæ tunc studentis, nondum religiosi, collocârunt fœminam insolentes, & impudentes quidam: quam ille ubi domum redux vidit, confessim se fugâ de illa domo eripuit, nec in eam unquam pedem retulit. In Societate cùm fœminas confitentes audiret, aures illis tantum, non oculos dabat, easque expediebat pari ædificatione, & brevitate. Charitate, patientiâ, obedientiâ præstans, & æger, & sanus nihil unquam aggrediebatur, nisi habito superioris, itâ volentis, nutu;

nutus etiam sufficiebat ad inchoatum  
quodlibet opus omittendum.

## XXIV. NOVEMBRIS.

I. **P**ius IV. Pont. Max. cognitô decretô , in Hispania condito , quô vetabat Rex Philippus II. ex Hispania Röinam mitti Collegio Romano subsidia quædam , plenissimam affectu paterno epistolam dedit an. 1561. ad eundem Regem pro Societate , & in particulari , pro Collegio Romano. Et officio , inquit , nostro convenit , Religiosam vitam degentes patrociniô nostrô diligenter tueri ac fovere ; & Regibus maximè expedit , de servis ejus , per quem ipsi regnant , quam optimè mereri. Dominus noster in servis suis recipitur , & honoratur , sicut ipse in Evangelio dixit : Qui recipit vos , me recipit. Sed inter Religiosorum Ordines , singulari ab Apostolica Sede studio , meritô complectendus est is Ordo , qui non itâ pridem institutus , & ab hac Sancta Sede confirmatus , IESU Societas appellatur. Hi enim operarii,

rarii, licet novissimi, tanquam nonā diei horā, in vineam Dominicam ab ipso Domino inducti sunt, adeò strenuam tamen, & utilem operam nava-re cœperunt, ut non modò spinas ex ea, & vepres evellere aggressi sint, sed ipsam etiam alibi auxerint, & propa-gârint. Incredibile ferè est, quantum tam brevi tempore hic Ordo profecerit, quantum Ecclesiæ DEI utilita-tis attulerit &c. Descendens postea Pontifex ad Collegium Romanum: Hujus Ordinis, inquit, maximum in hac alma Urbe Collegium habemus, quod tanquam Seminarium quoddam est aliorum, quæ per Italiam, & extra Italiam, in Germania, & Gallia pro-pagantur. Ex hoc uberrimo Semi-nario Apostolica Sedes instituit dele-ctos idoneos Ministros, tanquam ge-nerosas, & frugiferas plantas, alias aliò, prout usus venerit, conserendas mittere. Nullum unquam hi laborem pro DEI honore, & hujus Sanctæ Se-dis obsequio recusant. Itaque multum de-

debemus huic Collegio ità de Religione Catholica merito, & assiduè merenti. Quamobrem Majestatem tuam hortamur in Domino , rogamus , & in remissionem peccatorum suademus , ut pro tua præsenti in DEUM pietate , in Religiosos , & bene de Christiana Religione merentes Ordines , liberalitate , sicut Rex verè Catholicus , hoc Collegium complectare , & quām commendatissimum habeas &c. *Sacchin. hist.*  
*Soc. p. 2. lib. 5. num. 158.*

*Eodem die obierunt.*

2. Salmanticæ in Hispania an. 1601.  
 P. Franciscus Ribera Hispanus , Concionator , & animarum zelator præstans. Talis cùm etiam in seculo esset , Societatem ingressus est , postquam à P. Martino Gutierrez audivit : *LEO consecrandum esse , quod habemus optimum*, id est, liberam voluntatem. Magistro P. Balthasare Alvarez , eos fecit in virtute solida progressus , ut exemplar esset perfectionis religiosæ. *Concionan.*

nantem ad populum , vidit S. Thereseia , quæ ipso utebatur Confessario, ingenti splendore circumfusum , Christum verò Dominum assistentem , atque in ejus humeros reclinatum , eumque suavi amplexu foventem. Audit quoque dicentem : *Hic est , ô Anima , qui sensu germano scripturas meas , ea veritate , quam ipsi infundo , explicat. Novit ipsum earum pretium expendere , quas ego mortalibus mei sanguinis , effusione comparavi.* Gratulare tibi , quod eum habeas à Confessionibus ; obtempera dictis ipsis : ita voluntati meæ feceris satis. Tertio post mortem die visus est multâ gloriâ conspicuus ante thronum DEI , è cuius pectori pulcherrimus lucis radius promicans , P. Franciscum miro splendore , & gaudio perfundebat. Unde patet : quantum authoritatis debeatur doctissimis ejus Commentariis , quæ edidit in Epistolam ad Hebræos , atque in Evangelium , & Apocalypsim S. Joannis.

3. Villagartia in Hispania, an. 1621.

P.

P. Bartholomæus Perez, Hispanus. Regularum amantissimus, & observantissimus, semper eas circumferebat in sinu. Quoties è cubiculo prodibat, ferè semper Tabernaculum Eucharisticum invisebat. Jam morti proximus, & viribus destitutus petiit, an posset bonâ conscientiâ omittere annotationem consuetam punctorum, in libello Examinis particularis ? manabatque jugibus lacrymis, quod tempus in Societate non optimè, juxta genium ipsius, collocasset.

## XXV. NOVEMBRIS.

I. **H**Abita est anno 1603. Congregatio, & disputatio de Aux. coram Clemente VIII. vigesima secunda. Argumentum disputationis fuit : *An, quod liberum arbitrium ex se, separatum à gratia, nihil habeat à DEO, nisi possibilitatem illam, quam Deus tribuit ab initio, sit ex sententia S. Augustini, vel dotiùs Pelagii?* Respondit P. Bastida, distinguendo tres sensus istius quæstionis, ostenditque ex mente S. Augustini,

ni, & Molinæ , Liberum arbitrium concurrens ad actum bonum , plus omnino habere à DEO , quām possibilitatem illam. Quia DEUS per gratiam suam ipsum arbitrium movet , excitat , & adjuvat , ut actu operetur , & non solum possit operari . Prolixè , clarè , & nervosè hæc deduxit Baftida . *Eleuther. de Auxil. lib. 5. cap. 26.*

2. B. Aloysius Gonzaga , à DEI-patra monitus de ingredienda Societate , toto triennio cum Patre , Marchione Castilionensi , invictâ constantiâ luctatus , tandem assensum obtinuit , & anno 1585. die Divæ Virginis ac Martyri Catharinæ sacro , Romæ tyrocinium Societatis est ingressus . *Sacchin. hist. Soc. p. 5. lib. 5. n. 45.*

3. In Hispania anno 1551. Cordubam venerunt Socii ad inchoandum Collegium , quod noster P. Antonius Corduba , vir de principe familia , moliebatur , sed absolvit Joannes Corduba , ei sanguine junctus , Decanus Cordubensis . Erat is genere , & opibus

bus præpotens, avidus autem cognoscendæ Societatis. Ubi ergo audivit, venisse Cordubam Patrem Villanovam cum Sociis, omnes invitat ad se, hospitium præbet, liberaliter hospites habet, semper autem intentissimus, & diu noctuque deditus explorandis eorum non solùm moribus, sed mentibus, dabatque passim occasionem, ut eos caperet. Sed dum hoc agit soliciius, capitur ipsemet. Cùm enim nihil deprehendere posset tota industriâ suâ alienum à moribus religiosis, suspicere cœpit, ac amare Institutum tale, eoque res devenit, ut domum propriam offerret pro Collegio, redditus quoque assignaret annuos, & quod caput est, vitam ipse, statui suo non conformem, cum stupore civitatis mutaret in Prælato Ecclesiastico dignam. *Orlandinus hist. Soc. p. 1. lib. 13. n. 39.*

*Eodem die obierunt.*

4. Avifii in Lusitania anno 1590.  
P.Ludovicus Alvarez, Lusitanus. Concionado tantam nominis celebritatem

asscutus fuit , ut Summus Pontifex P. Præposito Generali dixerit , sibi relatū : comparuisse in Lusitania novum quendam Paulum , è Societate , ita ardebat ejus oratio , & intimas ossium medullas penetrabat . Etiam in proiecta ætate pedes obibat trans Tagum , libros ipse bajulans , & cibi aliquid ; si nihil secum attulisset , precariò vietabat , Xenodochio diversorii vice usus . Mundum muliebrem insolentiorem acerrimè infectatus , prædixit : Brevi fore , ut vannum , petulantemque illum splendorem barbaris darent fœminæ , ad redimendos è vinculis maritos . Quod evenit post funestam illam Sebastiani Regis in Africa cladem . Putatur P. Ludovicus venenô sublatus à quodam , cuius pravos mores corrigerere studebat .

5. Madriti in Hispania an. 1627. P. Rodericus Ninno de Guzman , Hisp. Illustrissimos natales splendida virtute , & singulari animas juvandi ardore ornavit . Ut obscurus , & ignotus viveat , quamvis sublimioribus tradendis

sci-

scientiis peridoneus, Grammaticæ clas-  
si infimæ docendæ applicari efficitim  
petiit, & obtinuit. Sed non diu lucer-  
na hæc sub modio illo latere potuit.  
Evectus ad Cathedram Ecclesiasticam  
miros plausus, & animorum motus ex-  
citavit, semelque auditus à Philippo  
IV. Rege mox in Aulicum Concionato-  
rem assumpitus est. Illud singulare, &  
planè mirandum, quod sive Collegio,  
sive Domui Professorum præcesset, sive  
Provinciam gubernaret, perinde assi-  
diuus occupabat Confessionale, pero-  
rabat è Cathedris, serviebat in Nosfo-  
comiis, exhortabatur Sodales, institue-  
bat rudes, invisebat, & morti parabat  
ægros, ut in proverbium venerit apud  
socios: P. Rodericum in se uno totum  
**Collegium circumferre**, ed; quod so-  
lus omnium munia impleret. *Ex Tan-  
nero.*

## XXVI. NOVEMBRIS.

I. IN Academia Ingolstadiensi Theo-  
logicas lectiones auspicati sunt  
anno 1549. Patres Salmeron, & Cani-  
L 2 sius

fius Salmeron Epist. D. Pauli, Canisius Magistrum Sententiarum explanandum suscepit. Jajus, qui unà cum illis tunc advenerat, sed jam antè ibidem legerat, Psalmos Davidicos postea est interpretatus. Magno cum gaudio, & honore venientes ex Italia excepti sunt Dilingæ à Card. Augustano, Monachii à Duce Bavariæ, Ingolstadii ab Episcopo Aistetenſi, & Academia tota, cujus Doctores omnes, atque Magistri ad eos consalutandos in diversorium convenerunt, atque hospites liberali epulo exceperunt. Nec fefellerunt isti spes de se conceptas, in id totis connisi viribus, ut Catholicam juventutem in fide firmarent, hæreticorum corruptelas arcerent, ac extirparent. *Orlandinus hist. Soc. p. 1. lib. 9. num. 53.*

2. In Hispania, dum Roma desudabat in examinando P. Molinæ libro, jam fama volitabat, confixum esse, & Societatis doctrinam propediem esse damnandam. Rumor hic cùm ad ipsum Philippum III. Regem pervenit.

nisset, non distulit literis, quas hoc die anno 1598. dedit, convenire Clementem VIII. rogando, ut pro sua auctoritate, & sapientia pacem conciliaret inter dissidentes Ecclesiae utilissimos Ordines duos. Alias dedit literas ad Oratorem suum Romae degentem, Ducem Sessae, quibus ei commendat, ut procuret, ex quo bonoque judicium exerceri, ut neutra pars dissidentium ulla in re iniquiore conditione prematur. Audiantur prius, & tum demum causâ satis cognitâ, jus æqualiter administretur. Multum contulisse videtur hæc solicitude, & authoritas Regis, ut Pontifex non staret judicio Censorum libri Molinæ, sed totam causam ad se transtulerit. *Fleuther. hist. de Auxil. lib. 3. cap. 5.*

*Eodem die obierunt.*

3. Mutinæ in Italia anno 1629. P. Joannes Argentus, Italus. In Italia, Austria, Polonia, Transylvania, insignia prudentiæ, zeli, conjunctionis cum DEO, & perfecti Religiosi edidit

exempla, sicutque passim in ea æstimatione, ut defuncto præposito Generali, Claudio Aquaviva, licet absens, virginis novem suffragiis ad id munericus fuerit desideratus. Nullus illi in agendo fucus, unica in diem refectione, pro lectulo ursina pellis, paterna erga omnes facilitas, eximia in Virginem DEI param, & S. P. Ignatium, pietas, ut meritò creditum sit, eos conspectu suo ipsum recreasse.

4. Romæ anno 1572. P. Joannes Bapt. Sanchez, Hispanus. Vir quam severus disciplinæ religiosæ exactor à se ipso, tam impatiens erratorum alienorum. Unde cùm in Sociorum quibusdam nonnulla adverteret errata, ad ipsam Societatem ea referebat, putabatque ipsam labi in deterius. Romanum igitur evocatus, & venit obedienter, licet à morbo fractus, & melius de Societate sentire didicit. P. Balthasar Alvarez aliquando dixit: sibi ad mortem præ dolore oppetendam satís fore, si sciret, se uno adhuc integro die vicietur. Ità cupiebat dissolvi, & esse cum Christo.

5. Ro-

5. Romæ anno 1681. P. Joannes Paulus Oliva, Italus Genuensis, Præpositus Generalis Societatis JESU. Avum, & Avunculum habuit Serenissimos Duces illius Reip. Concionandi munus per annos plurimos tanto plausu, & fructu sustinuit : ut à 4. Summis Pontificibus, Innocentio X. Alessandro VII. Clemente IX. & Clemente X. in Concionatorem S. Palatii Apostolici fuerit adlectus. Spiritum ipsius satis produnt Volumina edita. Onus gubernandi Societatem ob valetudinis imbecillitatem deponente P. Goswino Nickel, suffectus eidem est à Congregatione Generali cum plena gubernandi potestate, & jure succendi. Gubernavit Societatem annos viginti, insigni temperamento suavitatis, & disciplinæ, ac exquisitæ prudentiæ encomio.

## XXVII. NOVEMBRIS.

I. IN Sicilia Panormi jaeta sunt anno 1586. fundamenta novi Collegii ; quod enim anno 1549. condi-

tum fuit , minùs commodum videba-  
tur, & potius Domui Professæ accomo-  
datum. Consignatum ergo est Pro-  
fessis , novumque unà cum Scholis in-  
choatum. Primo lapidi jaciendo ma-  
num admovit Prorex ipse Siciliæ, cum  
amplissimo Senatu. *Sacchin. hist. Soc. p.*  
*g. lib. 6. num. 16.*

2. In Urbe emanavit tandem Annō  
1698. Decretum Innocentii XII. quo ,  
post multas altercationes inter PP. Car-  
melitas , & P. Danielem Pappenbro-  
chium è Societate nostra ferventes (de  
Antiquitate , & Origine Sacri Ordinis  
Carmelitarum ab Elia , & Elisæo Pro-  
phetis ) utrique parti severum indici-  
tur silentium , ut nec in libris impres-  
sis , nec in dissertationibus , nec in The-  
sis scriptis , vel impressis , de hac ma-  
teria affirmativè , vel negativè tractetur.  
*Ex literis Rom.*

*Eodem die obierunt.*

3. Mexici in America , annō 1695.  
P. Jacobus Herrera Hispanus , humi-  
litate , pietate , atque animarum zelo —  
exi-

eximus. Tam scitè, sancte que tractabat animas, quæ se ejus directioni commiserant, ut præter alios præclaros fructus, trecentæ Virgines illius institutione ad cælestem in variis cœnobiis vietam degendam transierint.

4. Duaci in Belgio an. 1617. Matthias dela Saulx, Belga Coadjutor. Magna curandorum ægrorum peritia, nec minor erga eosdem charitas in eo eluxit. Sed omnes præclaras ejus dotes vix non corrupit intempestivum, & pertinax desiderium Sacerdotii. Jam enim postridie dimittendus erat è Societate: cum noctu per quietem, videre sibi visus est S. P. Ignatium, ad pedes lectuli consistentem, & formidabili manu exitium sibi comminantem, si non persisteret in Societate. Tum ille in uberes lacrymas effusus, manè sinè mora ad superiorem advolavit, & damnato errore suo, potestatem in Societate manendi effictim petiit, impetravitque, in qua deinceps ita vixit, ut omnibus charus, pretiosam meruerit mortem in obsequio pestiferorum.

5. Hispali in Hispania, anno 1611.  
 P. Petrus Fontanus, Hispanus. A teneris Divinæ Eucharistiæ, ac DEI-paræ V. cultui addictissimus, ut illis placeret magis, non castam solum, sed nitidissimam servare conscientiam studebat. Nè verò per humanam fragilitatem nævi aliquid subinde contraheret, mortem potius impensè optabat. Ad quam celerius obtinendam Novemdiale Sacrum Beatissimæ V. instituit; cum autem putaret, se nihil impetrâsse, voluntati divinæ se plenè permisit. At propior, quām putarat, mors aderat, hominémque, quò desideraverat, abruptiuit intra paucos dies.

### XXVIII. NOVEMBRIS.

I. IN Germania anno 1590. disputatum feliciter cum hæreticis. Marchio Badensis Acatholicus medico utebatur doméstico, Joanne Pistorio, qui inita cum Patribus Collegii Spirensis familiaritate, conversus tandem est ad Fidem, & Religionem Catholicam. Is misto sèpiùs cum Marchione præfato de

de Religione colloquio, paulatim suspectam ei fecit sectam Lutheranam. Marchio, vir prudens, saluti suæ consulturus, ut certi aliquid circa Fidei Controversias assequeretur, optavit colloquium alicujus ministri in secta sua celebrioris, cum suo Pistorio, scripsitque ea de re ad ducem Wirtenbergensem. Dux suasit Jacobo Andreæ Smigdelino, eo tempore inter Lutheranos rabulas famoso, ut præclarum susciperet occasionem, de sua religione merendi. At ille, ut tumidum est hoc hominum genus, prætendit: indecorum esse sibi, homini Theologo, disceptare cum medico de Religione; adesset sibi par Theologus Catholicus, non recusaturum se congressum. Accepta facile conditio, rogatusque adfuit sine mora P. Theodorus Busæus, Collegii Molshemiensis in Alsatia Rector, vir apprimè doctus. Locus certamini designatus urbs Bada, seu Badena: eò se minister magna stipatus simmistarum manu contulit, sub finem Novembris. Certatum eventu

nem dubio , ut patuit ex conversione  
**Concionatoris aulici** , qui victus Ca-  
 tholicorum argumentis , Ecclesiæ ac-  
 cessit. Marchio quoque in consciен-  
 tia convictus erat , nè tamen Religio-  
 nis mutationem leviter suscepisse vide-  
 retur , aliud colloquium indicendum  
 putavit , ad quod invitavit Doctorem  
**Ægidium Hunnium**. Sed is Smigde-  
 lini clade territus , recusavit. Susce-  
 pit tamen eam spartam Joannes Pap-  
 pus Doctor Argentinensis , comparuit  
 que cum octodecim Badensis Provin-  
 ciæ ministris , ante omnia professus ,  
 se nec cum Pistorio , nec cum Jesuita  
 verbum facere velle , sed cum solo  
**Concionatore aulico** , nuper , ut aje-  
 bat , seducto. Verùm nec ex isto con-  
 flictu palmam tulit hæresis. **Concio-**  
**nator ille** , DEO opitulante , tam stre-  
 nuè rem egit contra Pappum , ut Mar-  
 chio planè convictus , dicere solitus sit :  
 præcipuam suæ conversionis causam  
 fuisse Pappum , misere profligatum.  
 Accito igitur P. Theodoro , Lutheri  
 errores execratus est , primus è Princi-  
 pibus

pibus Imperii conversis , 15. die Julii  
pa'lam Fidei Catholicæ fecit professio-  
nem , prædicantes è tota ditione sua  
proscripsit , fana occlusit , nihil metu-  
ens terrores , & arma principum vici-  
norum . Aliis igitur artibus impeti-  
tus est , & porrectis venenatis cerasis  
sublatus , zelosissimus Princeps , è cuius  
linea descendentes Marchiones , etiam-  
num Catholici perseverant . *Sacchin.*  
*bif. Soc. p. 5. lib. 10. num. 104. &c.*

*Eodem die obierunt.*

2. Tornaci in Belgio anno 1614 , P.  
Oliverius Manaraeus , Belga . Ab ipso  
S. P. Ignatio haufit primitias Spiritus  
Societatis , quas continuis , magnisque  
incrementis auxit . Romanum Colle-  
gium primūm , deinde Lauretanum  
rexit , ubi cùm cubiculum quoddam  
lemures infestarent lectâ S. Ignatii E-  
pistolâ importunos hospites exegit . I-  
bidem non semel prodigiosam DEI-  
paræ V. opem expertus est , tum in  
annona , tum in pecunia suppeditanda .  
Etiam cùm summa quæque in Socie-  
tate

tate munia gereret, nullum, vel Novitium, diu coram se aperto capite stare passus est; quam humilis, tam charus omnibus.

3. Nangasachi in Japonia, anno 1629. Leonardus Kimura, nobilis Japon, Coadjutor. Quamvis literis satiis tinctus esset, maluit tamen Coadjutorum classi adscribi. Proscriptis è Japonia Sociis, perststit constans, latuitque aliquantis per in solatium, & opem Christianorum. Comprehensus, conjectus est in angustiun carcerein, cuius ærumnas integro anno fortiter, & latus toleravit, distributisque in morem Collegii pietatis exercitiis, carcerem in dominum religiosam, imò in Ecclesiam convertit, conversis in illo baptizatisque octoginta sex capitibus. Interrogatus à Judice, cur contra decretum Imperatoris persttitisset in Japonia? Respondit: *ut Christi Evangelium prædicarem.* Tum Judex bis repetita voce sententiam dixit: *Ergo igne absumendus es.* Amplas egit gratias Leonardus alligatus stipiti, sinè ullo doloris

loris signo stetit magnanimus , ubi verò ignis vehementia combusta sunt vincula ; libera utraque manu ardentes prunas collegit , & illis caput , vellut rosis , coronans , exultabundus cecinit , *Laudate Dominum omnes gentes &c.* & invinctum spiritum DEO tradidit.

4. Brugis in Belgio anno 1621. P. Joannes Maus , Belga. Cùm pestifera iues civitatem acerbè affligeret , Episcopus , & Magistratus opem ab illo , ut Rectore Collegii imploraverat. Non est passus P. Joannes alteri gloriosam hanc cedere palmam ; se ipsum obtulit , & multis , magnisque meritis mortem pretiosam sibi comparavit.

## XXIX. NOVEMBRIS.

I. IN Congregatione , & disputatione XXXIV. de Auxiliis Gratiae , habita anno 1604. coram Clemente VIII. demonstravit P. Ferdinandus Bastida : Scientiam futorum contingentium , quam disputatione præcedente probaverat , dari in DEO , esse omnino certam , & infallibilem , & non

non conjecturalem tantum, seu probabilem. Talis enim maximè dedecet intellectum infinitè perfectum, cui nuda, & aperta sunt omnia. *Eleuther. hist. de Auxil. lib. 5. cap. 45.*

2. Annô 1572. post beatum Pii V. obitum, successit auspicatissimè in Ecclesiæ universalis regimen Gregorius XIII ; sed continuò rumor in Aquilonares Provincias emanavit, creatum esse Pontificem alienissimum ab Jesuitico nomine, & jam illos ex urbe expulisse. At planè oppositum evenit, statim enim ab initio sui regiminis perbenignum se Societati exhibuit, crevitque deinceps continuò beneficentia usque èd, ut vix ultrà posset. Primum beneficentiæ specimen edidit, quando sub extremum Novembrem, re communicata cum præcipuis Cardinalium, diligentèque discussa, permisit, ut Societas pristinis juribus suis ac Privilegiis à Sede Apostolica concessis, libere ac integre frui posset, adeoque sustulit Chorum recenter inductum à Pio V. solemnem Professio-

nem,

nem, quam idem emitti voluit statim cum suscep<sup>t</sup>o Sacerdotio, reduxit ad terminos in Instituto Societatis designatos. *Sacchin. hist. Soc. p. 3. lib. 8. num. 12. & seqq.*

*Eodem die obierunt.*

3. Vallisoleti in Hispania an. 1611. P. Antonius de Padilla, Hispanus. Grandibus procerum titulis, & fortunis se exuit, ut pauperem Christum in ejus Societate indueret. Humilitas illi pro primo Spiritualis vitæ lacte, & omnium adversorum condimento erat. In tirocinio jussit illum aliquando P. Baltasar Alvarez, ejus Magister, à mensa surgere, & ante portam domūs cum mendicis manducare. Fecit alacriter, diebusque Sabbathi exibat cum emptore, & emptas carnes humeris domum deportabat. Pro pulpito audiebatur secundissimis auribus, dicebaturque de illo Rex Philippus II. *Satis esse ad permovendam concionem, videre in pulpite P. Antonium, tantā mundi dispiciētiā gloriosum.* Cūm ei Burgensis Archie-

chiepiscopatus offerretur , dixit : *Sibi pro morte lectulum unicūm , eūmque rūdem , ac vetustum sufficere.* Quamvis vitam severissima virtute transegisset , in morte tamen immimentis judicii intuitu visus est trepidare . Sed acceptō divinō Viaticō se ipsum animans . *Quid timere , ajebat , debo , Domine mi , cūm mihi dixeris , quōd me clausum in tuo corde gestes ? Cūm itā sit , eamus , quōd vis , non est , quod pertimescam .* Et obiit placidē horā , quam prædixerat .

4. Milistadii in Germania an. 1633 .  
 P. Petrus Ximenez , Hispanus , magnum in Annalibus Austriae nomen . Græcii , & Olomucii multa fortiter , atque utiliter egit contra hæreticos , qui ibi dominabantur , viditque dulces laborum suorum fructus . In causa DEI , & Religionis nullis movebatur respectibus humanis . Unde Viennæ quosdam , qui cum fœminis nutibus colloquebantur , prehensa manu è templo eduxit , dicens : Locum illum DEO sacrum esse , nec polluendum his sordibus . Oratio illi prolixa , quæ illum aliquando à sen-

sensuum officio abstrahebat. Post Sacrum summa attentione peractum, duobus aliis intererat, ut suaviissimo hospite suo familiariūs frueretur.

5. Romæ anno 1694. P. Paulus Segneri, Italus, Missionarius per Italiam, & Concionator planè Apostolicus. Cùm circa annum 1663. ad sacram Exercitiorum spiritualium solitudinem Perusii se recepisset, audivit DEUM in corde sibi loquentem : *Volo, ut amemus invicem.* Fuisse hanc DEI vocem, mox probavit eventus. Ab eo enim momento mutatus in virum alterum, qui semper probus Religiosus fuerat, maximis passibus ad culmen perfectio-  
nis evasit, passim pro Sancto habitus, & proclamatus, à summo etiam Pontifice expetitus pro concionibus in aula habendis, quibus omnis conditionis hominibus, non aures mulcebat, sed loquebatur ad cor, in virtute DEI. Ex Epistola P. Pinamontii ejus Socii in Missionibus.

## XXX. NOVEMBRIS.

I. **A**NNO 1554. erectum est Collègium Lauretanum Pœnitentiariorum à Julio III. Pont. Max. datusque illi est primus Rector P. Oliverius Manaræus. Expedivit illuc S. Ignatius Socios 14. in fine Novembris, jussu Pontificis, qui cum propter confluxum populi sufficientes non essent, aucti sunt postea usque ad virginati. Quàm gratus ibi fuerit DEO Sociorum adventus, & labor, declaravit insigni ostento. Dum enim quidam è Patribus concionem dicit ad Canonicos, & populum, alii verò in exercitis constitutis dant aures, & operam pœnitentibus: visus est multis cælestis quidam splendor è fastigio templi labi supra Sanctam DEI-paræ Domum, templo inclusam, ubi cùm aliquamdiu consedisset, digressus est ad Pœnitentiariorum tribunalia, supérque capita ipsorum, & confitentium ferebatur tempore notabili. *Orlandinus hist. Soc. p. 1. lib. 14. num. 23. &c.*

2. Etiam per Angelos declaravit  
 DEUS anno 1650. hoc die : quām  
 acceptus ei sit labor Societatis, specia-  
 liter Missionariorum. Perpiniani, in  
 Comitatu Roussillionensi, nunc Gallis  
 subiecto , cūm præter bella fames, &  
 pestis affligeret populum , instituta est  
 Missio Societatis pro excitanda populi  
 devotione majore, & placandam Divi-  
 nam Majestatem. Recitabantur Li-  
 taniæ Marianæ in regali Parochia, fre-  
 quenti populo præsente, cūm ecce re-  
 ligiosior quidæm è Missionariis nostris  
 videt DEI-param V. aræ majori insi-  
 dentem , ingenti splendore circumfu-  
 sam , cuius latera stipabant SS. Ignati-  
 ius, & Xaverius ; Angelorum autem  
 Chorum numerosissimum , & suavissi-  
 mum audivit occidentem : “ Gaude  
 “atque exulta, Augusta cœli, Angelo-  
 “rūmque Regina. Gaude, & tu Ig-  
 “nati , gaude Xaveri. O te Beatum  
 “Ignati , qui eos natus es filios , qui  
 “tot animas à peccati vinculis , infamí-  
 “que servitute eripiunt , & laboribus  
 “suis verè Apostolicis , cælum implent  
 “tot

"tot tantisque animarum manipulis.  
 "Quæ porro felicitas , quæ beatitas,  
 "ex illa esse Societate , quæ adeò con-  
 "stanter , & operosè hominum saluti  
 "ac perfectioni incumbit ? O generosi  
 "Societatis Missionarii ite læti , ite ala-  
 "cres -- Vobis in primis amici sumus,  
 "ut vos adversus hostes tueamur , &  
 "omnia à capitibus vestris mala pro-  
 "pulsemus. O gloriose Ignati gaude,  
 "qui filios habes , quibus vel maximè  
 "favet cælestis Pater, quos amplectitur  
 "DEUS Filius , quos impensiùs amat  
 "Spiritus S. & potentissima Regina no-  
 "stra. Et tu gaude ô gloriose noster  
 "Seraphim Xaveri : qui ad divina illa  
 "animarum lucra , & dux fuisti , & lu-  
 "men ipse prætulisti. Tibi debetur  
 "illa laus , illa gloria , qui aliis ad sa-  
 "cras illas expeditiones exemplo illu-  
 "strioce præfulsist. Gaude magna Se-  
 "raphim Xaveri ! MARIÆ verò glo-  
 "ria ! quæ ad pios illos ausus animos  
 "fecit , & consilia saniora suggessit.  
 "Gloria MARIÆ , gloria Ignatio glo-  
     "ria

Xaverio! Gloria, gloria, gloria in  
æternum! Hæc cælestes genii, quo-  
rum aspectu, cantuque per medium  
circiter horam recreatus est Missiona-  
rius ille. Ita refert Jacobus Loretius Tom.

1. Quæst. in Domin. & Festa, quæst. 4. in  
Domin. 3. post Pentec. super illa verba:  
Gaudium erit in cœlo super uno pec-  
catore &c. Gomez in Elog. Soc. p. 3. classe  
3. num. 8.

3. Gerundæ in Aragonia an. 1658.  
in signi miraculo sanitatem subito resti-  
tuit moribundo Venerabilis P. Franci-  
scus Suarez. Jacebat in Seminario de-  
sperata jam valetudine Magister è no-  
stris, quem cum quidam è Patribus su-  
premis Sacramentis procurasset, ma-  
gna noctis parte apud ægrum transfa-  
cta, existimans supervicturum crasti-  
num, recepit se in Collegium. Sensit  
autem vehementem instinctum, ut ali-  
quid de reliquiis Ven. P. Francisci de-  
ferret ad ægrum, ac per ipsum à DEO  
posceret sanitatem moribundo, ad au-  
gendum Doctoris nostri estimationem,

&amp;

& honorem. Manè sumpto reliquiarum loco , à charta rescisso chirographo , manu P. Francisci exarato, redit ad ægrum , schedámque illi magna cum fiducia imponit. Nec mora, exclamat protinus æger : Revixi ! P. Suarius me invisit , sanitatémque reddidit ! Videbatur nonnenimi aberrâsse à mente : sed ille idem ingeminans, paùlo pòst è strato se proripuit , totus in sospitatoris sui laudes effusus. *Maffeius in Vita P. Suar. cap. 24.*

*Eodem die obierunt.*

4. Compluti in Hispania an. 1597.  
 P. Milan. seu Æmilianus Garcia , Hispanus , Concionator ardens , operarius indefessus , & multis peccatorum conversionibus felix. Inter dicendum visus est non semel tota facie collucere , alias in festis Pentecostes conspecta est Columba imminens capiti perorantis. Moriens impensè rogavit , & obtestatus est Patres circumstantes , ut cum

cum S. Paulo non aliud, quam JESUM  
prædicarent.

5. Osnaburgi in Germania anno 1630. P. Joannes Teinzerus, Germanus. Multos ad fidem Catholicam, non paucos ad vitam religiosam adduxit, sua illa de divinis loquendi eximia facultate. Osnaburgensis domicilii Procurator, & subinde Superior, ut difficillimis temporibus ex magnis angustiis, in quas ab hæreticis conjecti erant, expediret nostros, author fuit: ut post meridiem Litaniæ Laurentianæ de B. V. dicerentur (qui mos etiam deinde perstitit) præsentissimamque DEI-paræ opem sunt experti.

6. Polociæ in Lithuania anno 1650. P. Adamus Ciecienski, Polonus. Ad pietatem, & pias lacrimas apprimè promptus, ad expediendas è vitiorum cæno animas dexter fuit, infestum sibi propterea dæmonem passus, sed facile debellatum. Paralyssi tactus, putabatur non procul abesse ab hora extrema; Sed B. Josaphat Martyr, & Archiepiscopus Polocensis, ei spectandum

se exhibens , adhuc triennium vitæ promisit ; quo elabente , piè decessit , oculis plerumq; intentis in eam lectuli partem , ubi olim conspexerat B. Martym , fortè tunc etiam præsentem.

## I. DECEMBRIS.

**P.** Christophorus Rodericius à Pio IV. Pontifice , cum authoritate Nuncii Apostolici missus in Ægyptum anno 1561. ut Patriarcham Cophtorum , cum gente ipsi subdita , reduceret ad Ecclesiam , prout in animo sibi esse significarat , hoc die Patriarcham convenit Cairi , quæ veterum Memphis suisse dicitur. Traditis illi literis Pontificis , paucis exposuit , quanta charitate ac studio Pontifex optet Unionem Ecclesiæ Cophtorum cum Romana , ideoque se missum esse , ut hoc in negotio , quantam posset , præstaret operam. Respondit Patriarcha Gabriel : Gratiam se habere Pontifici , quod ut verus Pastor , & Pater omnium , curam Cophtorum suscepere , atque ad se potissimum Nuncium suum

de-

destinârit ; quamvis non pauci alii Episcopi ejusdem secum essent mentis, de Unione cum Ecclesia Romana. Sequidem diligenter adlaboraturum, & Nuncii operâ plurimùm usurum. Hæc tunc. Paucis pòst diebus conveniunt apud Venetum Consulem Patriarcha, & Rodericius, ubi iste alteras tradit illi literas Pontificis, quibus postulabat, Episcopum aliquem mitteret ad Concilium Tridenti congregatum. Adjunxit Rodericius ex voluntate Pontificis : ut Patriarcha juvencs aliquot Cophtos mitteret Romam, qui ibi Christiana, Catholicaque addiscerent dogmata, ac tandem ad suos deferrent ; denique Pontificia obtulit munera : pretiosum, splendidumq; apparatum sacrum. Perlibenter ea suscepit Patriarcha ; de concilio respondit, missurum se Episcopum anno sequente ; de juvenibus deliberaturum, nè fortè Turcis res innotesceret. Tam prospera initia utinam similis coronâset exitus. *Sacchin. hist. Soc. p. 2. lib. 5. n.*

2. Apud Sinas Imperator ceteris beneficiis suis insigne adjecit auctarium, hoc die anno 1691. ultro nostris offrendo erectionem novæ Ecclesiæ, ac domus suis sumptibus, extra Urbem Pekinensem, prope Villam suam, ubi magna anni parte commorari solet cum magnatibus suis, qui ibi sua habent palatia. Locum designavit ipse medium inter ædes duorum primariorum ministrorum suorum, nostris, & rei Christianæ addictissimorum. Ex literis P. Antonii Thomæ datis ad P. Thysum Gonzalez Gen. Præp. anno 1691.

*Eodem die obierunt.*

3. Londini in Anglia anno 1581. P. Edmundus Campianus, Anglus, inclyti Martyris elogiō passim honoratus. Romæ sublimioribus disciplinis instrutus, jussu Gregorii XIII. Pont. Max. in Angliam rediit. Ibi, mirum dictu, quot hæreticos brevi tempore converterit, quot Catholicos in fide confirmârit, quot fortis in aciem, pugnâque eduxerit pro fide athletas, præser-

tim

tim edito in lucem exiguo libello continente Rationes decem pro fide Catholica , quas nemo prudens legit , qui non probârit. Comprehensus,& crudeliter tortus , post tormenta productus est ad disputationem publicam cum principibus sectariorum ; ubi primùm ejus modestia , & fracta tormentis valedictio fannis excepta est, sed vis infracta argumentandi plausum , & victoriam tulit non dubiam. Patibulo tamen addictus , more solito excarnificatus est, stupente vasto flumine Tamesi, Londonum præterfluente , quod eo tempore undis stetit immotis.

4. Ibidem eodem die coronatus est P. Alexander Briantus , Anglus , vir oris Angelici , spiritus Apostolici , In carcere dira fame , & siti , & postea equuleo sæpe cruciatus est. Cùm crucem gestans ad tribunal prodiret , iussus est illam abjicere. Sed ille , *Nolo* , inquiebat , *nolo usque ad mortem vexillum meum Crucifixi miles deserere.* Ibo , ut moriar pro illo , qui pro me mortuus est prior. Suspensus igitur , & excarnificatus est , ut Campianus . M 3 5.

5. Methymnæ in Hispania anno  
1633. P. Ferdinandus de Castro Palao,  
Hispanus. Pueritiam egit tam inno-  
center, ut vulgo audiret *Puer Præde-*  
*stinatus*. In Tyrocinio Societatis *Angeli*,  
& *Sancti* titulum est assecutus, quem  
vita omni religiosissima firmavit, &  
ornavit profundissima humilitate, ri-  
gida paupertate, & indefesso Religio-  
sæ perfectionis, atque literarum stu-  
dio. Post Theologiæ Scholasticæ cur-  
riculum magnâ eruditionis famâ exa-  
ctum, totum se dedit Theologiæ Mo-  
rali; quam septem doctissimis Tomis  
in folio illustravit, auditus Compostel-  
læ ab auditorio tam frequenti, ut nec  
antè nec post simile sit visum. *Sotuel.*  
*in bibl. Soc.*

## II. DECEMBRIS.

1. **PP.** Salmeron, & Ribadeneira  
• Bruxellas in Belgio perve-  
nerunt, anno 1557. laboranti Societa-  
ti subsidio futuri. Multum enim ne-  
gotii facessebat Sociis Decretum Pari-  
fuis editum contra Societatem, sub no-  
mine

mine Academiæ illius , quamvis re vera paucorum fuerit , eratque id Decretum unica causa , quare Lovanium non admitteret Collegium . Dicebant enim : si falsum , iniquum , & famosum est id Decretum , cur Pontifex illud non damnat ? Sed Patres , nè universam concitarent Academiam , malebant illud concidere sine strepitu impulsu temporis , quam supremæ authoritatis ; nec defuit DEUS Societati tempore opportuno . *Sacchin. hist. Soc. p. 2. lib. 1. n. 109.*

2. Romæ , cùm anno 1559. Cardinales in Vaticano conclavi convenire non possent in eligendo Pontifice , post obitum Pauli IV. Otho Truchsesius Cardinalis Augustanus P. Lainium , Præpositum Societatis Generalem , ad se per libellum evocavit postridie Calend. Decembres , tanquam de re maximi momenti cum ipso tractaturus . Ut conspectus est in conclavi Laynez , Cardinales aliquot , quibus viri virtus , & sapientia perspectissima erat , illico

susplexerunt eum , tanquam divinitus missum , cœperuntque agere de ipso in Petri sede collocando. At verò ubi vir humillimus , quanta res ageretur , intellectus , inhorruit , raptimque se oculis illorum subduxit , tanquam de se indignis modis accipiendo agi sensisset. Non tamen hæc fuga Cardinalem consilia repente discussit , sed duodecim è gravissimis jam ad summum honorem illi deferendum consenserant , non facilè destituri , nisi Pontificiæ sanctiones , & inveterata exempla non aliunde , quàm è Sacro Collegio Pontificem assumi postulâfissent. Hæc , & apud multos Romæ vulgarata sunt , & Otho ipse Cardinalis Augustanus post Lainii obitum pro concione in exequiis , quas ei magnificas Dilingæ fecit , publicè prædicavit. *Sacchinus hist. Soc. p. 2. lib. 3. num. 47.*

3. Annō 1552. in Hispania in castro Xaverio conspecta est imago Christi Crucifixi sanguineo sudore manare ; & postea nunciatum , eodem die

die Xaverium in India obiisse. *Nadasi  
in indice Memor.*

*Eodem die obierunt.*

4. In Sanciano, insula Chinensi, an.  
1552. S. Franciscus Xaverius, Magnus  
Indiarum Apostolus, & Thaumatur-  
gus perpetuus Magnam animam hoc  
die reddidit **Creatori** in terra deserta,  
ab omnibus desertus, inter dulces Cru-  
cifixi amplexus, post decennes in In-  
dia Orientali labores, & plura quam  
duodecies centena millia Ethnicorum  
baptismô lustrata. Festum tamen ejus  
3. Decembris celebrari mandavit Ale-  
xander VII. Pont. Max. Miraculorum  
multitudo, & magnitudo Thaumatur-  
gi titulum illi asseruerunt. Potami,  
in oppido Calabriæ, numerantur du-  
centa, & 42. patrata intrâ triennium.  
Unde à pluribus per orbem urbibus,  
provinciis, & regnis in specialem Pa-  
tronum, & Protectorem solemniter est  
lectus: ut à regno Navarræ, urbe Nea-  
politana, Bononia, Parma, Placentia,

Massa, Aquila, Tergesto, Goritia, Episcopatu Varmiensi &c. In Indiis ab urbe Goa, Macao, Mexico, Manaria &c. Navigationum quoque per mare Pacificum, & bellorum in regno Chilensi cooptatus est Tutelaris. Hinc in ejus honorem non pauca condita templa, & facella: ut Romæ, Neapoli, Panormi, Messanæ, Genuæ, Bononiæ, Tridenti, Arimini, Trenchinii in Hungaria, Spitalii in Carinthia, Brugis in Flandria, Parisiis in Gallia, Lugduni, Ebreduni, Madriti in Hispania &c.&c. ut in omnibus glorificetur DEus, magnus, & gloriosus in Servo suo Francisco Xaverio.

5. Brisaci in Alsacia anno 1635. P. Godefridus Feller, Belga, prodigus viæ, obsequiis peste ictorum devotæ, heroum morte decessit, cum novem aliis Sociis in Germaniæ locis variis. Annō autem 1638. Pragæ P. Georgius Aquitanus, Silesius cum Sociis 4. simili morte conclusit vitam admodum religiosam, Xaverianæ virtutis æmulam. Bis pesti grassanti sese objecit; & cum supe-

superior ex moribundo quæsisset : An paratus esset , pro DEO Conditore suo vitam profundere ? mira vultus hilari-  
tate , & verborum emphasi respondit : Ego verò unam hanc vitam DEO ? O si mil-  
lies millionum suppeterent ; universas sicut  
unum profunderem !

### III. DECEMBRIS.

I. FESTIVITATEM gloriōsi obitūs Ma-  
gni Indiarum Apostoli, S.Fran-  
cisci Xaverii, quæ in hesternum inci-  
dit diem, transtulit Alexander VII. in  
tertium Decembris , unā cum Indul-  
gentia plenaria, quam Gregorius XV.  
concesserat pro die præcedente. Offi-  
cium ad ritum duplicem per univer-  
sam Ecclesiam evexit Clemens X. E-  
andem festivitatem hoc die insigni, &  
evidenti miraculo illustravit DEUS an-  
nō 1704. Romæ , quando ingenti , &  
evidenti prodigio per prædictum San-  
ctum plena sanitate repente donavit  
Sanctimonialem , dictam Angelam Ma-  
riam à SS. Trinitate , filiam Comitum  
de Silva , professam monasterii S.MA-

RIÆ de doloribus. Hæc à mense Ju-  
 liو ad Decembrem gravissimis torque-  
 batur capitis , oculorum , & pectoris  
 doloribus , ex febri calida ( quâ non  
 raro mente movebatur ) hydrope , &  
 asthmate ortis ; cùmque Sorores ejus-  
 dem Monasterii pridie festi S. Xave-  
 rii urgerent medicum , D. Emmanue-  
 lem Lopez , omnem artem , & medi-  
 cinam adhiberet ad curandam ægram ;  
 respondit is : Ad eam curandam non  
 medicô ordinariô , sed **Apostolô** opus  
 esse. Apprehendit eam vocem ægra ,  
 & quia sciebat imminere festivitatem  
 Magni Orientis Apostoli , ad illum-  
 mentem , & omnem post DEUM fidu-  
 ciā convertit , persuasumque habe-  
 bat , se illico sanam futuram , si aliquæ  
 Sancti Reliquiæ sibi admoverentur.  
 Quim primū ergo sequenti die eas  
 pectori inter oscula , & suspiria appres-  
 sit , sensit se sanitatem donatam surrexit ,  
 ipsa se vestivit , & cum sororibus ad  
 templum concessit , hymnūmque Eu-  
 charisticum decantavit. Miraculum  
 hoc mox ab ejus superiore , Confessa-  
 rio ,

rio, & Medico rire firmatum est jura-  
mentō. *Ex lit. Rom.*

2. Tridenti cum sacra synodus Ses-  
sione 25. hoc die cœpta, varia de Re-  
gularibus cap. 16. sanxisset, subjunxit  
ibidem: *Per hæc tamen S. synodus non in-  
tendit aliquid innovare, aut prohibere: quin  
Religio Clericorum Societatis JESU, juxta  
pium eorum Institutum, à S. Sede Apost.ap-  
probatum, domino, & ejus Ecclesie inser-  
vire possit. Quæ sententia sanctæ syno-  
di plurimūm æstimanda.*

3. Romæ anno 1572. malevoli qui-  
dam Gregorii XIII. non pridem electi  
Pontificis aures assiduè onerabant, quod  
in Jesuitas prodigalitate quadam con-  
gererentur Ecclesiarum, Monasterio-  
rum, Abbatiarum, & variorum Sacer-  
dotiorum bona, præsertim in Germa-  
nia. Polancus igitur Vicarius Gene-  
ralis, accuratum hujusmodi beneficio-  
rum Societati collatorum catalogum  
cum obtulisset Pontifici hoc die, & ipse  
per otium considerasset: dolere se di-  
xit, quod essent per pauca; optare: ut  
essent longè plura, & majora, pro a-  
lendis

lendis tam strenuis in vinea Domini  
operariis , præstítque re ipsa , quod  
optaverat. *Sacchin. hist. Soc. p. 3. lib. 8.*  
*num. 20.*

*Eodem die obierunt.*

4. Mindanai , in insula una Philip-  
pinarum , anno 1634. P. Joannes del  
Carpio , Hispanus , strenuus apud In-  
dos pictos operarius . Cùm insulæ il-  
lius regulus æger , impiè vovisset , se ,  
si convalesceret , omnium , quos nan-  
cisci posset , Christum prædicantium  
Patrum capita Mahometo sacrificatu-  
rum , primus comprehensus est P. Jo-  
annes , & acinace altè impresso cæsus ,  
cùm se DEO , positis humi genibus ,  
victimam dedicaret.

5. Londini in Anglia , 1641. P. Jo-  
annes Percy , Anglus , strenuus ani-  
marum zelator , inter gravissima peri-  
cula , & ærumnas . Carceribus Londi-  
nensibus quadriennio , & amplius mace-  
ratus , variis tormentis cruciatus , cùm  
exilium ei offerretur cum conditione  
non redeundi in Angliam : rejectit hanc ,

maluitque redire in carcerem. Inter alia tormenta, caput illi fune circumjecto, & fortiter contorto tam validè constrictum est, ut cranium ferè dissiliret. Sed ille ex hoc tormento, præter ingens meritum, id commodi tulit, quod aurium tinnitus, & gravem capitatis dolorem, quo pridem laboravit, indè amiserit. *Ex Tannero.*

6. Senis in Italia annō 1608. initio Decembris, P. Franciscus de Benavides, Hispanus. Quantis foris affuebat opibus, utpote filius Comitis S. Stephani; tanto paupertatis tenebatur amore in Societate, ut ferè solent ii, qui magis nobiles, ac divites Religionem ingrediuntur. Corpus morbis satīs fractum, voluntariis insuper cruciatibus ità atterebat: ut P. Hieronymus de Florentia diceret: se neque corpus pejus, neque meliorem animam unquam novisse, quam in P. Benavides.

7. Bononiæ in Italia annō 1644. P. Georgius Justinianus, natione Græcus, patria Chius, & stemmate principum illius insulæ dominorum, vir magna

industria, & zelo ad animas juvandas  
instructus. Cùm Romæ humaniores  
doceret literas, ità discipulos virtutis  
amore inflammavit: ut amplius sexa-  
ginta ad religiosas domos convolârint.  
Admirabili concionandi facultate præ-  
ditus, in insula Chio, & Byzantii Chri-  
stianam pietatem multùm promovit.  
Bononiæ per annos 40. ità zelum suum  
explicuit, ut Apostoli Bononiensium  
nomen meruerit. Tredecim Sodali-  
tates diversas ibi instituit, fovit, &  
provexit; quæ defuncto magnificum  
cenotaphum erexerunt: *Sotwell. in bibl.  
Soc.*

#### IV. DECEMBRIS.

I. **G**loriosissimam in India victori-  
am reportavit Lusitana classis  
exigua, septem duntaxat navium, de  
numerofissima classe Acenorum, &  
fœderatorum gentilium, vaticinio, &  
ope S. Xaverii, quam non solùm mul-  
tò antè prædixit, verùm, & cùm claf-  
ses concurrerent, repræsentavit. A  
mense uno, & dimidio nihil habebat  
civi-

civitas Malacensis de expeditæ classis  
suæ fortuna, aut infortunio, ideóque  
consternata sinistri aliquid ominaba-  
tur, cùm Xaverius hoc die, qui Domi-  
nicus erat, consensâ cathedrâ, ut con-  
cionem diceret, non longè proiectus  
sermone, hæret, vultum varium in-  
duit, nunc trepidantis, nunc exultan-  
tis, nunc lugentis, oculis in Christi  
Crucifixi effigiem defixis. Tum velut  
à sensibus abalienatus fari aliquid, sed  
fractis, & non intelligibilibus vocibus.  
Tenuit id spectaculum non modico-  
tempore attonitum auditorem, præser-  
tim ipsum, qui aderat, urbis Præfectum,  
Mellum, facileque intelligebant, obje-  
ctam illi esse divinitus speciem confli-  
ctus alicujus. Tandem erectus, nam  
caput velut lassum in oram cathedræ  
reclinaverat, atque vultu Angelum  
spirans, recitemus inquit, fratres, se-  
mel Orationem Dominicam, & Virgi-  
nis salutationem, ad agendas DEO  
gratias pro insigni victoria, quam hac  
ipsa hora classi nostræ de Acenis dedit.  
Aderit die Veneris nuncius unic us, se-  
que-

quetur statim triumphans exercitus,  
lætus, & hostium spoliis dives; quibus  
dictis pulpito descendit. Vaticinium  
feriâ sextâ cumulatè implevit even-  
tus, Xaverius autem, qui præcipue in  
ore exultantium ferebatur, maturatâ  
fugâ in oram Piscariam sese proripuit.  
*Bartolus in Vita lib. 2. n. 38.*

2. Sancta Virgo, & Martyr Barba-  
ra, cuius gloriosum agönem hoc die  
celebrat Ecclesia, vel hoc nomine  
charior nobis esse debet, quod B. Sta-  
niſlaum Kostkam Viennæ ægrum invi-  
serit, & recrearit, quando ei Angeli  
divinam Eucharistiam ministrarunt.  
*Nadas in Ind. Memor.*

3. Cracoviæ anno 1585. P. Petrus  
Skarga obstinatum apostatam è Socie-  
tate, & fide, Christianum Franchen,  
multo labore, & industria DEO, &  
Ecclesiæ reconciliavit, atque ad pali-  
nodiam, quam pertinax refugiebat, in  
principe templo, coram in numero po-  
pulo canendam, induxit, discipulum e-  
tiam ejus in Arianismum delapsum sa-  
cro fonte tinxit eodem die, postquam  
eodem

eodem anno Veteranum quoque Calvini asseclam , & ministrum , Adamum Copichum , Ecclesiæ reddiderat. *Sacchin. hist. Soc. p. 5. lib. 5. n. 98. & seqq.*

*Eodem die obierunt.*

4. Jendi in Japonia annô 1623. P. Hieronymus de Angelis , Italus , & Simon Jempo Japon , odio fidei flammis traditi , & combusti , post insignem à P. Hieronymo è flammis ad populum habitam allocutionem , In plures provincias fidem primus intulit ; in regno Cami , cùm vix mille reperisset Christianos , brevi decem millia baptizavit . In ipso carcere , quadraginta ethnicos illo detentos convertit ad Christum .

5. Limæ in Peruvia annô 1613. Petrus de Salazar , Hispanus . Ferventiūs aliquando orantem , & de cælestibus meditantem , Angeli fidium dulcissimo concentu recreârunt : Sancta verò Barbara , cuius cultui eximiè addictus erat , cum pluribus sanctis Virginibus ei spectandam se exhibens , quæsivit : An vellet proficiisci in cælum , ubi placidissima

dissima quies, & vita sempiterna? Annuenti Petro morbus paulò post occurrit, deinde pia mors in ipso divæ Barbaræ festo.

6. Flexiæ in Gallia annô 1644. P. Joannes Chevalier, Gallus. Præcipua illi à teneris annis cura fuit conservandæ Virginitatis, eamque ob causam intra religiosa septa in Societate se recepit, atque DEIparæ V. & Angeli Custodis opem studiosissimè implorabat, quam & expertus est. Quadam enim nocte sensit renes sibi, veluti cingulô, tam arctè ab Angelo Custode adstringi, ut in clamores eruperit, contra carnis illecebras deinceps satis munitus. DEIparam V. ut Matrem suam filiali coluit affectu, quæ se illi non semel adspectabilem, & liberalem præbuit in largiendis gratiis, quas P. Joannes pro infirmis, & aliis petebat. Amore divino ita æstuabat, ut ardorem ferre non valens, exclamârit non raro: O amor! O faces! O incendia pectoris! Nec odiosus erat ille amor, sed foras erumpebat, miraque in proximorum sub-

subsidium operabatur. *Sotuell.* in *bibl. Soc.*

## V. DECEMBRIS.

I. **G**regorius XIII. anno 1684. So-  
dalitatem studiosorum in Col-  
legii Romani Ecclesia erectam anno  
1564. sub DEIparæ V. Annunciatæ  
clientela, Primariam esse jussit, amplám-  
que concessit facultatem similes alias  
per variarum provinciarum Collegia  
eidem aggregandi, cum participatio-  
ne gratiarum, & Privilegiorum Prima-  
riæ concessorum. *Sacchin.* *bist.* *Soc. p. 5.*  
*lib. 5. n. 14.*

2. Anno 1590. Gregorius XIV.  
creatus est Pontifex Max. antè Nico-  
laus Sfondratus , dictus , qui uti Gre-  
gorii XIV. nomen assumpserat, ità pro-  
fua virtute, excellentique pietate in to-  
tam Ecclesiam , ac proprio quodam-  
erga Societatem studio, repræsentatu-  
rus animum , & tempora Gregorii-  
XIII. sperabatur. Magni faciebat, &  
familiariter diligebat Claudio Gene-  
ralem ; qui cùm de more illi offerret  
So-

Societatis obsequia : Non poterat, inquit, cadere in quenquam hoc munus, qui magis esset affectus in hunc vestrum ordinem, quem nos amamus, & magni aestimamus. Sub haec inter alia paternæ benignitatis indicia notabile contulit domui Professæ subsidium, ad dissolvendum æs alienum, & in singulos menses eleemosynam constituit Aureorum 50. Præterea Seminaria omnia, quæ Gregorius XIII. inchoarat, non solum confirmavit hortante Claudio, sed etiam, quæ sub extrema Sixti tempora vel derelicta erant, vel lababant, assignatis ex ærario Pontificio pensionibus in integrum restituit. *Sacchin. hist. Soc. p. 5. lib. 10. num. 65.*

*Eodem die obierunt.*

3. In Mazua Sinūs Arabici insula, anno 1596. P. Andreas Gualdanes, Lusitanus, Patris Andreæ Oviedo, Patriarchæ Æthiopiæ, socius. Post strenuos, & fructuosos in Æthiopia, labores, à Turcis comprehensus, odio fidei hastis transfixus, occubuit,

4. Ro-

4. Romæ anno 1653. P. Octavius Boninus, Italus. Frequenter se excitabat ad curandas diligenter res animæ, illo apophthegmate Christi: *Quid proficit homini, si mundum universum lucretur, animæ verò suæ detrimentum patiatur?* Exhortationes, quas domi ad socios dicere parabat, Patri suo spirituali primùm ostendebat, rogaratque: ut limaret; quod si factum esset, libentiūs eas pronunciabat, tanquam cælesti calculo jam probatas. Nobilem virum in secreto conclavi adiit, & deprompta è sinu Crucifixi effigie, supplex in genua projectus, tam accommodatè, fortiterque aggressus est, ut ad frugem meliorem reduxerit. Quadam in urbe cùm fœminæ colla, pectoraque impudenter nudata, gestarent, Pater autem ex juvenibus, virisque pluribus rescis- set, se illarum aspectu graviter tentari, conventione facta cum Concionatoriis, & Confessariis ejus loci, de non danda talibus absolutione, nisi meliora promitterent, fœda illa objecta brevi eliminavit.

5. Choynecii in Polonia, an. 1656.  
 P. Stephanus Staroscirske, Polonus  
 Missionarius impiger, Ecclesiastem  
 zelosum non solum egit in vita mortali,  
 verum etiam post mortem. Cuidam  
 enim è Sociis in Suetici Carceris squalo-  
 re tabescenti apparuit, monuitque, ut  
 æternam vitam per patientiæ lucra con-  
 tenderet adipisci.

## VI. DECEMBRIS.

I. IN India anno 1575. P. Valigna-  
 nus Visitator Congregationem  
 collegit Provincialem, non solum de  
 rebus Societatis, sed etiam promo-  
 vendo Christianismo consultaturus.  
 Inter cetera decretum est: ut Provin-  
 cia Indica non divideretur in duas,  
 quarum una esset cis Gangem, altera  
 ultra Gangem, sed Provinciali adden-  
 dum esse Vicarium; qui domicilia ul-  
 tra Gangem gubernaret cum depen-  
 dentia à Provinciali, ut per ejus visi-  
 tationem consuleretur domesticorum  
 necessitatibus, & nihilominus ab uno  
 eodemq; capite pendentibus omnibus  
 do-

domiciliis utriusque regionis conservaretur animorum conjunctio, & mutuum auxilium. *Sacchin. hist. Soc. p. 4. lib. 3. num. 221.*

2. In Litvania Venerab. P. Nicolaus Lancicius, anno 1590. tum adhuc adolescentis, ejuratâ Calvini sectâ, ad fidem orthodoxam conversus, in festo S. Nicolai Episcopi primò Sacram Eucharistiam sumpsit Vilnæ. Mira omnibus visa est adolescentis vocatio tam ad fidem, quam Religionem. Sectâ Calvini itâ devinctus erat, ut paſſim profiteretur, ad sanguinem, & mortem se pro ea pugnaturum. Unde, cùm rumore populari accepisset: Cardinalem Radivilium facultatem à Rege obtinuisse, vi ac tormentis in hæreticos agendi: Nicolaus, ut palam faceret, se nihil moveri terriculamentis, vel tormentis, veste à collo reducta nudatus, compluribus horis publicè incessit, voluntque primus esse, in quem Cardinalis potestatem illam exerceret. Singulari tamen Providentia Divina contingit, ut quamvis tanto ardore pro sectâ

Calvini ageret , nunquam tamen adduci potuerit , ut ad Cœnam Calvinistam accederet . Quod ipse pro magno beneficio divino deinde habuit . Post suscep tam autem Catholico ritu Eucharistiam ita incaluit igne divini spiritus , ut nemine suadente , in Sacello DEI paræ V. votum conceperit , emiseritque perpetuæ Castitatis , quam abs se nunquam læsam meminerat , etiam in illa fidei licentia . Religionis quoque ineundæ in Societate Votum alterum edidit , in cuius executione non parum , nec levium impedimentorum habuit . Geminam enim , eamque duram , à P. Provinciali conditionem accepit : ut primum Parentem Calvinistam converteret , atque ab eodem licentiam ingrediendi Societatem obtineret . Iterum ergo , festo S. Nicolai die , audendum ratus , patrem aggreditur sub ejusdem Sancti auspiciis ; & quamvis non statim , iterata tamen saepius impressione , utrumque feliciter obtinuit . *Balbinus in Vita cap. 5.*

*Eodem die obierunt.*

3. In regno Ceilano Indiæ Orientalis, anno 1616. P. Joannes Metella, Lusitanus, & P. Ludovicus Polingottus, Italus, odio fidei à barbaris confixi lanceis, capita præcisa hastilibus affixa in spectaculum, cadavera ad Crucis pedem abjecta.

4. Bruxellæ in Belgio anno 1619. P. Franciscus Costerus, Belga, In Provinciis quas gubernavit, primus DEI paræ V. Sodalitates erexit. Antwerpia loco Colossi profani, ante Curiam grandem illius statuam poni curavit. Rogatus, quis cultus DEI Matri esset gratissimus? Respondit: *Conflans, quamvis exiguum.* A. S. P. N. Ignatio, cui Romæ charus erat adhuc juvenis, singulariter commendatam habebat Humilitatem, Obedientiam, perpetuam quandam lætitiam. Quæ tria ipse met postea commendavit nobili juveni, Carolo Grobendonque, addidique, se post acceptam à S. Patre commendationem illam, sollicitè cogi-

tâsse , ac B. V. interpellâsse , quomodo semper latus esse posset , præsertim in gravi infirmitate , v. gr. podagra ? Respondit autem Virgo : *Francisce, promitas mibi , quod semper sis futurus humilis, & obediens , & ego tibi promitto , quod nunquam sis futurus æger , adeoque semper posteris esse latus.* Et adjecit P. Franciscus Carolo : Si quis tibi dixerit : P. Costerum ægrotare , scias fore mendacium , B. Virginis injuriosum. Idem enim erit Costero ægrotare , & mori. Ità factum. Quamvis verò tam integra esset Virginitate , ut nec à cogitationibus fœdis infestaretur , corpus tamen assidue flagris , & ciliciis in servitutem redigebat. Cum desertoribus Societas nullam nostris volebat esse conversationem. Colloquiis spiritualibus maximopere delectabatur ; si alia inferentur , obdormiscebat. Obiit anno ætatis 88. Societatis 67. Rogatus , an libenter moreretur ? Responsum dedit S. Ambrosii : *Ità vixi , ut me vixisse , non pudeat , mori autem non timeo , quia bonum Dominum habemus.*

5. Romæ annō 1686. P. Nicolaus Avancinus, Germanus Tirolensis, vir multæ eruditionis, ac religiosæ perfectionis. Rexit Collegia Passaviense, Græcense, Viennense, domum quoque Professam Viennensem ; Provinciam Bohemiæ pro Generali Præposito visitavit ; Romam adiit, primùm Procurator, deinde Elector à Provincia Austriæ lectus : ubi in Congregatione XII. Generali Assistens Germaniæ creatus est. Non pauca edidit felice vena, vincita solutâqne oratione, quæ pafsim in manibus oculisque legentium versantur.

## VII. DECEMBRIS.

I. **A**NNO 1605. habita est Congregatio, & disputatio 35. coram Clemente VIII. de Auxiliis Gratiarum. Quæstio erat : *An scientia, quam DEUS habet de futuris conditionatis liberis, sit in ipso ante absolutum Decretum voluntatis divinae?* P. Bastida summa animi alacritate ad eam disputationem accessit, ac in primis ostendit : ab ad-

versariis duplex poni divinæ voluntatis decretum, quamvis universa cæterorum Theologorum schola unum tantum agnoscat; scilicet alterum absolutum simpliciter, ut quod DEUS absolutè, simpliciter, & absque ulla conditione statuit, v. g. ut mundus sit; Alterum absolutum in se, quod tamen objectum habeat conditione certa affectum v. g. Volo ut Tyrii convertantur, si illis Christus prædicaverit. Demonstravit ergo Bastida: Scientiam divinam futurorum conditionatorum liberorum necessariò præcedere utrumque illud Decretum voluntatis Divinæ: neque satis congruè posterius illud Decretum divinum dici absolutum, cùm revera sit conditionatum. *Eleuth. hist. Auxil. 5. c. 47.*

2. In Hispania singulari Providentia divina sublevata est anno 1567. egestas Collegii Vallisoletani, quod S. Ambrosii dicitur. Propè erat dies, quo ob debita contracta satisfacendum erat creditoribus; sed cùm domires angustissimæ essent, recursus factus

ad

ad amicos , impetratum autem nihil ,  
 quod aliis facultas , aliis deesset volun-  
 tas juvandi . Vespere igitur indicun-  
 tur Sociis preces pro quadam urgente  
 necessitate domestica . Oratum fer-  
 venter , & impetratum feliciter , quod  
 desiderabatur . Primo enim manè præ  
 foribus fuit famulus ab Anna Pacia , o-  
 pulenta matrona , missus cum aureis  
 trecentis . Lætus opportunissimo sub-  
 sidio P. Franciscus Porrius , paulò pòst  
 præfatam adiit , matronam amplissimas  
 acturus gratias . At illa : nihil opus est ,  
 inquit , actione gratiarum , nam propè  
 coacta misi . Cùm enim ad quietem  
 heri secessisset , somnus omnis fugie-  
 bat ab oculis , vox autem continuò in-  
 gerebatur auribus : Cur non subvenis  
 pauperi Collegio Societatis ? Urgebat  
 autem ità , ut propè abfuerit , quin no-  
 ñte imtempesta mitterem nummos il-  
 los , quorum numerus etiam menti im-  
 pressus fuit . Sic DEUS die S. Ambro-  
 sii Ambrosiano suo subvenit Collegio .

*Sacchin. hist. Soc. p. 3. lib. 3. num. 187.*

*Eodem die obierunt.*

3. Romæ 1549. P. Petrus Codacius, Italus. Primus ex Italis Societati nomen dedit, Sacerdos jam tunc honoratus, & locuples è Pontificia familia, eamque, & eximiis virtutibus egregiè ornavit, & temporalibus subsidiis ità juvit, ut S. Pater fundatorum honores illi decreverit, & præter suffragia defunctorum fundatoribus exhiberi solita, lapidem cum epigraphe poni jusserit. Illius enim curâ Societas domum, & templum Romæ primùm accepit, illius erat alumna, tam tenere, & constanter amata, ut S. Ignatius dixerit: Eum ne verberibus quidem ex illa pelli posse.

4. Apud Hurones in America, anno 1649. P. Carolus Garnier, Gallus, Apostolicis laboribus apud eam gentem clarus. Ad juvandos moribundos utebatur potissimum Angelorum Custodum operâ, quibus illorum curam impensiùs commendabat. Et vidi non nemo ægrotum, Patri Carolo assistenter Angelum, qui infirmum monebat:

bat : ut Patris monitis atque consiliis diligenter pareret. Irruentibus deinde Hiroquæis barbaris in Hurones Christianos, & promisçua cæde ipsos delentibus , cum P. Carolus animam agentes expiaret , & catechumenos baptizaret , tribus globis trajectus est , cum nihilo minus ad saucium quendam adrepseret , eumque à noxis absolvisset , securi in caput adacta occubuit.

¶ Tornaci in Belgio anno 1621. Ignatius de Rassinghem, Belga, Coadjutor, Illustrissimo licet genere ortus , & linguae Latinæ non ignarus , elegit Coadjutorum sortem , infimis muniis singulari alacritate addictus. Per omnem vitam nihil , quod majus momentum haberet , aggrediebatur , nisi benedictione à superiore , de genibus petita , quam ubi etiam pro supremo agone petuit , & obtinuit , feliciter migravit.

### VIII. DECEMBRIS.

Cum ad condendam stabilem , & accuratam Rationem studiorum , evocati ex variis Provinciis Patres sex ,

virtute ac eruditione eximii, convenis-  
 sent Romæ annō 1584. ut tantum o-  
 pus, quod universæ Societati normam  
 docendi præberet, auspiciatò inchoare-  
 tur, & feliciter absolveretur, ipso Con-  
 ceptionis Marianæ die duxit illos R. P.  
 Generalis Claudio ad summum Pon-  
 tificem Gregorium XIII. pro benedi-  
 ctione obtainenda. Bene precatus  
 Pontifex Optimus, sedulitatem ac ce-  
 leritatem operi tam salutari, ut adhi-  
 berent, seriò est adhortatus. Domi-  
 cilium peropportunum, & coimmodum  
 hybernis quidem sex mensibus in Pœ-  
 nitentiaria S. Petri, æstivis autem calo-  
 ribus per trimestre spatium, in Quiri-  
 nali monte ad S. Andream illis est at-  
 tributum. Horæ ternæ diebus singulis  
 in consultatione ponebantur, temporis  
 reliquum legendis Doctoribus, & Com-  
 mentariis, traducebatur. Totum ne-  
 gotium in duas primarias partes distin-  
 ctum fuit: in opinionum delectum, &  
 praxim Scholarum. Quibus expedi-  
 tis accuratissimâ diligentia, totum opus  
 rursus sub incudem revocatum est, re-  
 le-

lectum coram omnibus illis sex Conditoribus, & siquid opus fuerat, emendatum, deinde Collegii Romani Theologis traditum est, ut ab ipsis primùm, deinde à reliquis per universam Societatem expenderetur. Atque sic satís operosè absoluta est Ratio illa studiorum. *Sacchin. hist. Soc. p. 5. lib. 4. n. 8. &c.*

2. Ferbuit, etiam festo die, disputatio de Auxiliis Gratiæ coram Clemente VIII. anno 1603. in Congregazione 23. Propositum fuit: *Quid intelligat Molina, dum dicit: quod in actibus eliciti ex sola facultate naturali, respicientibus fidem, spem, & charitatem erga DEUM, DEUS inserit se, & elevat eos, & facit supernaturales?* Respondit P. Bastida, Molinam non velle, quod DEUS illos ipsos actus, qui eliciti sunt à potentia tantum naturali, & in se sunt naturales, faciat supernaturales, sed quod præcedentibus illis actibus naturalibus solet DEUS per conprincipia supernaturalia elevare potentias ad produ-

cendos actus supernaturales fidei, spei,  
& charitatis. Et hoc probavit ex do-  
ctrina Molinæ. *Eleuther. hist. de Auxil.*  
*lib. 5. cap. 27.*

*Eodem die obierunt.*

3. Calari in Sardinia anno 1594.  
P. Petrus Espiga , Sardus , Pauperum,  
& Captivorum Pater, Sardiniae Aposto-  
lus habitus. Corpore admodum pu-  
sillo ingentem animum circumferebat,  
quo Episcopatum , & Archiepiscopa-  
tum oblatum repudiavit, atque ardua  
multa , Divinæ gloriæ , & animarum  
causâ aggressus est, & superavit. In-  
credibile est, quâm tenera , quâm soli-  
cita , & ingeniosa charitate intentus  
fuerit in omnem occasionem juvandi  
pauperes, captivos, & generis omnis  
afflictos. Clerum sacerdotalem exemplo  
suo , & opportunis monitis, ad virtu-  
tum heroicarum exercitium, præser-  
tim in cura pauperum , itâ induxit, ut  
ignem divinum cælitus super illos in-  
duxisse videretur. Magnatum quo-  
que itâ corda occupaverat , ut ea ar-  
bi-

bitratu suo flecteret , quò vellet , ad miseros juvandos . In supremo morbo rogatus à P. Collegii Rectore , anxio , nè post obitum illius Collegium exsolvendis debitibus gravaretur , quantum æris alieni contraxisset ? Respondit : *Mille quingentarum librarum.* Videlis autem hominem conternatum ; *Ne timeas Pater , addidit , Nam mutuum hoc DEO contractum est , cui incumbit , id finè nobis restituere ; & facturum omnino , nè dubita.* Vulgato eo Patris responso per urbem , adfuit eodem die ægrum invisens Prorex cum Archiepiscopo , suscepitque promptus totum illud debitum suo ære exsolvendum . DEUS quoque signis multis officiosam , hanc , & magnanimam Patris charitatem mirificè movebat .

4. Salmanticæ in Hispania , anno 1559. Alphonsus de Prato , Coadjutor Hispanus . Audito S. Borgiæ in Societatem ingressu , & profundissimæ humilitatis studio , Societatem expetiit , nec alium in ea gradum , quam Coadjutoris temporalis , admisit , quamvis illi

illi parum scientiæ deesset , ut vel inter Professos censeretur. Immaculatæ Virginis DEI paræ Conceptioni additissimus , cùm à Visitato Ven. Sacramento Fratres accederet, pro more suo locuturus de eo mysterio , præter solitum vultu alacrior , & inflammator , mox inclinato ad assidentem capite, pi- am humilémque animam edidit.

## IX. DECEMBRIS:

I. **R**Omæ habita est annô 1602. Congregatio , & disputatio XI. coram Clemente VIII. de Auxil. Grat. Examinata est propositio Molinæ tertia , & quarta , Semipelagianismi insimulata : *Quòd possit homo ex sola facultate naturæ diligere DEUM super omnia.* Et *quòd DEUS exspectet nostros conatus ; quòd que DEUS nos aliquando præveniat.* Respondit pro Molina P. Arrubal : pluribus modis discrepare Molinæ doctrinam à Cassiano , Semipelagianismi authore. Nam hic docuit i. posse hominem viribus naturæ diligere DEUM super omnia tanquam finem superna-

turalem, & charitate, quæ est virtutum omnium perfectissima. 2. Super omnia, etiam ad finem supernaturalem ordinata. 3. Dilectione sufficiente ad justificationem. 4. Dilectione sufficiente atque robusta ad implendam multo tempore legem naturalem, etiam urgentibus multis gravibusque tentationibus, & difficultatibus. Molina nihil horum docuit. Probavit utrumq; testimoniis disertis ex utroque allatis. In altera quoque propositione non convenire Molinam cum Cassiano ostendit: Quia hic docuit: DEum non vocare omnes homines, antequam operentur piè, sed potius alios esse, qui per conatus pios ex naturæ viribus præveniunt, & impetrant gratiam; alios autem, qui à gratia præveniuntur, ac proinde duos esse ordines adulorum, qui in Ecclesia justificantur. Molina autem nihil horum asseruit, nec tales duas classes statuit, sed docet: omnes à DEO præveniri gratiâ ad justificationem. Probavit claris textibus

Molinæ allatis. *Eleuther. hist. Auxil. lib. 5. cap. 15.*

2. Annō 1587. Sigismundus Sueciæ princeps, à Polonis electus in Regem, feliciter pervenit hoc die Cracoviam, ubi die S. Joannis Evang. coronatus est. In comitatu suo habuit P. Bernardum Golinium, quem conscientię suę, & pietatis, habebat directorem, amabat ut patrem, sequebatur ut ducem. Tantum verò in fidei ac religionis constantia profecerat: ut sæpe solicitatus à Sueciæ proceribus ad mutationem religionis, disertè testatus sit: malle se potius paterno regno, quam religione materna ( id est Catholica) spoliari. *Sacchin. hist. Soc. p. 5. lib. 7. n. 35.*

*Eodem die obierunt.*

3. Manilæ in Philippinis insulis, an. 1681. P. Franciscus Calderon, Hispanus. In Japonia per annos 30. strenuo labore promovit rem Christianam. Missionariis nostris domum redeuntibus, pedes ipse, lavabat, suavissimè illud ingeminans: *Quam speciosi pedes Evan-*

*Evangelizantium pacem ? Paupertati ità  
addictus erat : ut etiam Breviario ute-  
retur alieno. Examen particulare  
constanter ad mortem usque absolvit,  
cujus rationes notatæ sub cervicali in-  
ventæ sunt post mortem. Si quis mo-  
rientem interpellaret , petebat sibi re-  
linqui. Putantne , ajebat , parvi momen-  
ti occupationem esse , agonizare ? Mihi nunc  
negotium est cum DEO , & Angelis.*

4. Placentiæ in Italia anno 1620. P.  
Julius Ursinus , Italus , ex inclyta Co-  
mitum Petilianorum familia. Ange-  
lica modestia , & puritate conspicuus ,  
protegente DEIpara V. eandem serva-  
vit. Collegii Florentini Rector consti-  
tutus , cælorum Reginam eidem præfe-  
cit , & maternam ejus curam expertus  
est. Cuidam pro P. Julio infirmo im-  
pensiùs oranti visa est manus lilium spe-  
ciosum decerpens : unde intellexit ,  
eum instar lili candidissimi floruisse ,  
sed jam non tam mortis falce succiden-  
dum , quàm divino pollice decerpen-  
dum. Eidem post illius mortem scire  
desideranti : qua in virtute potissimum  
emi-

eminiisset P. Ursinus? Vox manifesta dixit: *Illum vixisse mortuum.* Non defunt fidem omnem commeriti testes, qui affirment: se P. Julium vidisse inter orandum, aliquot cubitis à terra sublimem. Ante mortem Patri Spirituali asseveranter dixit: sibi adolescenti Beatissimam V. visam, dixisse voce manifesta, quod ipsa illius puritatis tueræ curam susceperebat.

## X. DECEMBRIS.

I. **A**bsoluto feliciter Tridenti Concilio Oecumenico, an. 1564. Lainius Præpositus Generalis, cum Salmerone. Polanco, & Natali matrabant redditum in Urbem. Quà quà ibant, non gravabantur prædicatione Verbi divini erudire populum. Venetiis eum plausum tulit Salmeron in festis Christi Natalitiis, ut ibi relinquidebuerit, Duce multisque civium flagitantibus, ad sacras per Quadragesimam habendas conciones. Forolivii ea curiositas vexavit cives; ut videre vellent, quo apparatu in Collegio ex-

ciperetur Generalis Societatis Lainius, quām splendido peripetaſmate vefita eſſent conclavia &c. Cūmque omnia vidiffent ad ſimplicitatem, & paupertatem religioſam composita, nec quidquam ſplendoris aut ſingularis commo-ditatis apparere, non ſinē indignatione recefferunt, quōd tantæ Personæ iſ eſſet neglectus, ac ferè contemptus. Ni-mirum non intellexerunt, quæ eſſet pauperum ſpiritu beatitudo, & gloria.  
*Sacchin. hift. Soc. p. 2. lib. 8. num. 1. & seqq.*

2. In Hispania cūm nonulli ē ſacra PP. Prædicatorum familia, antefigna-no Melchiore Cano, acerbius invehe-rentur in Societatem, ac Socios apud populum traducerent, velut præcurſo-res Antichriſti, quamvis non deeffent ex eadem ſacra familia viri gravifimi, & doctiſſimi, qui verbō, & ſcriptō So-cietatem defendebant, viſum tamen est Reverendissimo P. Franciſco Ro-mæo, Generali totius Ordinis Magiſtro, per Epistolam anno 1548. hoc die datam Romæ, omnibus eandem

So-

Societatem commendare , ac præcipe-  
re , ut eam potius tueantur , quām per-  
sequantur . Omnibus , inquit , singu-  
lis præfatis fratribus præsentium teno-  
re mandamus , & authoritate nostri of-  
ficii , in virtute Spiritū S. & Sanctæ .  
Obedientiæ , ac sub pœnis arbitrio no-  
stro taxandis , præcipimus , nè dicto  
Ordini per Apostolicam Sedem ap-  
probato , & confirmato , aut ejus insti-  
tutis ullo modo detrahere , aut de eo  
obloqui audeatis , tam in publicis le-  
ctionibus , sermonibus , & congressi-  
bus , quām in privatis vestris colloquiis ,  
quin potius eum , Presbyterosque ejus ,  
tanquam vestros commilitones , juva-  
re , & contra impugnantes protegere ,  
& tueri studeatis . In quorum fidem  
&c. Dat. totam Epistolam Orlandinus bīst.  
Soc. p. 1. lib. 8. n. 50.

*Eodem die obierunt.*

3. Monasterii in Germania anno  
1655. Petrus Schmidt, Coadjutor, Ger-  
manus. Insignis religiosi , & præstan-  
tis

tis œconomi elogiō honoratus , orandi & laborandi studium ità conjunxerat usu assiduo , ut laborantem juvaret ora-  
tio , orantem non turbaret labor . No-  
ctu aliquando , iterata Angeli sui Cu-  
stodis , ut putabat , voce , eaque altio-  
re , & urgente , impulsus est , ut surge-  
ret , utque cellam vinariam adiret . Pa-  
ruit , reperitque , Vini vas , ruptis ali-  
quot vinculis , seu circulis , propè dis-  
solutum , vinūmque effusioni proxi-  
mum . Indè in cultu S. Angeli Custo-  
dis , qui semper ei cordi fuit , magno-  
pere confirmatus .

4. In Paraquaria Sancte defunctum P. Martinum Xaverium , ponit hoc die Nadası . Fuit P. Martinus clarissimæ in regno Navarræ , & S. Franciscum Xaverium sanguine attingentis familiæ hæres unicus . Trophæa Indiarum A-  
postoli assidue , tamque fortiter stimu-  
lärunt juvenem , ut annuo censu trium millium aureorum reliquo , Matre in-  
vita , in Societatem se receperit , atque in Paraquarium evolârit . Ibi Guita-  
nis laboriosam præstitit operam , insi-  
gni

gni linguae peritia , magnisque ac arduis itineribus exantlatis. Peste infectis ministrantem oppressit morbus contagiosus , non sine dolore , quod morte incruenta defungeretur. Post mortem variis conspectus est gloriosus.

## XI. DECEMBRIS.

I. **S**Cholæ Collegii Cordubensis pertæ sunt anno 1553. in quinque classes inferiores distinctæ , magna Civitatis gratulatione. Paulò postulatu Doctoris per Hispaniam celeberrimi , Joannis Avilæ , qui Cordubæ cum discipulis suis versabatur , Græcæ quoque literæ tradi cœptæ , & Officiorum explicari rationes. Ferebatur ille eo in Societatem affectu , ut quam primùm vidi nostros in ea urbe figere domicilium , magnitudine gaudii elatus , in Canricum Simeonis eruperit : Nunc dimittis servum tuum Domine.

*Orlandinus hist. Soc. p. 1. lib. 13. n. 41.*

2. Apud Sinas Pechino à Nostris expeditus est Joannes Ferdinandus , qui

qui Fratrem Benedictum Gōes Lusitanum, quibus posset viis deduceret, Pechinum. Fuit is Frater à P. Nicolao Pimenta, Indiae Orientalis Visitatore, expeditus ad inquirendum celebre illud, atque à multis quæsitum, regnum; *Cataium*. Patres enim, qui in imperio Magni Mogoris versabantur, ex relatione Saracenorum, multa de eo regno, quod ad Orientalem plagam jacere affirmabant, referebant, atque in P. Visitatore zelum excitârunt juvandi regionem illam, & gentibus, & Christianis, ut ferebatur, abundantem. Expeditus est ad illud iter Frater Benedictus à P. Hieronymo Xavierio, qui Missioni Mægorensi præerat, habitu negotiatoris Armeni, an. 1603. initio Januarii. Per immensum terrarum tractum, & sexcenta, imò continua pericula, eò tandem DEI protectione, & prudentia industriaque sua eluctatus est, ut ad muros Sinenses, Sinas à Tartaria dividentes, pervenerit, ac tandem intra regnum admissus,

Ex urbe Soceu ad P. Matthæum Ricci-  
um , in Pechinensi metropoli habitan-  
tem , literas dedit , significando de ad-  
ventu suo , & causa itineris . Expedi-  
tus ad illum deducendum ad Socios .  
Joannes Ferdinandus , ægrè confecto  
ferè quatuor mensium itinere , invenit  
tandem desideratum Fratrem Benedi-  
ctum , sed gravi morbo laborantem , ex  
quo etiam post dies undecim decessit ,  
cùm nec medicus idoneus adesset , nec  
vires suppeterent ad iter Pechinense .  
Incredibile dictu est quantò delibutus  
fuerit gaudiô , quòd inter amplexus  
fraternos expirare liceret . Retulite  
autem : se certò comperisse , Cataium  
quæsitum non aliud , vel alibi esse ,  
quàm Imperium Sinarum ; & Metro-  
polim à Saracenis appellatam Cambul  
esse Pechinum Sinense , & de his in-  
formari voluit Superiores suos in India  
& Proregem , qui ipsum expediverant .  
*Trigantius in Expeditione ad Sinas lib. 5.  
sap. 13.*

*Eodem die obierunt.*

3. Mediolani in Italia, anno 1612.  
 Ludovicus Vicecomes, Italus, Scholasticus. Nobilissimam domum ornavit insigni morum innocentia, & virtute. Ut Societatem ingredi liceret, multæ illi superandæ difficultates fuerunt: ad ejus pedes, qui religiosas vestes ipsi afferebat, exultabundus se abjecit, eosque exosculatus, gratias egit pro vestimentis salutis. Humilitatis studio præcipuo tenebatur, illis potissimum Bullæ Pontificis verbis accensus: Requirit hoc Institutum homines verè humiles in Christo. Magno flagrabat desiderio, excellenti quadam ratione serviendi DEO, unde, cum id per morbum, quo sensim atterebatur, non posset, mœrore tabescere. Cumque à suo in Philosophia Magistro causam doloris explicare juberetur, in uberes lacrymas solutus, dixit: Quia per adeò afflictas corporis vires, DEO servire non possum, prout illi serviendum esse cognosco, et volo. Dum extremè ungeretur, Cru-

Pars IV.

O

cifi-

cifixum complexus , eam , quæ ungebatur , corporis partem suavissimè osculabatur in simulacro Christi , oculos , aures , os , manus , pedes , & latus ; & feliciter exspiravit.

4. Parisiis anno 1652 . P. Dionysius Petavius , Gallus , Vir virtute & doctrina planè eximius , atque inter prima Societatis lumina recensendus . Invitavit illum Philippus IV . Rex Hisp . ad Academiam suam recenter Madriti erectam Urbanus VIII . Pont . non semel Romam evocavit , sed obstatit Rex Galliæ Ludovicus XIII . non ferens , viro tanto regnum suum privari . Præter editos Tomos 5 . in folio Theologorum Dogmatum , edidit complura alia varii argumenti Opuscula , & multa Græcorum Scripta in idioma Latinum transtulit , Latina quoque in Græcum . Cùm in extremo morbo acerbissimis doloribus cruciatus , confidenter quereretur coram D E O , vocem cælitus audit : *Tu de me cogitas ut homo : Ego de te cogito ut DEUS . Unde mox , & lumen , & levamen ortum est ægro .* *Sotzwell , in bibl . Soc . XII .*

## XII. DECEMBRIS.

**A**NNO 1558. epistolam, paterno pariter ac Apostolico zelo plenam, dedit Præpositus Generalis Lainius ad Socios in India, & Brasilia laborantes. Inprimis significat, se pro ipsis quotidianas indixisse preces per universam Societatem in Europa. Deinde ostendit. I. Vocationis in Indias præstantiam ex gravitate operis, & operariorum dignitate. Magnum, inquit, Fratres charissimi, beneficium, magna indulgentia est divinæ summæ que Bonitatis in eos universè omnes, quos ad hanc minimam vocat Societatem suam, gratiæque suæ ope dignatur, per quam secundùm ejus instituta vitam degant: eorum tamen, quibus ea fors evenit, ut in ejus servitium istis in regionibus laborent, singulare in primis est donum, tum propter momentum, & gravitatem operis, quod vos tractatis; tum propter operariorum privilegium, quod vobis datum

est valde singulariter , non modò ut multa faciatis bona , sed etiam ut multa perferatis mala &c. 2. Declarat , quanta illis imposita sit necessitas tendendi ad perfectam virtutem , tum quia plurimas habent occasiones eam exco lendi , & quodammodo excoquendi igne variarum tribulationum , & ær umnarum , tum quia ad conversionem , & spiritualem gubernationem barbari illius populi non vulgaris requiritur virtus , tum quia universæ Societatis oculi in illos intenti sunt , & fructibus laboris ipsorum pasci desiderant. 3. Tradit præcepta , quibus juventur ad propriam corporis animique sanitatem ac salutem tuendam. Quando quidem , inquit , vos tanquam hostias vivas integre DEO ac procreatori nostro ac Domino obtulistis ; ut vos usquequaque in negotia gloriæ , & obsequii ejus , & suarum animarum juvamen impendatis , id ità exequi me mentote , ut corpus quidem diu per ferre laborum suorum nus possit , curantes

rantes, & valetudinem ei, & necessaria ad opus vires tueri; anima vero vestra nequaquam se ipsam negligat, quoniam Christi D. sententiâ, nihil vobis prodesset, totum mundum lucrari, si detrimentum vestræ animæ faceretis. Nec non ipsa, quanto acris ad sui perfectionem connitetur, tanto ad alienas juvandas evadet utilior. Commendat ergo, ut cautè ambulent in medio nationis pravæ, timore, & amore DEI regantur, orationi, & Examini diligenter incumbant, inter ipsos labores mentem ad DEUM elevent, & quot annis Exercitiis spiritualibus vacent &c. Quæ omnia non solum ad Indicos, sed etiam Europæos Missionarios juvandos, plurimum conferunt.  
*Sacchin. hist. Soc. p. 2. lib. 2. n. 188.*

*Eodem die obierunt.*

2. In Philippinis insulis anno 1626. P. Emmanuel Martinez, Hispanus. Virgineros ejus oculos videtur Christus honorasse eâ gratiâ, ut se ipsi spectandum

objecerit ; orandi verò attentissimum studium , præsertim in persolvendis Canoniciis precibus , eo prodigio probavit , ut Breviarium ejus in mare delapsum nec mergi , nec omnino made fieri permiserit . Morienti adfuit amicus quidam sacerdotalis , vanitatibus mundi nimirū intricatus , videns autem P. Emmanuelem intrepidum , & religiosissimo apparatu mortem operientem , rogavit instantissimè , ut beatam æternitatem ingressus , impetraret sibi à DEO gratiam efficacem pro dirumpendis mundi laqueis , & strenua sui victoria . Vix animam egerat Pater , cùm vir ille altissimo de peccatis dolore saucius , in lacrymas amarissimas effusus , generalem de tota vita Confessionem instituit , & animum ad sequenda Christi signa convertit .

3. Suldæ in Belgio anno 1597. P. Franciscus Fabricius , Belga , strenuo glorioſoque inter pestiferos labori immortuus , decessit , vel in medio cada verum putridorum solitus confitentes expiare .

4. Romæ anno 1686. P. Carolus de Noyelle, Societatis Præpositus Generalis, Belga. Ut summo suffragiorum omnium consensu Societatis regimen adiit, ita illud summa omnium, etiam externorum, approbatione, ferè quinquennium tenuit. Instituti scientissimus, ut illud cæterorum observantia commendaret efficacius, in se ipso exemplar ipsius expressit absolutissimum. Admirabilis fuit viri constantia, tum in usu communis vitæ, nulla singularitate inquinatæ, tum in adversis æquissimo animo, & vultu tolerandis. Iis, quæ personam ejus tangebant, videbatur prorsus non tangi, verùm ad ea, quæ Societatem impetebant, admodum delicato erat sensu. Obiit in domo Professa Romana, anno ætatis 71. parentavitque Optimo Patri non solum Societas singulari luctu, sed etiam Innocentius XI. Pont. Max. lacrymis profusis. *Ex literis Encyclicis A. R. P. Thyrsi Gonz. Præp. Gen.*

## XIII. DECEMBRIS.

I. **N**choatum est anno 1545. Sacrosanctum Concilium Tridentinum sub Paulo III. Pont. Max. qui, ut maximo studio intentus erat in felicem ejus progressum, & exitum, ita præter Cardinales, Episcopos, & Ordinum Religiosorum Abbates, interesse voluit quam plurimos viros doctissimos, Theologiz, & Sacrorum Canonum peritos. Ex Societate recenter confirmata assumpsit duos è primis Decemviris, qui Theologorum Pontificiorum titulum, & munus gererent, Jacobum Lainium, & Alphonsum Salmeronem Hispanos, scientia magis, & virtute, quam ætate proiectos. Nam Lainez vix quartum, Salmeron alterum, supra trigesimum agebant annum. Nè vero vel ætatis fervore, vel scientiæ præstantia, vel munieris excellentia, aut hominum plausu evanescerent, & extra religio-  
se humilitatis ac modestiæ septa abriperentur, Sapientissimis illos monitis, & præceptis scriptò traditis, instruxit

S.

S. Pater Ignatius. Tria, inquit, omni-  
no in obeundo munere isto spectare  
vos volo. Primum in ipso Concilio  
maximam DEI gloriam, communéque  
Ecclesiæ bonum, deinde extra Conci-  
lium antiquum vestrum juvandi ani-  
mas institutum, quod quidem potissi-  
mum nobis in hac profectione vestra  
propositum est. Denique domi, &  
inter vos privatam animi vestri Cu-  
ram, studiumque, nè vos ipsos negli-  
gatis, ac deseratis, sed assiduâ vos cul-  
turâ ac diligentia, quotidie magis red-  
datis idoneos ad sustinendas impositas  
partes. Et in Concilio quidem decet  
vos in loquendo tardiores esse, in au-  
diendo attentos atque sedatos, in per-  
spicienda mente eorum, qui dicunt,  
sagaces. Indisputationibus monu-  
menta rationum in utramque partem  
afferenda erunt, nè vestro addicti ju-  
dicio videamini, perpetuò id curando,  
nè quis unquam ex vestra oratione mi-  
nus æquus placatusque discedat: om-  
nibus vos æquos esse convenit, nemini

ni obnoxios. Jam verò extra Concilium nullum munus bene merendi de proximis prætermittentis, quin aucupandæ occasiones erunt, modò audiendi pœnitentes, modò dicendi ad populum, modò instruendi pueros, & rudes, denique visendi, & fovendi ægrotos in nosocomiis, non modò idoneis sermonibus, sed etiam quibusdam pro facultate vestra munusculis, omnes autem in omni occasione cohortandi, ut pias ad DEUM fundant preces, pro felici Sacræ Synodi progressu ac exitu &c. - - Restat tertium, quod in munere isto pro dignitate gerendo, spectare vos convenit, quod quidem in vobis ipsis tuendis conservandisq; possum dicebamus. Quanquam enim vos non ignorare necesse est, quæ Professionis sunt vestræ, tamen hoc in primis meminisse æquum est, ut summa sit inter vos animorum conspiratio, mutua consiliorum omnium sententiarumque Societas, néve suo quisquam judicio prudentiæque præfidat. - -

Horam aliquam de nocturnis dicabitis, tum cujusque diei actis inter vos conferendis, tum quæ postridie videbuntur agenda. Deinde quo majore vos, & humilitate, & mutua charitate contineatis: rogabit quisque singulis noctibus alternatim reliquos Socios duos (nam & Jajus illis accessurus erat) ut ipsum corrigant, & ubi visum fuerit, libera oratione castigent, nec castigantibus causam facti reddet, nisi postulatus, & jussus. Matutinis temporibus, quemadmodum per diem vos gerere oportet unà deliberabitis, rationemque vitæ vestræ quotidie semel atque iterum à vobis ipsi reposcetis. Hæc autem quinto saltèm, postquam Tridentum perveneritis, die executioni mandanda memineritis. *Ità S. Pater.*  
 Quia verò his sapientissimis, & opportunitissimis monitis ac præceptis, boni illi Patres se suásque actiones summa diligentia atque humilitate conformare studebant: DEUS, qui humilia respicit, tantam illis tam in dicendo,

quām agendo dedit gratiam: ut apud omnes summam meruerint estimatiōnem, amorem, & honorem, prout suprā sēpiūs expositum. *Orlandinus hist.*  
*Soc. p. 1. lib. 5. n. 23.*

*Eodem die obierunt.*

2. Mindanai in Philippinis an. 1655.  
 P. Alexander Lopez, Hispanus, & P. Joannes Montiel Italus in odium fidei cæsi, jussu Coralati, barbari Regis. Cùm enim missi essent, ad commonendum illum, ut secundum pacta conventa permitteret in sua ditione liberum Christianæ religionis exercitium, & Pater Alexander, pro veteri, quæ ipsi cum Rege intercedebat, confidētia modestè urgeret, ut ipse quoque ei religioni accederet, parum abfuit, quin illico necarentur à furibundo. Digrassi ex aula, & paulò post ad illam revocati, in via lanceis confosso occubuerunt, disertè fatente Coralato, eos à ministris suis trucidatos, quod suscipienda fidei Christianæ authores fuissent.

3. Ruremundæ in Belgio , anno  
1630. P. Arnoldus Cathius , Belga ,  
Vir multæ ac solidæ pietatis. Nulla  
illi hora præterfluebat , qua Christi  
Patientis mysterium aliquod non re-  
co-  
leret , & congruis affectibus non vene-  
raretur . Zelus Charitatis non semel  
illum impulit ad operam præstandam  
peste infectis , cuius pretium non se-  
mel tulit , & ipse eadem infectus . Post  
strenuos in Holiandia labores , pepigit  
cum germano suo , ut qui prior mi-  
grâsset è vita , alteri impetraret cele-  
rem obitum , si id ejus congrueret sa-  
luti . Obiit frater 18va Octobris , se-  
cucus est hac die P. Arnoldus .

4. Olomucii in Moravia, an. 1655.  
P. Gasparem Hildebrandum , Silesium ,  
dum charitati suæ nimium indulget er-  
ga contagiosa lue correptos , mors ve-  
nenata , sed gloriosa , sustulit .

#### XIV. DECEMBRIS.

I. P. Carolus Spinola capitul in Ja-  
ponia ab apparitoribus , anno  
1619. Media nocte post festum S. Lu-

ciæ V. & M. diem , audit à satellitibus  
 gubernatoris Nangasachi effringi fo-  
 res domūs , in qua hospitabatur, facile-  
 que asscutus id , quod erat , ad oran-  
 dum , & sese in holocaustum DEO of-  
 ferendum , composuit. Sic depre-  
 henso injecta sunt vincula , collum, ma-  
 nus , pedesque tam arctè adstricti , ut  
 vestigia vulnerum , quoad vixit, super-  
 fuerint. Nangasacho paulò post aman-  
 datus cum aliis aliquot captivis Chri-  
 stianis , inter quos nonnulli Religiosi ,  
 ex SS. Dominici , & Francisci familia ,  
 in famosum Omurensem carcerem  
 conjectus est. In quo cum invenisset  
 alios quosdam sibi notos Religiosos , in  
 dulcissimos ruerunt omnes amplexus ,  
 Psalmis , & hymnis decantatis DEO ,  
 quod contigisset aliquid pati pro ipso .  
 Testatus est affectus suos P. Carolus in  
 variis ad Socios datis epistolis , præser-  
 tim ad quendam Macai , in insula Si-  
 nensi , degentem. Ecquando ô DEus  
 meus , inquit , hoc ego beneficium me-  
 ritus sum , ut dignus efficerer , pro No-  
 mine JESU contumeliam pati ? O bene  
 collo-

collocatos labores meos , quos itinere  
 tam longo , ex Italia in Japoniam tuli !  
 O bene remuneratos dolores , præser-  
 tim illos , qui tyrannidis hujus sœvien-  
 tis temporibus tolerati sunt &c. Et ad  
 alium è Societate in Japonia , datâ epi-  
 stolâ ; Tandem , inquit , venit hora  
 mea , atque ut clarè mihi innotuit vo-  
 luntas Numinis , itâ divina ejus Boni-  
 tas sperare me jubet , non egressurum  
 me hoc carcere , nisi ut in cælum mit-  
 tar. Quare consolationibus supera-  
 bundo ob tam felicem conditionem ,  
 quæ mihi obtigit. Utinam itâ Domi-  
 no placeat , ut hinc non egrediar , nisi  
 ad moriendum , aut ad Evangelium li-  
 bere disseminandum ! O mi Pater ,  
 quâm liberaliter mihi Dominus labo-  
 res meos omnes , vel hac gratia , com-  
 pensavit , quòd amore illius captus  
 sim ! O Pater , quâm suavis , & deli-  
 ciosa res est , pro Christo pati ! Id e-  
 go , ex quo in hunc carcerem veni , li-  
 quidius experior. *Eabius Spinola in Vita  
 P. Caroli.*

*Eodem die obierunt.*

2. Apud Elicuranos in America, an.  
1621. odio fidei cæsi , P. Martinus de  
**A**randa Valtivia , Hispanus , P. Horatius Vecchi , Italus , & Didacus Montaltus , Indus , Coadjutor. P. Martinus per illustri domo natus , militaribus exercitiis in Equitum ducem evaserat , dumque se per Exercitia S. Patris pararet ad capessendum munus Prætoris , animum cælitus illustratum adjecit ad Societatem , in qua magnô zelô variis populis barbaris salutarem præsttit o-  
peram. Cæso in primis Fratre Didaco , Patres Martinus , & Horatius , clavis-  
ferreis prostrati , hastisque confixi , ar-  
boribus sunt alligati , mox dissesto pe-  
ctore , cor illis evulsum , ipsi tamen per  
quartam horæpartem Christum præ-  
dicasse traduntur.

3. Romæ anno 1615. P. Petrus An-  
tonius Spinellus , Italus. Parvulus se-  
ptennis inter ducalis domûs illecebras  
virginitatem DEO vovit , octennis no-  
stu ad recitandum DEIparæ V. offi-  
cium

cium consurgebatur. Docentis in scho-  
la, & S. Synaxim distribuentis vultum  
ac pectus viderunt non pauci cælesti  
lumine illustratum. Visus quoque  
JESUM Parvulum in sacra pyxide cir-  
cumferre. DEIparæ V. totus addictus,  
ejus dotes, & laudes præclarô ingeniô,  
& eruditô calamô est prosecutus, in  
ejus Domo Lauretana subinde gemi-  
nas noctes pervigil duxit in oratione,  
ut aliquid honoris à se averteret. In-  
teriori veste una, an centone potius,  
annis 18. usus est, pro lectulo terrâ,  
vel assere nudo.

## XV. DECEMBRIS.

I. **P.** Melchior Carnerius Goæ con-  
secratur Episcopus Nicænus,  
annô 1560. Quamvis enim pro sua  
religiosa humilitate, vehementer cu-  
peret vitam in Societate agere priva-  
tam, & superioribus religionis subje-  
ctam, urgente tamen Pontificis man-  
dato, ut, quam primùm Episcoporum  
trium haberetur copia, consecraretur,  
& instantे Patriarcha Æthiopiæ Ovie-  
do,

do, quem sequi debebat, consecratio differri non poterat. Appulit enim Archiepiscopus primus Goanus, & cum eo Episcopus Malacensis, aderatque Patriarcha Æthiopiæ. Cum igitur honorem, & onus declinare non posset P. Melchior, ad suum solatium, & ad maiorem cum Societate conjunctionem, votô se obstrinxit, non solum se Societatis consiliis obtemperaturum, verùm etiam iterum in ea Professionem solemnem emissurum, cum primum id à Pontifice impetraret. *Sacch. hist. Soc. p. 2. lib. 4. n. 278.*

2. Romæ anno 1638. Urbanus VIII. Pont. Max. Indulgentiam Plenariam concessit visitantibus Ecclesias Societatis JEsu, ac Communione Eucharistica refectis in festo S. Xaverii, cum translatione Indulgentiæ, quando festum prædicti Sancti occurrit prima Dominica Adventus. *Bullar. Constit. 256. Urb. 8.*

*Eodem die obierunt.*

3. Forlivii in Italia , annō 1589. P. Marcus Antonius Mustoni , Italus , pietate , silentio , paupertate , & obedientia insignis. Mortem obiit non improvisam. Redux enim ab ægra fœmina , quam disposuerat ad mortem , dixit Socio : Illam quidem ex eo morbo non obituram , sibi autem paucis post diebus esse migrandum : & migravit plenus gaudii , quod suavi cantu testabatur.

4. In monte S. Gothardi annō 1654. P. Thomas Werner , Germanus , populo , militi , nostris , gratus Ecclesiastes , Confessarius , Superior. Vir ad ardua quæque aggredienda , & exequenda æquè fortis ac industrius. Ad motis tumidæ suæ tibiæ S. Xaverii lipsanis , & Orientalium Indiarum pectorum voto concepto , surrexit è lecto , tibiâ sanâ. Sed heroicum votum exequi non potuit , in itinere de cidentibus è monte nivium voluminibus oppressus.

5. Palentiæ in Hispania defunctus,  
annô 1595. P. Antonius de Torres, His-  
panus, hoc die ponitur à P. Nadasí.  
**In Indiis**, & Hispania magno fructu  
explicuit zelum suum Apostolicum.  
Pluribus in locis instituit, ut sextâ qua-  
vis feriâ historia seu exemplum aliquod  
pium narraretur, & pia flagellatio fie-  
ret. Palentiæ cùm Rector esset Colle-  
gii, ac extra urbem ægrum pauperem,  
qui urbem ingredi non poterat, repe-  
risset, illum in humeros sublatum, per  
urbem ad Xenodochium deportavit.  
**Ibidem** Sodalitatem Charitatis insti-  
tuit, in quam ferè nobiliores allegit,  
pro adjumento pauperum verecundo-  
rum. Per 4. horas orabat quotidie. A  
concione sudans, cilicium exuebat, sed  
aliud non minùs asperum in duebat. Li-  
cet tardiùs circa meridiem à concione  
rediret, positis humili genibus, plenum  
horæ quadrantem de genibus dabat,  
exmini Conscientiæ. Cùm aliquan-  
do de Inferno ad concionem diceret,  
multis visus est Angelico vultu, magno  
splendore collucens.

6. In Polonia latè grassante lue contagiosa , anno 1631. præclaram nocte est Societas occasionem Apostolicæ charitatis Spiritum exercendi. Gedani hoc die , inter strenua obsequia pestiferis exhibita , occubuit P. Nicolaus • Piwnicki , Prutenus , cum Sociis undecim alibi , variis mensibus sublati.

## XVI. DECEMBRIS.

I. **S.** Xaverius anno 1557. Malacâ scripsit Goam ad PP. Paulum Camerem , Joannem Beiram , & Antonium Criminalem , ut hi duo posteriores quantocyus proficiscerentur in Promontorium Comorinense. Paulo verò Camerti sollicitè commendat curam Domûs Goanæ , specialiter autem subjectionem omnem erga superiores. Paulo Camers , inquit , Charissime multùm oro te per , quo JESUM Christum prosequeris , amorem , ut acriter invigiles utilitatibus , & conservationi domûs istius. Ante omnia tibi etiam atque etiam commendo , ut plenam perfectamque exhibeas obedientiam iis qui

qui ejus domūs qualemcumque Præfeturam exercent. Sic habe : nihil te ulla in parte mihi gratius, nihil posse jucundius facere: quām si plenē ad nutum ipsis obtemperes. Evidem si isthic essem , nihil , nè minimum quidem , facerem contra , vel præter authoritatem , & voluntatem eorum. Opto , ac spero , DEum intimo in animam tuam afflatu inspirationis suæ persuasurum tibi penitus , nulla te re maiorem inire abs se gratiam posse , plūs que ad suum obsequium laudémque conferre , quām ejus amore abnegando tuam propriam voluntatem &c. Ex Epist. Veter. lib. 5. epist. 8.

2. Romæ anno 1602. habita est Congregatio , & disputatio XII. de Auxil. Grat. coram Clemente VIII. Collatæ sunt Conclusiones duæ Cossianæ , cūm doctrina Molinæ. Prima : *Quod Deus quodammodo occasiones querat , & exspectet , ut datio , & largitio suæ gratiae rationabilis videatur.* Altera : *Homo in natura lapsa sufficientes habet vires ad resistendum gravibus tentationibus , &*  
ad

*ad superanda singula difficultia.* Ad primam respondit P. Arrubal; In Molina nihil tale reperiri; nec verba *expectandi*, & *querendi*, haberi in locis ex ipso allegatis. Deinde Cassianus per occasiones illas intelligit *Actus naturales*: à quibus alienus est Molina. Ad secundam reposuit: Cassianum docere: hominem pervires naturales posse superare multo tempore tentationes gravissimas, quales S. Job sustinuit; quod non docet Molina. *Fleuth. hist. de Auxil. lib. 5. cap. 16.*

*Eodem die obierunt.*

3. Panormi in Sicilia, anno 1614.  
P. Vincentius Regius, Italus. Inter cæteras virtutes ejus eximia elucebat oculorum modestia, qua à blandioris sexūs aspectu severè abstinebat. Unde, cùm quispiam sororis ejus Sanctimonialis effigiem ipsi offerret, rogaretque: an illam satis referret? respondit: Se id nescire; quippe qui illam nunquam aspicerit. S. P. Ignatium Præcipuo cultu venerabatur, scilicet

accuratissimâ regularum observantiâ, ideoque dicitur conspectum ejus meritus in morte.

4. Romæ anno 1624. P. Franciscus Sacchinus, Italus, Historicus Societatis, & Secretarius quām disertus, tam accuratus, & religiosus. Ut satis temporis haberet pro assiduis laboribus suis, sollicitè cavebat, nè minimum quid illius perderet. Unde P. Mutius, Præpositus Generalis, dictitabat: Sacchinum, ne unicam quidem temporis unciam perdere. Eadem sollicitudine versabatur circa paupertatem religiosam, tum quod eam à S. Patre in Matrem commendatam sciret, tum quod velut in gremio ejus natus esset. Patrem enim habuit agrestem, & mulionem, quo tamen ille gloriabatur, & quoties ad Collegium Romanum veniebat, digitō eum monstrabat Sociis P. Franciscus dicens: En patrem meum. A sacro redux, obvio P. Generalis administrō Coadjutori dixit: Iret, ac Patri Generali diceret: se ad valetudinarium ire, & brevi moriturum. Invit, & quarto die religiosè decessit. 5.

5. Placentiæ anno 1644. Laurentius Ortegâ, Coadjutor, Hispanus. Ægrotos accuratissimâ curâ fovebat, præfertim senem quendam Patrem per annos quinque. Idem Pater post mortem convenit Fratrem Laurentium læta specie, eumque amanter amplexus, gratias egit pro tam effusis diuturnæ charitatis officiis, monuitque, ut constanter pergeret in eo officio : DEO enim id valde gratum esse, denique dato ipsi in fronte pacis osculo, videri desiit. Illud in eodem Fratre mirandum occurrit, quod jam indè à puerro, nunquam sitierit ( nisi in extremo morbo ) adeoque nec biberit, cùm experiretur id stomacho suo valde offere.

## XVII. DECEMBRIS.

I. GOæ in India celebratæ sunt an. 1557. magnificæ exequiæ S. Patri Ignatio, cui & Xaverium, & omnes, à quibus exulta est, & excolitur, debet India operarios. Interfure Prorex, & honestissimi Lusitano-

rum, sacrum fecit Patriarcha Æthiopiæ Andreas Oviedo, Consalvus Silveria pro concione virtutes, & egregia S. Patris facta, quantumque illi orbis terrarum, & India nominatim, debet, gravi oratione explicavit. *Sacch. bīst. Soc. p. 2. lib. i. n. 149.*

2. Coloniæ in Germania anno 1556. attributum est Societati trium Coronarum Collegium. Cùm enim Leonardus Klesselius cum aliquot Sociis habitarent in domo conductitia, & satiis incommoda; fructus autem facerent plures, quam pro numero operariorum: complures viri probi, & docti vehementer optabant, ad conservandam Religionem, sustinendumque Academiæ splendorem suscipi à nostris munus docendi. Evenit autem opportune, ut Regens unius è tribus gymanasiis, quæ in urbe erant præter Academiam, relegandus esset, quod Lutheranam spiraret hæresim. Vacans ergo Rectore Collegium Societati consignatum est, quod trium Coronarum dicitur, nomine imposito ab insignibus

bus Urbis Coloniensis , quæ tres re-  
præsentant Coronas. Sed quia nego-  
tium cum onerofis Societati conditio-  
nibus transactum erat, alia deinde æ-  
des pro Collegio comparata est cum  
debita immunitate. *Orlandinus hist. Soc.*  
*p. 1. lib. 16. n. 26. Sacchin. p. 5. lib. 2.*  
*n. 105.*

*Eodem die obierunt.*

3. Ingolstadii in Germania an. 1608.  
P. Paulus Hoffæus, Germanus, hæreti-  
corum expugnator acerrimus, & fidei  
Catholicæ propugnator strenuissimus.  
Unde de ipso, & P. Petro Canisio, u-  
surpabat sapientissimus Bavariæ dux  
Albertus, quod Ecclesia canit de Prin-  
cipibus Apostolorum: *Petrus Canisius,*  
*& Paulus Hoffæus*, *ipſi nos docuerunt le-*  
*gem tuam Domine.* Maximis muneri-  
bus par, in Societate præclarum egit  
Rectorem, Provincialem, Visitatorem  
& Assistentem, quatuorque interfuit  
Congregationibus Generalibus. Ani-  
mabus defunctorum juvandis addictis-  
simus, sæpe illas habebat ad portam

ubiculi suffragia petentes : ideoque Juvenes nostros, si videbat eos aliquid ultra concessa sibi indulgentes, blandè monebat : *Venietis, & vos aliquando ad me pro suffragiis.* Post mortem visus est unà cum P. Claudio Aquaviva, specie decora gloriosus.

#### 4. Compluti in Hispania anno 1625.

P. Joannes Suarez, Hispanus. Assidua ejus in mente, & corde occupatio erat, gratulari DEO de omni eo, quod est, & quasi assiduis in eum rapi amoris actibus. Cuidam familiari suo fassus est, se persæpe ad singulos passus elicere unum actum Amoris Divini. Nec loquebatur, nisi ferè de DEO, ab aliis colloquiis dextrè subducere se solitus. Cùm quidpiam durioris imperii aliquando à Superiore expectaret, atque ab eo abhorreret, illico ad Ven. Sacramentum se recepit, & voto se obligavit, ad nullam excusationem prætendendam. Et præsttit, licet res esset valde ardua, & cum insigni ejus despicientia conjuncta. Sed victoriæ tam insignis opulentum pretium tulit, quip-

pe

pe per annos 12. postea magnis , & miris à DEO gratiis , & solatiis cumulatus.

5. Glattoviæ in Boëmia, anno 1648.  
P. Georgius Pelinga, Moravus , ardens  
Verbi divini prædicator , & in Missio-  
nibus , præsertim Castrensisbus strenu-  
us ac felix operarius. Laus ejus non  
solum Boëmiam impleverat , & Mora-  
viam , sed Romam delata , singulare à  
P. Præposito Generali obtinuit enco-  
mium. *Ex Tannero.*

## XVIII. DECEMBRIS.

I. S. P. Ignatius anno 1594. jussu  
S. DEI paræ V. præclaram de stu-  
dio Humilitatis solidæ exhortationem  
dixit S. Mariæ Magdalenaæ de Pazzis,  
Ordinis Carmelitarum. Spectandam  
enim se illi præbuit Virgo Mater me-  
dia inter Sanctos Ignatium , & Ange-  
lum Martyrem Carmelitam , jussitque  
Ignatium instruere Magdalenaam in  
studio Humilitatis , Angelum in exer-  
citio religiosæ Paupertatis. Exhorta-  
tionem S. Ignatii , prout ab ipsa San-  
cta est relata , exhibit Bartolus in Vita

S. Ignatii lib. 4. n. 5. atque indè concludit: quām perfectus fuerit Ignatius in Humilitate; siquidem ipsum specia-liter delegit Virgo DEI para in Magistrum ejusdem virtutis, eīque tam capacem, & præclaram commisit discipulam.

2. Annō 1576. Gregorius XIII. Præposito Generali Societatis facultatem concessit, ut accepta debita informatione, possit quæcunque bona domorum, & Collegiorum Societatis alienare in evidentem ejusdem utilitatem, per se, vel per alios, vendendo, aut permutando, absque alia à Sede Apostolica, vel ejusdem Legatis, aut Nunciis, petita licentia. In Emphiteusim autem possit tradere ad tres generatio-nes. *Bullar. Societ.*

*Eodem die obierunt.*

3. Gracoviæ in Polonia, anno 1629. P. Adamus Gorski, Roxolanus. In Sacrificio Divine confiendo, & Horis Canonicas persolvendis ad stuporem accuratus, dicere solebat: *O quām igne-*

*ignorant Sacerdotes , quantas delicias ha-  
beant in opere isto ! Coram SS. Sacra-  
mento plures horas ducebat , faxi in-  
star immotus. Charissima ei erat Re-  
gula , qua jubemur in omnibus nostri  
mortificationem quærere. Unde cor-  
pus suum nunquam permittebat acri  
aliquo dolore carere , præcipuásque  
ejus partes in menses distribuebat , ut  
singulis mensibus aliud aliudve cru-  
ciaretur membrum. Pro generali  
Sanctæ vitæ regula sibi præscripserat :  
Ità vivere , sicut in tertio Probationis anno  
vixerat. Tesseram sui erga DEUM  
affectus , hanc scripto reliquit : *Iuro ,  
Domine , ac testor : quòd nihil velim , nisi  
maximam gloriam Nominis tui , & maxi-  
mam confusionem faciei meæ. Theolo-  
giæ docendæ se accingentem Craco-  
viæ , mors omni apparatu sancta occu-  
pavit.**

4. Ingolstadii in Germania , annō  
1648. P. Sebastianus Schaller , Germa-  
nus. Incredibili legum nostrarum  
observantiâ insignis : tanto lucranda-  
rum animarum zelo æstuabat , ut voto

concepto promiserit, se vitam, quaqua liceret, illis lucrandis impensurum. Et impendit, quando in obsequio pestiferorum nobilis cecidit victima charitatis.

## XIX. DECEMBRIS.

I. **P.** Robertus Bellarminus heri renunciatus Rector Collegii Romani anno 1593. ubi ex mærore, ob impositum onus honorificum, collegit animum vir humillimus, formam regiminis ad normam Sacrarum literarum, legumque Societatis sibi præscripsit, concinnavitque Adhortationem ad Socios habendam, ex illa Ecclesiastici sententia cap. 32. *Rectorum te posuerant? Noli extolli: esto in illis quasi unus ex ipsis-- Et non impedias musicam.* Cui divino monito ita conformavit gubernationem suam, ut potestate authoritatique Superior, humilitate esset omnium infimus, congrua suavitate, temperaret disciplinæ rigorem, & non animorum duntaxat, verum, & corporum paternam haberet curam. Talem

lem dum ageret Rectorem, meruisse  
visus est, ut ascenderet superius, &  
quidem passu velociore. Nondum e-  
nīm exacto gubernationis Collegii  
triennio, jussus est Provinciæ Neapolit-  
tanæ curam suscipere; quam summâ  
prudentiâ, & charitate gubernavit,  
donec post mortem Card. Toleti à Cle-  
mente VIII. evocaretur, ut illius loco  
munus Theologi Pontificii subiret. Pe-  
trafancta in Vita lib. 2. cap. 10.

*Eodem die obierunt.*

2. Granatæ in Hispania, anno 1610.  
P. Joannes de Torres, Hispanus. Si  
quod animæ alicujus lucrum speraret,  
ab eo nulla illum occupatio, nulla  
corpori adversa valetudo, nulla alia  
difficultas avertere valebat. Fama est,  
dæmonem cuidam authorem fuisse, ne  
cum illo suo inimico ( ita P. Joannem  
appellabat ) aliquid negotii haberet.  
Dies totos pro sacro pœnitentiæ tribu-  
nali insumebat, noctes vero meditan-  
dis divinis dabat. His intentum cum  
mors impeteret, Nunquam existimasse,

inquietabat, mori, rem tam dulcem esse, nec dubito, hanc esse vocationis gratiam.

3. In Hollandia, anno 1620. P. Petrus de Hollandre, Belga. Cùm morti se vicinum adverteret, eâdem, qua mortuus est die, scripsit ad Præpositum Provincialem, se protestari, quod ex ea, quam semper coluisse, voluntatis suæ cum Superiorum voluntate coniunctione, tantum per omnem vitam in Societate aëtam, jucundissimæ solidissimæque voluptatis hauserit, quantum omnes mundi deliciæ conferre non possunt. Ingenio erat ad summa omnia expperrecto, exquisitè observans legum, & privatæ pietatis exercitiorum, ita: ut etiam extremo vitæ suæ die, observatus sit ad horologi campanæque sonum attendere, ut distributorum in horas Crucifixi mysteriorum meminisset.

## XX. DECEMBRIS.

I. **S.** Ignatius iterata apparitione re-creat matronam afflictam. In valle quadam Pedemontana, Lauzus dicta,

dicta, grassabatur an. 1626. ingens luporum copia, qui insolita rabie etiam in homines sæviebant. Ad illos abigendos, oppidani novemdialem decreverunt supplicationem, ad Sacellum S. Ignatii instituendam. Audit sunt, lupique turmatim diffugerunt. Hoc Sancti præsidio excitati alii ejusdem vallis incolæ, cum lues pestifera strage magna desæviret in pecora, ad eundem Sanctum recurrerunt, edito voto, de sacra æde illi excitanda in proximo monte, ex veteris castri rudibus. Nuncupato voto, cessat strages, ægra sanantur animalia, difflatur omnis pestifera lues. Ergo populus voti reus, facellum extruit, quod confessim magno viciniæ concursu, singularique pietate celebrari cœpit. Nec defuit Sanctus supplicum precibus atque solatio. Mulier, Thomæ Mussani conjux, cuius filium fœdâ herniâ laborantem sanârat, persolutura preces voto promissas, dum convertit ad montem, in quo facellum ergebatur, oculos, videt S. Patrem cælesti fulgo-

re circumfusum , insidentem faxo elatiōri , amœnissimo vultu amabilem . Recurrit ad Parochum suum , visumque enarrat . Ille jubet eam insistere precibus , & sumptâ sacrâ Eucharistiâ , diligentius Sancto se commendare . Intērim gravi mœrore obruitur mulier , è quo ut emergeret , iterum oculos levavit in montem , nec defuit indè auxilium illi . Iterum vidit eodem in faxo Sanctum , cuius aspectus mœrorem omnem momento discussit , animum serenavit , & miris demulxit deliciis . Unde mirum in modum circumiacentibus in oppidis , & pagis crevit S. Ignatii cultus , ædificatis Sacellis , & aris , institutis jejuniis : & in ejus anniversaria festivitate solemnis veneratio . *Bartolus in Vita lib. 5. n. 99. § 100.*

*Eodem die obierunt.*

2. Goæ in India Orientali , aii. 1562 .  
P. Joannes Nunnez , Lusitanus Æthiopiæ Patriarcha . Deliberanti de vitæ sanctioris statu ineundo , spectandam se præbuit DEI para V. comitibus P. Petro

tro Fabro , & Francisco Strada è Socie-  
 tate JESU , quæsivitque ex Joanne : *Vis  
 servire Filio meo usque ad defatigationem?*  
**A**nnuente ipso . *Sequere ergo hos viros ,*  
 subjunxit DEIpara , & videri desiit .  
**I**ncidit paulò post Joannes Conimbricæ in P. Petrum Fabrum , agnovitque  
 illico , eum esse ipsum , quem nuper  
 DEIparæ comitem viderat , cùmque  
 Faber eum alloqueretur iisdem illis  
 verbis , quibus DEIpara : *Vis servire  
 Christo usque ad defatigationem?* Societati  
 constanter se addixit , & post præclara  
 non vulgaris virtutis documenta me-  
 ruit Æthiopiæ dari Patriarcha , quam  
 dignitatem egregiis dotibus ornavit .

3. In Sicilia , anno 1592. P. Hiero-  
 nymus Domenecus Hispanus . Socie-  
 tam in Sicilia præclarè provexit , ei-  
 que præfuit magna laude benigni Pa-  
 tris , accurati Superioris , periti medi-  
 ci , ità : ut Siculæ Societatis Angelus  
 diceretur . Orandi studium tanti fe-  
 cit , ut diceret : Etiam S. Franciscum  
 ab illa Sanctitatis suæ eminentia pro-  
 lapsurum fuisse , si non hoc præsidio se-  
 su-

sustentasset. Vesperi cubitum concedendo ita se se componebat, quasi re vera nocte ista esset è vita migraturus.

4. Calari in Sardinia, anno 1623. Franciscus Hortulanus, Coadjutor, Hispanus. Cum primùm ex utero matris egressus est infans, mox junctis instar orantis manibus, clara voce, & distin-ctè pronunciavit : MARIA, MARIA, prout mater, & obstetrix sanctè sunt testatæ. Et vixit semper addictissimus cultui DEIparæ V. rarissimis favoribus ab ipsa dignatus. Cum ægro cuidam nostro amanter, & accuratè serviret, vedit Christum Crucifixum brachia in amplexum suum protendentem, audi-vitque, nunquam se ab illo deserendum.

## XXI. DECEMBRIS.

I. FEstum S. Thomæ Apostoli admonet Societatem vaticinii, quo prædixit, eam olim in vastissimis Indiæ Orientalis regionibus, quas Christiana fide atque legibus excolebat, laboraturam. Erectæ enim columnæ, vel àt alii volunt, Cruci, prope Melia-

po-

porem, Choromandelis regni metropolim, in loco milliaribus 15. distante ab Oceano, inscripsit: Cùm mare eò, pervenisset, venturos in Indiam homines albi coloris, ad restaurandam Fidem, & Religionem, quam ipse prædicabat. Eventus vaticinio fidem fecit, cùm enim Vascus Gama primùm in Indiam appulit, mare pedem illius Crucis, seu columnæ, lambere cœpit. Secutus non multò pòst Xaverius cum Sociis, prædictionem cumulatè impletivit. *Bartolus in Vita S. Xav. lib. i. n. 25.* Unde patet, S. Thomam Apostolum etiam eo nomine rectè appellatum fuisse Didymum: *Joan. 2.* quodd in Apostolatu Indico geminum habiturus esset Xaverium.

2. Etiam in India Occidentali, seu America, prædicasse S. Thomam Apostolum, non obscura demonstrant vestigia, quæ repererunt Nostri, in terras illas appulsi. Inter cætera, fama fuit, sparsa per Paraquarium, vastam Americæ regionem, prædixisse illum: Post multa secula Sacerdotes, ejusdem  
DEI

DEI cultores , sibi successuros , qui eadem , quæ tuic ipse , posteros docearent , quique ut ipse , Cruces manu gestarent . Postquam igitur Socii illuc delati sunt , visæ in manibus ipsorum Cruces fidem fecerunt , ipsos esse illos , quos Apostolus prædixerat venturos . *Imago Soc. 1. Sec. lib. 1. cap. 2.*

3. Eidem S. Apostolo templum magnificum Goæ excitari à Prorege Constantino , curavit P. Consalvus Silvertia , post expeditionem Damanensem feliciter absolutam , ut regiones sanguine suo tinctas , veræ fidei lumine iterum illustraret , protegeretque recentes Evangelii prædicatores . *Sacchibst. Soc. p. 2. lib. 3. n. 13.*

*Eodem die obierunt.*

4. Romæ anno 1577. P. Joannes Polancus , Hispanus . S. Patri Ignatio valde utilem præstítit operam in gubernanda , & provehenda Societate , vir non minus Religiosus , quam prudens ac doctus . Quamvis autem , tanquam publico Societatis Secretario , in gens

gens negotiorum congeries incumbe-  
ret, concionibus nihilominus, sacrís-  
que lectionibus simul operam dabat,  
idémque, & Doctrinæ Catecheticæ, &  
Procuratoris Generalis officium admi-  
nistrabat, nec à culinæ, triclinijque  
muneribus erat immunis. Eandem o-  
peram præstítit S. Patris successoribus,  
Jacobo Laynez, & Francisc. Borgiæ,  
erátque maximè mirandum, quod in-  
tam variarum maximarumque occupa-  
tionum concursu, Polancus eodem  
semper esset vultu, eandémque animi  
serenitatem præferret semper. Post  
obitum S. Francisci Borgiæ præfuit So-  
cietati, & Congregationi Generali III.  
ut Vicarius Generalis, denique Visita-  
tione Siciliæ laudatè perfunctus, vita  
quoque religiosissima defunctus est. *Soc.*  
*tuell. in bibl. Soc.*

5. Friburgi in Helvetia, anno 1589.  
P. Petrus Canisius, Belga, magnum rei  
Catholicæ columen in Germania, in-  
fractus hæreticorum malleus, à quibus  
præclaro scommate appellabatur *Canis*  
*Austriacus*; quod Ferdinandus Cæsar  
illo

illo potissimum uteretur ad varias contra sectarios expeditiones , à Catholicis verò passim elogio Germaniae Apostoli honorabatur. Laboribus Apostolicis Italiam , Austriam , Bohemiam , Germaniam , ac potissimum Bavariam excolluit, ut meritò de ipso dicere consueverit piissimus Bavariæ Dux Albertus : Petrus Canisius , & Paulus Hoffaeus , ipsi nos docuerunt legem tuam Domine , Poloniam quoque jussu Pauli IV. cum Apostolico Nuncio invisit , & Clerum præcipue in fide confirmavit ; à Pio IV. Pont. Max. specialibus literis ad ipsum datis , laudatus , ut indefessus fidei zelator ; à Gregorio XIII. Romam evocatus , ut collato consilio Germania juvaretur , persuasitque Canisius Pontifici optimo , ut Collegium Germanicum in Urbe ad incitas redactum , resuscitaret ; quod ille præstítit abunde. Apostolicum fidei zelum par comitabatur Humilitas , & Obedientia. Illa suadente infulas Viennenses oblatas à Cæsare non admisit ; hac innuente , pari promptitudine , & ascendebat ad sublimia , & descendebat

debat ad ima , honoratus à DEO in vi-  
ta , & post mortem multis naturam su-  
pergressis gratiis.

6. Cordubæ in Hispania , an. 1576.  
P. Franciscus Gomez , Hispanus , vir  
planè columbinæ simplicitatis , & man-  
suetudinis , sive cum externis conversa-  
retur , sive domesticos gubernaret . Te-  
stata hanc ejus indolem candidissima  
Columba , quæ ipso Pentecostes die  
super sacrificantis caput confedit , &  
semel iterumque abacta , rediit , donec  
ab ædituo in sacrarium asportata est .

7. Antverpiæ in Belgio , annô 1624.  
P. Joannes Isenbrant , Belga , ad om-  
nem Obedientiæ nutum mirè prom-  
ptus . Quidquid demandaretur vel  
nutu Superioris , singulari alacritate  
reponeret : *Libenter* . Hausto pridie  
ab ægris morbo sublatus , cùm jam 8.  
horis in sarcophago jacuisset , Frater  
verò , quo socio usus erat , fortè illac  
transiret , audivit clarè , & distinctè al-  
lapsas è tumba , velut viventis P. Joan-  
nis , voces : *Libenter ! Libenter ! Libenter !*  
Visus paulò pòst à quodam Patre cæ-  
lesti

lesti splendore gloriosus, monuitque e-  
undem de imminente morte, quæ bro-  
vì secuta est.

## XXII. DECEMBRIS.

I. IN Transylvaniæ Generali con-  
ventu, cùm herì anno 1588.  
in Societatem atrociter invecti essent  
**Ariani**, & Calviniani Pseudo-episcopi,  
hodie in Conventum admissus P. Wu-  
jecus Provincialis cum aliquæ Socio-  
rum, solidè calumnias refellit, osten-  
dendo: quàm fideliter Societas operam  
suam instituendæ juventuti, juvandis-  
que Catholicis impenderit; quàm pa-  
cis ubique tranquillitatísque, multas li-  
cèt vexationes perpessa, non studiosa  
modò, sed, & custos fuerit &c, E-  
gressis è templo, ubi Conventus age-  
batur, Patribus, Hæretica Nobilitas,  
quanquam multùm repugnantibus  
Orthodoxis, & ipso Regni Thesaura-  
rio Acatholico, Sombrio, mittunt li-  
bellum ad Principem, iterum flagitan-  
tes, ut è regno idolatria, & ejus pro-  
pagatores Jesuitæ, ejiciantur. Sed  
ref-

respondit Sigismundus Princeps Ba-thoreus : nec Præceptores suos ( à no-stris enim literis institutus fuerat ) nec homines sibi à Patre , ac Patrono , Stephano Rege Poloniæ , commendatos , & à regno receptos , indictâ causâ , pel-li abs se decere ; cùm præsertim ejus religionis essent , quam ipse met seque-retur ; & aliqui etiam non Catholicî , affirmarent , eos regno opportunos esse , & ad suorum institutionem liberorum retineri , postularent . Hæc tunc Sigismundus Princeps insigni animi for-titudine , cui utinam constantia non defuisse set . *Sacchin. hist. Soc. p. 5. lib. 8. num. 53.*

2. Annô 1592. Clemens VIII. De-cretum misit Nuncio Apostolico in Belgium de confessione Paschali facta religiosis , in quo hæc habentur : præ-senti nostro decreto sancimus , licere secularibus , Christique fidelibus uni-versis liberè Missas diebus Dominicis , & aliis majoribus Festis audire in Ec-clesiis tam Fratrum Prædicatorum , quam aliorum Mendicantium , nec non . *etiam*

etiam Collegiorum Societatis JEsu, juxta illorum privilegia , & antiquas consuetudines , dummodo id in contemptum Ecclesiarum Parochialium non faciant ; & tam dictis Fratribus Prædicatoribus , & Presbyteris dictæ Societatis , quām aliis privilegiatis prædictis , quibus id à Sede Apostolica indulatum est , idoneis tamen , & ab Ordinario approbatis , peccata sua , etiam Quadragesimali , & Paschali , & quovis alio tempore , confiteri licet posse , dummodo tamen seculares Christi fideles Sacramentum Eucharistiæ die festo Paschalis Resurrectionis , in propria Parochia ab eorum Parocho sumant.

*Eodem die obierunt.*

3. Londini in Anglia , anno 1642 .  
**P.** Thomas Hollandus , Anglus post strenuos , & admodum fructuosus labores , consuetâ Sacerdotum Catholiconrum carnificinâ , sublatus est . Judex ipse disertè pro tribunalí fassus est : nihil criminis habere P. Thomam , quām quod

quod Sacerdos Catholicus esset. Auditâ capitali sententiâ latus respondit : *DEO Gratias* : in carcere vero Socios invitavit ad Hymnum Ambrosianum secum recitandum. Moriturus ajebat, se Catholicum esse Sacerdotem, & Jesuitam , paratum autem , religionis causâ pro DEO ponere vel tot vitas, quot haberet capillos in capite, quotve in Oceano essent guttae , & Perfectiones in DEO. Cæterum in Conversatione cum externis , & domesticis, tantâ pollebat gratiâ , & eruditione inferendis Colloquiis spiritualibus ; ut conflatus ē Spiritu, & Bibliotheca librorum Spiritualium , diceretur.

4. Monachii in Germania an. 1634.  
 P. Matthæus Raderus , Germanus Tirolensis. Insigni constantiâ Rhetorica docuit annis 22. ob excellentem peritiam, eruditionem, & elegantiam linguarum Atticæ , & Romanæ , à doctissimis id ætatis viris , Justo Lipsio , Martino Delrio , Velfero &c. magnis encomiis celebratus. Memoriâ semper fuit vegetâ etiam in fracto laboribus

ribus corpore , moribus verò innocen-  
tissimis , & suavissimo agendi modo , è  
religiosa humilitate nato . Eruditio-  
nem viri singularem testantur volumi-  
na ab ipso edita , præsertim ad illu-  
strandos authores Græcos , & Latinos  
quosdam Classicos : Viginti duo recen-  
set . *Sotuell. in bibl. Soc.*

### XXIII. DECEMBRIS.

**I.** IN Indiam Orientalen an. 1549.  
pervenerunt geminæ , à S. P. Jg-  
natio datae Epistolæ , quarum altera S.  
Xaverius nominabatur , Sociisque præ-  
ficiebatur Præpositus Provincialis per  
Indiam , & transmarinas regiones in  
Oriente , adeoque tunc primum India  
facta est Provincia Societatis , distin-  
cta à Lusitana . Alterâ confereban-  
tur Xaverio gratiæ omnes , & Privile-  
gia à Sede Apostolica collata Præposi-  
to Generali Societatis . *Bartolus in Vita  
S. Xav. lib. 4. n. 13.*

**2.** Annô 1579. Gregorius XIII. Re-  
ligiosis Societatis JEsu concessit , ut in  
suis Ecclesiis obtinere possint Indul-  
gen-

gentias omnium aliarum Ecclesiarum  
in locis, in quibus commorantur, si an-  
te altare in quo Sanctissimum Sacra-  
mentum Eucharistiae reconditum est,  
in ipsius Ecclesiis Societatis, oraverint  
pro S. Romanæ Ecclesiæ exaltatione,  
hæresum extirpatione, & inter Princi-  
pes Christianos fovenda pace. Bre-  
ve incipit : *Cum sicut accepimus.* Ex.  
Bullar. Soc.

3. Annō autem 1656. Alexander  
VII. insignem, & planè paternam de-  
dit Epistolam in forma Brevis, ad Se-  
renissimam Remp. Venetam, quibus  
eam hortatur ad restituendam Societa-  
tem in Dominium suum. Labores,  
inquit, quibus uti fideles operarii in  
Christi vinea, Societatis IESU Religiosi  
exercentur, fructusque, quos Domino  
benedicente ex illa percipiunt, Nobis  
nihilatibus vestris probè cognitos ac per-  
spectos esse, non dubitamus. Ad eò  
enim uberes sunt, ut bonus eorum o-  
dor longè sese latèque diffuderit, &  
ad longinquas etiam remotasque re-  
giones jam olim pervenerit. Nos,

Pars IV.

Q

quo-

quorum humilitatem supremus ille Paterfamilias ac Dominus , domūs suæ custodiæ , & agri sui cultioni præposuit , solicitudinis nostræ debitum , ac præcipuam curam esse putamus , utiles adeò servos , ac traditis à Domino talentis augendis in primis oportunos , peculiari charitate complecti &c. Concludit postea : Dignam itaque prudenteriâ vestrâ , dignam pietate , dignam perpetuâ in nos observantiâ , ac maxime opere ad divinum auxilium imperrandum , opportunam rem facietis , eos quam primum in nobilissimam istam civitatem , omnemque vestram ditionem recipiendo &c. Gomez in Elog. Soc. p. 1. Classe 1.

*Eodem die obierunt.*

4. Mauriaci in Gallia , anno 1610. P. Robertus Cuissotus , Gallus , ad omnem virtutem ita formatus : ut Ruthe nensis Antistes diceret : Solo hujus Patris aspectu , cælestes quosdam divini amoris igniculos aspicientibus injici. Humilitate erat tam profundè solidè que

que fundata, præsertim in Christo Crucifixo , ut negaret, se ullis dæmonis machinis posse ad arrogantiam inflari. Moriturus , suavissimè recolebat illud Apostoli : *Sive vivimus, Domino vivimus, sive morimur, Domino morimur.*

5. Carpentoracti in Gallia , anno 1658. P. Balthasar de Bus , Gallus. Ab ipso initæ Societatis exordio , totus fuit in carne spiritui subjuganda , ideoque unde poterat , tum veterum Patrum , tum recentiorum conquirebat heroicæ mortificationis externæ exempla , & quantum per Superiores licuit , æmulabatur. Sic subjugata carne , spiritum ejus tantis implebat DEUS cæli deliciis , ut illi nimiæ , & subinde suspectæ viderentur. Cogitatione pariter ac amore ità adhærebat DEO : ut diceret , difficile sibi esse , mentem ad creaturas convertere. Sub mortem , magno animi sensu , recitavit triste illud Ecclesiæ carmen , *Dies iræ , dies illa,* & ut securior , inter Amorem , & Timorem DEI , transiret ad beatam Æternitatem . Adjecit & hymnum Am-

broſianum : Te DEum laudamus , in gratiarum actionem , quod in Societate moreretur . Ad hanc ut vocaretur , eamque ingrederetur , ferventibus quatuor annorum precibus apud DEUM institit . Magnus DEI servus , per omnem Galliam celeberrimus , Cæſar de Bus , Patruus nostri , Patris Balthasaris .

## XXIV. DECEMBERIS.

I. **A** Nnō 1589. in Japonia , regno Arimæ Christiano , inventa est Crux prodigiosa in medio diffissæ arboris aridæ , quam Japones Taram vocant , putantque fugare dæmones . Cùm enim ligna pro festis Natalitiis Christi paraturus , exiisset Michaël quidam Christianus , aridum truncum viæ imminentem securi stravit , cùmque fidesset medium , in quavis fissæ arboris parte apparuit crux è ligno alterius speciei , similiter diffissa , ut in quavis trunci parte crux appareret , cuius longitudo erat dodrans palmi , seu spithama . Inter ceteros ad prodigiī famam accurrentes , adfuit etiam Prota-

fius

sius Rex Arimæ , cui ante menses sex per quietem visi duo quidam cæliPrin-  
cipes , nunciârunt : *Esse in terris ipsius  
signum JESU.* Hic ergo cùm vidisset  
prodigiosam illam Crucem , non dubi-  
tavit , eam esse signum JESU , de quo  
nuper monitus fuit . Prostratus igitur  
humi , O , inquiebat , ut te libens , gra-  
tusque accipio cœlo missum pignus !  
*Ede , quid hoc signo imperes , Christe : para-  
ti ad Crucem ferendam sumus.* Sub hæc  
Crucem argentea inclusam theca , in  
qua videri trans pellucidam crystallum  
posset , Arimam ipse portavit , ubi lon-  
gè celebrior facta est , secutis ad eam  
curationum ingentibus miraculis : ad  
quorum evidentiam , etiam ethnici ità  
commoti sunt , ut ex ipsis ante finem  
sequentis anni 1590. undecim millia  
Arimæ sint baptizati ; in variis vero  
Ximi locis , usque ad novem millia.  
Verum non solum benedictionis , sed  
etiam gravioris imminentis persecu-  
tionis ea crux signum fuit . *Sacchin. hist.  
Soc. pag. 5. lib. 9. n. 322. seqq.*

2. In Lusitania conabatur Ven. P. Franciscus Suarez expedire se curâ Prælectionum Theologicarum in Academia Conimbricensi in quibus jam ultra annum trigesimum tumibi , tum alibi processerat : Sed obstitit Philip- pus III. Rex Hispaniæ , & Lusitaniæ , datis ad eum literis hoc die , anno 1611. urgendo : ut saltèm triennium adhuc ei labori , Ecclesiæ , & ditionibus suis tam utili , impenderet , quibus evolutis , iterum instituit , ut unum adhuc annum superadderet . Tam eximiam habuit opinionem de Doctore illo , quamvis plurimi alii in doctissima Hispania , & Lusitania non deessent . *Massejus in Vita cap. 17.*

*Eodem die obierunt.*

3. In Brasilia , anno 1554. Petrus Correa , & Joannes Sosa , Lusitani in odium fidei nobiles victimæ ceciderunt . Erat primum Petrus turmæ militaris Ductor , miraque sagacitate venabatur Brasilos barbaros , Lusitanis in servitutem vendendos . Monitus resi- puit,

put, atque ut miseros Brasilos è capti-  
vitate diaboli in libertatem filiorum  
DEI assereret, Societati sese addixit;  
in qua dum indefesso labore, miraque  
dexieritate salutem illorum promovet,  
una cum Fratre Sosa, à barbaris obrui-  
tus sagittis occubuit, Christianis uni-  
cum Magistrum, omnium amicum,  
fratrem, & patrem deplorantibus.

4. Anconæ in Italia, anno 1587.  
P. Claudius Matthæus, Gallus. Hu-  
mili stirpe ac paupere domo natus, vir-  
tute ac ingenio eò evasit, ut Henricus  
III. Galliæ Rex, frequenter per duas  
trésve horas ab ejus ore penderet. Dux  
Guisius ferè quotidie perfamiliariter eo  
utebatur etiam spiritualibus S. Ignatii  
Exercitiis per dies 40. ab ipso exultus.  
Cùm Provinciam gubernaret, certior  
fiebat divinitus, quoties aliquis in Pro-  
vincia moriebatur. Claudium Aqua-  
vivam in Präpositum Generalem eli-  
gendum, diúque illi muneri præfatu-  
rum, cælitus didicit, ac prædixit. In  
postremo Romam itinere, quotidie per  
horæ dimidium Exhortationem habe-

bat ad comites, vel ad aliquem famulorum. Redeuntem in Galliam, Anconæ mors occupavit.

5. Hispali in Hisp. anno 1584. P. Georgius Alvarez Hispanus. Magna siti salutis animarum ardebat, magna in permovendis ad lacrymas obstinatis peccatoribus efficacitate pollebat. Persuasit aliquando Parenti suo, ut Exercitiis Spiritualibus apud nos animum excoleret: Sed simul P. Rectorem oravit, ut illi calceos faciendos vel reficiendos daret tempore exercitii manuallis; esse enim arte sua futorem. *V*eritas est non ab uno, nec semel, inter orandum cœlesti lumine circumfusus. Morientem Rodericum de Flores rogavit P. Georgius: Ut celerem ipsius mortem impetraret. *A*n non posses, ajebat, mihi à DEO obtainere, ut proximum Christi nascentis diem in cœlo celebrem? Recepit Rodericus, id se curaturum. Et P. Georgius brevi æger, scilicet undecimâ Decembris, hoc die optata morte migravit è vita.

## XXV. DECEMBERIS.

I. **A**NNO 1538. ipsa Natalis Christi nocte, S. P. Ignatius Romæ ad Præsepe nati DEI, in Basilica S. MARIAE Majoris, ad Nives dicta, primum Missæ Sacrificium DEO obtulit, post præmissam plus quam unius anni præparationem. *Nadas in Indice Memor.*

2. Granatæ in Hispania anno 1560. Concionatorem è Societate agebat P. Joannes Bapt. Sancius, cum ea in animos auditorum authoritate, ut quod quod vellet illos flesteret. Fuit, cum in nosocomio, quod S. Joannes DEI erexit, confertum auditorem è Clero, & primariis aliis viris, ad opera misericordiæ invitaret, præsertim in re valde angusta ejus domus. Inter alia: Erritne, inquiebat, in hac tam insigni corona, qui exemplo S. Martini, velit nudum Christum in suis pauperibus operire? Vix dixerat, cum prosiliens in medium Sacerdos quidam, pretiosum sibi detractum pallium ad pedes

Patris abjecit. Exemplum confestimi  
secuti alii super alios , quidquid ad  
manum habebant , in unum conjiciunt  
cumulum , pecuniam , annulos , pallia,  
sagas , thoraces &c. ut Sancius inclama-  
re debuerit : Satis esse , supérque. Ean-  
dem industriam eadem felicitate repe-  
tiit ipso Christi Natalis die , hortando,  
ut algentem nudúmque Christum ope-  
rarent. Tam facilè calefacit Auditio-  
res ardens Orator. *Sacchin. hist. Soc. p.*  
*2. lib. 4. n. 178.*

3. Apud Sinas Pechini , urbe regia,  
tandem anno 1609. ipso Dominici Na-  
tal is die aperuerunt Nostris Sacellum e-  
legans , Europæo more constructum ,  
cum aris duabus , altera Christo Salva-  
tori , altera ejus Parenti Virgini dica-  
ta. Neophytorum ingens fuit concur-  
sus , sed major Ethnicorum , quorum  
non pauci per eam occasionem gregi  
Christi sunt aggregati. *Trigaultius in*  
*Exped. Sinens. lib. 5. c. 15.*

4. In Gallia , ut Lugdunum , urbem  
amplissimam , ab hæresi plenè purga-  
ret

ret P. Edmundus Augerius , qui supra duo millia hæreticorum ibi converterat , ex voluntate Senatus , aggressus est cum aliis quibusdam Doctoribus bibliopolia recognoscere . Congesta est infinita vis librorum pestilentium , qui ipsa nocte Nascentis Christi incensi magna luce perfuderunt cælum , continuatum est incendium etiam per sequentes duos dies . *Sacchin. hist. Soc. p. 3. lib. 3. n. 161.*

5. In Transylvania anno 1588. alia fuit facies . Ab hæreticis Gubernatore Getzio , & Nobilitate editum decretum , ut ex omni Transylvania intra 25. dies excederent Jesuitæ , nec ulli fas esset , eos apud se habere , multaque alia contra Religionem Catholicam decreta ; Princeps Sigismundus coactus in verba impii decreti jurare . *Sacchin. hist. Soc. p. 5. lib. 8. n. 61.* In Livonia quoque Rigæ , ingens tumultus excitatus ab hæreticis anno 1585. *Idem ibid. lib. 5. n. 82.*

6. Post mortem Pauli IV. diu inter

Cardinales de eligendo Pontifice concertatum , quorum plerique subitō motu Laynium , Societatis IESU Generalem , virum omni exceptione majorēm eligendum proclamārunt. Sed tandem in die Natalis Christi , omnes in Joannem Angelum Medicinum Mediolanensem convenerunt. Coronatus est g. Idus Jan. dictūsque Pius IV. cuius cellæ supervolitans columba , & in ea quiescens creditur Pontificatum prænunciasse. *Brietius.*

### *Eodem die obierunt.*

7. Fremonæ in Æthiopia , an. 1593. P. Emmanuel Fernandez , Lusitanus , Patris Andreæ Oviedi , Patriarchæ, Socius , laborūmque ac periculorum consors. Nestoriano Monacho contra Catholicos Imperatorem concitanti , prædixit : Catholicos ab Imperatore nihil passuros , ipsum autem pseudo monachum , brevi ad tribunal divinum rapiendum , prout evenit. Mortem , quam octiduo ante prædixit , inter liquidissima solatia oppetiit , comparenti

renti enim sibi DEIparæ V. *Ah Domina mea!* ajebat: *Ah Domina mea!* Petenti Francisco Lopez Coadjutori, ecquid esset? respondit: *Vidi Virginem DEIparam, pulchritudine Divina mirabilem. Sine me, sequi abeumtem.* Et secutus est.

8. Nangasachi in Japonia, an. 1628. Michaël Nacascima, Japon, odio fidei interemptus. Christianam rem egregie promovit in Japonia, non uno fustuário honoratus. Denique comprehensus solito æquæ in os infusæ, & mox violenter cum sanguine expressæ, tormento cruciatus est. Soli torrendus expositus, leni aura è cælo aspirante, recreatus est. Deinde bulliente sulphurea aqua, quæ ex monte vicino manat, frequenter perfusus, & per stagna ejusdem aquæ raptatus, cùm Christum, & fidem constanter profiteretur, extinxitus, seu potius cælo ortus est.

9. Londini in Anglia, annô 1628. P. Joannes Bennetus, Anglus ob fidei & animarum zelum gravissimis carcerebus, & acerbissimis tormentis excrucia-

ciatus. Quibus tamen omnibus longè acerbius excogitavit , & adhibuit tormentum hæretica rabies ; quando in angustum cubiculum compacto P. Joanne, immisit spurcissimorum juvenum turmam , qui ante oculos Viri castissimi omne genus fœditatum exercuerunt. Sed omnibus infractus, proscriptus tandem est ex Anglia , intentata dira morte , si rediret. Rediit tamen , & totis 35. annis in laboribus Apostolicis , & quotidianis mortibus exactis, quievit in pace , Viri Sancti elo-gio passim honoratus.

10. In Belgio anno 1690. P. Cornelius Hazart, Belga. Per annos viginti , & ultra Concionibus sacris Antverpiæ satè occupatus : ut non sola voce, sed stylo etiam prædicaret, tantum temporis invenit vir zelosissimus : ut præter Tomos 7. Historiæ Ecclesiasticæ, in folio, Controversiis fidei distinctos libros 37. elucubrârit, edideritque. Sotuell. in bibl. Soc.

## XXVI. DECEMBRIS.

I. **C**ontigit anno 1599. insignis visio S. Mariæ Magd. dePazzis, quando in extasim rapta, in festo S. Stephani Protomartyris vidit: DEUM S. Joannis Evang. animâ itâ delectari; ut quodammodo præter illum, nemo esse in cælo videretur; quod idem præstabat DEUS animæ S. Ignatii Soc. JESU Fundatoris. Nam, ut ipsa Sancta subdit: Idem est S. Joannis cum S. Ignatii, spiritus. Amborum enim fuit scopus hic, & finis; amor, & charitas in DEUM, & proximum: amore atque charitate homines trahebant ad DEUM. Tum addit: nullus felicior in terris nunc viget, quam Ignatii spiritus, ejus enim filii in regendis animis contendunt potissimum, ut sci-ant; quantopere DEO placeat, interiorem excolere hominem, & interioribus exercitiis se dare. His enim efficitur, ut ardua, & difficilia facile obeantur: nam virtus interior lumen animo iufundit, ex quo nascitur is amor,

mor , quo amata omnia dulcescunt.  
Videbat præterea , Ignatii filios , quo-  
ties in terris hoc modo cum proximis  
agerent , toties illam instaurare , quam  
ex Ignatii anima DEUS percipit , vo-  
luptatem. *Bartolus in Vita S. Ign.lib. 2.n.47.*

2. In Africa annô 1561. hoc die,  
potentissimum Monomotapæ Regem  
adiit P. Consalvus Silveira. Ante-  
quam Regem accederet , præmisit ille  
Ducem exercitus sui Antonium Caja-  
dum Lusitanum , qui suo nomine Con-  
salvum salutaret , ac munera deferret ,  
ingens auri pondus , boves permul-  
tos , famulósque in usus domesticos.  
Quæ cùm omnia officiosè remisisset  
Consalvus , tanquam statui suo non ac-  
commodata : miratus est Rex eam ani-  
mi excelsitatem. Adveniente excep-  
pit ea humanitate , quam nec stipen-  
diariis sibi Regibus præstare solebat.  
Ubi verba salutis æternæ facere cœpit ,  
eam illis gratiam dedit DEUS , ut in-  
tra breve tempus Rex cum Matre sua ,  
multisque Proceribus sit baptizatus.  
*Sacchin. bist. Soc. p. 2. lib. 5. n. 219. Sc.*

3. In Italia Robertus Bellarminus, juvenis adhuc annorum 22. nec gustatâ adhuc Theologiâ , ad stuporem concionatus est in templo primario Montis Regalis. Primam dixit concionem heri, quam cùm summa voluptate audissent Prælati , & cives , legatis ad Collegium missis, institerunt , ut altera etiam die , S. Stephano sacra , non gravaretur eos reficere verbo DEI. Erubuit Robertus, & cùm temporis brevitatem opposuisset ad concionem parandam , repositum est : quidquid diceret , ratum gratumque futurum. DEO ergo confisus , dixit cum ea satisfactione : ut Canonici omnes acclamârint ; heri audivimus te concionantem , hodie DEUM per te. Rector Collegii scribens de his ad Generalem , non dubitavit , Bellarmino juveni accommodare illud : Nunquam sic locutus est homo. Petras. in Vita lib.

2. cap. 2.

Eo-

*Eodem die obierunt.*

4. Rhemis in Gallia , anno 1654.  
**P.** Petrus Cellot, Gallus , vir ad omnes  
 apices legum , & consuetudinum no-  
 strarum formatus. Raro illo elogio  
 celebrant eum Annuæ : quod cum Sa-  
 cras Literas explicaret quatuor aut tri-  
 bus Auditoribus , non minus libenter ,  
 & diligenter parabat lectiones , quam  
 si frequentissimum haberet Auditio-  
 rem.

5. Carpentraeti in Gallia , anno  
 1628. Jacobus Vasserot , Coadjutor ,  
 Gallus. Cum luem publicam ardere  
 videret , ut suppetias ferre posset labo-  
 rantibus , impetravit à Superioribus .  
 Pridie autem , quam egrederetur ad o-  
 pitulandum infectis , per quietem spe-  
 cabilem habuit Christum D. Sed tergo  
 ad se converso procedentem . Con-  
 sternatus hoc viso , flexis genibus co-  
 nabatur eum sequi , humillimèque  
 peccatorum suorum veniam flagitabat ;  
 & mox vidit Christum facie ad se con-  
 versum , audivitque dicentem : *Dimit-*  
tun-

tuntur tibi peccata tua. Expergefactus, incredibili solatio est perfusus; & mox facta Generali exomologesi, inter communicandum tantam vim profudit lacrymarum, ut ipsi Sacerdoti communicanti eas exprimeret. In Xenodochio, infectorum eam curam habuit, ut Pater omnium videretur, donec & ipse charitate immolatus est.

6. Ratisbonæ in Germania an. 1649.  
 Marcus Grandl, Germanus. Coadjutor impiger & accuratus. Ut frequenter mortem haberet in mente, sandapilam ipse sibi construxit, quæ semper sibi versaretur ante oculos. Profuit viro bono ea cautela. Nam dum universæ vitæ labes quadam die confessione diligenti, sanus adhuc, ad aures Sacerdotis deponit: repentinâ apoplexiâ ipso in opere pio oppressus est, Sacerdote absolutionem maturante, dum adhuc spiraret.

## XXVII. DECEMBRIS.

I. **S.** Joanni Evang. speciali devotione affectam esse Societatem, decet:

decet : tum quia unus est S. Ignatii,  
 & Joannis spiritus ; prout revelatum  
 S. Mariæ Magdalenaæ de Pazzis : tum  
 quia eximiam illius æstimationem pro-  
 didit adolescenti cuidam de statu vitæ  
 deliberanti Parisiis. Is cùm liberiore  
 vita relictæ, magis probam instituisset :  
 nocte quadam percepit vocem , ad con-  
 stantiam se adhortantis. Post octidi-  
 um similiter monitus , quæsivit : quis  
 esset, qui loqueretur. Responsum est :  
 sum tui cognominis , Joannes , Evan-  
 gelista. Capuccinumne , an Carthu-  
 sianum agere placet ? Ut DEO visum :  
 reposuit adolescens. Rursus post octi-  
 dum comparet Apostolus , dataque in  
 manus schedulâ , en , inquit , tres tibi  
 offeruntur Ordines , quem voles , eli-  
 ge , ego amplius non revertar. Erant  
 autem in scheda duorum Ordinum  
 nomina argenteis scripta literis ; ter-  
 rium nomen , quod erat , Societatis  
 JEsu , aureis. Intellexit adolescens  
 mysterium , sibique consuluit Societa-  
 tem ingressus. *Imago primi Sec. Soc. lib.*  
*2. cap. 9.*

2. In Transylvania latus pariter ac  
tristis illuxit hic dies Sociis proscriptis.  
Latus: quod digni habiti essent, pro  
Nomine JEsu contumeliam , & bono-  
rum omnium jacturam pati. Tristis,  
quod regio tam ampla deserenda es-  
set , & tam copiosus Catholicorum  
grex in medio luporum relinquendus,  
unà cum principe Sigismundo , Catho-  
lico quidem , sed cui hæretici jam do-  
minabantur , ita: ut nemo Patrum , e-  
tiam per supplicem libellum , aut lite-  
ras , ipsum convenire posset. Erat  
Albæ P. Joannes Lelesius , qui princi-  
pem à pueritia educarat , & instituerat,  
Religionemque Catholicam in Tran-  
sylvania quam maximè propagarat ac  
sustentarat ; is cum ab aliquot annis  
paralyticus jacuisset , ut mortem jam  
~~vicinam~~ ibidem opperiretur , impetra-  
re non potuit , Meggesio , ubi con-  
ventus Nobilitatis est habitus , hodie  
proficiscentibus , Patribus tam vehe-  
mens coorta est procella , ut tectum  
templi , in quo proscriptionis decre-  
tum promulgatum fuit , & caminum

ab domo Principis, & pontis Albani partem disjecerit. *Sacchin. hist. Soc. p. 50 lib. 8. n. 61.*

*Eodem die obierunt.*

3. In Anglia anno 1656. P. Andreas Vitus, Anglus. Apostolicis laboribus patriam usque ad octogesimum ætatis annum strenuè juvit. Conjectus denique in carcerem, cum consueto sibi jejunio in pane, & aqua, attritum, & exhaustum corpusculum bis quot hebdomadis maceraret, carceris custos eam severitatem stupens. Si ita rem agere pergeret, inquiebat, minimè parem fore, ut è Tiburni furca rectus penderet. Mihi verò, respondit Senex, istud ipsum jejunium abunde vi- rium subministrat, ad quidlibet causâ Christi Domini mei, perferendum. Crescente deinde languore, cum jam animam acturus videretur: Nondum, ajebat, venit hora mea, aut dies S. Joanni Evangelistæ sacer. Jam dies cum advenisset, vocem audivit: *Hodie tecum eris;* & munitus Sacramentis,

prout

prout petierat , feliciter ex utroque ergastulo evolavit.

4. **Gandiæ in Hispania**, anno 1570.  
 Petrus Aldea , Novitius Scholaſt. His-  
 spanus. Magno fervore ad solidam  
 eminentemque virtutem ferebatur ;  
 sed cælo jam maturus , raptus est. Eo-  
 dem tempore , quo Petrus Gandiæ mo-  
 riebatur , Valentiæ Catharina Ferraria,  
 pia mulier , cuius hospitio ante initam  
 Societatem ille usus fuerat , cùm nocte  
 intempesta orationi instaret , odore  
 suavissimo sibi perfundi videbatur.  
 Postridie Francisco , illius marito , spe-  
 ciosus apparuit Petrus , & apprehensa  
 ejus manu , dixit : Se illius memorem  
 esse , prout olim promiserat. Vedit  
 quoque octennis filiolus Petrum , unà  
 cum 40. Sociis , floreis sertis redimitos ,  
 & palmis instructos. Quæ cùm Catha-  
 rina manè in Collegio Sociis retulisset ;  
 adfuerunt paulò post Gandiâ literæ ,  
 quibus mortis Petri tempus , cum præ-  
 dictis bene congruens , nunciabatur.

5. **Viennæ Austriae** anno 1634. P.  
 Joannes Hitzette , Lotharingus , glo-  
 rioso

rioso labore pestiferis impensò consumptus est cum tribus Sociis. Fuit is annus tam funestus Germaniæ : ut præter innumeram populi multitudinem, è nostris 64. variis in locis, obsequiis pestiferorum sint immortui.

## XXVIII. DECEMBERIS.

I. **C**laudiopoli in Transylvania, post promulgatum proscriptiōnis decretum, deliberatum à nostris est : An parendum esset inniquissimo decreto ; vel sparsim, & incognitò, permanendum? Audendum, etiam cum vitæ periculo, censebant plerique, nec committendum, ut tam fortiter, & feliciter cœpta facile deserantur, & cum populo Catholico Princeps Sigismundus, velut agnus inter feras bestias relinquatur. Nondum esse ventum ad tormenta, posse fieri, ut procella hæc, quod major esset, eò citius detonaret. Ex altera parte, cedendum suadebat, in primis monitum Christi, ut orta in una civitate persecutio, recipiamus nos ad aliam ; deinde nè re-  
fra-

fractarii videamur , & quod hæretici  
 continuò clamant, legum contempto-  
 res, & seditiosi. Vincendum potius  
 esse in bono malum ; fieri posse, quod  
 non raro fit, ut modestia exarmet fu-  
 rorem , & patientia sævitiam. Ubi  
 viderit nobilitas clausam Academiam  
**Claudiopolitanam** , alia quoque Colle-  
 gia , & Gymnasia desolata , prouum  
 est , ut amissi boni sensus tangat illam.  
 Carendo enim magis , quam fruendo ,  
 plerumque rerum pretia cognoscimus.  
 His , & similibus in utramque partem  
 allatis , Pro provincialis censuit , ad  
 Principem Sigismundum decisionem  
 esse referendam. At is , postquam se-  
 rò tandem eum licuit convenire , cùm  
 laudasset operam sibi , & populo à So-  
 cieta te p r æ st it a m , cedendum iniqui-  
 tati temporis putavit , ultróque viati-  
 cum obtulit , & virtutis testimonium.  
 Sic finem habuit prima Societatis in  
 Transylvania commoratio. Sociorum  
 alii in Poloniam redière , alii in Au-  
 striam concessere , alii abiēre in Mol-  
 daviam , quo vocabantur. **Claudius**

Generalis non probavit, quod omnes  
excessissent. *Sacchin. hist. Soc. p. 5. lib. 7.*  
*num. 62.*

*Eodem die obierunt.*

2. Valentiæ in Hispania, anno 1583.  
Michaël Gubernus, Hispanus. Eccle-  
siasten quamvis ageret, tranquillo dul-  
cique dicendi modo amabilem: ob so-  
liditas tamen, quas adferebat, rationes,  
mirè fuit efficax, & in atula, atque ubi-  
que acceptus. Incredibili amore te-  
nebatur erga Christum Infantem, cu-  
jus effigiem passim dulcissimis lacrymis  
rigabat: ab illo, dicebat, se suas habe-  
re conciones, & omnia. Ingredienti  
aliquando Bibliothecam, occurrit In-  
fans JESUS; & cum P. Michaël præ-  
tenderet, sibi jam prohibitum esse, de  
illius Infantia meditari; respondit  
Parvulus: *Vade, & pete' veniam, ut me-  
cum possis loqui.* Ivit, & impetrata ven-  
niā redux, dulcissima cum JESU suo  
miscuit colloquia.

3. In Gallia, anno 1623. P. Nico-  
laus Pollienus, Sabaudus, silentii, &  
DEI-

DEIparæ V. amantissimus. Compa-  
ruit ea viro gravi, & probo è clero, æ-  
gro, sed vigilanti, comitémque habe-  
bat P. Nicolaum, quem jussit : ut ægri  
pectus tangeret. Tactus ægro saluta-  
ris fuit. Ipse Pater cùm adversa labo-  
raret valetudine, geminos è Sociis Ani-  
cium euntes rogavit ad sacros Divi  
Francisci Salesii cineres, id sibi impe-  
trarent ; ut die, quo ille migravit è vi-  
ta, id est, die SS. Innocentibus sacro,  
& ipse migraret. Oratum, & impe-  
tratum.

4. Bruxellæ in Belgio anno 1630.  
P. Joannes à Gouda, Belga, Ecclesia-  
stes eximius non solùm oris facundiâ,  
sed etiam vitæ exemplô. Quâm po-  
tens verbo in cathedra, tam taciturnus  
domi, quamvis ingenii esset admodum  
amœni. Rogatus quando suas concio-  
nes esset typis editurus ? faceta humili-  
tate respondit : *Jam esse editas* ; quasi  
non sui, sed alieni ingenii partus essent.  
Paupertatis studio, fere vacuum, & ina-  
ne incolebat cubiculum ; Calaino uno  
totos decem annos usus est ; quamvis

complures elucubrârit, edideritque li-  
bros contra Sectarios. Tria optavit  
pro morte: ut non lenta, sed præcipiti  
morte decederet; ut die aliquo Ma-  
riano; ut inter labores. Obtinuit o-  
mnia. Fractus enim concionibus per  
Adventum habitis, cùm hoc die, qui  
Sabbatum erat, mensæ communi ac-  
cumberet, & finem prandii expecta-  
ret: dñrepente linquitur animo, móx-  
que sacro inunctus oleo, placidissimè  
expiravit. *Sotuell. in bibl. Soc.*

## XXIX. DECEMBRIS.

I. **P**ius IV. Pont. Max. vindicem fa-  
mæ Societatis epistolam dedit  
annô 1564. ad Maximilianum Impe-  
ratorem. Sparserat enim non solum  
per Urbem, & Italiam, sed etiam Ger-  
maniam, quidam Prælatorum, quos  
in his partibus vocant, libellos famo-  
sos, quibus præter crimina afficta, eam  
traducebat, & omnium odio propina-  
bat, ut Religionem diabolicam, natio-  
nem execrandam, barbaricam sectam.  
Eò erumpunt impotentes animi mo-  
tus,

tus, ubi non ratio, sed cupiditas, & invidia dominantur. Deprehensum tandem Authorem privat officio Pontifex, jubetque dari in vincula, & severè puniri. Nec sanè grave supplicium effugisset, nisi pro more suo adnitente Societate, Pontifex, ad agendum clementius flexus fuisset. Ad infamiam tamen Societatis evitandam vel abstergendam, literas laudis, & commendationis plenas dedit ad Imperatorem, Cardinalem Augustanum, Ecclesiasticos Imperii Electores, atque Bavariæ Ducem, postquam à Cardinalibus Judicibus, quibus causæ cognitionem commiserat, pro Societate pronunciatum est, non sinè elogio ejusdem. *Sacchin. hist. Soc. p. 2. lib. 8. n. 31. Sc.*

2. Aliam ad ipsummet Pium IV. Pontificem, pro Societate dedit Epistolam, Cardinalis, & Princeps, deinde Rex Lusitaniæ, Henricus, anno 1568. qua illam eximiè commendat Pontifici, significatque se Oratori Regis in Urbe existenti, dedisse in man-

datis , ut omnia negotia , quæ ad com-  
moda Societatis pertinent , singulari-  
cūrâ , & diligentîa procuraret &c. Ge-  
mez in Elog. Societ. p. Clas. 2.

*Eodem die obierunt.*

3. Ulyssipone in Lusitania , annô  
1616. P. Joannes Nunnius , Lusitanus.  
Affidua illi erat cum DEO consuetu-  
do , quam in noctem profundam co-  
ram Ven. Sacramento protrahebat.  
Spiritualibus aulæ ministeriis applica-  
tus , nec ullas gulæ illecebras , nec quid-  
quid honoris speciem habebat , admi-  
fit , solitus non rhedâ , sed pedibus è  
Collegio ad aulam proficisci , ad tria  
vel quatuor passuum millia. Magnam  
in ea morum probitatem , & eximia  
virtutum decora florere fecit verbo , &  
exemplo. Mortuum , in feretro per  
Proceres adornato , sex primæ dignita-  
tis Optimates humeris extulêre.

4. Pragæ in Bohemia , annô 1651.  
P. Bernardus Oppel , Moravus , è Ca-  
nonico Societatis Religiosus. Magna  
in eo fuit nobilissima quæque capita ad  
fidem

fidem Catholicam adducendi dexteritas, &c felicitas. Rectorem agens verites sibi detractas dabat egentibus, calicésque aliquot in subsidium lue tactorum conflavit. Egeno ultimos, quos habebat, decem argenteos nummos dedit: quorum loco decem aureos inventit in scriniolo, in quo nihil repositum fuerat,

5. Montibus in Belgio, anno 1652. Joannes Daniel, Coadjutor, Belga, DEI paræ V. cultui addictissimus; à qua gravi hernia, qua miserè torquebatur, liberatus est. Inter orandum enim consopito, spectabilis facta, quæsivit: *Joannes vis sanari?* Respondente illo; cupere se, si id DEO placeret. Mox exercefactus, perfectè persanatum se invenit.

### XXX. DECEMBRIS.

I. PIUS IV. Pont. Max. præter litteras famæ Societatis vindices, heri datas ad Maximilianum Imp. alias in eadem causa dedit hodie ad Daniellem Archiepiscopum Moguntinum, &

Electorem : Non sine magna admirazione cognovimus , inquit , libellos quosdam maledictorum , probrorum , & contumeliarum plenos , nuper disseminatos per Germaniam fuisse , ad odium infamiamque conflandam universo Ordini Societatis JESU , & quibusdam ex ea , præcipue qui cæteris sunt notiores . Sanè id molestè tulumus . Intellexinus enim , id maligni hostis instinctu actum fuisse , ut quoniam ab ejus Societatis Collegiis , quæ sunt in Germania , & aliis provinciis , magna , & multiplex his miseris temporibus ad Ecclesiam DEI utilitas pervenit , eorum bona opera per malevolorum hominum obtrectationes , & calumnias impediantur &c. *Sacchin. hist. Soc. p. 2. lib. 8. num. 35.*

2. In India insigni zelo atque industria rem Christianam promovit P. Gonzalus Rodriquez in Salfetis. Cùm enim exeunte anno 1557. illuc venisset Franciscus Barretus Prorex , magnamque vidisset Christianorum solitudinem ob hominum egestatem : obtulit

lit P. Gonzalo aureos quingentos, annuatim persolvendos, quibus ad rem Christianam propagandam, pro sua prudentia liberè uteretur. Tam opportuno subsidio invitatus Pater, moliri statim cœpit fundationem novæ Christianitatis, quæ ab urbe Tana, in qua colluvies sectarum vigebat, esset commodè remota. Distabat tertio ab urbe milliario sylva, in qua templum cum idolo tricipiti extabat satis elegans, & ab idololatris frequenti visita-  
tione adiri solitum, ad nuncupanda vel exsolvenda vota, quibus saginabantur Brachmanes. Sylvam ergo illam cum circumjacente agro inculto, emit Gonzalus, eamque crucibus erectis implevit, quibus cum profanata esse & sylvam, & fanum illud existimarent ethnici, abstinebant à frequentatione illius. Deserto fano, ac oblatis defi-  
cientibus diffugerunt sacrificuli Brach-  
manes, Pater verò tanquam bona de-  
relicta occupavit, pagumque in vici-  
nia fundavit pauperum Christiano-  
rum, quos ubi artem colendi agrum

edocuit, mox ille larga segete respondit culturæ. Sic factum, ut unius anni spatio quingenti numerarentur coloni, omnes Christiani; qui paulò post usque ad ter mille ascenderunt. Cavit autem diligenter, tum ne quisquam viveret otiosus, tum ne illis immiscerentur veteres Christiani, præsertim Europæi, qui liberiore vivendi ratione corrumperent novellum illum innocentemque gregem, ad omnem pietatem certis legibus efformatum. Usus est idem, & aliâ solertis ingenii industriâ, instituta per quam sancta negotiatione. Apud circumiacentes ethnicos invaluit vetus error, & consuetudo, ut parentes, sive ob egestatem, sive ex fastidio educationis, sive quaestus causâ, venderent parvulam problem, pretio vix majore, quam quo apud nos constat hædus anniculus. Horum plurimos, ne iu Mauros incident emptores, assignatâ illâ sibi à Prorege pecuniâ emebat Gonzalus, educabátque Christo. Emebat, & multos adultiores, vel membris mutiles,

ios, vel gravi ægritudine factos inuti-  
les, vel qui credebantur non diu su-  
pervicturi; quos omnes vili pretio com-  
paratos, vitæ vel morti Christianæ mi-  
rabili solertiâ aptabat, avarus anima-  
rum negotiator. *Bartolus hist. Asiat. lib.*  
*7. num. 14. & 15.*

*Eodem die obierunt.*

3. Aronæ in Italia, anno 1596. P.  
Emanuel Sa, Lusitanus, vir ex illu-  
strioribus Societatis nominibus, in quo  
mira eruditio cum summa pietate emi-  
nebat. Vix annos 17. natus, in nova  
Gandiæ Academia Philosophiam ma-  
gno plausu docuit, meruitque ipsum  
Academiæ Fundatorem, S. Franciscum  
Borgiam, tum adhuc Gandiæ Ducem,  
privatim habere discipulum. Romæ  
conclaves habuit annis compluribus,  
nullo quidem Rhetorum artificio ele-  
gantes, & quasi ultro inconcinnas,  
semper tamen gratas, rationibus, &  
spiritu validas, adeoque fructuosissi-  
mas. Fertur, non semel Infantis JESU,  
& Matris ejus conspectu recreatus,

quæ etiam morienti adfuit cum S. Pa-  
tre Nostro.

4. Hispali in Hispania , annō 1644.  
P. Petrus de Urteaga , Hispanus. Ad  
populum plausu admirabili , & fructu  
dixit per annos 45. etiam dum Colle-  
gia , & Domum Professam iteratō gu-  
bernaret. Nec incarceratorum , ægro-  
rūmque curam interim deponebat.  
Quodsi fortè , dum regebat , in ali-  
quem domi incidisset , à meridie ali-  
quid otio indulgentem , summa man-  
suetudine rogabat : *Quid hic agis , mi-  
ster ? Et quomodo cœnam hodie à Domino  
mereberis , nisi ante noctem lucrum ali-  
quod illi ex animabus attuleris ?* Aposto-  
licos ejus labores etiam temporali fru-  
ctu remunerabatur Dominus , quando  
domesticam egestatem non semel pro-  
digiosè sublevavit.

5. Eboræ in Lusitania , annō 1600.  
P. Joannes Stremosius , Lusitanus. Duo  
memorabilia de hoc traduntur. Alte-  
rum , quod centesimum decimum æta-  
tis annum excesserit , alterum , quod  
etiam in ea ætate crudus in se ipsum  
fue-

fuerit, quotidianis flagris in strigiosum corpus desæviendo.

6. Ibidem anno 1582. P. Emmanuel Alvarus, Lusitanus. Eximia vitæ integritate atque prudentiâ præstans, Collegia rexit Eborense, & Ulyssiponense, ubi etiam domum Professam cum laude gubernavit. Sed multò celebriorem fecerunt libri editi de Arte Grammatica quos, & externi Grammatici insignes magni fecerunt, & Societas universa recepit, in scholis suis explicandos. *Sotuell. in bibl. Soc.*

### XXXI. DECEMBRIS.

I. EX insula Sanciano, anno 1551. E folvit Malacam, ac inde Goam, reversus ex Japonia, Indiarum Apostolus S. Xaverius. Propositum ei fuit, ordinandi res Societatis in India, ut posset iter arripere in Chinam. Advertit enim in Japonia, prædicacionem Evangelii longè majores provenitus facturam, si illud probâssent, ac suscepissent Sinenses. Japones quippe Religionis suæ ritus referebant ad Si-

Sinenses , tanquam magistros suos , à  
 quibus , & deos , & modum eos colen-  
 di accepissent . Proinde si illi aliud  
 quoddam novum Numen admisiſſent ,  
 se non gravatè ſecuturos , dictitabant .  
 Hujus ergo expeditionis curam Apo-  
 stolicum Xaverii pectus affiduè coque-  
 bat ità , ut eidem etiam fit immortuus  
 annô ſequente . Jam ſummam doctri-  
 næ Christianæ , Sinensi idiomate con-  
 cinnatam habebat , ſibi , & Sociis olim  
 uſui futuram , jam cum Jacobo Perei-  
 ra , ſibi amicifimo , convenerat de na-  
 vigio , & itineris Societate , jam ani-  
 mum obſfirmaverat ad quævis pericu-  
 la , carceres , tormenta , & quamvis  
 mortem . In Indiam ergo anhelabat ,  
 ut inde quantocyus rediret in Sancia-  
 num . Et videbatur DEUS favere pro-  
 posito . Statim enim ac Xaverius in  
 Sanciano navim conſcenderat , ventus ,  
 qui adverſabatur euntibus in Indiam ,  
 à puppi adſpirare cœpit , plenisque  
 velis navim agebat . Verūm non diu  
 ſecundo cursu frui licuit . Coortus e-  
 nim typho , turbine repento cælum  
 na-

navēsque involvit , atque eam , quæ  
 Xaverianæ navi comes ibat , miseran-  
 do naufragio dissolvit . Actum fuis-  
 set , & de altera , nisi Xaverium vexis-  
 set . Pereira ergo cum cæteris accur-  
 rere ad sanctum , & de salute sua con-  
 clamare , nisi opem ferat . Ille tacitus  
 secedit , & cùm aliquantisper orans  
 hæsisset , prodit in publicum , vultu  
 Angelum referente , elatōque brachio ,  
 navi bene precatur , prædicítque : *Na-*  
*vim sanctæ Crucis* ( erat id nomen navi )  
*mari nunquam hauriendam , sed quo fa-*  
*bricato fuerat loco , illic sua sponte dissol-*  
*vendam.* Mox typho navim dimisit li-  
 beram , secundus iterum afflavit ven-  
 tus , exiitque per totam Indiam fama ,  
 navim Pereiræ nullo unquam casu pe-  
 ritutam , ideoque certatim omnes illâ  
 vehi , illi merces suas credere , ipsi nau-  
 lum quodvis liberalissimè solvere , qua-  
 si certam emerent securitatem . Et  
 sanè è sexcentis eluctata periculis , to-  
 tis 30. annis , ab illo vaticinio , super-  
 stes fuit , licet ægra , cariosa , decrepi-  
 ta .

ta. Cavebant autem Navarchi , ut  
 cùm eam refici oporteret , non sub-  
 duceretur in terram , sed in mari re-  
 ficeretur , eò , quòd Sanctus prædixe-  
 rat , in sicco dissolvendam . Admi-  
 randa planè sunt , quæ de ea navi tra-  
 duntur . Cùm tandem in potestatem  
 venisset Præfecti arcis Diensis , hic vi-  
 dens undique hiulcam , & tantùm non  
 carie defluentem , Cocini jussit eam  
 in litus extrahi , & reparari . Ibi dum  
 in diem sequentem expectat artificum  
 manus ; noctu , velut senio fractis ar-  
 tubus , in acervum lignorum collapsa ,  
 jacuit , solis ignibus utilis . Confluxit  
 populus ad rarum spectaculum , tám-  
 que diuturnum Xaverii miraculum fe-  
 stis vocibus celebravit . At Georgius  
 Nonnius infimæ notæ mercator , ratus ,  
 etiam dissolutis tabulis aliquid Xave-  
 rianæ virtutis inesse , raptam ingenti  
 fiduciâ tabulam Liburnicæ suæ infe-  
 ruit ; valuitque industria , & fides .  
 Semper enim felici cursu famosa nau-  
 fragiis maria peragravit , donec eodem  
 fa-

fato, quo navis illa S. Crucis, extracta  
interram, ut reficeretur, sponte con-  
cidit, & dissoluta est. *Bartolus in Vita  
S. Xaver. lib. 3. num. 50. & seqq.*

2. Ex regno Siam Indiæ Orientalis,  
annô 1688. in Decembri, Legatos Re-  
gis Siamensis Romam dededuxit P.  
Guido Tasciard, natione Gallus, ad  
venerandum summum Potificem Inno-  
centium XI. eundémque informandum  
de statu rei Christianæ in regnis  
Siam, Tunchin, & Cocincina. Op-  
portunus fuit is adventus, & informa-  
tio. Jam enim S. Congregatio de Pro-  
paganda Fide ex sinistra æmolorum  
delatione decretum condiderat contra  
Missionarios Societatis in illis partibus,  
quod Innocentius rectius informatus  
suspendit. *Ex literis Rom.*

*Eodem die obierunt.*

3. Lalovesci in Gallia, annô 1640.  
S. Joannes Franciscus Regis, Gallus,  
animatorum zelo, & miraculis clarus.  
Missionibus obeundis, Sodalitatibus  
instituendis, & regendis, pauperibús-  
que

que juvandis totum se , & vitam omnem , incredibili fructu impendit . In Missionibus post plures conciones in diem habitas , pœnitentibus audiendis ita se addixit , ut non nisi vespere aliquid refectionis admitteret , nec aliud ferè , quam lactis modicum , poma , & panem cibarium mendicatò impetratum . Noctu somno vix tres horas domi , in Missionibus duas concedebat , reliquæ Orationi sacræ erant . Mortem suam prævidens , ideoque ex humilitate in stabulum deportari petens conspicuos habuit Christum , & B. Virginem . Ad justa funebria Viro DEI persolvenda in pago Lalovesc dicto , in quo obierat , confluxerunt per altas nives Parochi 18. frequentissimum , populum ducentes , quamvis resciri non potuerit , unde nuncium de morte Patris habuerint . Parentatum autem magna comploratione , tanquam communis , & sancto Patri . Etiam pulvrem de sepulchro illius multi experti sunt sibi salutarem . Beatorum nume-

ro adscriptus à Clemente XI. an. 1716.  
 Sanctorum Catalogo insertus à Cle-  
 mente XII. anno 1737. colitur 24. Maji,  
 plura habet vita ejus Brunsbergæ im-  
 pressa.

4. Messanæ in Sicilia, anno 1630.  
 Marcellus Scaglione, Coadjutor, Ita-  
 lis. Deliberans de Societate ineunda,  
 radium splendidum vidi cælitus erum-  
 pentem, è quo didicit, ibi vivendum,  
 & moriendum sibi esse. Quamvis no-  
 bilis, & sacerdotio idoneus esset, ele-  
 git abjectus vivere in domo DEI. Sed  
 eum non semel DEI para V. & cæli-  
 Principes spectabili præsentia sua ho-  
 norârunt. Per omnem vitam, in pran-  
 dio, & cœna, eligebat aliquid melius,  
 à quo amore DEI abstineret. Perse-  
 verantium in Societate, quotidie  
 per aliquem Sanctum ejus diei  
 petiit, & feliciter obti-  
 nuit.

IN.



# I N D E X.

## A.

<b>A</b> Bdicatio bonorum.	pag. 42.
P. Abella Honor. cautè conversa-	
tur cum fœminis,	47
P. Abrerus Anton. victima charitatis,	
-	122
<b>A</b> bstinentia,	164
<b>A</b> cademia Vilnensis instituta,	122
P. Acosta Jac. certamen cum Hugo-	
nottis,	101
P. Acosta Joan. victima fidei ,	38
P. Adamus Joan. victima fidei,	96
Æger cibum delicatum rejicit,	43
Affectus erga Societatem, 18. itèm	104
Agonia magni momenti,	303
De Aguilar Joan. Procurator insignis,	
-	165
P. de Alamo Ferd. Missionarius Dæmo-	
ni infensus,	230
P. de	

*Index.*

- P. de Alarcon latus moritur , 46  
Alber. Mich. victima charitatis , 145  
P. Albergotti Marcel. petitio , subsi-  
dium ejus in Oratorio, - 176  
P. Almeida Lud. chirurgus celebris,  
- 23  
S. Aloysius Societatem ingreditur,  
- 240  
Altare portatile Societati concessum,  
- 3  
P. Alvarez Georg. mortem celerem  
imperat, - 367  
P. Alvarez Lud. Ecclesiastes eximius,  
prophetat de mundo muliebri splen-  
didiore, - 242  
P. Alvarus Em. Auctor artis Gramma-  
ticæ, - 396  
P. Amieu Joan. Sodalitia fundat, 160  
Amor DEIparæ, 132. Itèm 386.  
P. Andries Jodoc. Ecclesiastes eximius,  
- 227  
Angeli Custodis cultus fructuosus, 307  
Angeli laudant Societatem. 261  
Angelorum opera in cura infirmorum,  
- 295  
P. de Angelis Hieron. victima fidei, 183  
Ange-

*Index.*

- A**ngerer Mag. DElparæ cultor, 108  
Annus sacerularis Societatis, - 196  
**P.** Argentus Joan. absens habet suffragia pro Generalatu, - 245  
**P.** Arnoldi Joan. victima fidei, 181  
**P.** de Atienca Joann. vocatur ad juvandos Indos, - 137  
**P.** Avancinus Nic. probus & doctus, - 292  
**A**viditas patiendi, - 80  
Avicula jussu Superioris capta, 221  
**P.** de Avila Alphons. Concionator excellens, - 76  
**A**vilæ Joan. affectus erga Societatem, - 309

**B.**

- B**ailius Guil. mirabilis in operatione, - 114  
Baptizatorum multitudo, - 17  
**S.** Barbara invisit ægrum S. Stanislaum, - 282  
**S.** Barbara spectabilis apparebat Petro de Salazar, - 283  
**P.** Bartschius Frid. victima charitatis, - 227

*Index.*

- P. Barzæus Gas. Operarius laboriosus,  
79. Orator extemporaneus, 134
- PP. Basiliani conciliantur, - 139
- P. Bazanus Franc. humiliis, - 121
- P. Bellarminus Robert. Controversiarum Professor, 126. Romam redit, emendat Biblia, 178. Rector Collegii Romani, 343. Primam dicit concionem, - 376
- P. Belli Balt. victima charitatis, 41
- P. Bellidus Petr. assiduus in orando, 114
- P. de Benavides Franc. anima sana in corpore infirmo, - 279
- Benedictio Superiorum, ad opera, 296
- P. Bennetus Joan. variè cruciatus, 372
- P. Bernal. Petr. jurandi consuetudinem abolet, - 229
- Bonchristianus Petr. imitator S. Aloysii, - 206
- P. Boninus Octav. humiliis in Exhortatione, - 287
- P. Borassa Didac. Superioris jussu aviculam capit, - 221
- S. Borgiæ dies Natalis, 118. Ejus Sanctitas, 44. Mors, - 5  
S.

*Index.*

- S. Borromæi Car. affectus erga Societatem, - - - 146  
P. Boschus Anton. victoriam prædictit, - - - 38  
Breviarium in aqua non madefit, 317  
P. Brianthus Alexan. cum aliis ad mortem damnatur. - - 215  
P. Buceleni Joan. humilitas, & abnegatio, - - - 189  
Bullonius Cardinalis vacat Exercitiis, - - - 157  
P. de Bosus Baltha, amans mortificationis, conjunctio ejus cum DEO, - - - 362<sup>3</sup>

**C.**

- Cadavera se salutant, - - - 10  
Calari Nostri suscepiti, - - - 188  
P. Calderon Franc. humilis, - - 303  
P. Campianus Edmun. victima sidei, - - - 191. 268  
P. Canisii Petri elogia, - - - 352  
Capuanus Pompej. constans in vocatione, - - - 14  
Carcer Tirocinium vitæ religiosæ, 20  
Carceris fructus, - - - 83  
Car-

*Index.*

Cardinales aliquot volunt P. Lainez Pontificem,	271
P. del Carpio Joan. victima fidei,	278
P. Carvalius Hiero. Orationis, & pau- pertatis amans,	103
P. de Castillo Joan. victima fidei	205
Castitatis laudes , 212. Ejusdem cura,	284
P. Cathius Arnol. init pactum pro ac- celeranda morte,	324
P. Centurionius Aug. familiam habet Religiosam,	164
Certamen cum Hugonottis ,	101
Charitas,& naufragium duorum è No- stris, unus ope S. Ignatii liberatur ,	122
Charitas fraterna,	175
P. Chevalier Joan. curam habet casti- tatis, amore DEI ardet,	284
Chodorowicz Laur. Oratione, & pa- tientia excellit,	15
Clericis Societ. licet concionari ,	218
P. Codacius Petr. amans Societatis,	295
Cognitio contingibilium,	118
P. Colibrant Georg. Deus mortifica- tionem supplet,	140
<i>Pars IV.</i>	S
	Co-

# *Index.*

- Colinus Domi. victima fidei , 131  
Collegia in Gallia fundata , 98. Colle-  
gium Germanicum Romæ , 116  
Cordubæ , 240. Laureti , 260. Co-  
loniæ Agrip. - 337  
P. à S. Columba Claud. victima chari-  
tatis , - 137  
Columba supra caput sacrificantis , 354  
Commendatio Societatis , - 306  
Commemoratio defunctorum Societa-  
tis , - - 144  
Concionator Apostolicus , 264. Insig-  
nis , - 193  
Concio igne purgatoriæ expianda , 79.  
Concio efficax , 368. Præparatio ad  
conciones , - 115  
P. Conde Nic. mirandæ memoriaræ , 24  
Confessarius promptus , - 51  
Confessio Paschalis potest fieri apud  
Mendicantes , - 356  
Confessio frequens , - 100  
Conflictus ad Echinadas , - 30  
Conformitas voluntatis propriæ cum  
voluntate Superiorum , - 349  
Congregatio non cogenda , 25. Con-  
gregatio Generalis , VIII, 223  
XIV. - - 216

## *Index.*

- P. Consalvius Mel. victima fidei, 28  
Contemptus bonorum, - 257  
Controversia de auxiliis gratiæ, 162  
Conventus primus Procuratorum Ro-  
mæ, 8. finitus, - 25  
Conversatio cauta cum fœminis, 47  
Conversio multorum, 156. Itèm duo-  
rum Regum, - 12  
Cordubense Collegium, - 240  
Corpora, & Crucifixi simulacra in i-  
gne illæsa, - - - 198  
P. Cossus Cæsar abstinens, - 164  
P. Costerus Franc. cultor DEIparæ  
semper latus, - - - 290  
P. de Couros Mat. Missionarius inde-  
fessus, - - - 124  
P. Cramerus Mat. victima fidei, 141  
Crucifixus sanguineo sudore manat,  
272. Crux prodigiosa, - 363  
P. Cuissotus Rob. humilis, - 361  
P. Cyrianus Paul. ingratis præstat ob-  
sequium, - - - 66

## D.

- Dæmon syngrapham reddere cogi-  
tur, - - - 54  
S 2 P. Da-

*Index.*

P. Damianus Vincent. victima fidei,	181
Decretum Parisiis contra Nostros, 270	
Decretum de origine PP. Carmelitarum, -	248
Defectuum osor, -	246
DEIparæ cultor, 108. Advocata in purgatorio, 103. Impertit sanitatem, 390. Invisit afflictum, 99. Item infirmum, -	371
P. Delrio Martini encomia, 84	
Disputatio de auxiliis gratiæ, 174	
211. - 239. -	298
Disputatio cum Hæreticis, -	250
P. Dobokay Alexan. vocatio ad Societatem, -	61
Doctrina juncta virtuti, -	133
P. Domenecus Hiero. Orationis studius, -	348
Drama occasio tumultūs', -	26
Duacum revocantur Nostri, -	151
E.	
Eboracense Collegium, -	11
Ecclesiastes insignis, 92. Item	110
Eleemosyna lucrosa, -	150
Epis.	

## *Index.*

- Epistola Pauli V. ad P. Franc. Suar. de  
libro pro immunitate Ecclesiastica, 9.  
pro Doctrina P. Molinæ, 72. Ale-  
xandri VII. ad Rempublicam Vene-  
tam, 360. Pii IV. ad Maximilianum  
Imperator. 387. Ejusdem pro So-  
cietate, 390. Alia Societatis com-  
mendatitia, - 388
- P. Espiga Petr. mutuum refundit in  
DEum, - 299
- xamen particulare, - 186
- Expeditio Japonica periculosa, 78
- In Peruviam, 138. Ad Regnum  
Cataium, - 310
- Expulsio Nostrorum ex Transylvania,  
- 380

## F.

- P. Fabius de Fabiis, - 185
- Facultas alienandi bona, - 341
- Familia Religiosa, - 164
- P. Farsia Franc. per radium ab Eu-  
charistia evibratum in aliud muta-  
tur, - 128
- Fernandez Em. DEI-para appareat,  
- 372

*Index.*

- P. Fernandius Franc. pacis, & chari-  
tatis victima, - 193  
Florius Mich. gloriosè moritur , 150  
P. de Fonseca Petri encomia, 148  
P. Fontanus Petr. impetrat sibi mor-  
tem, - - - 250  
P. Frusius Andr. pietatem doctrinæ  
jungit, - - - 112  
Fuldæ gravis tempestas 153. Augetur,  
& sedatur, - - 156

**G.**

- P. Garcia Æmil. Concionator illustris,  
- - - 264  
P. Garnier Car. Angelorum Custodum  
operâ utitur in cura infirmorum, 295  
P. Gerardi Theodo. morti vicinus au-  
dit concentum Angelicum , 5  
P. Giatinus Joan. tragœdiarum, & co-  
mœdiarum auctor , - 217  
Gilbeti Georg. obedientia præmiata, 29  
Goës Bened. expeditio ad quærendum  
Regnum Cataium, - 310  
P. à Gonda Joan. mors ad votum acci-  
dit, - - - 386  
P. Gonzalez Thyrſi obitus, - 115  
P. Gon-

*Index.*

- P. Gonzalez. Roch. occisus loquitur, 197  
Græcense Collegium, - 40  
Gregorii XIII. beneficentia in Societatem, 256. Item - 277  
Gregorii XIV. affectus erga Societatem, - 285  
Gruda Nicol. victima' charitatis, 51  
P. de Guadarrame Joan. humilis, observans Regularum, - 171  
P. Gualdanes Andr. victima fidei, 286  
P. Gubernus Mich. amator infantis Christi, - 385  
P. de Guzman Roderic. in se uno totum circumfert Collegium, 243

**H.**

- Hæretici urgent expulsionem Nostrorum ex Transylvania, 355. Item 370  
P. Hazart Corn. variorum librorum, auctor, - - 373  
P. L'Hermite Mart. injurias condonat, - - 71  
Hispaniæ Rex promovet concordiam inter dissidentes de auxiliis gratiæ, - - 245  
S 4 P. Hof.

## *Index.*

- P. Hoffæus Paul. Hæreticorum oppugnator, animarum refugium, 338  
P. de Hollandre Petri conformitas propriæ voluntatis cum voluntate Superiorum, - 344  
P. Hollandus Thom. victima fidei, 357  
Homo lingua aliarum creaturarum, - 168  
Honor in carcere, - 127  
P. Horn Adri. liberalis in peregrinos, - 6  
Hortulanus Franc. infans pronuntiat nomen Mariæ, - 349  
Humaniores litteræ 30. annis traditæ, - 203

## I.

- P. Jamot Nic. victima charitatis, 169  
P. Janus Joan. victima charitatis, 72  
JESU nomen honorabile, - 81  
S. Ignatius liberatur ab infamia, 58  
207. Apparet Patri Kesselius, 111  
Primam Missam celebrat, 368  
S. Ignatii ope sanatur paralyticus, item tyro Societatis, 167. Ejus Reliquiæ, 214. Minatur exitium, 249, Exequiæ ejus

# Index.

- ejus in India, 336. Dicit exhortationem de humilitate, 340. Apparet mulieri afflita, 345. Literæ in Indiam ab Eo missæ, 359. Monita dat euntibus ad Concilium Trid. 319
- Ignis supra Pœnitentiarios, - 260
- Ignis ab ardentibus suspiriis, - 67
- Indulgentia plenaria pro festo S. Xaverii, 329. Absolventibus exercitia, 53. Indulgenciarum aliarum Ecclesiærum, - - - 359
- Indus opem implorat, - 137
- Ingolstadii studiorum initium, 243
- Injuriarum condonatio, - 71
- Innocentia vitæ, 100. Item, 270
- Institutio Episcoporum unde, 86
- S. Joan. Evangelista svaldet Societatem ingredi, - 378
- B. Josaphat prædicit P. Adamo Ciecienski vitam prolongandam, 265
- P. Isenbrant Joan. promptè obediens, vox è tumba illius, - 354
- P. Justinianus Georg. Zelator animarum, - 279
- K.
- P. Kaldi Georg. Liber in loquendo, 128  
S 5 P.

# *Index.*

- P. Kesselio S. Ignatius apparet, 111  
P. Kihn Joan. gloriösè moritur, 93  
Kimura Leonard. victima fidei, 254  
Kolowrat Wenc. bonis se abdicat, ci-  
    bum delicatum æger rejicit, 42  
S. Kostka Stanislaus suscepitus ad Novi-  
    tiatum, - - - 118  
Ejusdem Sancti ope sanitas obtenta, 89  
Kostka Paul. impetrata Societate mo-  
    ritur, - - - 189

# *L.*

- Labores præmiati, - - - 59  
P. Lætavallii Mich. encomia, 23  
Lætitia perpetua, - - - 290  
P. Lainez Jac. cum P. Salmerone desti-  
    natur ad concilium Trid. 319. fa-  
    cundè perorat in Concilio Trid. 48.  
    cum aliis Romam redit, 305. Lite-  
    ræ ejusdem ad Socios in Indiam, 314.  
Aliqui è Cardinalibus eum volunt  
    Pontificem, - - - 271  
P. Lancicij Nic. conversio, - - 288  
Lauffennum oppidum Ecclesiæ restitu-  
    tum, - - - 82  
Lauretanum Collegium cedit Nostris,  
    - - - 260

*Index.*

- P. Layman Paul. doctrinæ jungit humilitatem, - 191  
Lectulus speciosus defuncti, 182  
P. Ledesma Jac. visitatur à DEIpara,  
audit laudes castitatis, - 212  
P. Ledesma Joan. Theol. humiliis, 57  
Liber exercitiorum vindicatus, 121.  
Libri hæretici combusti, - 370  
Liberalitas remunerata, 7. Itèm 390  
Libertas in loquendo, - 128  
Litaniae Lauretanæ efficaces, 265  
Literæ Pontificis ad Czarum Moscho-  
viæ, 119. Ad Regem Hispan. 235.  
Regis Hisp. in causa Molinæ, 245  
P. Loarte Gasp. Crucifixus consolatur,  
- 39  
P. Lopez Alexan. victima fidei, 323  
P. Lopez Franc. victima fidei, 120.  
A Lotharingia Ericus compos non fit  
voti, - 158  
P. Lupatinus Hector custos castitatis,  
- 234  
Lux in vultibus, - 120

**M.**

- P. Manaræus Oliver. lemures pellit, 253  
S 6 P.

*Index.*

- P. Mancinellus Jul. in Turciam venit, - 170  
P. Manconium Andr. Deipara invisit, 99  
P. Mangotius Adrian. memoriâ desti-  
tuitur, - 198  
P. Mans Joan. Rector victima charita-  
tis, - 255  
P. Martinez Em. breviarium non ma-  
defit in aqua, impetrat alteri dolo-  
rem de peccatis, - 316  
Martius Nic. victima charitatis, 226  
P. Massimani Theo. thalamus cœlestis,  
- 182  
P. Mastrilli Marcel. martyrium, 75  
P. Matthæi Claudii gesta, - 366  
P. de Mattos Anton. noscit secreta, 107  
Memoriæ defectus, - 198  
P. Mercuriani Everar. Instructio ad  
Superiores, - 36  
Mesquita Jac. Exul ob fidem, 149  
Methymnensis Collegii vexatio, 177  
P. Minister charitativus, - 63  
P. de las Missas Joan. victima fidei, 18  
M' ssio in Transylvaniam, - 4  
M' ssionarius industrius, 214. Itèm 391  
Dæmoni infensus, 231. Laboriosus,  
124. Vires auctæ, 194. Mo-

## *Index.*

- Molinæ doctrina, 55. Eadem defendit, - 191  
Monasteriense Collegium institutū, 80  
P. Montaltus Mich. Deiparæ cultor, 107  
P. Morales Manuel excolit præfidiarios Lusitanos, - 4  
Morbi levamen, - 313  
Mors placida, 258. Læta, 47. Ex fame, 50. Prævisa, 103. Accelerata beneficio B. V. 250. Gloriosa, 93. Itèm. - 150  
Mors statim post baptismum, 113  
Mortificationis vices supplet DEUS, - 140  
P. Mustoni Marc. mortem prævidet, 330  
Mutatio affectū erga Societatem, 105  
Mutuum à DEO solvendum, 300

## **N.**

- P. Nacaura Julian. victima fidei, 91  
P. Natalis Hieron. accedit Societati, 231  
Navis S. Crucis nunquam haurienda, - 398  
Nidardi Joan. virtus, & promotio, 22  
P. de Noyelle Car. obitus, - 318  
P. Nugentius Nic. in carcere fructificat, - 230

*Index.*

P. Nunnez Joan. vocatur ad Societatem, 347. Ejus acta,	389
P. La Nusa Aloys. Ecclesiastes insignis,	-
	92

**O.**

Obedientia prompta, 30. 339. 354.	
Post mortem,	180
Occisus loquitur,	197
P. Ochoia Mich. præditus dono curandi morbos,	6
Oculorum modestia,	334
Odoenus Nic. victima fidei,	186
Officium de S. Ignatio,	49
P. Oliva Paul. Concionator S. Palatii,	-
	247
De Onate Domi. mors nuntiatur,	20
Orationis studium 348. efficax, 114.	
	294
P. Orimbellus Ang. victima charitatis,	33
P. Ortega Em. operarius insignis,	93
Ortega Laur. Infirmarius exactus,	336
Ovandus Alphons. integer vitae,	160

**P.**

*Index.*

**P.**

- P. de Padilla Anton. contemptor mundi, - 257  
P. Paez Steph. DEIparæ cultor, 154  
P. de Castro Palao Ferd. innocentis vita, - 270  
P. Pallavicinus Sfortia ex obedientia Cardinalis, - 175  
P. Palmius Bened. Concionator infignis, - 193  
Panormitanum Collegium, 247  
P. Pardus Franc. Missionarius indefensus, - 11  
Parisienses afficiuntur Societati, 204  
P. Passokius Laur. victima fidei, 140  
Patientia mira, - 15  
Paulus III. creator Pontifex, - 58  
Paupertas Religiosa, - 306  
S. Mariæ Magdal. de Pazzis visio, 374  
Pecunia bene impensa, - 391  
Pennant Phil. bis sanatur tactu Xaverianæ imaginis, - 60  
P. Percey Joan. tormenta salutaria, 278  
Percussor non proditus, - 83  
P. Perez Barth. observans regularum, - 239

*Index.*

- P. Petavius Dion. sentit levamen in  
morbo, - 313
- P. de Petris Franc. vocatio ad Societa-  
tem, - 153
- P. Petrius Franc. in Sinis honoratur,  
223. Sinis excedit, - 228
- P. Piccius Bernardin. severus in se, 168
- Pietas juncta doctrinæ, - 115
- Pii IV. literæ ad Regem Hispaniæ, 235
- P. Pinas Ant. victor in lue, - 144
- P. Plozzinius Blasi. pluviam impetrat,  
- 96
- P. Polanci Joan. Encomia. - 351
- P. Pollienus Nic. Amator DEIparæ  
mortem impetrat, - 386
- P. Ponce Aloys. humilitas, - 141
- P. Possevinus Anton. Caduceator inter  
Moschum, & Regem Poloniæ, 21
- Præparatio ad Conciones. - 115
- De Prato Alphonsi humilitas, 300
- P. de Pretere Guil. Amator DEIparæ,  
- 176
- Privilegiorum Confirmatio, - 94
- Privilegium pro habitatione Nostro-  
rum, 125. Privilegia Societatis, 134
- Procurator insignis, - 165
- Pro-

*Index.*

- Provincialis unus in India, - 288  
P. Puche vestis honorata, ardentia  
suspiria, - 67

**R.**

- P. Raderus Matt. 22. annis docet Rhe-  
toricam, - 358  
Radius ab Eucharistia vocat ad Reli-  
gionem, - 128  
De Rassinghem Ignat. Superiorum be-  
nunciationem in operibus implorat,  
- 296  
P. Raynaudus Theoph. virtutem jun-  
git doctrinæ, - 133  
P. Regius Vincent. modestiam servat  
oculorum, - 334  
S. Regis Joan. Franc. acta & mors, 400  
Regularum observantia, 171. 239  
Reliquiis S. sedatur tempestas, 91  
P. Rhem. Jac. instituit Sodalitatem  
colloquii Mariani, - 56  
A Rhœtis pelluntur Nostri, - 126  
P. de Rhodes Alexan. multos conver-  
tit, - 155  
P. Ribera Franc. Interpres à Christo  
laudatus, - 237  
P. Ri-

## *Index.*

- P. Riccii Mat. locus sepulturæ, 129  
Exequiæ, - 135  
P. Richter Sam. zelosus operarius, 97  
P. Redericius Christo. venit in Ægyptum, - 266  
P. Rodriquez Alphons. corpus, & crucifixus in igne illæsus, - 198  
Rodriquez Alphons. amator DEI pax, - 132  
P. Rodriquez Gonzalus Missionarius zelosus, & industrius, - 391  
P. Romæi Sebast. labores præmiati, 59  
P. Rosweidus Heribert. scriptor sedulus, - 25  
Ruselli Rud. innocentia vitæ, 100

## *S.*

- P. Sa Em. Philosophus, & Ecclesiastes, - 394  
P. Sachinus Franc. Observans temporis, - 335  
Sacellum Bechini apertum, - 369  
Salus sive purgatorio, - 114  
P. Sanchez Joan. defectuum osor, 246  
P. Sanctius Gaspar literas humaniores 30. annis docet, - 203  
P. de

*Index.*

- P. de Saninan Melch. severus, & sua-  
vis, - 145
- P. de Santaren Ferd. victima fidei, 221
- Scaglione Marcel. vocatio, - 402
- P. Schaller Sebast. victima charitatis,  
- 342
- P. Schorichius Georg. victima fidei, 88
- Scientia futurorum contingentium  
conditionatorum, 255. Itèm 292
- Secretorum notitia, - 108
- P. Segneri Paul. Concionator Aposto-  
licus, - 259
- Seminarium Anglicanum, - 108
- Semipelagianismus, - 301
- Severitas suavitate mixta, - 145
- Siani Rex constans in fide, - 12
- Sigismundus Rex Poloniæ, - 303
- Silentii amans, - 33
- P. Silveira Conf. adit Regem Mono-  
motapæ, - 375
- Sinensis Imperator nostris beneficus,  
- 268
- P. Sirmondi Jac. Senectus vegeta, 34
- P. Skarga Petr. apostatam DEO recon-  
ciliat, - 282
- Sodalitas colloquii Mariani, - 56
- So-

# *Index.*

- Sodalitas impia conversa, : 152  
Sodalitas Mariana Romæ, : 285  
Sodalitia fundata, - 160  
P. Soldanus Mar. victima charitatis, 233  
P. de Sonsa Anton. victima fidei, 112  
De Soria Joan. frequenter confitetur,  
- - - - 100  
P. Spinola Car. capitulatur, mittitur in car-  
cerem, - - - - 324  
Spiritus nationalis, - - - - 200  
P. Staroscirski Steph. Concionator vi-  
vus & mortuus, - - - - 288  
P. Strada Franc. Ecclesiastes excellens,  
- - - - - 110  
P. Streidt Philip. Examinis particula-  
ris observator, - - - - 185  
P. Stremosius Joan. senex crudus in-  
se, - - - - 395  
Studiorum ratio, - - - - 296  
P. Suarez Franc. Romæ inchoat Theo-  
logiam, 139. Continuat eandem 365  
sanat infirmum, 263. Mortuus dat  
Eucharistiam, 63. 224. 232.  
P. Suarez Joan. assiduus in amore Dei,  
ejus obedientia, - - - - 339  
Subsidium in Oratorio, - - - - 177  
P. Suff-

*Index.*

- P. Suffren. Ant. excellens charitas, 175  
P. Sylvorstius Joan. carcere honoratur, -  
- 127

T.

- Taurinenses scholæ, - 101  
P. Teinzerus Joan. fructuosè adhibet  
Litanias Lauretanæ, - 265  
Tentatio diaboli, - 94  
Testimonia de doctrina Molinæ, 97  
- - - 174  
Theologi obsequia humilia, 57  
S. Theresiæ affectus erga Societatem,  
- - - 64  
S. Thomæ Apostoli vaticinium, 349  
Prædicavit in America, 350. Ejus  
honori Goæ templum erectum, 351  
P. Tolgsdorff Operarius zelosus, 19  
Tormenta salutaria, - 278  
P. de Torres Ant. ægrum pauperem  
portat, - 331  
P. de Torres Joann. suaviter moritur,  
- - - 341  
P. de Tovar Ferd. victima fidei, 202  
Transitus ad Carthusiam, - 59  
Translatio Corporis S. Ignatii, 31  
Ex

*Index.*

- Ex Transylvania jubentur Nostri exes-  
se, 370. 383.  
P. Trebosius Guil. Minister charitati-  
vus, - - - 63  
P. Trigautio Nic. vires augentur, 194  
Tumultus Duaceni, - - 73  
Tumulus sponte apertus, - - 169  
P. Turrianus Cos. zelator fidei, 10  
P. Turriani Franc. opera festum Præ-  
sentationis B. V. breviario restitu-  
tum, - - - 225  
Turrianus Mich. mutat affectum erga  
Societatem, - - - 104

V.

- P. de Valdivia Lud. visitator regius, 154  
P. de Valle Joan. Missionarius indu-  
strios, - - - 214  
P. Varsevicii Stanis. encomia, 14. I-  
tem - - - 51  
Vasius Alphons. in præsentia DEI ver-  
satur, - - - 172  
Vasserot Jac. dimittuntur peccata, vi-  
ctima charitatis, - - - 377  
P. Velasquez Joan. defensor Immacu-  
latæ Conceptionis, - - - 161  
P. Venustus Petr. non prodit percusso-  
rem, - - - 83

*Index.*

- Vestis honorata, - - - 67  
Vicecomes Lud. humilis, - - 312  
Victoria prædicta 45. relata, 280. Ad  
Echinadas, 30. 35. Ad Malacam 39  
P. Ujeyski Thom. PP. Basilianos conci-  
liat, - - - - 139  
Vilnensis Academia instituta, 122  
P. Vitelescus Mut. eligitur in Genera-  
lem, - - - - 196  
P. Vitus Andr. abstinenſis in carcere, 381  
Ulyſſiponenses Scholæ, - - - 77  
Vocatio ad Societatē, 61. 153. 347. 402  
P. Ursinus Jul. vivens mortuus, 304  
P. de Urteaga Petr. otii ofor, 395  
P. Wegelin Balth. victima charitatis, 88  
P. Worthingtoni Joan. fructus in car-  
cere, - - - - 83  
P. Woysza Stan. ope S. Stanislai fa-  
natus, - - - - 88

X.

- S. Xaverius Franc. urget expeditionem  
contra Acenos, 61. eandem turba-  
tam iterum urget, 68. Epistola ejus  
severa, 90. alia, 94. 95. 105. Ad So-  
cios Goanos, 148. Ad Præfectum  
Malacensem, 150. Ad Jacobum Pe-  
rei-

## *Index.*


reiram 183. Ad P. Franc. Perez 184. Monita S. Xaverii 173. urget excommunicationem 187. Certamen cum Bonziis 195. 199. Est præsens in duobus locis, 219. Refert victoriam Lusitanæ classis, 280. Thaumaturgus, 273. Imago Ejus tacta bis sanat paralyticum 60. Ejus reliquiis tibia sanatur, 330. Obediens post mortem, 180. Brachium ejus Romanam vehitur, 142


P. Xaverius Martin. victima charitatis, 308

P. Ximenez Petr. zelator Domus DEI 258

Notandum : Defunctorum plerisque excerptos esse ex P. Nadasi Anno dierum memorabilium ; quibus ex Sotuelli Bibliotheca S. J. Tanne-ro, &c. alii accesserunt.

# Finis Partis quartæ.









105-A